



BIBLIOTECANAZ

LIBRERIA
MATURI

36

NAPOLI





GUILIELMI HARVÆI
Medici Regij
EXERCITAT. ANATOMICA
*De Motu Cordis et
Sanguinis Circulo.*

Veritatem Tempus

Manuducit



Roterdami,
Apud Arnoldum Leers A° 1661.



GUILIELMI HARVEJI
Doct: & Profess: Regii
EXERCITATIONES
ANATOMICÆ,
De motu Cordis & Sanguinis
Circulatione.

Cum duplici Indice Capitum & Rerum.

A C C E S S I T

Dissertatio de Corde

Doct. JACOBI DE BACK,
Urbis Roterodami Medici ordinarii.



ROTTERDAMI,
Ex Officinâ ARNOLDI LEERS.
CLC LX.

I N
G U I L I E L M U M
H A R V E J U M
Z A C H A R I A S S Y L V I U S.

Vivat *Aristoteles*, vivat *Galenus* & in-
gens
Hippocrates, quorum fama perennis erit.
Vivat & H A R V E I U S, tam sanctas nem-
pe tulerunt
Illi artes, quas nunc *Anglus* hic ecce co-
lit.

Z A-

ZACHARIÆ SYLVII

Medici Roterodamensis

P R Æ F A T I O

I N

G U I L I E L M I

H A R V E J I

Exercitationem Anatomicam.



*Memorabile est, quod refert
Aventinus Bojorū Scriptor,
Bonifacium quendam Mo-
guntinum Episcopum, cum
audiisset, Virgilium Salaburgensem Epi-
scopum, pro concione eorum hominum men-
tionem facere, qui vestigia nobis adversa
urgent, ita excanduisse: ut crimine impie-
tatis Virgilium accusare non dubitarit:
quod antipodibus inductis, novum etiam
Christum non obscure videretur inducere.
Inducio etiam ad Utilionem Bojorum*

P R Æ F A T I O.

Regem delato, Bonifacium à Zachariâ Pontifice litteras impetrasse ad Utilionem: atque ita Virgilium Regio & Pontificio calculo fuisse damnatû. Simile etiam de Democrito narratur. Democritus hic solertissimus operum naturæ perscrutator, cû assiduè secandis animalibus occuparetur, existimatus fuit insanus ab Abderitis; qui miserati sortem hominis advocarunt Hippocratem, ut illi medicinam faceret, mentemque alienatam restitueret. Rogatus accurrit, & offendit Democritum animalia secantem, quo spectaculo mirum in modum oblectatus, omnes Abderitas insanire pronuntiavit, solum sapere Democritum. Nunc autem multi Abderitana plebis pectora habent, multi nunc Bonifacii & Utiliones, qui nova inventa illorum, qui veluti magno quodam numinis afflatu, ad rerum causas indagandas & cognoscendas omnia sua studia contulerunt, tanquam inutilia calumnientur. Tantum consuetudinis semel inductæ vis potest, ut nullus in Barbariâ ullâ immaniore potentiam.

tiam usurpasse videatur. Nimirum edidit nuper doctissimus vir Guilielmus Harvejus Medicus Regius & in Londinensi Medicorum Collegio Anatomia Professor, novam quandam & inauditam de motu cordis & circulatione sanguinis sententiam: Quæ compendio dicta sic se habet: primum se constringunt cordis auricula, & in illâ constrictione sanguinem contentum in ventriculos cordis pellunt; quo, dum replentur, cor dilatatur: mox hoc contrahens ventriculos pulsum facit: quo pulsu conjectum in se sanguinem protrudit in arterias; è sinistro ventriculo in aortam, è dextro in pneumonicam, dictam immerito venam arteriosam; unde denuo per pulmonem in pneumonicam venam, vulgo arteriam venosam; hinc in ventriculum sinistrum rapitur, & ab hoc in aortam & totum corpus per illius ramos propellitur. Sanguis sic in habitum corporis impulsus transit ab arteriis in venas rursus, remeatque in venam cavam, & ab hac in dextram cordis auriculam, deinde in ventriculum dextrum: &

P R Æ F A T I O.

ita porro eundem circulum agit, quem ante, idque continuò. Unde eum sanguinis motum vocat circulationem. Audacem scilicet hominem !

O Medica tranquillitatis turbatorem!

O Medica reipublica seditiosum civem !

Qui sententiam post tot secula omnium consensu confirmatam, & tot Medicorum monumentis consignatam, & quasi per manus posteritati traditam primus convellere est ausus : quasi nemo tot ante secula sapuisset. Religiosè quidem ut par est faciunt, qui antiquitatem venerantur : Minus autem, quam viris sapientibus dignum, qui, quasi omnium temporum hominumque communis non esset sapientia, vetustati eam tanquam propriam non sine posteritatis injuria adscribunt. Non enim, inquit Lactantius lib. 2. divinarum institutionū, c. 8. quia nos illi temporibus antecesserunt, sapientiā quoque antecesserunt ; quæ si omnibus datur aqualiter, ab antecedentibus occupari non potest : sed illibabilis est tanquam lux & claritas Solis ; quia ut Sol

P R Æ F A T I O.

oculorum, sic sapientia lumen est cordis humani. Et profectò si illi, quorum beneficio & lucubrationibus Medicinam inventam & constitutam habemus in eâdem sententiâ cum reprehensoribus hisce fuissent, neque quicquam, nisi majorem judicio & calculo comprobatum, literis dignum judicassent, nunquam artes tam excultæ & elaboratæ in lucem prodiiissent. Verùm cum Veteres multa præclarè invenisse, nonnulla verò minus exploratè percepta, quadam etiam planè incognita ipsis fuisse, persuasum haberent, non tam præclusam, quàm munitam sibi vetustatis exemplo & diligentia, veritatis inquirenda viam arbitrati, erecto animo in id incubuerunt, ut eodem, quo illi, aut etiam longius perscrutando quidlibet, progredierentur. Hi ad eruendas abditas rerum causas quasi signum sustulere, & exemplo, ut sequeremur, prætere: Hæc quippe sapientiæ libertas est, ut nemini obnoxia, sui juris & mancipi sit. In hujus Republicâ & abrogare & derogare & obrogare, sine fraude cujusquam

P R Æ F A T I O.

liceat : quam libertatem, si tollimus, semper in artium incunabulis habebimus : nec erit unde earum incrementa , aut proditis meliora unquam speremus. Quocirca nos æquitatem & humanitatem in nostris judiciis, quæ de aliis facimus, desideramus. Si semper idem sentiendum & loquendum sit : nihil novi invenire liceat , neque quod res ipsa docet & ratio dicat, apprehendendum fuerit. Propterea priorum vestigia omnia premere , & eadem semper inculcare ridiculum est. Nec probat Galenus Commentarium Anatomicum , nisi novi aliquid contineat. Pigri est ingenii contentum esse iis, quæ sunt ab aliis inventa, siquidem mentis acrimonia nihil non humanarum rerum subjicitur. Immensi sunt naturæ thesauri & inexplicabilis ejus sapientia, ut ea, quæ quotidie in lucem producuntur, viam præparent ad succedentia investiganda. Veritas quippe in multò altiore demersa puteum est , quàm ut paucis inde extrahi possit seculis. Verum est quod Aratus prodidit, non omnia simul edoctos fuisse

à Jove, *sed adhuc pleraque occulta manere, quorum aliqua dabit in posterum. Galenus natura solertiam in humani corporis fabricâ tantam esse prædicat, ut cùm eam magni viri diligenter & assiduè perscrutati sint, non omnem tamen invenerint. Hinc Poëta eleganter cecinit,*

Multa dies variusque labor mutabilis ævi

Rettulit in melius, non omnia grandior ætas,

Nos quæ scimus, habet, seris venit usus ab annis.

Itaque cùm sapere, hoc est, veritatem querere omnibus sit innatum, sapientiam sibi adimunt, qui sine ullo judicio inventa majorum probant, & ab iis pecudum more ducuntur, & in iis, quod non vident, videre se temere gloriantur. Fabula ab Histronibus agi solita huic rei simillima mihi videtur: Vano cuidam & simplici Thrasoni pannus à nebulone sartore describitur per commodus, sed eo colore præditus, ut à nothis & spuris conspici non possit. Itaque

P R Æ F A T I O.

Thraso cupidus emendi, pannum sibi proponi jubet : nebulo protinus tanquam multarum ulnarum molem profert expansis palmis, ut mercatores hic assolent, licia diducit, speciem miratur, emptori suo prædicat & ostentat. Hic Thraso vanus, adulterii materni suspitione protinus tactus est : confiteri tamen pudor vetat : itaque pannum, quem nullum videt, qui nullus etiam est, se videre & admirari dicit, & emit, vestemque sibi sarciri jubet. Hic sartor exultare gaudio & triumphare incipit, pannum dividit, divisionis stridorem miris modis imitatur, vestemque hoc egregio invisi invisibilisque, ut (ita dicam) coloris panno consarcit : pretium denique accipit, & addicit. Hæc (mibi crede) fabula, in credulis sine judicio, veritas & Historia, non fabula est. Credunt (quid enim Medicis tot ætatum seculorumque judiciis approbatis non credant ?) non vident tamen, nec omnino videre, quod nihil est, possunt. Ne tamen idiotæ videantur, laudant, admirantur, emunt pretio non solum pecunia, cujus

P R Æ F A T I O.

cujus jactura tolerari potest, sed temporis
& vitæ, cujus detrimentum nullo pecuniæ
pretio compensari potest. Sanè, ut quod res
est dicam, parcius nobis fides auctoritati
adjungenda, verum assensio cohibenda, &
præter auctoritatem etiam ratio querenda
vel ipsorum veterum Philosophorum &
Medicorum exemplo & auctoritate, & pri-
mum quidem divini illius Platonis, quem
tanti facit Cicero, ut modò Philosopho-
rum Homerum, modò Deum dicere
non dubitet, apud quem ô Beate (inquit
Socrates, Polo juveni de beatâ viâ disse-
renti productis testibus) Oratorum more
convincere me contendis, quemadmodum
in judicio fieri solet, ubi alii alios tum
convincere se opinantur, cum pro suâ causâ
multos celebresque adducant testes: adver-
sarius autem aut nullum, aut unum ali-
quem, cum ejusmodi probatio nullius ad
veritatem sit momenti, sæpe enim ob fal-
sorum testium multitudinem atque eorum
etiam, qui alicujus rei & pretii esse viden-
tur, quis injuste opprimitur; similiter &
in

in charmide; Neque id considerandum, quis dixerit, sed utrum verè dicatur nec ne: Hac & similia apud Platonem passim. Quin & Aristotelem Magistri sui vestigiis hic prorsus insistentem attendamus, quicùm à veterum Philosophorum nemine, tum ne à Socrate & magistro Platone abstinent. Contra ideas enim disputaturus inquit; etsi difficilis existit quaestio, quia nobis amici sunt ii, qui ideas induxerunt: tamen æquum est, veritatis retinendæ causâ suâ etiam decreta tollere, Philosophis præsertim. Etsi enim utrique clari sunt; tamen præclarum est pluris aestimare veritatem. An non hinc, quo loco Philosophorum vel gravissimorum autoritas sit habenda, liquidò constare dicemus? cùm Socrates non tam Hippocratis aliorumque testium; Aristoteles verò non tam Socratis & Platonis, quàm rationis veritatisque momenta esse ponderanda atque aestimanda clamitet: præsertim cùm & Cicero, divinâ ingenii celeritate, singularique judicio vir, qui propter crebras Platonis & Aristotelis

P R Æ F A T I O.

*stotelis laudes in utriusque verba jurasse
 posset videri, non invitus relictâ Platonis
 Academia & Aristotelis lyceo, ad Stoico-
 rum portum deflexerit. Credo etiam ad
 Cyrenaicorum Cynosargēs, Epicureorum
 hortos, aliorumque Philosophorum scholas,
 pari libertate transiturum fuisse, si quic-
 quam cognitu dignum in illis comperisset &
 judicasset. Quin etiam discentes ab ejus-
 modi credulâ superstitione revocatos nomi-
 natim non tam autoritatis, quàm rationis
 momenta quarendâ esse admonet: quod ob-
 sit plerumque iis, qui discere volunt, auto-
 ritas eorum, qui docere se profitentur. De-
 sinunt enim, inquit, iudicium suum adhibe-
 re, id habent ratum, quod ab eo, quem pro-
 bant, vident iudicatum. Quamobrem verâ,
 quamvis nova Medicina principia cum Ve-
 terum opinionibus comparemus: plurima
 enim hic contraria comperiemus. Adhibea-
 mus Anatomicam exercitationem Harvei:
 experiamur quid hâc possumus adjuvari;
 nec sepius diutius imitemur: ut enim pisces
 illi, cum se peti à piscatoribus senserint, ef-
 fuso*

P R Æ F A T I O.

*fuso atramento, quod illis est pro sanguine,
 infuscatâ aquâ abscondunt se & piscatori-
 bus iter veluti sepiunt atque intercludunt:
 nec sic videlicet cum veritate, cum luce,
 cum firmâ constantique ratione urgeamur
 & constringamur. Etenim turbida ista aqua
 residebit aliquando; opinionum enim com-
 menta delebit tempus, natura judicia con-
 firmabit. Experimentum insigne hujus rei
 habemus in clarissimo viro Vepisco For-
 tunato Plempio Artium & Medicinæ
 Doctore, atque in Academiâ Loranensi
 practicen primo loco proficiente, cujus de
 Harveio judicium hic proponere libuit,
 quod dedit lib. 2. de fundamentis Medi-
 cinæ, cap. 7. Hac ejus verba. Nuper An-
 glia novam peperit de motu cordis opinio-
 nem, quam invulgarit Guilielmus Har-
 veius, edito eâ de re peculiari libello. Sen-
 tentiam suam multis plausibilibus rationi-
 bus adstruit, adeo ut jam multis de celsis ho-
 diè arridere incipiat; nomineturque hono-
 ris causâ à quodam conterraneo suo circu-
 lator Microcosmi, ad distinctionem alterius
 Angli,*

P R Æ F A T I O.

Angli, qui primus Macrocosmum circula-
vit. Primum mihi inventum hoc non pla-
cuit, quod & voce & scripto publicè testatus
sum, sed dum postea ei refutando & explo-
dendo vehementius incumbo, refutor & ipse
& explodor: adeò sunt rationes ejus non
persuadentes, sed cogentes: diligenter om-
nes examinavi, & in vivis aliquot canibus
eum in finem à me dissectis, verissimum
comperi. Hoc ut facerem monitus quoque à
clarissimo Walæo Professore Leydensi,
cujus viri candido sedatoque ingenio & ju-
dicio plurimum tribuo, multumque in hâc
ipsâ materiâ acceptum refero. Mira judi-
cii Metamorphosis! Sperare hinc incipio &
aliorum æquitatem, qui deposito omni odio,
& agnito errore tandem cum Plempio
bene sentire de Harveio incipient. Mali-
tiosi & improbi animi est, errore delectari,
lucem odisse, tenebras consecrari, industriam
bonorum calumniari, quod vitium non nisi
in fœdissimas personas cadit & viles. Viles,
adeò verè dictum, ut negemus, non dicamus
bonam, sed mediocriter bonam altamque
in-

indolem, nunquam hâc labe fuisse aspersam. Vetus & nostrum avum excutite. Non aliter legetis, videbitis, audietis, quàm tristes quasdam malignasque naturas, quas sydere suo Saturnus afflavit, aliis invidentes, sibi diffidentes pronas ad hoc vitium & factas. Videtisne minutos illos canes, qui hospites allatrans, feras non tangunt; Tales deteriores isti hominum, qui ladere tantum nati & vexare. Nati, inquam, quia revera ad hoc vitium ita vergunt & inclinant, ut quies iis non sit, nisi aliis inquietis. Si dicerent reprehensores ejus, Guilielmus Harveius Veterum errores notavit ac reprehendit, verum illi quidem dicerent: tum verò multo etiam verius, ~~sed~~ adderent, Guilielmus Harveius diurnâ & assiduâ rerum Anatomicarum observatione & meditatione proposuit è viâ Medicina spinas, filices, ceteraque impedimenta tollere, ut iter planum, simplex, expeditum, directum esset; quo facilius ad Medicina non modò veritatem & intelligentiam, sed etiam utilitatem & fructum perveniretur. Socratis

sa-

P R Æ F A T I O.

sapientia vel Apollinis oraculo notissima est, inter cujus laudes, vel illa insignis ac precipua fuit, artium liberalium fines ad humana vitæ referre fructum, ut homines his artibus instructi prudentius de rebus agendis, paratiusque deliberatas ac promptius exsequerentur ac conficerent. Hunc finem spectavit Harveius noster, veritatem solam & fructum artis Medicæ indicavit. Videbat etenim ingens spectilegium reliquum esse, multa spatiosis naturæ latifundis superesse, hætenus intacta aut impervia, in quorum possessionem tanquam in vacuum sapientibus venire liceat. Verùm nullius adductus jurare in verba magistri, non aliorum scriptis credidit Harveius, sed oculis fidelibus rerum Anatomicarum internunciis; quia melius ἀπὸ τῆς comparatur Anatome, quam longâ lectione & profundâ meditatione, quibus & nos experti credimus. Eupompus pictor egregius interrogatus, quem antecedentium sequeretur, dixisse fertur demonstratâ hominum multitudine naturam ipsam imitandam

P R Æ F A T I O.

dam esse, non artificem. Idem Harveius fecit, atque naturam perscrutando eò per-
venit, ut meritò non aliter atque Archi-
medes inventâ suberati auri obrussâ, ma-
gnâ voce exclamaret, εὐρηξα, εὐρηξα. Hac
vera & antiquæ philosophiæ sacrosancta lex
est: Amicus Plato, amicus Socrates,
magis amica Veritas: quare αὐτῷ ἴφρ
nunquam hic audiatur: nulla hominis ex-
cellentis autoritas pro argumento adfera-
tur, nulli prærogativæ sententiæ, sed melio-
ri calculus adjiciatur. Denique dum alii
antiquorum partes suscipiunt, nos veritatis
cum Harveio causam agimus. Majorum
inventâ non vetustatis sed rerum veritate
ponderantēs æstimantesque, veritati con-
grua comprobemus, contraria rejiciamus.
Edidimus in hunc finem denuo Harvei
Exercitationem Anatomicam, quæ
Anno 1628. Francofurti incuriâ Typo-
graphi vitiosè admodum edita fuit, quod
Autor sæpè conquestus est, sentiens inde re-
prehensorum calumnias originem traxisse,
qui dicta ejus minus intelligentes, iniquo
ani-

P R Æ F A T I O.

animo acceperant , & publicè traduce-
re conati sunt : edidimus inquam , sedu-
loque operam dedimus , ut perplexis, con-
fufis & mutilis quantum fieri potuit , sub-
latis, reftituta eadem exercitatio emenda-
tè prodiret , ufi hâc in re opera doctiffimi
DE BACK Collegæ noſtri amiciffimi,
cujus judicio plurimum tribuimus. Ve-
rumenimverò ut Præfationis noſtræ vela
complicemus, imitemur, in honoribus præ-
ſtandis rerum inventoribus, antiquitatem.
Videlicet quondam apud ſæculum prius Me-
dica inventio tam admirabilis fuit , tam
dulcis experientia ut ejus autores aut pla-
nè pro Diis habiti ſunt, velut Apollo &
hujus filius Æſculapius, aut certè divinis
honoribus digni ſint æſtimati, velut Aſcle-
piades, quem Illyrici numinis inſtar re-
ceptum , Herculi in honoribus æquarunt.
Non equidem probo totum quod fecit an-
tiquitas : Affectum ſanè & judicium lau-
do , quippe quæ rectè & ſenſerit & de-
clararit , nullum ſatis dignum præmium
perſolvi poſſe Medicinæ artis inventoribus.

Ita-


P R Æ F A T I O.

Itaque in sempiterno honore apud nos Doctor HARVEIUS esto, cujus doctrinâ patefactam viam habemus ad tantum Medicæ virtutis splendorem perspicendum, amandum, mutandum. Sapientissimi Syracidis modestam de suo instituto commendationem liberè Harveio attribuamus. Ego ultimus vigilavi, tanquam is, qui spicas legit post messorum, profeci gratiâ Domini, implevi torcularis lacum: considerate me mihi non laborasse, sed omnibus quarentibus eruditionem.

Serenissimo & Invectissimo

C A R O L O,

*Magna Britannia, Francia, &
Hibernia Regi, Fidei
Defensori.*

 ERENISIME REX,
Cor animalium, funda-
mentum est vitæ, Princeps
omnium, Microcosmi Sol,
à quo omnis vegetatio dependet, vi-
gor omnis & robur emanat. Rex pa-
riter regnorum suorum fundamen-
tum & Macrocosmi sui Sol, Reipu-
blicæ cor est, à quo omnis emanat po-
testas, omnis gratia provenit. Quæ
de motu cordis hîc scripta sunt, *Maje-
stati Tuæ* (uti hujus seculi mos est) of-
ferre eò magis ausus sum, quòd, ad
hominis exemplum, uti corporeæ
actio-

D E D I C A T I O.

actiones omnes cordi, sic Regi res publicæ cunctæ competunt. Regi non inutilis cordis sui notitia, tanquam actionum Divinum Exemplarium: (sic parvis componere magna solebam:) Poteris saltē Regum optime, in fastigio rerum humanarum positus, unâ operâ & humani corporis principium & Regiæ simul potestatis tuæ effigiem contemplari. Suscipe itaque, humillime precor, *Serenissime Rex*, usitatâ benignitate & clementiâ, de corde novâ hæc; qui ipse novus splendor hujus seculi & totum vere cores, Princeps virtute abundans, ac gratiâ; cui acceptum jure merito referimus, quicquid nostra Anglia boni, quicquid vita nostra jucundi, habet.

Augustissima Majestatis Tua

devotissimus servus

GUILIELMUS HARVEIUS.

Excel-

Excellentiss: & Ornatiss: Viro

D. D. A R G E N T,

Collegii Medicorum Londinens.

Præsidi Amico suo singulari cæterisque

Doct. Medicis Collegis suis amantiss:

S. P. D.



E A M de motu & usu Cor-
dis & circuitu Sanguinis sen-
tentiam E. D. D. antea
sæpius in prælectionibus

meis Anatomicis aperui novam: sed
jam per novem & amplius annos mul-
tis ocularibus demonstrationibus in
conspectu vestro confirmatam, ratio-
nibus & argumentis illustratam, &
ab objectionibus doctissimorum &
peritissimorum Anatomicorum libe-
ratam, toties ab omnibus desidera-
tam, à quibusdam efflagitatam, in lu-

(**)

cem

D E D I C A T I O.

eem & conspectum omnium hoc li-
 bello produximus. Quem nisi vobis
 transmissum E. D. D. minus spera-
 rem prodire posse integrum & tutum:
 cum penè omnium illarum observa-
 tionum, ex quibus aut veritatem col-
 ligo, aut errores redarguo; vos fide
 dignos appellare possum testes, qui
 dissectiones meas vidistis, & oculari-
 bus demonstrationibus eorum, quæ
 hic ad sensum palàm assevero, assiste-
 re candidè & astipulare consuevistis.
 Cùm itaque contra per tot secula an-
 norum receptam ab innumeris, iisque
 clarissimis, doctissimisque viris tritam
 & illustratam viam; sanguinem iter
 novum metiri suum & revolvere solus
 hic liber affirmet; arroganter nimis
 factum videri, summo opere verèbar, si
 libellum hunc, per aliquot abhinc re-
 tro annos alioquin perfectum, vel in
 publicum exire, vel transfretare per-
 misissem; nisi prius eum vobis pro-
 positum per autopsiam confirmassem,
 vestris

D E D I C A T I O.

vestris dubiis & objectionibus re-
 spondissem, Præsidisque ornatissimi
 censuram in favorem accepissem. Per-
 suasissimum veruntamen habui, quod
 si coram vobis nostroque Collegio
 tot tantisque viris doctissimis nobili-
 tato, propositum sustinere potuerim,
 ab aliis tum demum minus pertimes-
 cendum, & illum, qui mihi à vobis,
 ob amorem veritatis, contigit favor,
 ab aliis, qui similiter sint philosopha-
 ti, non minus esse sperandum. Philo-
 sophi enim veri, qui amore veritatis
 & sapientiæ flagrant, nunquam se tam
 σφῆς, sapientiā plenos reperiunt, aut
 suo sensu abundant, quin veritati, à
 quocunque & quodocunque vene-
 rit, locum dent. Quis est tam angusti
 animi ut credat artem aut scientiam
 adeò omnibus numeris absolutam &
 perfectam à Veteribus traditam, ut
 aliorum industriæ & diligentiae nihil
 sit reliquum? sed profitentur pluri-
 mi, maximam partem eorum, quæ
 (** 2) scimus,

D E D I C A T I O.

scimus, eorum, quæ ignoramus, minimam esse: traditionibus & præceptis quorumcunque non ita addicti, inservire se patiuntur Philosophi, ut libertatem perdant, ne oculis propriis fidem adhibeant, nec ita in verba jurant antiquitatis magistræ, ut veritatem amicam in apertis relinquunt, & in conspectu omnium deferant. Sed sicut credulos & vanos, omniâ primâ facie admittere & credere, ita manifesta sensui non videre, & Luce meridianâ diem non agnoscere, stupidos & insensatos pariter existimant: non minus Poëtarum fabulas & vulgi deliramenta, quàm Scepticorum epochen in viâ philosophicâ declinare docent. Omnes item studiosi, boni, honestique, nunquam ita passionibus indignationis, invidiæ, obrui mentem sinunt, quo minus audiant æquo animo, quæ pro veritate proferantur, aut rem verè demonstratam intelligant: nec turpè putant mutare sententiam,
 si ve-

D E D I C A T I O.

si veritas suadet & aperta demonstratio: nec errores, licet antiquissimos deferere arbitrantur inhonestū. Cū optimè norint quod humanum sit errare, decipi, & quod casu multa reperia esse contingat quæ discere quivis à quovis possit, à juvene senex, à stulto intelligens.

Verūm isto Tractatu, Collegæ amantissimi, in Auctorum & Scriptorum Anatomicorum nominibus, operibus & sententiis recensendis, exagitantis memoriam meam & lucubrationes, multamque lectionem & magnum volumen ostentare volebam. Tum quòd non ex libris, sed ex dissectionibus, non ex placitis Philosophorum, sed fabricâ naturæ discere & docere Anatomen profitear. Tūm quòd neque è Veteribus quemquam debito honore defraudare, neque è posterioribus quemquam irritari æquum censeam, aut moliar. Neque cum iis, qui in Anatomicis an-

DEDICATIO:

tecelluerunt & me docuerunt, manus conferere, aut dimicari honestum putem. Accedit, quod nec falsitatis crimen, in quempiam veritatis studiosum meâ sponte inurere vellem, nec ququam erroris labe insimulare. Sed solam veritatem sector, & omnem tum operam, tum oleum eò contuli, ut aliquid bonis gratum, doctis commodum, & rei litterariæ utile in medium proferre possem. Valete Domini D. Excellentiss. & Anatomico vestro favete

GUILIELMO HARVEIO.

I N D E X C A P I T U M.

- P** *Roæmum præcedit, quo demonstratur
quod quæ hæcenus scripta sunt de motu
Uſu cordis & arteriarum minus firma
ſint.* Pag. 1
- C A P. I.** *Caſe, quibus ad ſcribendum Au-
tor permotus fuerit.* 22
- C A P. II.** *Ex vivorum diſſectione qualis ſit
cordis motus.* 26
- C A P. III.** *Arteriarum motus qualis ex
vivorum diſſectione.* 32
- C A P. IV.** *Motus cordis & auricularum
qualis ex vivorum diſſectione.* 37
- C A P. V.** *Cordis motus ælio & funcio.* 48
- C A P. VI.** *Quibus viis ſanguis, è venâ ca-
vâ in arterias, vel è dextro ventriculo cor-
dis in ſiniſtrum deferatur.* 56
- C A P. VII.** *Sanguinem de dextro ventri-
culo cordis, per pulmonum parenchyma per-
meare in arteriam venoſam & ſiniſtrum
ventriculum.* 69
- C A P. VIII.** *De copiâ ſanguinis tranſeun-
tis, per cor è venis in arterias, & de circu-
lari motu ſanguinis.* 80
- C A P. IX.** *Èſſe ſanguinis circuitum, ex pri-
mo ſuppoſito confirmato.* 85
- C A P. X.** *Primum ſuppoſitum (de copiâ per-
tranſeuntis ſanguinis è venis in arterias,
& èſſe*

INDEX CAPITUM.

<i>Esse sanguinis circuitum) ab objectionibus vindicatur, Et experimentis ulterius confirmatur.</i>	96
C A P. XI. <i>Secundum suppositum confirmatur.</i>	101
C A P. XII. <i>Esse sanguinis circuitum, ex secundo supposito confirmato.</i>	115
C A P. XIII. <i>Tertium suppositum confirmatur, Et esse sanguinis circuitum ex tertio supposito.</i>	119
C A P. XIV. <i>Conclusio demonstrationis de sanguinis circuitu.</i>	131
C A P. XV. <i>Sanguinis circuitus rationibus verisimilibus confirmatur.</i>	132
C A P. XVI. <i>Sanguinis circuitus ex consequentibus probatur.</i>	138
C A P. XVII. <i>Confirmatur sanguinis motus Et circuitus ex apparentibus in corde, Et ex iis, quæ ex dissectione anatomicâ parent.</i>	148
<i>Exercitatio Anatomica altera, ad J. Riolanum, prima de circulatione sanguinis.</i>	173
<i>Exercitatio Anatomica tertia: ad J. Riolanum secunda de circulatione sanguinis: in quâ multæ, contra circulationem eandem objectiones refelluntur.</i>	210

PROOEMIUM

Quo demonstratur, quod, quæ hæc-
nus scripta sunt de motu & usu
cordis & arteriarum, mi-
nus firma sint.

DE Cordis Arteriarumque motu,
pulsu, actione, usu, & utilita-
tibus cogitanti operæ-premium
est, quæ prius ab aliis manda-
ta sunt literis, evolvere; quæ vulgo jactata
& tradita, animadvertere; ut quæ rectè
dicta, confirmentur; quæ falsa, dissectione
Anatomica, multiplici experientia, dili-
genti & accurata observatione emenden-
tur.

Fenè omnes huc usque Anatomici, Me-
dici, & Philosophi supponunt cum Gale-
no, eundem usum esse pulsus, quem respi-
ratio-

rationis : & una re tantum differre , quod hæc ab animali, ille à vitali facultate manet ; reliquis, vel quod ad utilitatem , vel quod ad motus modum spectat, similiter se habentibus : unde affirmant (ut Hieronymus Fabr. ab Aq. p. libro suo de respiratione nuperrimè edito) quoniam non sufficit pulsus cordis & arteriarum , ad eventandum & refrigerandum , à natura pulmones circa cor fabrefactos esse. Hinc patet , quæcunque dixerint priores de Systole & Diastole , motu cordis & arteriarum, pulmonum ea modo fieri tradidisse.

Cùm verò aliter se habeat motus , & constitutio cordis, quam pulmonum ; aliter arteriarum, quam pectoris : alios exinde, usus & utilitates exoriri verisimile est, differreque plurimum cordis, & similiter arteriarum pulsus & usus, à pectoris & pulmonum.

Si enim iisdem usibus inserviant pulsus ac respiratio , & in Diastole introsument aërem in cavitates suas arteriæ (uti vulgò dicunt) & in Systole per poros carnis & cutis,

tis, fuligines emittant; nec non, medio tempore inter Systolem & Diastolem, aërem contineant; & quovis tempore aut aërem, aut spiritus, aut fuligines expellant; quid itaque respondebunt Galeno? qui librum scripsit, Natura sanguinem contineri in arteriis, & nihil prater sanguinem, nimirum neque spiritus, neque aërem, sicut ab experimentis, & rationibus in eodem libro facile colligere licet.

Et si (dum in Diastole replentur arteriæ ab aëre introsumpto) in majori pulsu, major subeat aëris copia; sequetur magno existente pulsu, si totum corpus in balneum immerferis, vel aquæ, vel olei, necessario pulsum statim aut minorem esse, aut tardio rem multo; cum per corpus ambientis balnei, aërem intra arterias permeare difficile sit, si non impossibile.

Similiter, cum omnes arteriæ tam profunda, quam cutaneæ, eodem tempore, & pari velocitate distendantur; quomodo poterit aër tam liberè, & celeriter per cutem, carnem, habitumque corporis in profundum

pertransire, quam per cuticulam solam?

• Et quomodo Embryonum arteria forinsecus in cavitates suas aërem, per ventrem maternum, & per corpus uteri attrahent? Vel quomodo Phoca, Balena, Delphines, cetaceum omne genus & pisces omnes in profundo maris, arteriarum suarum Diastole, & Systole, per immensam aquae massam celeri pulsu aërem introsument, & emittent?

Dicere verò quod aërem implantatum in aquam absorbeant, & in aquam fuligines suas reddant, figmento haud ab simile.

Si in Systole arteria per poros carnis & cutis, fuligines è cavitatibus suis expellant, cur non item spiritus, (quos dicunt etiam in illis contineri) cum spiritus multo tenuiores fuliginibus sint?

Si cum in Systole, tum in Diastole aërem arteria accipiunt & reddunt, uti pulmones in respiratione; cur non & hoc faciunt inflicto per arteriotomiam vulnere? uti in sectione trachae, per vulnus aërem ingredi, regredi, duobus contrariis motibus, palam esset; cum tamen secta arteria uno continuo
motu

motu sanguinem vi protrudi, non verò ærem, vel ingredi, vel regredi, manifestū sit.

Si pulsus arteriarum, partes corporis refrigerant & eventant, qui pulmones ipsum cor; quomodo dicunt vulgo, arterias à corde in partes singulas vitalem sanguinem deferre refertissimum spiritibus vitalibus, qui partium calorem foveant, sopitum suscitent, & quasi absumptum resarciant?

Quomodo (si ligaveris arterias) statim partes non modò torpent, frigent, & quasi pallidæ cernuntur, sed & ali tandem desinunt? quod secundum Galenum contingit, quia calore qui per omnes partes superne à corde confluxerat, privatae sint: cùm hinc pateat magis arterias calorem partibus deferre, quàm refrigerium, & eventationem:

Præterea quomodo Diastole simul spiritus à corde attrahet, ad calefaciendas partes, simulque ab externo refrigerium?

Amplius, tametsi iisdem usibus pulmones, arterias, & cor inservire aliqui affirmant, nihilominus cor spirituum officinam esse, & arterias spiritus continere, & transmittere

tere dicunt : Pulmones verò spiritus facere, aut retinere contra Columbi opinionem, negant. Quin & cum Galeno, quod sanguis contineatur in arteriis, & non spiritus, contra Erasistratum asseverant.

Videntur istæ opiniones ita inter se pugnare, & sese invicem refellere, ut omnes non immerito sint suspectæ.

Sanguinem in arteriis contineri, & arterias solum sanguinem deferre tum experimento Galeni, tum in arteriotomia, tum in vulneribus manifestum est.

Ab una arteria dissecta, Galenus lib. quod sanguis continetur in arteriis, affirmat, plurimis in locis, unius semi horæ spatio totam massam sanguinis ab universo corpore, magna & impetuosâ profusione exhaustam fore.

Experimentum Galeni tale est : Si (inquit) funiculo arteriam utrimque ligaveris, & medio rescisso secundum longitudinem, quod inter duas ligaturas in arteria comprehensum erit, nihil præter sanguinem reperiēs : & sic eam
pro-

probat sanguinem solum continere.

Unde nobis ratiocinari licet: Si eundem sanguinem, qui venis similiter ligatis, & rescissis inest, inveneris in arteriis (quemadmodum in mortuis, & aliis animalibus sapius ego expertus sum) eâdem ratione concludere nos possumus, arterias eundem sanguinem, quem vena, & nihil præter eundem sanguinem continere.

Aliqui dum hanc dissolvere difficultatem tentant, spirituosum, & arteriosum esse sanguinem affirmantes, tacite concedunt, arteriarum munus esse sanguinem à corde in universum corpus deferre, & repletas sanguine arterias esse (spirituosus enim sanguis, non minus sanguis est.) Etiam sanguinem, prout sanguis, & qui in venis fluit, spiritibus imbui nemo negat.

Quamvis in arteriis sanguis uberiori spirituum copia turgeat, tamen existimandū est hos spiritus à sanguine inseparabiles esse, sicut illi, qui in venis; & quod sanguis, & spiritus unum corpus constituent (ut serum, & butyrum in lacte, aut calor &

aqua in calidâ) quo replentur arteria.

Cujus corporis distributionem à corde arteria præstant, hoc corpus nihil aliud, quam sanguis est: si verò hunc sanguinem in arterias, è corde per arteriarum Diastolen attrahi dicunt; videntur astruere, quod arteria suâ distentione sanguine isto replentur, & non aëre ambiente, uti prius.

Si etiam aëre ab ambiente repleri dicant, quomodo & quando recipient è corde sanguinem? Si in Systole id fiat, continget impossibile; repleri arterias, cum contrahantur; vel repleri & non distendi. Sin autem in Diastole, in duos usus contrarios, & sanguinem, & aërem, & calorem, & frigus simul recipient; quod est improbabile.

Amplius, cum affirmant, simul Diastolen cordis & arteriarum esse; & simul Systolen; alterum est inconveniens. Quomodo enim cum simul distenduntur duo corpora sic invicem connata, alterum ab altero attrahet, vel cum simul contrahuntur, alterum ab altero recipiet aliquid?

Insuper forsitan impossibile est, aliquid posse

posse aliud corpus ita in seipsum attrahere ut distendatur, cum distendi sit pati; nisi, ut spongia prius vi ab externis constricta, dum redeat ad constitutionem suam naturalem. Tale autem aliquid in arteriis posse esse, difficile est fingere.

Arterias distendi, quia replentur, ut sacculi, & utres; atque non repleri, quia distenduntur ut folles, facile & aperte demonstrare me posse, & palam ante hac demonstrasse existimo.

Attamen (libr. quod sang. cont. in arter.) Galeni experimentum in contrarium sic se habet. Arteriam nudatam secundum longitudinem incidit, calamumque, vel fistulam concavam per vulnus immittit, & quo sanguis exilire non possit, vulnus obturatur. Quoadusque (inquit) sic se habet, arteria tota pulsabit, cum primum verò obductum filum super arteriam & fistulam, in laqueum contrahens arteriæ tunicas, calamo obstruxeris; non amplius arteriam ultra laqueum palpitare videbis.

Nec ego feci experimentum Galeni, nec recte posse fieri vivo corpore, ob impetuosum sanguinis ex arteriâ eruptionem, puto; nec obturabit sine ligaturâ vulnus fistula: & per fistulâ cavitatem ulterius prosilire sanguinem dubito. Tamen hoc experimento probare videtur Galenus facultatem pulsificam per tunicas arteriarum à corde manare, & arterias, dum distenduntur, à facultate pulsifica, repleri, quia distenduntur ut folles; non distendi, quia replentur ut utres.

Sed, & in arteriotomia & vulneribus, contrarium manifestum est: sanguis enim saliendo ab arteriis profunditur cum impetu, modò longius, modò propius vicissim prosiliendo, sed saltus semper est in arteriâ Diastole, & non in Systole. Hinc clarè apparet, impulsu sanguinis arteriam distendi: ea enim dum distenditur, non posset sanguinem tantâ vi projicere; potius aërem in se per vulnus attrahere deberet, secundum ea, quæ vulgò de arteriarum usu jactata sunt.

Nec

Nec crassities tunicarum arteriæ nobis imponat, facultatem pulsificam provenire à corde per ipsas tunicas : nam in quibusdam animalibus arteriæ à venis nihil differunt ; & in extremis partibus hominis , & parvis disseminationibus arteriarum, quales in cerebro, manu, &c. nemo per tunicas, arterias à venis poterit distinguere : eadem enim utrisque tunica.

In aneurismate præterea ex incisa vel exesa arteria genito, eadem omnino pulsatio cum reliquis arteriis, & tamen non habet tunicam arteriæ. Hec mecum doctissimus Riolanus lib. 7. attestatur.

Neque eundem usum pulsus ac respirationis quis existimet, quod iisdem causis uti respiratio, crebriores, majores, celeriores pulsus fieri cernat ; ut cursu, irâ, balneo, aut quovis calfaciente. Nam non solum experimentum est in contrarium (quod solvere Galenus nititur) cum ab immodicâ repletionem pulsus existant majores, respirationes minores : sed & in pueris pulsus frequentes, cum respiratio interim rara.

Similiter in timore, & curis, & anxietate animi, imò aliquibus in febris, pulsus, celeres, frequentes, respirationes verò tardiores.

Hæc & hujusmodi incommoda positas opiniones de pulsu, & usu arteriarum, consequuntur: non minus forsàn etiam ea, quæ de usu & pulsu cordis affirmantur, difficultatibus plurimis & inextricabilibus implexa sunt.

Cor affirmant vulgo fontem & officinam vitalis spiritus esse, quibus vitam singulis partibus largiatur: & tamen negant, dextrum ventriculum spiritus faccre; sed præbere duntaxat alimentum pulmonibus: unde dicunt piscibus deesse dextrum ventriculum cordis, (& omnino omnibus deest, quibus non sunt pulmones:) & quod dexter ventriculus cordis, pulmonum gratia sit.

I. Cur (quæso) cum eadem pene constitutio sit utriusque ventriculi, eadem fabrica fibrarum, lacertulorum, valvularum, vasorum, auricularum, & eodem uterque in dissectionibus refarciatur sanguine,

guine, similiter nigricante, similiter grumefcente: Cur (inquam) cum eadem sit utriusque actio, motus, pulsus, variis eos usibus tam differentibus, existimemus destinatos fuisse? Si valvula tricuspides tres sub dextri ventriculi ingressu, impedimento sint sanguinis regressui in venam cavam: & si semilunares tres illae in orificio arteriosa vena ut sanguinis regressum impedirent factae sint: cur, cum similiter se habeant in sinistro ventriculo, similiter sanguinis tum egressui, tum regressui impediendo, factas esse, negemus?

2. Cum magnitudine, formâ, situ, omnino eodem pene modo in sinistro se habeant ventriculo, quo in dextro, cur dicunt hic spirituum egressui & regressui impedimento esse, in dextro verò sanguinis? Idem organon simile non videtur sanguinis & spirituum motus similiter impedire apte posse.

3. Cum meatus, & vasa sibi invicem respondeant magnitudine, videl: vena arteriosa & arteria venosa, cur unum privato usui destinetur, videl: alendis pulmonibus, alterum publico?

4. Quo-

4. Quomodo probabile est (ut notavit Realdus Columbus) tanto sanguine opus esse ad nutritionem pulmonum, cum hoc vas, (vena videlicet arteriosa) exuperet magnitudine. utrumque ramum distributionis venæ cavæ descendentis in cruralem?

5. Cum (quæso) pulmones tam propè sint, & vas tam amplum existat, & ipsi in continuo motu, quid est quod dextri ventriculi pulsu opus sit? Quæ causa est, quod Natura, gratia alendorum pulmonum, alterum ventriculum cordi adjungere necesse habeat? Cum dicunt sinistrum ventriculum, è pulmonibus & dextro cordis sinu, materiam attrahere, ad spiritus condendos (aërem videlicet & sanguinem) & pariter in aortam spirituosum sanguinem distribuere, & hinc fuligines retro per arteriam venalem remittere in pulmones, & spiritus in aortam. Quid est quod separationem facit, & cur modò huc modò illuc spiritus & fuligines citra permistionem aut confusio-
nem commeant? Si tricuspidēs mitrales
non

non impediunt regressum fuliginum ad pulmones, quomodo impediunt aëris? Et quomodo semilunares prohibebunt regressum spirituum (subsequente Diastole cordis) ab aorta?

Quomodo dicunt per arteriam venalem spirituosum sanguinē distribui è ventriculo sinistro in pulmones, nec interim hoc impedire tricuspidēs? Cum affirmant aërem per idem vas à pulmonibus in ventriculum sinistrum ingredi, & hujus regressui tricuspidēs valvulas impedimento esse velint. Deus bone! Quomodo tricuspidēs impediunt aëris regressum, & non sanguinis?

Amplius, cum venam arteriosam, vas amplum, magnum cum tunica arteriæ factum, non nisi privato & uni usui (videlicet alendis pulmonibus) destinent; cur arteriam venalem vix pari magnitudine, cum tunica venæ, molli, laxa, pluribus usibus (tribus, vel quatuor videlicet) fabrefactam asseverant? Volunt enim per ipsam aërem è pulmonibus in sinistrum ventriculum permeare: volunt similiter è corde in pulmo-
nes

nes fuligines per ipsam remeare : volunt spirituosæ sanguinis portionem à corde per ipsam in pulmones ad ipsos refocillandos distribui.

Fuligines & aërem, à corde illas, ad cor hunc, per eundem tubulum volunt transmitti; cum tamen tam contrariis motibus, & usibus unum vas, & unam viam fabricare Natura solita non sit, nec videre uspiam contingat.

Si fuligines, si aërem hâc viâ permeare & remeare contendunt, ut per Bronchia pulmonum: quare exsecta, vel incisa arteria venosa, neque aërem, neque fuligines reperire in dissectione possumus; & unde semper refertam crasso sanguine arteriam venosam istam videmus, & nunquam aëre, cum in pulmonibus aërem remanentem cernimus?

Si quis experimentum Galei faceret, & cani adhuc viventi tracheam incideret, & folliis pulmones aëre impleret per vim, & distentos ligaret fortiter; mox dissecto pectore multam aëris copiam in pulmonibus

bus usque ad extimam illorum tunicam inveniet; sed neque in arteria venosa, neque in sinistro ventriculo cordis quidquam.

Si aërem è pulmonibus, in cane vivente, aut cor attraheret, aut pulmones transmitterent, multo magis hoc experimento id facere deberent. Imo in administratione Anatomica inflatis cadaveris pulmonibus, etiam aërem statim huc ingredi (si ulli essent meatus) quis dubitaret? Tam magni verò faciunt hunc usum arteria venosa, videlicet ad aërem è pulmonibus cordi deferendum: ut Hieron. Fabr. ab aqu. p. hujus vasis causa pulmones factos fuisse, & hanc esse præcipuam pulmonum particulam contendat.

Sed amabo, si aëri deferendo arteria venosa condita esset, cur ejus constitutio est venæ?

Fistulis potius opus esset naturæ, & quidem, quales Bronchia sunt, annularibus, ut semper pateant, neque concidant, & ut omnino vacuæ sanguine permaneant, ne humor aëris transitum impediat, uti manifestum

festum est (quando pulmones, pituitâ Bronchiis vel infarctâ, vel paululum admixtâ, laborant) sibilo & strepitu oborto dum respiramus.

Minus toleranda illa opinio, quæ (cùm duplicem materiam, aëream & sanguineam, necessariam esse ad spiritus vitales efficiendos supponat) sanguinem, per mediastini cordis cæcas porositates, de dextro in sinistrum ventriculum transfundere, aërem per magnum vas arteriam venosam è pulmonibus attrahi, contendit, & proinde in septo cordis porositates plures esse, producendo sanguini accommodatas. Sed me hercule porositates nullæ sunt, neque demonstrari possunt.

Septi enim cordis substantia densior, & compactior est quavis altera corporis particula, exceptis ossibus & nervis. Sed si adessent foramina, quomodo (cùm simul uterque ventriculus distenditur & dilatatur) alterum ab altero quidpiam, aut sinistrum sanguinem è dextro exhaurire possibile esset?

Et

Et cur non potius dextrum spiritus ex sinistro, quam sinistrum sanguinem è dextro ventriculo per eadem foramina evocare crediderim. At mirum & incongruum certe, sanguinem per cæcos obscurosque ductus, & aërem per patentissimos eodem instanti commodius attrahi.

Cur quæso pro sanguinis transitu in sinistrum ventriculum ad cæcas & invisibiles porositates, incertas, obscuras consugiunt, quando adest per arteriam venosam tam patens iter? mirum mihi certe est, quod per cordis septum, crassum, durum, densum, compactissimum, viam facere, vel fingere potius maluerint; quam per patens vas venosum, aut etiam per pulmonum substantiam raram, laxam, mollißimam, spongiosam.

Præterea si per septi substantiam sanguis permeare potuisset, aut è ventriculis imbibi; quid opus esset venæ, & arteriæ coronalis ramulis ad ipsius septi nutritionem divaricatis?

Notatu dignissimum si in fœtu, (quando
omnia

omnia rariora, molliora) Natura coacta fuit per foramen ovale sanguinem in sinistrum ventriculum è venâ cavâ per arteriam venosam traducere : quomodo verisimile possit esse quod in adulto per cordis septum jam densius atate factum, tam commodè nulloque negotio transfundat ?

Andreas Laurentius libr. 9. cap. 11. Quæst. 12. autoritate Galeni de lo. affect. lib. 6. cap. 7. & experientia Hollerii fultus asserit & probat, è cavitate pectoris serositates, & pus Empyicorum in arteriam venosam absorptum, per sinistrum ventriculum cordis, & per arterias cum urina, vel cum facibus alvi posse expelli : recenset quinetiam in confirmationem, casum cujusdam melancholici, qui sæpius deliquium animi passus, à paroxysmo liberatus erat emissionem urinae turbida, foetida, acris : quo genere morbi tandem confectus, dissecto cadavere, talis substantia, qualem mingebat, neque in vesica, neque in renibus uspiam apparebat, sed in cordis sinistro ventriculo, & cavitate pectoris plurima :

rima : unde gloriatur se horum affectuum talem prædixisse causam.

Non possum non mirari, cùm materiam heterogeneam posse eodem tractu evacuari divinarat, & prædicaverat : quod iisdem viis sanguinem è pulmonibus in sinistrum ventriculum secundum naturam deduci convenienter : cernere aut asseverare non potuerit, aut voluerit.

Itaque ex his, & huiusmodi plurimis patet, quod ea, quæ dicta antehac à prioribus de motu & usu cordis, & arteriarum sunt, aut inconvenientia, aut obscura, aut impossibilia diligentius consideranti appareant. Utile proinde admodum erit paulò penitius rem introspicere ; arteriarum & cordis motus non solum in homine, sed & aliis animalibus cor habentibus contemplari ; quin etiam vivorum dissectione frequenti, multaue autopsia veritatem discernere, & investigare.

EXER-

EXERCITATIO ANATOMICA,

De motu Cordis & Sanguinis
in Animalibus.

C A P. I.

*Causa qua ad scribendum Auctor
permotus fuerit.*

CUm multis vivorum dissectionibus (uti ad manum dabantur) animum ad observandum primum appuli; quo cordis motus usum, & utilitates in animalibus per autopsiam, & non per libros aliorumque scripta invenirem: rem arduam plane, & difficultatibus plenam continuò reperi, ut (cum *Fracastorio*) motum cordis soli Deo cognitum esse, penè opinarer. Nec enim quomodo Systole, aut Diastole fieret,
nec

nec quando, aut ubi dilatatio & constrictio existeret, recte potui inter noscere; propter celeritatem scilicet motus, qui in multis animalibus, nictu oculi, quasi trajecto fulgure, se in conspectum exhibuit, & subtraxit illico; ita ut modò hinc Systolen, illic Diastolen, modò è contra, modò varios, modò confusos fieri motus, me existimabam cernere: unde animus mihi fluctuabat, nec quid vel ipse statuerem, vel aliis crederem, habebam; & motum cordis esse qualis Euripi fluxus & refluxus Aristoteli, Andream Laurentium scripsisse non mirabar.

Tandem majori indies, & disquisitione, & diligentia usus, multa frequenter, & varia animalia viva introspeciendo multisque observationibus collatis, rem attigisse, & ex hoc labyrintho me extricatum evasisse, simulque motum, & usum cordis, & arteriarum, quem desiderabam, compertum

pertum habere me existimabam. Ex quo non solum privatim amicis, sed etiam publicè in prælectionibus meis Anatomicis, Academico more, proponere meam in hâc re sententiam non verebar.

Quæ aliis (uti fit) placebat, aliis minus: hi convellere, calumniari, & vitio vertere, quod à præceptis, & fide omnium Anatomicorum discesserim: Illi rem novam, cum inquisitu dignam, tum maximè utilem fore confirmantes, plenius sibi explicatam poscere.

Tandem amicorum precibus, ut omnes meorum laborum participes fierent, partim etiam aliorum permotus invidia, (qui dicta mea iniquo animo accipientes, & minus intelligentes, me publicè traducere conabantur) ut omnes de me, & de re ipsâ iudicium ferre possent, hæc typis mandare publicè, coactus fui.

Sed hoc eo libentius, quod *Hieronym.*

nym. Fabr. ab aqu. p. cùm singulas penè animalium particulas, accuratè & doctè peculiari tractatu deliniasset, solum cor intactum reliquerit.

Denique ut, si quid reipublicæ literariæ ex opera mea utile & commodum hâc in parte accederet, forsan recte fecisse me constaret; nec alii omnino inertem me vixisse viderent.

Forсан in Cordis motu eveniet nunc, quod Senex ait in Comœdia,

- „ *(Nunquam quisquam ita bene subducta ratione ad vitam fuit,*
- „ *Quin res, atas, usus aliquid oportet novi,*
- „ *Aliquid admoneat, ut illa, quæ te scire credas, nescias,*
- „ *Et, quæ tibi putaris prima, in experiundo repudies.)*

aut alii hinc saltem, hac data via, felicioribus freti ingeniis, rei rectius gerendæ, & melius inquirendi occasionem capient.

C A P. II.

*Ex vivorum dissectione, qualis sit
Cordis motus.*

PRimum itaque in Cordibus, omnium adhuc viventium animalium aperto pectore, & dissecta capsula, quæ cor immediate circumcludit observare licet. Cor aliquando moveri, aliquando quiescere: esse etiam tempus in quo movetur, & in quo motu destituitur.

Hæc manifestiora in cordibus frigidorum animalium, ut bufone, serpentibus, ranis, cochleis, gammaris, crustatis conchis, squillis, & pisciculis omnibus. Fiunt enim manifestiora in cordibus calidiorum, ut canis, porci, si eousque attentè observaveris quoad emori cor, & languidius moveri, & quasi extingui incipiat: tum etenim tardiores, & rariores ipsius motus fieri, & longiores quietes, cernere aperte, & clare poteris;
motus

motus enim qualis sit, & quomodo fiat, commodius intueri, & dijudicare licet.

In quiete, ut in morte, cor laxum, flaccidum, enervatum & inclinatum quasi jacet: In motu, & eo quo movetur tempore, tria præ cæteris animadvertenda.

I. Quod erigatur cor, & in mucronem se sursum elevet; sic ut illo tempore ferire pectus, & foris sentiri pulsatio possit.

II. Undique contrahi, magis vero secundum latera, ita, ut minoris magnitudinis, & longiusculum, & collectum appareat. Cor anguillæ exemptum, & super tabulam aut manum positum, hoc facit manifestum: æque etiam apparet in corde piscicorum, & frigidiorum animalium, quibus cor coniforme, aut longiusculum est.

III. Comprehensum manu cor eo quo movetur tempore, duriusculum

lum fieri : (à tentione autem illa durities est) quemadmodum si quis laceratos in cubitu manu comprehendens, dum movent digitos, illos tendi, & magis renitentes fieri percipiet.

IV. Notandum insuper in piscibus, & frigidioribus sanguineis animalibus, ut serpentibus, ranis, &c. illo tempore quo movetur cor, albidioris coloris esse; cùm quiescit à motu, coloris sanguinei sature cerni.

Ex his mihi videbatur manifestum; Motum cordis esse tentionem quandã ex omni parte, & secundum ductum omnium fibrarum constrictionem; quoniam erigi, vigorari, minorari, & durescere in omni motu videtur; ipsiusque motum esse, similem muscutorum, dum contractio fit secundum ductum partium nervosarum, & fibrarum: muscoli enim, cùm moventur & in actu sunt, vigorantur, tenduntur, ex mollibus duri fiunt, attolluntur, incrassantur, & similiter cor.

Ex

Ex quibus observatis rationi consentaneum est, cor eo quo movetur tempore, undique constringi, & secundum parietes incrassescere; secundum ventriculos coarctari, & contentum sanguinem protrudere; quod ex quartâ observatione satis patet, cùm in ipsâ tensione suâ, propterea quod sanguinem in se prius contentum expresserit, albescat: denuo in laxatione, & quiete, subingrediente de novo sanguine in ventriculos, redit color purpureus & sanguineus cordi.

Verùm nemo amplius dubitare poterit, cùm usque in ventriculi cavitatem inflicto vulnere, singulis motibus five pulsationibus cordis, in ipsâ tensione, proflire cum impetu foras contentum sanguinem viderit.

Simul itaque hæc, & eodem tempore contingunt, tensio cordis, mucronis erectio, pulsus qui forinsecus sentitur ex allisione ejus ad pectus, parietum incrassatio, & contenti san-

guinis protrusio cum impetu, à contractione ventriculorum.

Hinc contrarium vulgariter receptæ opinioni apparet, secundum quam eo tempore, quo cor pectus ferit, & pulsus foris sentitur, una cor distendi secundum ventriculos, & repleti sanguine putatur: quanquam contra rem se habere intelliges, videlicet cor, dum contrahitur, inaniri. Nam qui motus vulgo cordis *Diaστοle* existimatur, re vera *Systole* est. Et similiter motus proprius cordis *Diaστοle* non est, sed *Systole*; neque in *Diaστοle* vigoratur cor, sed in *Systole*; tum enim tenditur, movetur, vigoratur.

Neque omnino admittendum (tametsi divini Vesalii adducto exemplo confirmatum de vimineo circulo scilicet ex multis juncis pyramidatim junctis,) cor in *Systole* secundum fibras rectas tantum moveri, sic &, dum apex ad basin appropinquat, latera

tera in orbem distendi, cavitates dilatari, ventriculos cucurbitulæ formam acquirere, & sanguinem introsumere.

Nam secundum omnes quas habet fibras, cor eodem tempore tenditur, constringitur, incrassatur, & dilatatur, potius secundum parietes & substantiam, quàm ventriculos: dum tenduntur fibræ à cono ad basin, & apicem unà ad basin trahunt, nec in orbem latera cordis inclinant; sed potius contrariè, uti omnis fibra in circulari positione dum contrahitur versus rectitudinem. Sicut omnes musculorum fibræ, dum contrahuntur & in longitudine abbreviantur, ita secundum latera distenduntur eodem modo, quo musculorum ventres incrassantur.

Adde, quod in motu cordis non solum per erectionem & incrassationem parietum, contingat ventriculos coarctari; sed etiam quod fibræ

five lacertuli, ab Aristot. *Nervi dicti*, (in quibus solum fibræ rectæ, in parietibus verò omnes circulares) sint vario, in ventriculis cordis majorum animalium, & admirabili apparatu, & dum contrahuntur, omnia interiora latera veluti laqueo invicem compellant, ad contentum sanguinem majori robore expellendum.

Neque verum est, quod vulgo creditur, cor proprio suo motu, aut extensione sanguinem in ventriculos attrahere, sed dum movetur & tenditur, expellere, dum laxatur & concidit, recipere sanguinem eo modo, quo postea patebit.

C A P. III.

Arteriarum motus qualis ex vivorum dissectione.

ULterius in cordis motu observanda veniunt hæc, quæ & ad arteriarum motus, & pulsationes spectant.

I. Eo tempore quo cordis fit tentio,

tio, contractio, percussio pectoris, ejusdem est Systole; tunc arteriæ dilatantur, pulsum edunt, & in suâ sunt Diastole: Similiter eo tempore ventriculi contrahuntur, & protrudunt contentum sanguinem, vena arteriosa pulsatur, & dilatatur cum aorta & reliquis arteriis corporis.

II. Quando sinister ventriculus cessat moveri, pulsare & contrahi, cessat pulsus arteriarum; imo quando languidius tenditur, pulsus in arteriis vix est perceptibilis: & similiter, cessante dextro, in venâ arteriosâ.

III. Item secta quavis arteria vel perforata, in ipsâ tentione ventriculi sinistri propellitur foras sanguis ex vulnere cum impetu.

Similiter secta vena arteriosa eodem tempore, quo dexter ventriculus tenditur & contrahitur, exinde cum impetu sanguinem proflire videbis.

Similiter in piscibus secta fistula,

B 5

quæ

quæ è corde in bronchia ducitur, quo tempore cor tendi, & contrahi videbis, eo una etiam sanguinem exinde protrudi cum impetu.

Similiter denique in omni arteriotomia (in quâ sanguis profiliendo exit, modò longius, modò propius) saltum fieri in arteriarum Diaſtole, quando cor pectus ferit; è cordis verò vulnere, eo tempore, quo cor tendi & contrahi apparet, & in ſuâ eſt Syſtole & erectione, sanguinem expelli eodem motu comperies.

Ex his videtur manifestum contra communia dogmata, quod arteriarum Diaſtole fiat eo tempore, quo cordis Syſtole; & arterias repleri & distendi, propter sanguinis, à conſtrictione ventriculorum cordis, immiſſionem & intrusionem; quin etiam distendi arterias, quia replentur ut utres, aut vesica; non repleri, quia distenduntur ut folles. Eâdem de causâ universi corporis arteriæ pulſant, videlicet, à
ten-

tensione sinistri cordis & ventriculi, sicut vena arteriosa à dextri.

Denique arteriarum pulsum fieri ab impulsu sanguinis è ventriculo sinistro, eo pacto, quo cum quis in chirothecam inflat, omnes digitos simul videt distendi, & pulsum æmulari: sic etiam secundum cordis tensionem pariter pulsus fiunt, qui sive sint majores, vehementiores, frequentes, celeres, omnes rythmum, quantitatem & ordinem servant cordis pulsantis.

Nec est expectandum, propter motum sanguinis, quod tempus, inter constrictionem cordis, & arteriarum (præcipuè magis distantium) dilationem intercedat, ne fiant simul; cum eodem modo res se habeat, ut in inflatione chirothecæ, aut vesicæ, quia in pelvi (uti per tympanum, & in longis lignis) ictus, & motus simul sunt in utroque extremo. Hinc Aristot. (3. Anim. cap. 9. de respir. cap. 15.) *Palpitat intra venas* (arterias intelligit)

sanguis omnium animalium, pulsuque simul undique movetur : sic pulsan venæ omnes & simul invicem, propterea quod pendent omnes à corde : quod se semper movet, quare & illa, semper & simul invicem, cum corde moventur.

Notandum cum Galeno, à veteribus Philosophis venas pro arteriis, appellatas fuisse. Accidit me vidisse, & præ manibus habuisse casum, qui mihi hanc veritatem apertissimè confirmabat. Habuit quidam tumorem ingentem, pulsanem, *Aneurisma* dictum, in dextrâ parte juguli, prope descensum arteriæ subclaviæ in axillas, ab ipsius arteriæ exesione prognatum, qui summum indies incrementum capebat, propter immisionem sanguinis ab arteriâ singulis pulsationibus dislenti : (quod secto, post mortem, cadavere deprehensum erat) in illo pulsus ejusdem brachii exilis admodum, eo quod major sanguinis portio & influxus in tumorem diver-

divertebatur, & interceptus fuit.

Quare five per compressionem, five per infarctum, vel interceptionem sanguinis motus per arterias præpeditur, posteriores arteriæ minus pulsant, cum pulsus arteriarum, nil nisi impulsus sit sanguinis in arterias.

C A P. · I V.

Motus cordis & auricularum qualis ex vivorum dissectione.

PRæter hæc circa motum cordis observanda sunt quæ ad auricularum usum spectant. *Casparus Bauhinus* (*Anat. l. 2. c. 22.*) & *Johannes Riolanus* (*Antrop. lib. 3. cap. 12.*) viri doctissimi, & Anatomici peritissimi observarunt & admonent, quod (si in vivâ sectione alicujus animalis cordis motum studiosè observes) quatuor motus, loco & tempore distinctos, aspicias; quorum duo sunt auricularum,

rum, ventriculorum duo. Pace tantorum virorum, quatuor sunt motus, loco, non verò tempore distincti. Simul enim ambæ auriculæ moventur, & simul ambo ventriculi, ut quatuor loco motus distincti sint duobus tantum temporibus, atque hoc se habet modo.

Duo sunt eodem tempore motus, unus auricularum, alter ipsorum ventriculorum: qui simul non fiunt; sed præcedit motus auricularum, & subsequitur cordis; ut motus ab auriculis incipere, & in ventriculos progredi videatur.

Cùm jam languidiora omnia (emori-
ente corde, & in piscibus, & in frigidioribus sanguineis animalibus) inter
hos duos motus, tempus aliquod quietis
intercedit; cor quasi suscitatum
motui respondere videtur, aliquando
citius, aliquando tardius; tandem ad
mortem inclinans, cessat motu suo re-
spondere, & quasi capitè duntaxat le-
viter

viter annuit, & obscure adeò move-
tur, ut motus signum præbere pulsanti
auriculæ videatur.

Sic prius definit cor pulsare, quam
auriculæ, ut auriculæ supervivere di-
cantur; primus omnium definit pul-
sare sinister ventriculus, deinde ejus
auricula, demum dexter ventriculus,
ultimo (quod etiam notavit Galenus)
reliquis omnibus cessantibus & mor-
tuis, pulsat dextra auricula, ut ultimo
in dextra auricula vita remanere vi-
deatur.

Dum sensim emoritur cor, videre
licet, post duas vel tres pulsationes au-
ricularum, aliquando quasi experge-
factum cor respondere, & unum pul-
sum lentè, & ægrè peragere & mo-
liri.

Sed & præcipuè notandum, quod,
postquam cessavit cor pulsare adhuc
auriculâ pulsante, digito super ven-
triculum cordis posito, singulæ pul-
sationes percipiantur in ventriculis;
eodem

eodem planè modo, quo ventriculorum pulsationes in arteriis sentiri antea diximus, à sanguinis impulsu nimirum distentione facta; & hoc tempore, pulsante solum auricula, si forfice cordis mucronem absecuris, exinde singulis auriculæ pulsationibus sanguinem effluere conspicias: ut hinc pateat quod in ventriculos sanguis ingrediatur, non attractione, aut extensione cordis, sed pulsu auricularum immissus.

Notandum est omnes, quas voco, & in auriculis & in corde, pulsationes, contractiones esse, & primò contrahi auriculas, &, in consequentia, cor ipsum. Auriculæ etiam, dum moventur & pulsan, albidiores fiunt, præsertim ubi paucò sanguine replentur (replentur autem, tanquam promptuarium & lacuna sanguinis, venarum motu compressivo, ad centrum declinante sponte sanguine) quin & in finibus & extremitatibus ipsarum,
hæc

hæc albedo à contractione fieri vel maximè apparet.

In piscibus, ranis, & similibus unum ventriculum habentibus cordis, (nam pro auricula vesicam quandam in basi cordis positam refertissimam sanguine habent) videbis vesicam primo contrahi, & subsequi postea cordis contractionem apertissime.

Hæc à me observata, etiam quæ his contrario modo se habere videntur, adscribere lubet.

Cor anguillæ & quorundam piscium & animalium (etiam exemptum) sine auriculis pulsat: imo, si in frustra dissecueris, partes ejus divisas, separatim sese contrahere & laxare videbis, ita, ut in his, post cessationē motus auricularum, cordis corpus pulsum faciat & palpitet. Sed hoc fortè proprium vivacioribus, quorum radicale humidum glutinosum magis, aut pingue & lentum est, & non ita facile dissolubile. Hoc etiam apparet in carne

anguillarum, quæ post excoriationem, exenterationem & in frustra dissectionem motum retinet.

In Columba certe experimento facto, postquam cor desierat omnino moveri, & nunc etiam auriculæ motum reliquerant, per aliquod spacium, digitum saliva madefactum, & calidum cordi superimpositum detinui: hoc fomento (quasi vires, & vitam postliminio recuperasset) cor, & ejus auriculæ moveri, sese contrahere, atque laxare, & quasi ab orco revocari videbantur.

Sed & præter hæc aliquoties à me observatum fuit, (postquã cor ipsum, & ejus auricula etiam dextra, à pulsatione quasi mortis articulo quiescerent) in ipso sanguine qui in dextra auricula continetur, obscurum motum, & undationem, ac palpitationem quandam manifesto superfuisse tamdiu scilicet, quam calore & spiritu imbui videretur.

Tale

Tale quiddam evidentissime, in primâ animalis generatione, intra septem dies ab incubatione, in ovo Gallinaceo, cernitur. Inest primum ante omnia gutta sanguinis, quæ palpitat, (quod etiam annotavit Aristot.) ex quâ incremento facto, & pullo aliquâ ex parte formato, fiunt cordis auriculæ; quibus pulsantibus, perpetuo inest vita. Cùm postea corpus delineari intermissis aliquot diebus, inceperit, tum etiam cordis corpus procreatur, sed per aliquod tempus albidum apparet & exangue, nec, ut reliquum corpus, pulsū edit nec motum. Quin etiam in fœtu humano vidi, circa principium tertii mensis, similiter cor formatum, sed albidum & exangue, cujus tamen auriculis sanguis inerat uberrimus & purpureus; sic etiâ in ovo, jam adaucto & conformato fœtu, simul & cor adaugeri & ventriculos habere, quibus sanguinem tunc recipere & transmittere ocepserat.

Rem.

Rem si penitius introspicere quis velit, non cor esse primum vivens, & ultimum moriens verè dixerit, sed auriculam & quæ in serpentibus, piscibus, & hujusmodi animalibus, pars pro auricula est, eamque prius quam cor ipsum vivere, & post etiam emori.

Imo an prius adhuc ipse sanguis, vel spiritus habeat in se obscuram palpitationem (quam post mortem retinere mihi visus est) & an cum palpitatione vitam incipiat, licet dubitare: quandoquidem, & sperma animalium omnium (ut notavit *Aristotel.*) & spiritus prolificus palpitando exit, velut animal quoddam. Ita Natura in morte, quasi decursione facta, reducem (ut *Aristot. de mot. ann. cap. 8.*) agit, motu retrogrado, à calce ad carceres, eo unde proruit sese recipit: nam animalis generatio, ex non animali procedit in animal, tanquam ex non ente in ens, & iisdem retro gradibus corruptio ex ente revolvitur in non

non ens ; unde, quod in animalibus ultimo fit, deficit primum, & quod primo ultimum.

Observavi quoque in omnibus pene animalibus cor verè inesse, & non solum (ut *Aristot.* dicit) in majoribus & sanguineis, sed in majoribus, exanguibus, crustatis & testaceis quibusdam, ut limacibus, cochleis, conchis, astacis, gammaris, squillis, multisque aliis ; imo vespis, & crabronibus, muscis (ope perspicili ad res minimas discernendas) in summitate illius particulæ, quæ Cauda dicitur, & vidi pulsans cor, & aliis videndum exhibui.

In exanguibus verò Cor lentè admodum, rarisque ictibus pulsat, (ut in aliis jam moribundis,) & tardè sese contrahit, ut facilè in cochleis est cernere; quorum cor deprehendes in fundo illius orificiï in latere dextro, quod se aperire, & claudere eventationis causa videtur, & unde salivam expuit, sectione

sectione factâ in summitate, juxta partem jecori analogam.

Sed notandum & hoc, hyeme & frigidioribus tempestatibus exanguia aliqua (qualis est cochlea) nihil pulsans habere, sed vitam magis plantæ agere: ut etiam reliqua, quæ *plantanimalia* ideo dicuntur.

Notandum insuper, in omnibus animalibus, ubi cor inest, ibi etiam auriculas esse vel auriculis aliquid analogon: & ubicunque cor duplici ventriculo donatur, ibi duas semper adstare auriculas, non contra. Sed, si in ovo, pulli conformationem advertas, primum inest; ut dixi, tantum vesicula, vel auricula, vel gutta sanguinis pulsans: postea incremento facto absolvitur cor. Ita quibusdam animalibus (quasi ulteriorem perfectionem non adipiscentibus) pulsans vesicula quædam, instar puncti cujusdam rubri vel albi, duntaxat, inest, quasi principium vitæ: uti apibus, vespis,

cochleis, squillis, gammaris, &c.

Est hic apud nos minima squilla (quæ Anglicè dicitur *a Shrimp*, Belgicè *een Garneel*) in mari & Thamesi capi solita, cujus corpus omnino pellucidum est: eam aquæ impositam sæpius præbui spectandam amicissimis quibusdam meis, ut cordis illius animalculi motus liquidissime perspiceremus, dum exterioris illius corporis partes visui nihil officerent, quo minus cordis palpitationem, quasi per fenestram, intueremur.

In ovo Gallinaceo post quatuor, vel quinque dies ab incubatione, primum rudimentum pulli instar nubeculæ videndū exhibui (nimirum ovo, cui cortex adimebatur, in aquam limpidam, tepidamque immisso) in cujus nubeculæ medio, punctum sanguineum palpitans tam exiguum erat, ut in contractione dispareret, & visum aufugeret, in laxatione instar summitatis acus appareret rubicundum: ita ut,

ut, inter ipsum videri & non videri, quasi inter esse & non esse, palpitacionem & vitæ principium ageret.

C A P. V.

Cordis motus actio, & functio.

EGo ex his tandem & hujusmodi observationibus repertum iri confido, motum cordis ad hunc modum fieri.

Primum sese contrahit auricula, & in illâ contractione sanguinem contentum, quo abundat, (tanquam venarum caput, & sanguinis promptuarium & cisterna) in ventriculum cordis conjicit; quo repleto cor sese erigens, continuo omnes nervos tendit, contrahit ventriculos, & pulsum facit, quo pulsu immissum ab auricula sanguinem continenter protrudit in arterias; dextet ventriculus in pulmones per vas illud, quod vena arteriosa nominatur, sed revera, & constituitur

stitutione & officio, & in omnibus arteria est; sinister ventriculus in aortam, & per arterias in universum corpus.

Isti duo motus, auricularum unus, alter ventriculorum, ita per consecutionem fiunt, servata quasi harmonia & rhytmo, ut ambo simul fieri, & unus tantum motus esse appareat, præsertim in calidioribus animalibus, dum illa celeri agitantur motu.

Nec aliâ ratione id fit, quam cùm in machinis, una rota aliam movente, omnes simul moveri videantur; & in mechanico illo artificio, quod sclopetis adaptant; ubi compressione alicujus ligulæ, cadit silex, percutit chalybem & propellit, ignis elicitur, qui dum in pulverem cadit, igitur pulvis, interius prorepit, disploditur, evolat globulus, metam penetrat, & omnes isti motus, propter celeritatem, quasi in nictu oculi simul fieri apparent.

Sic etiam in deglutitione, radicis linguæ elevatione, & oris compressione, cibus vel potus in fauces deturbatur, larinx à musculis suis & epiglottide clauditur, elevatur & aperitur summitas gulæ à musculis suis, (haud aliter quam saccus ad implendum attollitur, & ad recipiendum dilatatur) & cibum, vel potum acceptum transversis musculis deprimit, & longioribus attrahit: & tamen omnes isti motus, à diversis & contradistinctis organis facti, cum harmoniâ & ordine dum fiunt, unum efficere motum videntur, & actionem unam, quam deglutitionem vocamus. Sic contingit planè in motione & actione cordis; quæ deglutitio quædam est, & transfusio sanguinis è venis in arterias.

Si quis (dum hæc habuerit in animo) cordis motum diligenter in vivâ dissectione animadverterit, videbit non solum, quod dixi, cor sese erigere,

gere, & motum unum facere, cum auriculis continuum, sed undationem quandam & lateralem inclinationem obscuram, secundum ductum ventriculi dextri, & quasi sese leviter contorquere, & hoc opus peragere: quemadmodum cernere licet, cum equus potât, & aquam deglutit, singulis gulæ tractibus absorberi aquam, & in ventriculum demitti; qui motus sonitum & pulsum quendam, auscultantibus & tangentibus exhibet; ita dum istis cordis motibus, fit portionis sanguinis è venis in arterias transductio, pulsum fieri & exaudiri in pectore contingit.

Motus itaque cordis omnino ad hunc se habet modum, & una actio cordis est ipsa sanguinis transfusio, & in extremâ usque, mediantibus arteriis, propulsio; ut pulsus, quem nos sentimus in arteriis, nil nisi sanguinis à corde impulsus sit.

An verò cor sanguini, præter trans-

positionem & motum localem, & distributionem aliquid aliud addat, five calorem, five spiritum, five perfectionem, posterius inquirendum, & ex aliis observationibus colligendum. Hoc in præsentia sufficiat satis ostensum esse, in pulsu cordis sanguinem transfundi & deduci è venis in arterias per cordis ventriculos, & distribui in universum corpus.

Sed hæc licet omnes aliquo modo concedant, &, ex cordis fabrica, valvularum artificio, positione, & usu, colligant: tanquam in loco obscuro titubantes tamen cœcutire videntur; dum varia, subcontraria, non cohærentia componunt, & ex conjecturâ plurima pronunciant, ut ante demonstratum est.

Causa maxima hâc in parte hæsitandi & errandi una fuisse mihi videtur, cordis cum pulmone in homine contextus. Cùm venam ibi arteriosam in pulmones obliterari & similiter

ter arteriam venosam, conspexissent: unde aut quomodo dexter ventriculus in corpus distribueret sanguinem, aut sinister è venâ cavâ exhauriret, obscurum admodum illis erat. Hoc attestantur Galeni verba, libr. de placitis Hippoc. & Plat. 6, (dum contra Erasistratum de venarum origine & usu, & sanguinis coctione, invehitur.) Respondebitis (inquit) ita esse effectum, ut in jecore sanguis præparetur, atque inde in cor deferatur, ibi postea reliquam propriæ formæ perfectionem absolutam accepturus: quod profecto ratione vacare non videtur. Nullum enim perfectum & magnum opus repente unâ aggressione fieri, totamque suam expolitionem ab uno instrumento acquirere potest. Quod si ita est, ostendite nobis vas aliud, quod è corde sanguinem absolutè perfectum educat, atque ipsum ut arteria spiritum, in totum corpus dispenset. Ecce opinionem rationabilem non approbasse, & reliquisse Galenum, quia (præter-

C 3. quam

quam quod viam transitus non videbat) vas reperire non poterat, quod in totum corpus è corde sanguinem dispenseret.

Si quis verò ibidem pro *Erasistrato*, vel pro illâ & nunc nostrâ opinione, (ipsius confessione *Galen*i) aliâs rationi consentanea, instaret, & arteriam magnam sanguinem, è corde in universum corpus dispensantem digito demonstrasset; quid divinus ille vir, ingeniosissimus & doctissimus responderet, miror, si arteriam spiritus dispensare & non sanguinem diceret? profecto *Erasistratum* non refelleret satis, si in arteriis spiritus duntaxat contineri arbitraretur, sed sibi ipsi contradiceret, & id turpiter negaret, quod libro proprio acriter contendit, contra eundem *Erasistratum*, & multis validisque argumentis comprobât, & experimentis demonstrât, quod sanguis contineatur in arteriis naturâ, & non spiritus.

Sin verò (divinus vir uti facit eodem loco sæpius) concederet, omnes arterias corporis à magnâ arteriâ oriri, & hanc à corde; quin etiam in ipsis omnibus sanguinem natura contineri, & deferri; & valvulas illas tres sigmoides in orificio aortæ positas, regressum sanguinis in cor prohibere, professus; & quod has natura nequaquam præstantissimo visceri constituisset, nisi maximum aliquod ministerium illæ fuissent exhibitura. Si (inquam) hæc omnia; & his ipsissimis verbis concederet Pater Medicorum, (uti facit *recitato libro*,) quomodo negare posset, arteriam magnam istiusmodi vas esse, quod sanguinem (jam absolutam suam perfectionem adeptum) è corde in universum corpus dispenset, non video. An adhuc forsan hæsitaret, (ut omnes in hunc usque diem post ipsum,) quod, propter contextum, ut dixi, cordis cum pulmone, non videret vias, per quas sanguis è venis in arterias transferri posset?

Quod dubium etiam Anatomicis (dum semper in dissectionibus inveniunt arteriam venosam, & sinistrum ventriculum cordis repletos sanguine, eoque crasso, grumefcente, atro,) non mediocriter perturbat; cum sanguinem, è dextro ventriculo in sinistrum, per septum cordis, transudare, coacti sint affirmare: sed hanc viam antea refutavi.

Nunc itaque via paranda est & aperienda, qua inventa, nulla erit difficultas, quæ quempiam (credo) inhibebit, quo minus quæ ante proposui (de pulsu cordis, & de dispensatione sanguinis in universum corpus per arterias) concedere & agnoscere facile posset.

C A P. V I.

Quibus viis sanguis, è venâ cavâ in arterias, vel è dextro ventriculo cordis in sinistrum deferatur.

Cum errandi occasionem præbuisse probabile sit, quam in homine

mine vident (ut dixi) cordis cum pulmone connexionem : in hoc peccant, qui de partibus animalium (uti vulgo omnes Anatomici faciunt) quidpiam pronunciare & demonstrare, aut cognoscere volunt, quod unum tantum hominem, eumque mortuum introspiciant, & sic tanquam qui una rei publ. formâ perspectâ, disciplinam politicam componere, aut unius agrî naturam cognoscentes, agriculturam se scire opinantur, nihilo plus agunt, quàm si ex unâ particulari propositione, de universali syllogizare, darent operam.

Veruntamen, si in dissectione cæterorum animalium æquè versati essent, ac in humani cadaveris anatomie exercitati, res hæc (quæ in dubio omnes perplexos retinet) palam absque omni difficultate, in ea sententia elucesceret.

In piscibus, in quibus unus tantum ventriculus cordis (ut non habenti-

bus pulmones) res primum satis manifesta est. Vesicam enim sanguinis, in basi cordis positam, auriculæ nimirum analogon, sanguinem in cor immittere, eundemque cor denuo per fistulam sive arteriam, vel arteriæ analogon, apertè transmittere, tum visu, tum secta arteria (exinde sanguine singulâ pulsatione cordis profiliante) oculis palam confirmari posse constat.

Idem etiam in omnibus animalibus, quibus unus duntaxat ventriculus, vel quasi unus contigit, non difficile est cernere; ut in bufone, rana, serpentibus, lacertis; quæ etsi pulmones aliquo modo habere dicantur, ut quæ vocem habent (de quorum pulmonum artificio admirando, & de cæteris ejusmodi, permultas apud me observationes habeo, quæ non sunt hujus loci) tamen ex autopsiâ eodem modo in illis è venis in arterias sanguinem pulsu cordis traduci, palam est:

est : quæ via tam patens, aperta & manifesta est, at nulla difficultas, nullus hæsitandi sit locus. In his enim perinde se res habet atque in homine; si septum cordis perforatum, aut ademptum esset, aut unus ex utrisque fieret ventriculus, nemo credo dubitaret, quâ viâ sanguis è venis in arterias transire posset.

Cùm verò major numerus animalium non habentium pulmones sit, quam habentium; & similiter major numerus sit, unum tantum ventriculum cordis, quàm habentium duos: proclive est statuere in animalibus *ἐπὶ τὸ πλεον* ut plurimum, & in universum, sanguinem apertâ viâ è venis in arterias per cordis sinum transmitti.

Consideravi mecum, quod etiam in embryonibus iis, qui pulmones habent, idem apertissimè constet: nam in fœtu vasa cordis quatuor (videlicet vena cava, vena arteriosa, arteria venalis, & aorta, sive arteria magna)

alio modo uniuntur, quàm in adulto : quod omnes Anatomici norunt satis.

Primus contactus & unio venæ cavæ cum arteria venosa (quæ fit priusquam cavâ, in dextrum ventriculum cordis, se aperiat, aut venam coronalem emittat, paululum supra egressum ab hepate) anastomosin lateralem exhibet, hoc est, foramen amplum, patens, ovali figurâ pertusum, è cavâ in arteriam illam pervium; ita ut (tanquam per unum vas) per illud foramen sanguis de venâ cavâ in arteriam venosam, & auriculam cordis sinistram, usque in ventriculum sinistrum, liberri-
mè & copiosissimè dimanare possit. Insuper in illo foramine ovali, è regione, quâ arteriam venosam respicit, operculi instar membrana tenuis & dura est, foramine major, quæ postea in adultis, operiens hoc foramen & coalescens undique, istud omnino obstruit & prope obliterat. Hæc, inquam, membrana sic constituta est,
ut,

ut, dum laxè in se concidit, faciat ad pulmones & cor viam, resupinetur, & sanguini à cavâ affluenti cedat quidem, at ne rursus in cavam refluat, impediat. Ut liceat existimare, in embryone sanguinem continuo debere per hoc foramen transire de venâ cavâ in arteriam venosam, inde in auriculam sinistram cordis, & postquam ingressus fuerit, remeare nunquam posse.

Altera unio est venæ arteriosæ (quæ fit postquam vena illa, è dextro ventriculo egressa, in duos dividitur ramos) estque tanquam, duobus dictis, tertius truncus & quasi canalis arteriosus, ab hinc in arteriam magnam obliquè ductus & perforatus: ut in dissectione embryonum quasi duæ aortæ, vel duæ radices arteriæ magnæ è corde exorientes, appareant.

Canalis hic in adultis similiter sensim attenuatur, tabescit, & penitus tandem, ut vena umbilicalis, exsiccat & aboletur.

Iste

Iste canalis arteriosus nullam membranam in se habet, sanguinis motum hinc, vel illinc impredientem. Sunt enim in orificio illius venæ arteriosæ (cujus iste canalis, uti dixi, propago est) valvulæ sigmoïdes tres, quæ intus foras spectant, & sanguini, è dextro ventriculo hâc viâ in magnam arteriam fluenti, cedunt facilè; contra verò ab arteriâ quidquam, aut à pulmonibus, in dextrum ventriculum ad amissum clausum, remeare omnino impediunt. Ut hic etiam arbitrari consentaneum sit in embryone, dum cor sese contrahit continuo sanguinem è dextro ventriculo hac via in arteriam magnam invehiri.

Quòd vulgo dicitur, has duas uniones tam magnas, patentes & apertas, nutriendorum pulmonum causâ, factas fuisse tantum, & in adultis (cùm jam pulmones propter calorem & motum, copiosius nutrimentum desiderent) aboleri & consolidari, commentum.

mentum improbabile est & malè cohærens.

Similiter, quod dicant, cor in embryone feriari & nihil agere, nec movere, atque hinc natura hos transitus facere, alendorum pulmonum causa, coacta sit, falsum est: cùm in ovo, cui gallina incubuit, & in embryonibus recenter ex utero exsectis, autopsiâ pateat, tum cor movere, sicut in adultis, tum naturam nullâ tali necessitate urgeri.

Cujus motus non solum hi oculi sæpe testes, sed & *Aristoteles* attestatur ipse (*l. de spir. 3.*) *Pulsus* (inquit) *per initia statim in constitutione cordis emergit, quod in sectione vivorum, & pulli formatione ex ovo deprehenditur.* Quin & observamus has vias (tam in hominum genere, quam in cæteris animalibus) non solum apertas & patentes esse, usque ad tempus partus (ut annotarunt *Anatomici*) sed etiam permultos post menses, imo in aliquibus per

per aliquot annos, ne dicam toto vitæ curriculo; veluti in anser, bucagine & avibus plurimis & animalibus, præsertim in minoribus. Quæ res imposuit forsan Botallo, ut assereret, se novum transitum sanguini, de venâ cavâ in sinistrum ventriculum cordis invenisse: fateor, me quoque (cùm in mure majori jam adulto hoc primum ipse reperi,) tale quid statim existimasse.

Ex quibus intelligitur, in Embryone humano, quin & in aliis, in quibus istæ uniones non abolentur, id ipsum accidere; ut cor suo motu, per patentissimas vias, sanguinem de venâ cavâ in arteriam magnam, apertissimè traducat, per utriusque ventriculi ductum. Dexter siquidem sanguinem ab auriculâ recipiens, inde per venam arteriosam & propaginem suam (canalem arteriosam dictam) in magnam arteriam propellit. Sinister similiter, eodem tempore, mediante auriculæ
motu,

motu, recipit sanguinem (in illam sinistram auriculam deductum, scilicet per foramen ovale, è venâ cavâ) & tentione suâ, & constrictione, per radicem aortæ, in magnam itidem arteriam simul impellit.

Ita in embryonibus (dum pulmones otiantur, & nullam actionem aut motum habent, quasi nulli forent) natura duobus ventriculis cordis quasi uno utitur, ad sanguinem transmittendum. Et similis est conditio embryonum pulmones habentium, (dum adhuc pulmonibus non utuntur) ac est eorum animalium, qui pulmones non habent.

Itaque tam clarè in his etiam elucescit veritas, quod cor suo pulsu sanguinem, è venâ cavâ, in arteriam magnam traducat & transfundat, perque tam patentes & apertas vias, ac si in homine, quod dixi, ambo ventriculi (eorum septo adempto) ad invicem pervii essent facti.

Cum

Cùm itaque majori ex parte animalibus omnibus, quodam tempore, patentissimæ istæ extent viæ, quæ transmissioni sanguinis per cor interviunt: restat ut inquiramus. Aut, cur in quibusdam animalibus) ut in homine) iisque calidioribus & adultis, per pulmonum substantiam illud fieri non existimemus, quod in embryone natura antea fecit, per eas vias (illo tempore, quo pulmonum nullus erat usus) quas, ob defectum transitus per pulmones, coacta videbatur facere? Aut, cur melius sit (natura enim semper quod est melius, facit) in adolescentibus, sanguinis transitui naturam omnino occlusisse vias patentes illas, quibus antè in embryone & fœtu usa fuerat, & omnibus aliis animalibus utitur, neque alias ullas pro illo sanguinis transitu aperuisse, sed sic omnino impedire?

Ita jam eo res cessit, ut has in homine quærentibus vias (quibus sanguis,

guis, è venâ cavâ in sinistrum ventriculum & arteriam venosam, permeat) majus operæ pretium sit, & rectè magis factum videatur, cùm ex dissectione animalium, veritatem investigare velint, ut causam inquirant, cur in majoribus & perfectioribus animalibus, iisque adultis, natura sanguinem transcolari per pulmonum parenchyma potius velit, quàm, ut in cæteris omnibus, per patentissimas vias: & tum, nullam aliam viam & transitum excogitari posse, intelligent. Sive hoc fiat, quod majora & perfectiora animalia sint calidiora, cumque sint adulta, eorum calor magis (sic dicere liceat) ut igniatur & suffocetur, sit proclivis, & ideo transire, & trajici per pulmones, ut inspirato aëre contemperetur, & ab ebullitione & suffocatione vindicetur, opus sit, sive quid aliud tale. Sed hæc determinare, & rationem hujus reddere, nihil aliud agere est, quam
propter

propter quid pulmones facti sunt, speculari.

Haftenus de his, horumque usu & motu, de eventatione omni, aërisque necessitate & usu, & cæteris hujusmodi; de variis etiam & differentiis organis, hujus causa in animalibus factis: quæ licet multis & quam plurimis observationibus à me deprehensa sint, tamen, ne nimium à proposito, de motu & usu cordis, hoc loco aberrando, aliud agere, stationem relinquere, remque interturbare & subterfugere videar; hæc proprio tractatu convenientius exponenda relinquam: & quæ restant, ut ad propositum scopum revertar, confirmare pergam.

In perfectioribus itaque & calidioribus animalibus, iisque adultis (ut in homine) sanguinem de dextro ventriculo cordis per venam arteriosam in pulmones, & inde per arteriam venosam in sinistram auriculam, & subinde

inde in ventriculum cordis sinistrum permeare, primum posse, deinde ita fieri ostendam.

C A P. VII.

Sanguinem, de dextro ventriculo cordis, per pulmonum parenchyma, permeare in arteriam venosam, & sinistrum ventriculum.

Fieri autem hoc posse, & nihil esse quo minus fiat, satis constat, cum, quomodo aqua per terræ substantiam permeans, rivulos & fontes procreet, consideremus; aut, quomodo per cutem sudores, per parenchyma renum urina fluat, speculemur.

Animadvertendum est in iis, qui aquis Spadensibus utuntur, vel de la Madonna (ut ajunt) in agro Patavino, vel aliis acidulis, aut vitriolatis, & ad congios ingurgitant potum, quod una aut altera hora, per vesicam emingant totum: debet ista copia

pia aliquantulum in concoctione immorari; debet per jecur (ut, singulis diebus bis, ingesti alimenti succum omnes confitentur facere) debet per venas, per renum parenchyma, per ureteres in vesicam profluere.

Sunt qui negant posse sanguinem, imo totam massam sanguineam, per pulmonum substantiam, æquè ac succus alimentalis per jecur, permeare; tanquam impossibile & nullo modo credibile. Existimo, quod hoc genus hominum (cum Poëta loquor) ubi volunt, concedant facilè, ubi nolunt, nullo modo; iidem hic ubi opus est verentur, ubi nihil opus, ibi non verentur simile affirmare.

Jecoris parenchyma densius multo est, & similiter renum, quàm pulmonum, quod rarioris multo texturæ, & si renibus & jecori conferantur, spongiosæ sunt.

In jecore nullum impellens, nulla vis cogens; in pulmone ex pulsu dextri

tri ventriculi cordis impingitur sanguis ; cujus impulsu distendi vasa, & porositates pulmonum necesse est. Præterea pulmones in respirando elevantur & concidunt (*Galenus de usu part.*) quo motu necesse est, ut porositates & vasa aperiantur & claudantur ; ut in spongiis contingit, & in omnibus particulis habentibus constitutionem spongiosam, quando constringuntur, si non rursus dilatantur. Contra jecur quiescit, nec ita dilatari & constringi visum est.

Denique si per jecur, totum ingestorum succum, in venam cavam, tam in homine, quam in bove, & maximis animalibus, pertransire posse, nemo sit qui non asserat; præterea quod pertransire aliqua nutrimentum, & permeare in venas sit necesse (si fieret nutritio) cumque nulla alia extet via, ut proinde hoc affirmare coacti sint: cur non iisdem argumentis, de transitu sanguinis in adultis
per

per pulmones, fidem similem habent? & cum *Columbo* peritissimo, doctissimoque Anatomico idem asserunt & credunt, ex amplitudine & fabricâ vasorum pulmonum? arteria enim venosa, & similiter ventriculus, repleti sint semper sanguine, quem è venis huc venisse necesse est, nulla alia, quàm per pulmones, semita: ut quod ille, & nos, ex antè dictis & autopsiâ, aliisque argumentis, palam esse existimamus.

Sed quia aliqui sunt, qui nil, nisi adductis auctoritatibus, admittunt; iidem ex ipsius etiam *Galen*i verbis, hanc veritatem confirmari posse sciant; scilicet, non solum posse sanguinem, è venâ arteriosâ in arteriam venosam, & inde in sinistrum ventriculum cordis, & postea in arterias transmitti; sed, ex continuo pulsu cordis, & pulmonum motu inter respirandum, hoc fieri.

Sunt in orificio venæ arteriosæ,
val-

valvulæ tres figinoïdes, sive semi-lunares, quæ omnino sanguinem, in illam venam arteriosam immissum, non sinunt remeare in cor; quod omnes norunt.

Harum valvularum necessitatem & usum Galenus his verbis explicat, (de usu part. 6. cap. 10.) In toto est (inquit) *mutua Anastomosis*, atque osculorum *apertio arteriis simul cum venis*; transsumuntque ex sese pariter sanguinem & spiritum, per invisibiles quasdam atque angustas planè vias. Quod si os ipsum *venæ arteriosæ* itidem semper patuisset, nullamque natura invenisset machinam, quâ claudere ipsum, cum est tempestivum, ac rursus aperire queat; fieri nunquam potuisset, ut per invisibilia, atque exigua oscula, sanguis (contracto thorace) in arterias transumeretur. Neque enim similiter omnis ex quovis attrahitur, neque emittitur: sed quemadmodum quod leve est, facilius eo quod gravius, dilatatis instrumentis attrahitur, iisdem autem contractis exprimi-

tur: ita & per latam viam celerius aliquid, quàm per angustam trahitur ac rursus emittitur. Cùm autem thorax contrahitur, pulsa atque intro compressa undique fortiter, quæ in pulmone sunt venosæ arteria, exprimunt quidem quam celerrimè, qui in seipsis est, spiritum transsumunt autem per subtilia illa oscula sanguinis portionem aliquam, quod nunquam accidisset profecto, si sanguis per maximum os (cujusmodi est vena arteriosa) ad cor retro remeare potuisset. Nunc verò reditu per os magnum intercluso, dum comprimitur undique, destillat quidpiam in arterias per exigua illa orificia. Et paulò pòst sequ. capit. Quanto thorax contendit vehementius sanguinem elidens, tanto membrana (videlicet valvula sigmoides) exactius os ipsum occludunt, & nihil remeare sinunt. Quod & eodem Capitulo 10. paulò antè. Nisi valvula essent, triplex sequeretur incommodum; ita sanguis ipse frustra longum hoc curriculum subinde emetiretur; in Diastolis quidem pulmonis, (adfluens & (quæ

& (qua in ipso sunt) venas omnes refarciens; in Systolis verò, quasi aestus quidam maritimus, instar Euripi, motum identidem, huc atque illuc reciprocans; qui hanc^a quaquam sanguini conveniret: at hoc videri posset exiguum. Quod verò interim ipsius quoque respirationis utilitatem labefactet, id non amplius pro parvo est habendum, &c. Et paulò post: Atque etiam tertium secutum fuisset incommodum, hanc^a quaquam contemnendum, cum sanguis retro in expirationibus remigrasset, nisi opifex noster membranarum Epiphysin fuisset fabricatus. Unde concludit Capit. II. Communis autem ipsorum omnium, videlicet valvularum, est usus, ut materias retro remigrare prohibeant; utrarumque verò proprius, educentium quidem è corde materias, ne amplius ad ipsum remeent; inducentium verò, ne amplius ex ipso effluant. Non enim volebat natura vano labore cor fatigari, neque in eam partem mittere, unde trahere praestiterat, neque rursus ex illâ identidem ducere, ad quam

mittere erat necesse. Proinde cùm sint quatuor omnino orificia, bina in utroque ventriculo, alterum quidem inducit, alterum però educit. Et paullò pòst: Porro cùm vas alterum, quod tunica simplici constat, in cor infigatur, alterum, quòd duplici ex ipso producat: communem utrique locum, (videlicet ventriculum dextrum Galenus intelligit, & ego eâdem ratione similiter sinistrum ventriculum cordis) quasi lacunam quandam, parari necesse fuit, ad quam pertinentibus utrisque, per alterum quidem trahatur sanguis, per reliquum però emittatur.

Quod argumentum Galenus, pro transitu sanguinis per dextrum ventriculum de venâ cavâ in pulmones, adducit; eodem nobis rectius, pro transitu sanguinis, de venis per cor in arterias, mutatis tantum terminis, uti liceat. Ex Galeni igitur, viri divini, patris Medicorum, locis & verbis clarè apparet, sanguinem per pulmones de venâ arteriosâ, in arteriæ venosæ

ſæ ramulos permeare, tum propter pulſum cordis, tum propter pulmonum & thoracis motum. (Vide *Hofmanni doctiſſimi Commentarium ſupra Galeni lib. 6. de uſu part.* quem librum poſtquam hæc à me ſcripta eſſent, vidi.)

Ex eodem patet cor continuè in ventriculos, quaſi lacunam, recipere & emittere ſanguinem; & huic rei pro cauſa, valvularum genera quatuor, duo inductioni, emiſſioni ſanguinis duo inſervire; ne aut ſanguis Euripi in morem, inconvenienter agitur huc, illuc; aut retro remeet, unde trahi præſtiterat; & ex illâ reſſuat parte, ad quam mitti erat neceſſe; ne ſic vano labore fatigetur, & pulmonum reſpirationis præpediatur.

Denique clarè apparet aſſertio noſtra, continuè & continenter ſanguinem per pulmonum porofitates permeare, de dextro in ventriculum

sinistrum, de venâ cavâ in arteriam magnam. Nam cum continuo, de dextro ventriculo immittatur sanguis in pulmones per venam arteriosam; & similiter continue è pulmonibus in sinistrum attrahatur, (quod ex dictis & valvularum positione patet) quin pertranseat continue, fieri non potest.

Itidem, cum semper & continue ingrediatur sanguis in cordis ventriculum dextrum & egrediatur, similiter de sinistro ventriculo, (quod ratione & sensu patet) quin continuo pertranseat sanguis de venâ cavâ in aortam, impossibile est.

Illud igitur in animalibus, majori ex parte & planè omnibus, dum primum crescunt, per patentissimas fieri vias, ex dissectione manifestum est; quod in his jam adultis per pulmonum cæcas porositates & vasorum ejus oscula, tam ex *Galen*i verbis, quàm ex ante dictis, fieri, æquè manifestum est.

est. Unde apparet, quod quanquam unus ventriculus cordis, videlicet sinister, sufficiens esset sanguinis dispensationi per corpus & educationi è venâ cavâ, (quemadmodum etiam sit in omnibus quæ pulmonibus carent) natura, cum voluerit sanguinem per pulmones transcolari, dextrum ventriculum superaddere coacta fuerit, cujus pulsu, per ipsos pulmones, è venâ cavâ in sinistri ventriculi locum, sanguis compelleretur; atque hoc modo, dextrum ventriculum, pulmonum causâ, scilicet propter translocationem sanguinis, non propter nutritionem duntaxat, factum esse dicendum. Quandoquidem, tanto proven-
tu annonæ, compulsu subministrato, & tanto puriore & spirituosiore (utpote immediatè à ventriculis cordis subvecto) indigere alimento pulmones magis, quàm aut cerebri purissimam substantiam, aut oculorum splendidissimam & divinam constitu-

tionem , aut ipsius cordis carnem ,
(quæ rectius per arteriam coronalem
nutritur)inconveniens omnino est ex-
istimare.

C A P. VIII.

*De copia sanguinis transeuntis, per cor
è venis in arterias, & de cir-
culari motu sanguinis.*

HUc usque de transfusione san-
guinis è venis in arterias , & de
viis per quas pertranseat, & quomodo
pulsu cordis, transmittatur dispense-
turque: quibus forsan aliqui, qui an-
tea sunt aut *Galen*i auctoritate, aut *Co-*
lumbi, aliorumve rationibus, adducti,
assentiri se dicent. Nunc verò, quæ
restant de copiâ & proventu istius
pertranseuntis sanguinis, (licet valdè
digna consideratu) cùm dixero; adeò
iis nova erunt & inaudita, ut non so-
lùm ex invidiâ quorundam, metuum
malum mihi, sed verear, ne habeam
ini-

inimicos omnes hominēs. Tantum consuetudo, aut semel imbibita doctrina, altisque defixa radicibus, quasi altera natura, apud omnes valet, & antiquitatis veneranda opinio cogit. Ut cumque sit, jam jacta est alea, spes mea in amantium veritatis & doctorum animorum candore sita.

Sanè cùm, copia quanta fuerit, sæpius mecum & serio considerassem; tum ex vivorum (experiendi causa) dissectione & arteriarum apertione, disquisitioneque multimoda; tum ex ventriculorum cordis, & vasorum ingredientium & egredientium symmetria & magnitudine; (cùm natura nihil faciens frustra, tantam magnitudinem, proportionabiliter his vasis frustra non tribuerit) tum ex concinno & diligenti valvularum & fibrarum artificio, reliquaque cordis fabrica; tum ex aliis multis: cùmque animo diutius evolvissem, quanta scilicet esset copia transmissi sanguinis; quam brevi

tempore ea transmissio fieret; anne suppeditare ingesti alimenti succus eam posset; animadverti tandem, venas inanitas & omnino exhaustas, & arterias ex alterâ parte, nimia sanguinis intrusionè, disruptas fore; nisi sanguis aliquâ viâ ex arteriis denuo in venas reinearet, & ad cordis dextrum ventriculum regrederetur.

Cœpi egomet mecum cogitare, an motionem quandam quasi in circulo haberet: quam postea veram esse reperi, & sanguinem, è corde per arterias, in habitum corporis & omnes partes, protrudi & impelli, à sinistri cordis ventriculi pulsu (quemadmodum in pulmones per venam arteriosam à dextri) & rursus per venulas in venam cavam, & usque ad auriculam dextram reineare; quemadmodum ex pulmonibus per arteriam dictam venosam, ad sinistrum ventriculum, ut antè dictum est.

Quem motum circularem eo pacto
nomi-

nominare liceat, quo *Aristoteles*, aërem & pluviam circularem superiorum motum æmulari, dixit. Terra enim madida à Sole calefactâ evaporat; vapores sursum elati condensantur; condensati in pluvias rursus descendunt; terram madefaciunt; & hoc pacto fiunt hic generationes & similiter tempestatum & meteororum ortus, à Solis circulari motu, accessu & recessu.

Sic verisimiliter contingit in corpore; motu sanguinis; partes omnes sanguine calidiore, perfectio, vaporoso, spirituofo, (& ut ita dicam) alimentativo nutriri, foveri, vegetari; in partibus sanguinem refrigerari, coagulari, & quali effœtum reddi; inde ad principium, videlicet, cor, tanquam ad fontem sive ad lares corporis, perfectionis recuperandæ causa, reverti; ibi calore naturali, potenti, fervido, tanquam vitæ thesauro, de novo colliquari; & spiritibus (ut ita

dicam) tanquam balsamo prægnantem, inde rursus in omnes partes dispensari; atque hæc omnia à motu & pulsu cordis dependere.

Ita cor principium vitæ & Sol microcosmi (ut proportionabiliter Sol cor mundi appellari meretur) cujus virtute & pulsu sanguis movetur, perficitur, vegetatur, & à corruptione & grumefactione vindicatur, suumque officium nutriendo, fovendo, vegetando, toti corpori præstat lar iste familiaris, fundamentum vitæ, auctor omnium. Sed de his convenientius, cùm de hujusmodi motus causa finali speculabimur.

Hinc, cùm venæ sint viæ quædam, & vasa deferentia sanguinem, duplex est genus ipsarum; cava & aorta; non ratione lateris (ut *Aristoteles*) sed officio; & non (ut vulgò) constitutione, cùm in multis animalibus (ut dixi) in tunicæ crassitie, vena ab arteriâ non differat; sed munere & usu distin-

distinctæ sunt. Vena & arteria, ambæ à Veteribus Venæ non immerito dictæ, ut *Galenus* annotavit; eo quod hæc, videlicet arteria, vas est deferens sanguinem, è corde in habitum corporis; illa sanguinem ab habitu rursus in cor; hæc, via à corde; ad cor usque, illa; illa continet sanguinem crudiores, effæctum, nutritioni jam redditum inidoneum; hæc, coctum, perfectum, alimentativum.

C A P. IX.

Esse sanguinis circuitum, ex primo supposito confirmato.

SEd ne, verba dare nos, dicat quispiam, & assertiones speciosas tantum facere sine fundamento, & non justâ de causâ innovare: tria confirmanda veniunt, quibus positis, necessario hanc sequi veritatem, & rem palam esse arbitror.

Pri-

Primò , continuè & continenter , sanguinem è venâ cavâ in arterias , in tantâ copiâ , transmitti pulsu cordis , ut ab assumptis suppeditari non possit , adeò ut tota massa brevi tempore illinc pertranseat.

Secundò , continuè æquabiliter & continenter sanguinem , in quodcunque membrum & partem , pulsu artèriarum , impelli & ingredi , majori copia multo , quàm nutritioni necessarium sit , vel tota massa suppeditari possit.

Et similiter tertio , ab unoquoque membro , ipsas venas , hunc sanguinem perpetuò retroducere ad cordis locum.

His positis , sanguinem circumire , revolvi , propelli & remeare , à corde in extremitates , & inde in cor rursus , & sic quasi circularem motum peragere , manifestum puto fore.

Supponamus (vel cogitatione , vel experimento) quantum sanguinis, sinister

ster ventriculus in dilatatione (quum repletus sit) contineat sive $\frac{3}{4}$ ij, sive $\frac{3}{4}$ iij, sive $\frac{3}{4}$ j ss, ego in mortuo reperi ultra $\frac{3}{4}$ ij.

Supponamus similiter, quanto minus in ipsâ contractione, vel quando sese contrahit cor sit, & quanto minorem ventriculus capacitatem habeat in ipsâ contractione, tanto minus continere, atque inde quantum sanguinis in arteriam magnam protrudatur: protruditur in Systole enim aliquid semper, quod antè demonstratum est cap. 3. & omnes fatentur, ex fabricâ valvularum persuasi) verisimili conjectura ponere licet, in arteriam immitti partem vel quartam vel quintam, vel sextam, & ad minimum octavam.

Ita in homine protrudi, singulis cordis pulsibus, supponamus $\frac{3}{4}$ ss, vel $\frac{3}{4}$ iij, vel $\frac{3}{4}$ j sanguinis, qui, propter impedimentum valvularum, in cor remeare non potest.

Cor

Cor una semihora plus quam mille pulsus facit ; imo in aliquibus , & aliquando bis , ter , vel quater mille. Jam multiplicatis drachmis , videbis una semihora aut millies drachmas tres , vel drachmas duas , aut uncias quinquies centum , aut talem aliquam proportionatam quantitatem sanguinis , per cor in arterias transfusam ; quæ major est copia quàm in universo corpore contingat reperiri. Similiter in ove , aut cane , si pertransit (esto) scrupulus unus , in unâ cordis contractione ; tum una semihora mille scrupuli vel circiter libræ tres & semi sanguinis transeunt , in quorum corpore plerumque non continetur plus quatuor libris sanguinis ; quod in ove expertus sum.

Ita penè , supputatione facta , secundum quam nimirum conjectare possumus transmissi sanguinis copiam , enumeratis pulsationibus , videtur omnis quantitas sanguineæ massæ pertransire,

ire, de venis in arterias per cor, similiter per pulmones.

Sed esto, quod non una semihora, fessit integra, vel unâ die, utcumque velis, fiat; manifestum est plus sanguinis per cor, ejus pulsu transmitti continuè, quam vel ingestum alimentum suppeditare, vel in venis simul contineri possit.

Nec est dicendum, quod cor in suâ contractione aliquando protrudat, aliquando non, vel quasi nihil & imaginarium quid. Hoc à me antè refutatum est, & præterea sensui contrarium est & rationi. Si enim, dilatato corde. repleri necesse est ventriculos sanguine; contracto, necesse est protrudere semper & non parum, cùm & ductus non parvi & contractio non pauca sit: in quavis propulsione proportio sanguinis exclusi, (videlicet, subtripla, sextupla, vel suboctupla) debet respondere quantitati prius contentæ, & in dilatatione replenti;
uti

uti se habet capacitas contracti ventriculi ad dilatati : quemadmodum eum in dilatatione non contingit repleri nihilo, vel imaginario, ita in contractione nunquam nihil, vel imaginarium expellit, sed semper aliquid secundum proportionem contractionis. Quare concludendum, si uno pulsu in homine, vel ove, vel bove, cor emittat drachmam unam, & mille fiant pulsus in una semihora, contingere eodem tempore, libras decem & uncias quinque transmissas esse; si uno pulsu drachmas duas, ℥ xx & ⅔ x; si semi-unciam, ℥ xlj, & ⅔ viij; si ⅔, ℥ lxxxiiij & ⅔ iiij contingere in unâ semihora transfusas (inquam) esse de venis in arterias.

Sed quantum, in unoquoque, protrudatur singulis pulsationibus, & quando plus, & quando minus, & quâ de causa, accuratius post hæc, ex multis observationibus, à me forsan palam fiet.

Inte-

Interim hoc scio, & omnes admonitos velim, quod aliquando uberiori copia pertransit sanguis, aliquando minore; & sanguinis circuitus quandoque citius, quandoque tardius peragitur, secundum temperamentum, ætatem, causas externas & internas, & res naturales & non naturales, somnum, quietem, victum, exercitia, animi pathemata, & similia.

Verùm enim verò, cùm per pulmones & cor, vel minimâ copiâ transeat sanguis, longè uberiori proventu, in arterias & totum corpus deducitur, quàm ab alimentorum ingestione suppeditari possibile sit, nisi regressu per circuitum facto.

Hoc etiam palam fit sensu, vivorum dissectionem intuentibus, non solum aperta magna arteria, sed (quod confirmat *Galenus*, in ipso homine) si quævis vel minima arteria dissecta fuerit, unius penè semihoræ spatio, totam sanguinis massam, è toto corpore

pore, tam venis quàm arteriis, exhaustam fore.

Similiter Laniones, hoc satis attestari possunt, quando, rescissis arteriis jugularibus, in mactando bove, unius horæ quadrante minus; totam sanguinis massam exhauriunt, & vasa omnia inanita reddunt: in membrorum excisione & tumorum, ex largâ sanguinis profusione, itidem comperimus aliquando brevi contingere.

Nec astringit hujus argumenti vim, quod, per venas effluere (in jugulatione & in membrorum excisione) æque sanguinem, si non magis, quàm per arterias, dicat quispiam, cum contra feres habeat. Venæ enim quia subsidunt, quia in ipsis nulla vis cogens foras, & quia impedimento valvularum compositio est (ut postea patebit) parum admodum reddunt: arteriæ verò impetu impulsam sanguinem foras, largius, impetuosius, tanquam cum syphone ejectum, profundunt.

Ex-

Experienda res est : omiffa vena & incifa jugulari arteriâ in ove, vel cane; admirabile videbitur , quanto impetu, quantâ protrufione, quam cito, omnem fanguinem, è toto corpore, tam venis, quàm arteriis, contingat inani-ri.

Arterias autem nullibi fanguinem è venis recipere, nifi transmiſſione facta per cor, ex ante dictis, patet. Quare , ligando aortam ad radicem cordis , & aperiendo jugularem , vel aliam arteriam , fi arterias inanitas & ſolum venas repletas conſpexeris, mirari non convenit.

Hinc cauſam apertè videbis , cur in Anatome tantùm ſanguinis reperiatur in venis , parum verò in arteriis; cur multum in dextro ventriculo , parum in ſiniſtro; cauſa forſan eſt, quod, de venis in arterias, nullibi datur tranſitus, nifi per cor ipſum & per pulmones.

Hæc res forſan antiquis dubitandi præ-

præbuit occasionem & existimandi, spiritus solos in illis concavitatibus contineri, dum vitæ superstes animal esset.

Cùm enim expiraverint pulmones & moveri desiverint, de venæ arteriosæ ramulis in arteriam venosam, & inde in sinistrum ventriculum cordis, sanguis permeare prohibetur; cùmque unà cum pulmonibus cor non desinat moveri, sed postea pulsare & supervivere pergat; contingit sinistrum ventriculum & arterias emittere, in venas ad habitum corporis sanguinem & per pulmones non recipere, ac proinde inanitas ire.

Sed hoc nec uno cordis ventriculo donatis, nec quibus uterque pro uno inservit (ut in embryone notatum antea est) accidit: iis non prohibetur, ob defectum pulmonum motus, oscula & porositates cæcas & invisibiles apertis & claudentis, sanguinis transitus; dum is per apertas manifestasque
ana-

anastomoses (foramen ovale & ductum arteriosum) perfluat.

Quod in rem nostram non parum facit fidei; cum hujus nulla alia causa (nisi quam nos ex nostrâ suppositione afferimus) adduci possit.

Præterea hinc patet, quo magis, aut vehementius arteriæ pulsant, eo citius, in omni sanguinis hæmorrhagia, inanitum iri corpus.

Hinc etiam in omni lipothymia, omni timore, & hujusmodi, quando cor languidius & infirmius, nullo impetu pulsat, omnem contingit hæmorrhagiam sedari & cohiberi.

Hinc etiam est, quod corpore mortuo, postquam cor cessavit pulsare, non possit, vel è jugularibus, vel cruralibus venis & arteriis apertis, ullo conatu, massæ sanguineæ plus quàm pars media elici. Nec lanio, si bovi (postquam ejus caput percusserit, & attonitum reddiderit) jugulum prius non secuerit, quàm cor pulsare desierit,

rit, totum sanguinem exhaurire inde poterit.

Denique, hinc, de Anastomosi venarum & arteriarum (ubi sit & quomodo sit, & quâ de causâ) neminem hactenus rectè quidquam dixisse, licet suspicari, ego in illâ disquisitione jam sum.

C A P. I.

Primum suppositum (de copia pertrans-euntis sanguinis è venis in arterias, & esse sanguinis circuitum) ab objectionibus vindicatur, & experimentis ulterius confirmatur.

HActenus primum suppositum confirmatum est, siue res ad calculum revocetur, siue ad experimenta & autopsiam referatur. Videlicet: quod sanguis pertranseat in arterias, maiori copia continue, quàm ab alimento suppeditari possit, ita ut,
tota

secundum naturam constitutis, tantam copiam* pertransire tam brevi spatio, adeò ut regressum fieri sit necesse. Respondendum, quod, ex ante dictâ computatione, subductâ ratione, apparet, quantum cor repletum ulterius contineat in suâ dilatatione quàm in constrictione, tantundem (majori ex parte) singulis pulsationibus emitti, & proinde in tanta copia, pertransire integro corpore, & secundum naturam constituto.

Sed in serpentibus & piscibus quibusdam, ligando venas per aliquod spatium infra cor, videbis spatium inter ligaturam & cor valde cito inaniri, ita ut regredi sanguinem (nisi autopsiam neges) asserere necesse habeas. Posterius etiam idem clarè patebit in secundi suppositi confirmatione.

Hæc omnia, uno exemplo confirmantes, concludamus, quo fidem oculis propriis adhibere unusquisque possit.

Qui

Qui anguem vivum dissecuerit, videbit plus quàm per integram horam cor placidè, distinctè pulsare, & sese tanquam vermem in constrictione (cùm oblongum fit) secundum longitudinem contrahere & propellere; in Systole albidiori colore esse, contra in Diastole; & reliqua penè omnia, quibus evidenter (cùm hic longiora & distinctiora inagis sint) hanc veritatem confirmatam iri diximus.

Sed hoc peculiariter & luce clarius meridiana experiri licet: vena cava partem inferiorem cordis subingreditur, exit arteria parte superiori; jam comprehensa vena cava vel tenaculis, vel digito & pollice, sanguinisque cursu intercepto, per aliquod spatium infra cor, videbitur, à pulsu statim penè inaniri illam partem intra digitos & cor; sanguine exhausto à cordis pulsu, simul cor albidiori multo colore esse; etiam in dilatatione suâ, ob defectum sanguinis, minus esse,

& longuidius tandem pulsare, sic ut emori denique videatur: cùm contra statim, soluta vena, color & dilatationis magnitudo redeant cordi.

Postea si relinquas venam; & arterias similiter, per aliquam distantiam à corde, ligaveris vel compresseris; videbis contra, illas vehementer turgere in parte comprehensâ, & cor ultra modum distendi, purpureum colorem contrahere usque ad livorem, & tandem opprimi sanguine, sic ut suffocatum iri credas: soluto verò vinculo, rursus ad naturalem constitutionem, in colore & magnitudine pulsus redire cerneris.

Ecce jam duo sunt genera mortis, extinctio ob defectum, & suffocatio ob copiam: hic ad oculos utriusque exemplum habere licet, & dictam veritatem autopsia in corde confirmare.

C A P. X I.

Secundum suppositum confirmatur.

Secundum confirmandum à nobis, quod ut clarius intuentibus appareat, annotanda sunt experimenta quædam, ex quibus patet sanguinem in quodcunque membrum per arterias ingredi, & per venas remeare; & arterias vasa esse deferentia sanguinem à corde, & venas vasa & vias esse re-gerendi sanguinis ad cor ipsum: in membris etiam & extremitatibus sanguinem (vel per anastomosis immediate, vel mediate per carnis porositates, vel utroque modo) transire ab arteriis in venas; sicut ante in corde & thorace à venis in arterias; unde in circuitum moveri, illinc huc, & hinc illuc, è centro in extremâ scilicet, & ab extremis rursus ad centrum, manifestum fit.

Postea quin etiam, computatione factâ, similiter manifestum ibidem est,

de copia, quod neque ab assumptis possit suppeditari, neque ad nutritionem necessario requiratur.

Simul etiam de ligaturis manifestum est, quomodo eæ attrahant; quod neque calore, neque dolore, neque vi vacui, neque ulla, ante hac cognita, causa fieri potest: similiter ligaturæ quàm commoditatem & usum afferre possint in medicinâ; quomodo hæmorrhagiam supprimant & provocent; & quâ de causâ gangrenas & mortificationes membrorum inducant; & sic in castratione animalium quorundam, & tumorum carnosorum & verrucarum exemptione usui sint.

Enimverò, quia nemo harum omnium causas & rationes rectè affecutus sit, hinc factum est, licet omnes ferè, ex antiquorum sententiâ, in morbis curandis, proponant & consulant ligaturas; quod pauci, earum administratione, curationibus suis vix aliquid adjumenti afferant.

Liga-

Ligatura alia stricta est, alia mediocris.

Strictam ligaturam dico, cum ita arcte undique constrictum membrum sit fascia, vel laqueo, ut, ultra ipsam ligaturam nullibi, arterias pulsare percipiatur. Tali utimur in membrorum excisione, fluxui sanguinis prospicientes: tali etiam utuntur in castratione animalium, & tumorum ablatione; qua ligatura, affluxu alimenti & caloris omnino intercepto, tabescere & emori testiculos, atque ingentes sarcoses, & postea decidere, videmus.

Mediocre[m] verò dico ligaturam, quæ undique membrum comprimit, sed citra dolorem: & sic, ut ultra ligaturam aliquantulum arteriam pulsare sinat; qualis, in attractione & in sanguinis missione usui est: nam licet supra cubitum fiat ligatura, tamen, arterias in carpo aliquantulum pulsare, tactu percipies, si rectè in phlebotomiâ fiat ligatura.

Jam experimentum fiat in brachio hominis, vel adhibita fascia quali in sanguinis missione utuntur, vel ipsius manus fortiore comprehensione; quod quidem commodius fit in macilento corpore, cui venæ sunt ampliores, & quando (calefacto corpore) calent extrema, & major quantitas sanguinis in extremitatibus est, & pulsus vehementiores; omnia enim ibi evidentiora apparebunt.

Facta itaque stricta ligatura (quam arcte fieri, & quis eam ferre, possit, constringendo) observare licet, primum, ultra ligaturam videlicet versus manum, non pulsare in carpo vel uspiam arteriam; deinde, immediate supra ligaturam incipere arteriam, altius suam diastolem habere, & magis vehementius pulsare, &, prope ipsam ligaturam, æstu quasi quodam intumescere (ac si fluxum interceptum & transitum inhibitu percurrere & referre conaretur)

ma-

magisque quam par sit, ibi repletam apparere: interea manus suum colorem retinet & constitutionem; solum tractu temporis refrigerari aliquantulum incipit, nihil verò attrahitur in eam.

Postquam per aliquod spatium permanferit ista ligatura & derepente paululum solvatur in mediocrem, quali, ut dixi, in sanguinis missione utuntur: observabitur manum totam statim colorari & distendi, & ejus venas tumidas & varicofas fieri; & spatio decem vel duodecim pulsationum arteriam, multo sanguine impulso atque impacto, refertissimam cerni, & ab illâ ligaturâ mediocri, multam copiam sanguinis affatim attractam iri absque dolore vel calore, vel fuga vacui, vel ulla alia antehac commemorata causa.

Si quis interea, in ipso illius solutionis momento, prope ligaturam, digitum ad arteriam jam pulsantem

applicaverit, quasi subtus præterlabentem sanguinem sentiet.

Ipsè porrò, cujus in brachio fit experimentum, ab ipsâ mutatione ligaturæ strictæ in mediocrem, planè calorem & sanguinem pulsu ingredientem, quasi semoto obstaculo, illico sentiet; & aliquid, secundum ductum arteriarum, tanquam confestim inflatum & sparsim per manum transmissum, percipiet, & continuo calefieri manum & distendi.

Quemadmodum in strictâ ligaturâ, arteriæ supra distenduntur & pulsant, non infra, & venæ minores fiunt; ita in mediocri, venæ infra ligaturam turgent & renitentes fiunt, supra verò nequaquam, & arteriæ minores sunt. Imo, si venas tumidas compresseris, (nisi vâldè fortiter) vix, aut supra ligaturam sanguinem diffundi, aut venas detumeri, conspicias.

Ita ex his, cuivis diligentius observanti, facilè est noscere, sanguinem
in-

ingredi per arterias : ipsarum enim strictâ ligaturâ nihil attrahitur, manus colorem servat, nihil influit, neque fit distensio; ipsis verò paululum solutis (ut in mediocri ligatura) vi & impulsu affatim sanguinem intus trudi, manumque tumidam fieri, manifestum est. Ubi sanguis profluit, ut in mediocri ligaturâ, arteriæ pulsant scilicet; ubi verò non, ut in strictâ, pulsant nequaquam, nisi supra ligaturam. Interim venis compressis, nihil per ipsas refluerè potest; cujus hoc est signum, quod infra ligaturam tumidiores multo sunt, quàm supra, & quàm dempta ligatura solent esse. Hinc quod compressæ, nihil superioribus suggerant, & quod ligatura impediât regressum sanguinis per venas ad superiora, easque infra ligaturam tumidas faciat permanere, clarè patet.

Arteriæ verò in isto casu, non obstante mediocri ligatura, vi & impulsu

cordis, ab internis corporis partibus, foras ultra ligaturam, sanguinem trudent. Hæc est differentia strictæ ligaturæ à mediocri, quod illa (stricta ligatura) non solum transitum sanguinis in venis, sed in arteriis intercipiat; hæc (quæ mediocris) vim pulificam, quo minus ultra ligaturam se exporrigat, ad extimasque corporis partes propellat sanguinem, non impediat.

Adeo ut sic ratiocinari liceat: mediocri ligaturâ quando venas turgidas & distentas esse & manum plurimo sanguine impleri videmus, unde fit hoc? Aut enim per venas aut per arterias, aut per cœcas porositates, infra ligaturam sanguis advenit: è venis, non potest: per cœcos ductus, minus: ergo per arterias, secundum quod dictum, necesse est. Per venas influere non posse, patet; cùm non retro sanguinem remeare contingat supra ligaturam, nisi ablatâ omninò ligaturâ.

râ: sed tunc subito omnes venas detumescere, & sese in superiores partes exonerare, manum dealbari, & sursum omne prius collectum & tumorem & sanguinem affatim evanescere, videtur.

Amplius; sentiet ipse, cui ita post multum spatium ligatum corpus aut brachium erat, & manus tumidæ pauloque frigidiores inde redditæ; sentiet (inquam) de solutione mediocris ligaturæ, frigidum quid sursum, usque ad cubitum vel axillas, obrepere, unâ scilicet cum revertente sanguine: quem ego frigidi sanguinis recursum (post sanguinis missionem) ad cor usque (soluta vinculo) causam esse lipothy-miæ arbitrarer; quam etiam robustis aliquando supervenire vidimus, & maxime à solutione ligaturæ: quod vulgò dicunt à conversione sanguinis fieri.

Præterea, cum statim, à solutione strictæ ligaturæ, in mediocri immis-

missione sanguinis per arterias, continuo venas intumescere videmus infra ligaturam comprehensas, non autem arterias; signum est sanguinem ab arteriis in venas, & non contra, permeare; & aut anastomosin vasorum esse, aut porositates, carnis & partium solidarum, pervias sanguini esse.

Item signum est, venas plurimas inter sese communicare, cum, ligatura mediocri supra cubitum facta, multæ attollantur simul & turgeant, ex unâ verò venulâ, scalpello exitu sanguini dato, omnes statim detumescant, & in illam unam sese exonerantes, subsistant simul penè omnes.

Hinc unusquisque potest causas attractionis, quæ fit per ligaturas, & forsan omnis fluxionis, cognoscere; videlicet (quemadmodum in manu, per ligaturam, quam dico mediocrem) quando compressæ sunt venæ sanguis exire non potest; interea si
per

per arterias vi (scilicet cordis) impingatur, dum non potest exire inde, ut repleatur & distendatur pars, necesse est.

Alias enim qui fieri posset? Calor, dolor & vis vacui attrahunt quidem, sed ut impleatur tantum pars, non ut distendatur, aut tumescat ultra naturalem constitutionem: sed ob infarctum & arcte impactum vi sanguinem, tam violenter & tam subito opprimi membrum, ut caro continui solutionem pati, & vasa disrumpi cernantur, nunquam tamen hoc aut calore, aut dolore, aut vi vacui fieri posse, credibile aut demonstrabile est.

Insuper ligatura contingit attractionem fieri, absque omni dolore, calore, aut ullâ vi vacui. Quod si à dolore aliquo accideret sanguinem attrahi: quo modo ad cubitum, ligato brachio, infra ligaturam, intumescerent & manus & digiti, & venæ
vari-

varicosæ fierent? Cùm propter ligaturæ compressionem eò pervenire sanguis per venas non possit: atque quare supra ligaturam, neque tumoris aut repletionis signum, neque venarum turgescentiæ, neque attractionis aut affluxus vestigium omnino appareret?

Sed est attractionis infra ligaturam, & tumefactionis ultra naturæ modum, in manu & digitis, hæc causa manifesta, nempe, quod sanguis cum impetu & affatim ingrediatur, exire verò nequeat. Hinc omnis tumoris causa (ut est apud *Avicen.*) & omnis redundantiaë opprimentis in parte; quia viæ ingressus apertæ, egressus clausæ, inde humorem abundare, & in tumorem partem attolli necesse est.

An hinc etiam contingat in tuberculis inflammatoriis, quod quousque tumor incrementum capescit, & non sit in ultimo statu, sentiatur eo loci
pul-

pulsus plenus, præsertim calidioribus tumoribus, in quibus incrementum derepente fieri solet, posterioris disquisitionis erit: uti an etiam hinc contingat, quod in me ipso casu expertus sum. Ego è curru delapsus, aliquantum fronte percussus, quo loco arteriæ ramulus à temporibus prorepat, statim ab ipsâ percussione, spatio ferè viginti pulsationum, tumorem ovi magnitudine, absque vel calore vel multo dolore, passus sum; propter videlicet arteriæ vicinitatem, in locum contusum, sanguis, affatim magis & velocius, impingebatur.

Hinc apparet, quâ de causâ in phlebotomiâ, quando sanguinem longius profligare & majori impetu exire volumus, supra sectionem ligamus, non infra; quod si per venas inde efflueret tanta copia à partibus superioribus, ligatura illa non modo non adjuvaret, sed impediret: etenim inferius ligandû verisimilius esset, quo sanguis
in-

inhibitus uberius exiret, si ex partibus superioribus eo per venas descendens emanaret. Sed quia aliunde per arterias impellitur in venas inferiores, in quibus regressus per ligaturam præpeditur, ideo venæ turgent, & distentæ ipsum majori impetu per orificium elidere & longius ejicere possunt; soluta verò ligaturâ, viaque regressus aperta, ecce sanguis non amplius, nisi guttatim decedit; & quod omnes norunt, si vel vinculum solveris in administranda phlebotomia, vel infra ligaveris, vel stricta nimis ligatura membrum constrinxeris, tum tamquam ablato impetu non exit: quia scilicet via, ingressus & influxus sanguinis per arterias, intercepta est stricta illa ligatura; aut regressus liberior datur, per venas, ligatura soluta.

C A P. XII.

*Esse sanguinis circuitum, ex secundo
supposito confirmato.*

HÆc cùm ita sint, constat confir-
matum iri etiam aliud, quod
antea, per cor continuo sanguinem
transire, dicebam. Videmus enim in
corporis habitu, ab arteriis sanguinem
in venas dimanare, non è venis in ar-
terias:) videmus insuper vel penè to-
tam massam sanguinis exhauriri posse
ab ipso brachio (idque una vena cuti-
culari scalpello aperta, si fiat ligatura
decens: videmus præterea, ita impe-
tuoſe & affatim effundi, ut non solum
breui & cito évacuari, qui ante sectio-
nem, in brâchio infra ligaturam, com-
prehensus erat sanguis, sed ex toto
brachio & toto corpore, tam arteriis
quàm venis, constet.

Quare confiteri necesse est primo;
vi & impetu suppeditari, & vi im-
pingi

pingi ultra ligaturam ; (vi enim & impulsu exit) & proinde à cordis pulsu & robore ; vis enim & impulsio sanguinis solum à corde.

Deinde, à corde provenire hunc fluxum, &, per cor transitu facto è venis magnis, hâc effluere, similiter confiteri necesse ; cùm intra ligaturam sanguis per arterias ingreditur, non per venas, & arteriæ nusquam sanguinem è venis recipiunt, nisi è sinistro ventriculo cordis.

Neque omnino aliter, ex unâ venâ (factâ supra ligaturâ) tanta copia exhauriri ullo modo potuisset, præsertim tam impetuosè & affatim, tam facilè, tam subito, nisi à cordis vi & impulsu consecutio fiat, dicto modo.

Si hæc ita sint, de copia computationem facere, & de circulari motu sanguinis argumentari, apertissimè possumus. Si etenim in phlebotomiâ (eo quo solet prorumpere effusione & impetu) aliquis per semihoram provenire

venire fineret sanguinem, nulli dubium, quin maximâ ipsius parte exhaustâ, lipothymiâ & syncope adventarent, & non solum arteriæ, sed & venæ magnæ penè inanitæ forent: transire ergo rationabile est, semihorâ illo spatio, tantundem è venâ magnâ per cor in aortam.

Ulterius si quot unciaë per unum brachium perfluant, vel quot in viginti vel 30 pulsationibus intra mediocrem ligaturam trudentur sanguinis, supputares; daret profecto existimandi copiam, quantum per aliud brachium interea, per utrumque crus, per collum utrinque, & per alias omnes arterias & venas corporis pertranseat; & quod his omnibus, fluxus, qui per pulmones & cordis ventriculos fit, novum continuo sanguinem suggerere, & per venas circuitum facere necessario debeat; cùm tanta quantitas nec suppeditari ab assumptis possit, sed longe major sit,
quàm

quàm partium nutritioni conveniat.

Amplius observandum ; quod in administranda phlebotomia quandoque contingat, hanc veritatem confirmari. Nam, rectè brachium quam ligaveris, & scalpello debito modo dissecueris, apto orificio & omnibus ritè administratis ; tamen si timor, aut quævis alia causa, aut animi pathema lipopsychia adveniat, ut cor languidius pulset, nullo modo sanguis exhibit, nisi guttatim : præsertim si ligatura strictior paulò facta sit.

Ratio est, quia compressam arteriam languidior pulsus & impellens vis infirmior recludere & sanguinem infra ligaturam trudere, non valet : imo per pulmones deducere, aut è venis in arterias copiosè transferre, enervatum & languidum cor non potest.

Sic eodem modo, & eisdem de causis contingit, mulierum menstrua,
& om-

& omnem hæmorrhagiam sedari.

Ex contrariis etiam hoc patet; quoniam, redintegrato animo, amoto metu, cum ad se redeunt, jam adaucto robore pulsificante, arterias statim vehementius pulsare (etiam in parte ligatâ) in carpo moveri, & sanguinem per orificium longius prosilire, continuo videbitur.

C A P. XIII.

*Tertium suppositum confirmatur, &
esse sanguinis circuitum, ex
tertio supposito.*

HActenus de copia pertranseuntis sanguinis in cor & pulmones, centrum corporis, & similiter ab arteriis in venas & habitum corporis. Restat, ut explicemus, quomodo per venas ab extremitatibus, ad cor retro sanguis remeet, & quomodo venæ sint vasa deferentia eundem, ab extremitatibus ad centrum: quo

quo facto, tria illa proposita fundamenta pro circuitu sanguinis, fore aperta, vera, stabilia, & ad fidem sufficientia faciendam, existimamus.

Hoc autem, ex valvularum, quæ in venarum cavitatibus reperiuntur, usu, & ocularibus experimentis, satis erit apertum.

Clarissimus *Hieron. Fabr. ab Aquapend.* peritissimus Anatomicus & venerabilis senex, (vel, ut voluit doctissimus *Riolanus*, *Jac. Silvius*) primus in venis membraneas valvulas delineavit, figura sigmoides vel semilunares, portiunculas tunicæ interioris venarum, eminentes & tenuissimas. Sitæ sunt distantibus in locis, vario modo in variis hominibus, ad venarum latera connatæ, fursum, versus radices earum, spectantes, & in mediâ capacitæ ambæ (ut plurimum enim duæ sunt) se invicem respicientes, atque debitè contingentes, ut extremitatibus cohærere, copularique aptæ sint;
 &, ne

&, ne quid à radicè venarum in ramos, vel à majoribus in minores remearet, omnino impédiant: ita sitæ sunt, ut sequentium cornua, præcedentium convexorum media (& sic versis vicibus) respiciant.

Harum valvularum usum inventor non est affecutus, neque alii, qui dixerunt, ne pondere deorsum sanguis in inferiora subito ruat, creatas. Sunt namque in jugularibus deorsum spectantes, & sanguinem sursum prohibentes ferri: nam ubique spectant, à radicibus venarum, versus cordis locum.

Ego, ut alii etiam, aliquando reperi in emulgentibus & ramis mesenterii, venam cavam & portam spectantes. Adde insuper, quod in arteriis nullæ sint; & notandum, quod canes & boves omnes habeant valvulas, in divisione cruralium venarum, ad principium ossis sacri, vel in ramis iliacis prope coxendicem, in quibus,

nil tale timendum, propter erectam (ut in homine) staturam.

Nec ob metum apoplexiæ (ut alii dicunt) sunt in jugularibus valvulæ; quia materia, in somno, per arterias soporales, influere in caput prona est.

Nec ut sanguis in divaricationibus subsistat, nec in ramos exiles, vel in magis apertos, & capaces totus irruat; nam positæ etiam sunt ubi nullæ divaricationes; licet frequentiores conspiciantur, (fateor) ubi divaricationes sunt.

Nec ut motus sanguinis à centro corporis retardetur; verisimilius enim est tardè satis suâ sponte, è majoribus in minores ramulos intrudi, à massâ & fonte separari, aut è locis calidioribus in frigidiora migrare.

Sed omnino valvulæ factæ sunt, ne, à venis magnis in minores, moveretur sanguis, & sic illas dilaceraret, aut variocosas efficeret; néve à centro corporis in extremâ, sed potius ab
extre-

extremitatibus ad centrum progredere-
retur. Itaque ab hoc motu valvulæ
tenues facilè occluduntur, & sibi con-
trarium omnino supprimunt: sic enim
positæ & ordinatæ, ut si quid per cor-
nua superiorum minus prohiberetur
transitu, sed quasi per rimas elabere-
tur, convexitas subsequantium trans-
versim posita id exciperet, & sisteret
ne ulterius transiret.


Ego illud sæpissimè in dissectione
expertus sum, si, à radice venarum ini-
tio factò, versus exiles ramos specil-
lum immitterem (quanto potuerim ar-
tificio) ob impedimentum valvularum
longius impelli, non potuisse, contra
verò forinsecus à ramulis radicem
versus; facillimè.

Pluribus in locis, valvulæ binæ ad
invicem ita positæ & aptatæ sunt, ut
ad amussim (dum elevantur) in me-
diâ venæ cavitate cohæreant & unian-
tur, extremitatibus & convexis, in-
vicem; ut neque visu cernere, neque

satis explorare rimulam aut coïtum liceat: contra verò forinsecus intro immissò stylo cedunt, & (valvularum, quibus cursus fluminum inhibentur, in morem) facillimè reclinantur, ut motum sanguinis, profectum à corde & venâ cavâ, intercipient, & ad amissum pluribus in locis (elevatæ invicem dum clauduntur) omnino inhibeant & supprimant; neque sursum ad caput, neque deorsum ad pedes, neque ad latera brachii sanguinem à corde moveri (ita sunt constitutæ) usquam sinant; sed motui omni sanguinis, qui à majoribus venis auspicatus in minores desinit, adversentur & obstant: ei verò qui à venis exilibus incipiens in majores desinit, obsecundent, liberamque & patentem viam expediant.

Sed quo veritas hæc apertius elucescat; ligetur brachium supra cubitum vivo homini, tanquam ad mittendum sanguinem; A A : per intervalla

valla apparebunt, præcipuè in rusticis & varicosis, tanquam nodi quidam & tubercula, B, C, D D, E, F, non solum ubi est divaricatio, E, F, sed etiam ubi nulla; [C, D,] & isti nodi à valvulis fiunt. Hoc modo apparentibus in interiore parte manus vel cubiti, si à nodo O, inferius, pollice vel digito comprimendo, sanguinem deduxeris ad H secundæ figuræ, videbis nullum (inhibente omnino valvula) subsequi posse; & venæ portionein (H, O, secundæ figuræ) intra tuberculum & digitum deductum, obliteratam, & tamen, supra tuberculum vel valvulam (O, G,) satis distentam; immo si ita deductum sanguinem & venam inanitam (H) retinueris, & alterâ manu venæ (O, teriæ figuræ) partem superiorem distentam, deorsum compresferis (K teriæ) nullâ vi cogi aut impelli trans valvulam (O,) posse videbis; sed quanto majori conatu, hoc



*Figura
1a I.*

Figura 2.



feceris, videbis tanto magis ad valvulam vel tuberculum (O tertiæ) venam turgentem, distentam, & tamen inferius vacuam esse (H, O, tertiæ figuræ.)

Hoc, cùm pluribus in locis experiri quis possit, apparet valvularum officium in venis idem esse, cum sigmoïdum & tricuspidum, quæ in orificio aortæ & venæ arteriolæ fabrefactæ sunt; videlicet, ut ad amissum claudantur, ne retro sanguinem transeuntem remeare sinant.

Præterea ligato brachio uti prius (A, A,) & venis turgentibus, si infra tuberculum aliquod sive valvulam, venam firmaveris per aliquod spatium, (L 4,) & postea sanguinem sursum, usque supra valvulam (N,) digito (M,) compuleris, vacuam illam partem venæ permanere videbis (L, N,) nec retro per valvulam regredi posse; (H, O, 2 figuræ) ablato verò digito (H tertiæ, vel L quartæ figuræ) rursus

repleri ab inferioribus, & esse ut (D, C, primæ) ut hinc sursum, ab inferioribus ad superiora & ad cor, sanguinem moveri in venis & non contrario modo, planè constet.

Licet aliquibus in locis à valvulis, quæ non ita ad amussim clauduntur, aut ubi unica solum est, transitus sanguinis à centro non videatur prorsus impediri; tamen ut plurimum ita apparet; vel saltem, quod alicubi negligentius fieri visum est, illud, ex subsequantium in ordine valvularum, vel frequentia, vel diligentia, vel alio modo videtur compensari; adeo ut venæ, viæ patentēs & apertæ sint, regredienti sanguini ad cor, progredienti verò à corde omnino occlusæ.

Notandum hoc insuper, ligato ut prius brachio & venis turgentibus, apparentibus nodis sive valvulis, si infra aliquam valvulam, in loco ubi subsequentem inveneris, pollicem, qui venam firmet, applicueris, ne quid

à manu sursum sanguinis progredia-
tur ; digito tum sanguinem ab illâ
venæ portione, sursum supra valvulam
[L, N] exprime ; ut ante dictum est :
& ablato digito [L] finito rursus re-
pleri ab inferioribus , ut [D, C,] &
rursus premente pollice , identidem,
sursum, exprime sanguinem [L, N, &
H, O,] & hoc millies in brevi tempo-
re facito.

Jam si rem supputaveris , quantum
unâ compressione, sursum moveatur
valvulam supprimendo, & facta per
numerus millenarium multiplicatio-
ne, tantum sanguinis hoc modo per
unius venæ partem, in non longo tem-
pore, transmissum reperiēs , ut de
circuitu sanguinis , & ab ejus cele-
ri motu, te persuasissimum sensurus
sis.

Sed ne hoc experimento naturæ
vim afferri dicas ; in longe distanti-
bus valvulis, illud si feceris, obser-
vaverisque ablato pollice, quam cito,
& quam

& quam celeriter, sanguis sursum recurrat, & venam ab inferiori parte repleat, illud ipsum exploratum tibi fore non dubito.

C A P. XIV.

Conclusio demonstrationis de sanguinis circuitu.

IAm denique nostram de circuitu sanguinis sententiam ferre, & omnibus proponere liceat.

Cùm confirmatum sit, rationibus & ocularibus experimentis, quod sanguis, per pulmones & cor, pulsu ventriculorum pertranseat, & in universum corpus impellatur & immittatur, atque in venas & porositates carnis obrepit, & per ipsas, undique de circumferentiâ ad centrum, ab exiguis venis in majores reinet; unde in venam cavam, ad auriculam cordis tandem veniat, tanta copia, tanto fluxu, refluxu, hinc per arterias illuc, & il-

hinc per venas huc retro, ut ab assumptis suppeditari non possit, atque multo quidem majori (quam conveniret nutritioni) proventu: necessarium est concludere, circulari quodam motu, in circuitum, agitari in animalibus sanguinem & esse in perpetuo motu; & hinc fieri actionem sive functionem cordis, qua pulsum peragit, & denique, motus & pulsus cordis, causam unicam esse.

C A P. XV.

Sanguinis circuitus rationibus verisimilibus confirmatur.

SEd hoc etiam subungere non abs re fuerit, quod secundum communes quasdam ratiocinationes, ita est conveniens & necessarium. Primum (*Aristot. de respirat. & libr. 2. & 3. de partibus animalium & alibi*) cum mors sit corruptio propter calidi defectum & viventia omnia calida, mortua frigida

gida sint, locum & originem esse oportet caloris, (quasi lares focusque) quo naturæ fomes & primordia ignis nativi, contineantur & conserventur; à quo calor & vita in omnes partes, tanquam ab origine, profluant; alimentum adveniat, concoctio & nutritio & omnis denique vegetatio, dependeat.

Hunc autem locum, unde principium vitæ, cor esse (eo quo dictum est modo) neminem velim dubitare.

Sanguini itaque motu opus est, atque tali, ut ad cor rursus revertatur; nam in externas corporis partes amandatus, longe (ut *Arist. 2. de partib. animal*) à suo fonte, immotus coagularetur: motu enim in omnibus calorem & spiritus generari & conservari videmus, quiete evanescere. Cum itaque sanguis in externis partibus subsistens, à frigore extremorum & aëris ambientis geletur & spiritibus (uti in mortuis) destituatur: ut rursus
à fonte

à fonte & origine, tam calorem quam spiritus, & omnino præservationem suam repetat, & revertendo redintegret necesse est.

Videmus, à frigore exteriori, extremitates aliquando algere, ut lividi & nasus & manus & genæ, quasi mortuorum, appareant; quia sanguis in ipsis (qualis cadaverum, locis prœnotis, solet decumbere) consistat: unde membra adeo torpida & ægrè mobilia evadunt, ut vitam penè amisisse videantur. Nullo modo profecto rursus (præsertim tam cito) calorem, colorem & vitam recuperarent, nisi novo ab origine affluxu & appulsu caloris foverentur. Attrahere enim quomodo possent, quibus calor & vita penè extincti sunt? aut quibus meatus condensati, & gelato sanguine repleti, quomodo adveniens admitterent alimentum & sanguinem, nisi contentum dimitterent? nisi omnino cor esset hujusmodi principium, unde
(his

(his refrigeratis) remanarent vita & calor (ut *Aristot. respirat. 2.*) & unde novo, per arterias transmissio sanguine calido, spiritibus imbuto, quod frigidum & effœtum est propelleretur, & omnes particulæ, calorem languidum & vitalem fomitem penè extinctum, repararent?

Hinc ita est, ut cæteris omnibus partibus & vitam restitui, & sanitatem recuperari, corde illæso, contingere possit: corde verò vel refrigerato, vel vitio gravi aliquo affecto, totum animal pati & corruptum iri necesse est.

Quando principium corrumpitur & patitur, nihil est (ut *Aristot. 3. de partib. animal.*) quod aut ipsi, aut cæteris quæ ab ipso pendeant, præbere auxilium potest.

Hinc obiter forsan petenda ratio est, cur in cœrore, amore, invidiâ, curis & hujusmodi confectis, tabes & extenuatio contingant, aut cacoehymia

mia & proventus cruditatum, quæ morbos plurimos inducunt & homines conficiunt: omne namque animi pathema, quod cum dolore & gaudio, spe, aut anxietate humanas exagitat mentes, & ad cor usque pertingit, & ibi mutationem à naturali constitutione, intemperie & pulsu & reliquis facit, illud in principio totum alimentum inquinando & vires infirmando, minimè mirum videri debet, quod varia genera morborum incurabilium, in membris & corpore, subinde procreet; quandoquidem totum corpus, in illo casu, vitiato alimento & inopia calidi nativi, laborat.

Præter hæc cum alimento vivant omnia animalia interius concocto, necesse est concoctionem perfectam esse, simul & distributionem; & proinde locum & conceptaculum, ubi perficiatur alimentum & unde derivetur in singula membra. Hic locus
autem

autem cor est ; cùm solum ex omnibus partibus (quamvis in venâ & arteriâ coronali privato usui) in cavitatibus suis tanquam in cisternis , & promptuario (auriculis scilicet & ventriculis) publico usui , sanguinem contineat : reliquæ omnes partes , sui ipsius tantum causa & privato usui, in vasis duntaxat , habeant. Adde : cor solum ita situm & constitutum est , ut inde pulsu suo , in omnes partes (idque secundum justitiam & proportionem cavitatum arteriarum , unicuique particulæ inservientium) æqualiter dispenset , distribuat , & indigentibus (quasi è thesauro & fonte) hoc modo largiatur.

Amplius ; ad hanc distributionem & motum sanguinis , impetu & violentia opus est & impulsore , quale cor est. Adde ; sanguis sponte suâ versus principium (quasi pars ad totum , vel gutta aquæ sparsæ super tabulam ad massam) facilè concentratur & coit :

& coit : uti celerrime à levibus causis solet scilicet frigore, timore, horrore & hujusmodi aliis.

Præterea, è venis capillaribus in parvas ramificationes & inde in majores exprimitur motu membrorum & à musculorum compressione : proclivis etiam est & magis pronus sanguis, ut à circumferentiâ moveatur in centrum, quam contra, quoniam valvulæ impedimento nullæ sunt. Unde sequitur ; si principium relinquit, & loca stricta & frigidiora init, & contra spontaneum movetur sanguis, violentia opus habere & impulsore : tale cor solum est, quod dictum est modò.

C A P. XVI.

Sanguinis circuitus ex consequentibus probatur.

SUnt insuper problemata, quæ, ex hâc veritate suppositâ, tanquam con-

consequentia , ad fidem faciendam (veluti à posteriore) non sunt inutilia, hæc licet multâ ambiguitate & obscuritate involutâ videantur esse : tamen & rationem & causas assignari facilè patiuntur.

Videmus in contagione , ictu venenato , & serpentum aut canis rabidi morfu , in lue venereâ , & hujusmodi , illæsa particula contacta , tamen totum habitum contingere vitiari : lues venerea , illæsis aliquando genitalibus , primo omnium vel scapularum , vel capitis dolore , vel aliis symptomatibus , sese prodere solet. Vulnere , factò à morfu canis rabidi , curato , febrem tamen & reliqua horrenda symptomata supervenisse experti sumus. Quoniam , in particulam impressum contagium , unà cum reverte[n]te sanguine ad cor ferri & totum corpus postea inquinare posse , hinc patet. In tertianæ febris principio , morbifica causa cor petens , circa cor & pul-

& pulmones quando immoratur, anhelosos, suspiriosos & ignavos facit; quia principium aggravatur vitale & sanguis in pulmones impingitur, in-
crassatur, non transit (hoc ego ex dis-
sectione illorum qui in principio ac-
cessionis mortui sunt, expertus lo-
quor) tunc semper pulsus frequentes,
parvi & quandoque inordinati sunt;
ab adaucto verò calore, attenuata ma-
teria, apertis viis & transitu facto, in-
calefeit universum corpus, pulsus ma-
jores fiunt & vehementiores, ingra-
vescente paroxysmo febrili. Calor,
scilicet, præter-naturalis accensus in
corde, inde in totum corpus per ar-
terias diffunditur, unà cum materiâ
morbificâ, quæ eo modo à naturâ ex-
superatur & dissolvitur.

Cùm etiam exterius applicata me-
dicamenta vires intro exerceant suas,
ac si intro sumpta essent, (colocynthis
& aloë ventrem solvunt, cantharides
urinas movent, allium plantis, pedum
alli-

igatum expectorat & cordialia ro-
rant, & hujus generis infinita) hinc
onstat forsan non irrationabiliter di-
venas per orificia, ab exterius ad-
otis, absorbere aliquid & intro cum
ngwine deferre, non alio modo,
uam illæ in mesenterio, ex intestinis
ylum exsugunt & ad jecur unà cum
ngwine apportant.

In mesenterio etiam sanguis, per
terias cœliacas, mesentericam supe-
orem & inferiorem, ingressus ad in-
stina progreditur: à quibus, unà cum
ylo in venas attracto, per illarum
equentissimas ramificationes in por-
m jecoris revertitur, & per ipsum in
enam cavam. Sic contingit, ut san-
is, in his venis, eodem sit imbutus
colore & consistentia, quâ in reli-
is, contra quam plures opinantur.
Nam duos contrarios motus in ca-
llari propagine, chyli sursum, sangui-
s deorsum, convenienter & proba-
liter fieri, existimare necesse esset.

Sed

Sed an non summa naturæ providentia hoc fit? si enim chylus cum sanguine, crudus cum concocto, æquis portionibus confunderetur, non concoctio, transmutatio & sanguificatio exinde proveniret; sed magis (cùm invicem activa & passiva sint) ex alteratorum unione mistio, & medium quid, (ut in confusione vini cum aquâ oinocraton;) jam verò quando multo cum præterlabente sanguine, exigua portio chyli hoc modo admista sit, & quasi nullâ notabili proportione, contingit illud facilius quod (ut ait *Aristoteles*) cum unâ guttâ aquæ indita vini dolio, aut è contra, totum non mistum, sed vel vinum vel aqua sit. Ita in venis meseraicis dissectis, nec chymus, nec chylus & sanguis separati, sed confusi reperiuntur, & idem qui in reliquis venis sanguis colore & consistentia ad sensum apparet. In quo tamen quia chyli quiddam incoctum (licet insensibiliter) insit,

infit, natura jecur appofuit, in cujus mæandris moras trahit ut pleniorẽ transmutationem acquirat, ne præmatu-
rè crudum ad cor perveniens, vitæ principium obruat.

Hinc in embryone penè nullus ufus jecoris, ubi vena umbilicalis jecur manifeftè integra pertransit; nam à portâ jecoris extat foramen vel anæftomofis, ut fanguis regrediens ab inteftinis fœtus, non per jecur, fed in di-
ctam umbilicalem transiens, cor (una cum materno fanguine revertente à placentâ uteri) petat, unde etiam, in primâ fœtus conformatione, jecur pofterius fieri, contingit. Nos etiam, in fœtu humano, obfervavimus, perfectè delineata omnia membra, imo genitalia diftinéta, nondum tamen jecoris pofita penè fuiſſe rudimenta. Et fanè quouſque membra (ut vel cor ipſum in initio) alba omnia apparent, & præterea in venis nequidquam ruboris continetur, nihil præter rudem
quafi

quasi extravasati sanguinis collectionem loco jecoris videbis, quam contusionem quandam, vel ruptam venam existimares.

Sunt in ovo duo quasi vasa umbilicalia; unum ab albumine, integrum pertransiens jecur & ad cor rectà tendens; alterum à luteo in venam portæ desinens; quippe contingit in ovo pullum, primum ex albumine tantum, formari & nutriri, à luteo verò post perfectionem & exclusionem: nam intra intestina in ventre pulli contentum, post multos dies ab exclusionem, potest luteum reperiri, & respondet nutrimento lactis cæterorum animalium.

Sed hæc convenientius in observationibus circa fœtus formationem; ubi hujus generis possunt esse problemata plurima; cur hoc prius factum, aut perfectum sit, illud posterius, & de principatu membrorum, quænam particula alterius causa sit; circa cor
etiam

etiam plurima: uti, cur primum (ut *Aristot. de part. anim. 3.*) consistens factum sit & habere videatur in se vitam, motum & sensum, antequam quidquam reliqui corporis perfectum sit: & similiter de sanguine, quare ante omnia, & qualiter principium vitæ & animalis in se habeat; cur moveri atque huc illuc impelli desideret: dein cujus causa cor factum fuisse videatur.

Eodem modo in pulsum speculatione; cur videlicet isti lethales aut contra; & in omnibus generibus, ipsorum causas & præfagia contemplando, quid isti significant, quid hi & quare.

Similiter in crisis & expurgationibus naturæ, in nutritione, præsertim distributione alimenti, similiter & omni fluxione.

Denique in omni parte medicinæ, Physiologica, Pathologica, Semeiotica, Therapeutica, cum quot proble-

mata determinari possint ex hâc datâ veritate & luce; quanta dubia solvi & quot obscura dilucidari, animo mecum reputo, campum invenio spatiosissimum, ubi longius percurrere & latius expatiari adeò possum, ut non solum in volumen excresceret, præter institutum meum, hoc opus: sed mihi forsan vita ad finem faciendum deficeret.

Hoc itaque loco (*sequente videlicet capitulo*) solummodo, quæ in administranda Anatome circa fabricam cordis & arteriarum apparent, ad suos usus & causas veras referre enitar: ibi enim quo me convertam, plurima, quæ ex hâc veritate lucem recipiunt, & hanc vicissim illustriorem reddant, reperiuntur; quæ Anatomicis argumentis firmata & exornata præ cæteris velim.

Est unum, quod, licet inter observationes nostras de lienis usu, locum habere deberet, tamen hic quoque obiter

obiter annotare non erit impertinens.
A ramo splenico in pancreate deduc-
to, è parte superiore, venæ oriuntur,
coronalis postica, gastrica & gastro-
epiploica, quæ omnes plurimis furcu-
lis & ramificationibus in ventriculum
(veluti meseraicæ in intestinâ) disse-
minantur; similiter, à parte inferiori
illius splenici, deorsum in colon &
longanomen usque, deducitur vena
hæmorrhoidalis; per has venas utrin-
que sanguis regrediens, & succum
crudiorum secum (hinc à ventriculo
aqueum, tenuem nondum perfectâ
chilificatione; illinc crassum & ter-
restriorem tanquam è sæcibus) repor-
tans, in hoc ramo splenico, contra-
riorum permistione, convenienter at-
temperatur, & ambos hos succos dif-
ficilioris coctionis (propter contrarias
tantum indispositiones) natura per-
miscendo, & multa copia calidioris
sanguinis, à liene uberrime (propter
multitudinem arteriarum) scaturien-

tis, superinfusa, magis præparatos, ad
 jecoris portam adducit, & defectum
 utrorumque, tali venarum fabricâ, sup-
 plet & compensat.

C A P. XVII.

*Confirmatur sanguinis motus & circuitus,
 ex apparentibus in corde, & ex iis,
 quæ ex dissectione Ana-
 tomicâ patent.*

COr non in omnibus animalibus
 invenio distinctam esse & sepa-
 ratam particulam; alia enim (quasi
 dicas) Plant-animalia cor non habent;
 & quæ animalia sunt frigidiora, exi-
 guæ corpulentia, mollioris texturæ,
 & similis cujusdam constitutionis
 (uterucarum genus & lumbricorum
 & plurima quæ ex putredine oriun-
 tur, non servantia speciem) iis cor
 non est, ut quibus impulso non opus
 sit, quo alimentum in extremâ de-
 feratur; corpus enim connatum &
 unum,

unum, absque membris indistinctum habent, sic ut contractione & relaxatione totius corporis; intro sumant & expellant, moveant & removeant alimentum.

Plant-animalia dicta, Ostrea, Mytili, Spongiæ & Zoophytorum genera omnia, cor non habent, pro corde enim toto corpore utuntur, & quasi cor, hujusmodi animal est.

In plurimis & penè omnibus insectorum generibus, propter corpulentiaë exiguitatem, cor rectè discernere non possumus; attamen in apibus, muscis, crabronibus & hujusmodi aliquando (ope perspicilli) licet.

Pulsans quiddam intueri, etiam in pediculis, in quibus & transitum alimenti per intestina (cùm translucidum sit animal) instar maculæ nigræ cernere insuper clarè poteris, multiplicantis illius specilli ope.

Sed in exanguibus & frigidioribus quibusdam, ut cochleis, conchis,

sq̃uillis crustatis & similibus inest pulsans particula, quasi vesicula quædam vel auricula sine corde, rarius contractionem & pulsum suum faciens, & quem non, nisi æstate aut calidiori tempestate, discernere licet: in his ita se habet ista particula.

Impulsu aliquo opus est, ad alimentî distributionem, propter partium organicarum varietatem, aut densitatem substantiæ: sed rarius fiunt pulsationes, & quandoque omnino non, ob frigiditatem, prout conveniens illis est, quia dubiæ sunt naturæ, ita ut quandoque vivere, quandoque emori, videantur, & quandoque vitam animalis agere, quandoque plantæ.

Hoc etiam insectis videtur contingere, cùm hyeme lateant, & quasi mortua occultentur, vel plantæ vitam tantummodo agant: sed an idem etiam quibusdam sanguineis animalibus, accadat, ut ranis, testudinibus, fer-

serpentibus, hirundinibus, non injuria dubitare licet.

In animalibus paulò majoribus & calidioribus, utpote sanguineis impulsore alimenti & vi forsan majori polente, opus est: proinde (uti piscibus, serpentibus, lacertulis, testudinibus, ranis & hujusmodi aliis) tum auricula, tum cordis ventriculus unus est datus. Unde & verissimum illud (*Aristot. de part. anim. 3.*) quod nullum sanguineum animal careat corde, quo impulsore validius & robustius redditur, & non solùm ab auriculâ agitatur alimentum, sed ab hoc longius & celerius protruditur.

Quin adhuc majoribus, calidioribus & perfectioribus animalibus (utpote plurimo ferventiori & spirituosio sanguine abundantibus) quo protrudatur fortius, celerius & impetu majori, propter corporis magnitudinem, aut habitus densitatem, alimentum, in his robustum cor magis & carnosius desideratur.

Insuper, quia perfectioribus, perfectiori opus alimento & uberiori calore nativo, ut alimentum concoquatur & ulteriorem perfectionem nanciscatur, illis animalibus, pulmones habere & alterum ventriculum, qui per ipsos alimentum trumat, conveniebat.

Sic quibuscunque insunt pulmones, illis duo ventriculi cordis dexter & sinister; & ubicunque dexter ibi sinister quoque inest, non è contra ubi sinister ibi dexter quoque: (sinistrum voco ventriculum, usu non vero situ distinctum, videlicet qui sangainem in totum corpus diffundat non in pulmones solum) hinc sinister ventriculus per se cor efficere videtur, & in medio situs, scrobiculis altioribus ita insculptus & majori diligentia fabricatus est; ut cor sinistri ventriculi gratia factum videatur, & dexter ventriculus quasi famuletur sinistro, nec ad conum ejus pertingat, & tenuiori triplo pariete sit, & quasi articulationem
nem

nem quandam (ut *Aristot.*) supra finistrum habeat & majorem capacitatem, utpote, qui non solum sinistro materiam, sed & pulmonibus alimentum præbeat.

Notandum verò, quod in embryo-
ne aliter se habeant ista & non tanta
differentia sit ventriculorum, sed (tan-
quam in nuce nuclei gemelli) æquali-
ter penè se habeant, & dextri conus ad
sinistri summitatem pertingat, ut cor
in his tanquam duplici apice in cono
sit. Hæc fiunt quoniam in his (dum
sanguis non transit per pulmones, uti-
que de dextro cordis sinu in sinistrum)
ambo ventriculi, per foramen ovale &
transitum arteriosum (ut dictum est)
idem officium traducendi sanguinem,
è venâ cavâ in arteriam magnam, pa-
riter præstant & in universum corpus
impellunt æqualiter, unde æqualis
constitutio.

Cùm verò pulmones usui esse &
uniones dictas occludi, sit tempesti-

vum, tum hæc differentia ventriculorum incipit in robore, ut reliquis, esse; quia dexter duntaxat per pulmones, sinister per totum corpus impellit.

Sunt ultra hæc etiam in corde lacer-
tuli (ut ita dicam) sive carnosæ vir-
gulæ & fibrosi nexus plurimi, (quos
Aristot. lib. de respir. & de part. anim. 3.
Nervos vocat) qui partim separatim
diverso modo tenduntur, partim in
parietibus & mediastino (altis factis
scrobiculis) sulcatim reconditi sunt
tanquam muscoli quidam parvi; qui
ad robustiorem & ad validiorem im-
pulsus sanguinis & constrictionem
cordis, quasi succenturiantur & super-
adduntur cordi, ad ulteriorem expul-
sionem sanguinis auxiliares, & ut (tan-
quam in navi funium diligens & artifi-
ciosus apparatus) corde undiquaque se
contrahente, undique adjumento fo-
rent, & sanguinem plenius & validius
è ventriculis expellerent.

Hoc

Hoc autem manifestum ex eo; quod quibusdam animalibus sint, quibusdam minimè; & omnibus quibus sunt, illis plures & fortiores in sinistro, quàm dextro; quibusdam animalibus, in sinistro sunt, dextro verò nequaquam: in hominibus, plures in sinistro quàm dextro ventriculo, & plures in ventriculis quàm auriculis, & aliquibus in auriculis quasi nulli: in torosis, musculosis & agrestibus corporibus & durioris habitus, plures, in tenellis corporibus & sceminis pauciores.

In quibus animalibus ventriculi cordis intus leves, omnino absque fibris & lacertulis, neque scrobiculis fissi sunt, (ut avibus minoribus penè omnibus, serpentibus, ranis, testudinibus & hujusmodi, perdica etiam, gallina, piscium maximâ parte) in his neque nervi sive fibræ dictæ, neque valvulæ tricuspidæ in ventriculis reperiuntur. Quibusdam animalibus

dexter ventriculus intus levis est, sinister verò fibrosos illos nexus habet, ut in anserē, cygno & avibus majoribus: in his eadem est ratio, quæ in omnibus; cū spongiosi, rari & molles sint ipsis pulmones, ad protrusionem sanguinis per ipsos, vim tantam non desiderant; proinde in dextro ventriculo aut non sunt illis fibræ, aut pauciores & infirmiores, nec ita carnosæ, aut musculos æmulantes: in sinistro verò sunt robustiores & plures, carnosiores & musculosi; quia sinister ventriculus majori robore & vi opus habet, quo per universum corpus longius sanguinem prosequi debet.

Hinc etiam medium cordis possidet, & triplo crassiorē parietem & robustior est sinister ventriculus dextro. Hinc omnia animalia, etiam homines, quo densiori, duriori & solidiori habitu sunt carnis, & quo magis carnosæ & lacertosæ habent extrema mem-

membra & magis à corde distantia, eò magis fibrosum, crassum, robustum & musculosum habent cor, idque manifestum est & necessarium: quo contra rariori textura & molliori sunt habitu & corpulentia minore; flaccidum magis, mollius & intus minus (aut non omnino) fibrosum & enervatum cor gerunt.

Valvularum similiter usum considera; quæ ideo factæ, ne semel emissus sanguis in cordis ventriculos regeneratur, & tam in orificio arteriæ quàm venæ (dum sursum elevatæ & invicem conjunctæ triquetram lineam, qualis ab hirundinum morfu relinquitur, effingunt) quo arctius obseratæ, sanguinis refluxum arceant.

Tricuspidēs in introitu, venæ cavæ & arteriæ venosæ janitores sunt, ne, cum maximè impellitur sanguis, retro labatur; eâ de causâ non insunt omnibus animalibus, neque quibus insunt, eadem naturæ solertia factæ, apparent,

parent, sed in aliis exactius, in aliis remissius & negligentius clauduntur, pro majori vel minori impulsione à ventriculorum constrictione. Ideo in sinistro ventriculo, uti ad majorem impulsione[m] diligentior oclusio fiat, duæ tantum sunt instar mitræ, habentes, ut exactissimè claudantur, longè usque in conum, per ejus medium, pertingentes lacertulas. Hæc res imposuit forsan *Aristoteli*, ut hunc ventriculum duplicem, sectione per transversum factà, existimaret. Ne retro in arteriam venosam labatur sanguis, & exinde robur sinistri ventriculi exsolvatur, in propellendo per universum corpus, ideo valvulæ istæ, mole & robore & exacta clausura, longè in dextro positas exsuperant. Hinc etiam necessario nullum cor sine ventriculo conspicitur, cùm lacunar, fons & promptuarium esse sanguinis debeat. Idem verò in cerebro esse non semper contingit; avium enim genera,
penè

penè omnia, nullum habent in cerebro ventriculum, ut patet in anfore & cygno: horum cerebrum, quamvis à cuniculi cerebro penè magnitudine æquetur, cuniculi tamen ventriculos in cerebro habent, anser non habet. Similiter ubicunque cordis ventriculus unus, ibi una auricula appendet, flaccida, cuticularis, intus cava, sanguine referta; ubi duo ventriculi, duæ similiter auriculæ. Contra verò aliquibus auricula duntaxat inest animalibus vel saltem vesica auriculæ analogæ, vel vena ipsa dilatata (non autem cordis ventriculus) cordis loco pulsus faciens, uti apparet in crabronibus & apibus & aliis insectis; quæ non solum pulsus habere, sed & respirationem in illâ parte quam caudam nominant, experimentis quibusdam me posse demonstrare arbitror: unde ipsam elongari & contrahi contingit modò frequentius, modò rarius, prout anhelosi magis videntur, & aëre

& aëre magis indigere : sed de his in *Tractatu de respiratione*.

Auriculas similiter pulsare apertum est, & sese contrahere (ut antè dixi) & sanguinem in ventriculos conjicere ; unde ubicunque ventriculus ibi auricula est necessaria ; non solum, quod vulgo creditur, ut sit sanguinis receptaculum & promptuarium (quid enim opus est pulsatione ad retinendum ;) sed motores primi sanguinis sunt auriculæ, præsertim dextra, primum vivens & ultimum moriens (ut ante dictum) quare necessariae, ut scilicet sanguinem in ventriculum subservientes infundant. Ventriculus verò continuo (seipsum contrahendo) jam antè in motu existentem sanguinem commodius elidit & violentius propellit ; uti cùm ludis, pilam fortius & longius, à reverberatione percutiendo quàm simpliciter projiciendo, impellere poteris. Quin etiam contra vulgarem opinionem, quia, neque cor
ne-

neque aliud quidquam, seipsum extendere sic potest, ut in seipsum attrahere suâ diastole quicquam possit, (nisi ut sponsia vi prius compressa, dum redit ad constitutionem suam) sed omnem motum localem in animalibus primum fieri, & principium sumpsisse constat à contractione alicujus particulæ, ideo à contractione auricularum conjicitur sanguis in ventriculos ut ante patefeci, & inde à contractione ventriculorum ulterius projicitur & transfertur.

Quæ veritas de motu locali & quod immediatum organum motivum, in omni motu omnium animalium, quibus spiritus motivus (ut *Aristoteles* dicit *lib. de spiritu* & alibi) primo inest, sit contractile, & (quemadmodum *ἡ ἀπό τοῦ κεντροῦ, nuto*) à contraho dicatur; & quod *Aristoteles* musculos cognoverit, cum operam omnem & motum in animalibus retulit ad nervos sive ad contractile & proinde illas la-
certu-

certulas in corde nervos appellaverit; si quando de motivis organis animalium & de musculorum fabrica, ex observationibus nostris, quandoque demonstrare liceat, palam arbitror fore.

Quin institutum prosequentes, de auricularum usu (quem ad ventriculos implendos sanguine ante demonstravimus esse) contingere videmus, quo magis densum, compactum cor & pariete crassiore est, eo auriculas nervosiores & magis musculosas, ad impellendum & implendum, esse; quibus verò contra, iis tanquam vesica sanguinea & membrana continens sanguinem apparet, ut in piscibus; ibi enim tenuissima & adeo ampla est vesica, quæ auriculæ loco est, ut super ipsam cor nature videatur: at quibus piscibus carnosior paulo illa vesica est, & perbellè pulmones æmulari & eimentiri videtur: ut in cyprino, barbo, tinca & aliis.

In aliquibus hominibus, torosis videlicet & durioris habitus, dextram auriculam ita robustam, & cum lacerulis & vario fibrarum contextu interius affabre concinnatam reperi: ut aliorum ventriculis robore videretur æquipollere: & mirabar sanè quod in hominibus diversis, tanta esset differentia.

Sed notandum, quod in foetu auriculæ longè majores, quam pro portione insunt, quia, antequam cor fiat, aut suam functionem præstet, (ut antè demonstratum est) cordis quasi officium faciunt.

Sed quæ in formatione foetus observavi (ut antea retuli, & *Aristoteles* in ovo confirmat) maximam huic rei fidem & lucem afferunt. Primum, dum foetus, quasi vermiculus mollis, & (ut dicitur) in lacte est, inest solum punctum sanguineum, sive vesicula pulsans, & quasi umbilicalis venæ portio; in principio vel basi dilatata: postea
cùm.

cùm foetus delineatus , jam corpulentiam quandam duriozem habere incipit, ista vesica carnosior & robustior facta in auriculas (mutatâ constitutione) transit, super quas cordis corpus pullulare incipit, nondum ullum officium faciens publicum : formato verò foetu, cùm jam distincta ossa à carnibus sunt, & perfectum est animal & motum habere sentitur, tum cor quoque, intus pulsans habetur, & (ut dixi) utroque ventriculo sanguinem è venâ cavâ in arteriam transfundit.

Sic natura perfecta & divina, nihil faciens frustra, nec cuiquam animali cor addidit, ubi non erat opus, neque, priusquam esset ejus usus, fecit; sed iisdem gradibus, in formatione cujuscunque animalis, transiens per omnium animalium constitutiones (ut ita dicam, ovum, vermem, foetum) perfectionem in singulis acquirit. Hæc alibi in foetus formatione, multis observationibus confirmanda sunt.

De-

Denique non immeritò *Hippocrates*, in libro de Corde, ipsum Musculum nuncupavit, cùm eadem utriusque actio & idem officium sit, videlicet seipsum contrahere, aliud movere, nempe contentum sanguinem.

Insuper ex fibrarum constitutione, motivaque fabrica, ut in musculis ipsis, cordis actionem & usum licet cernere. Omnes Anatomici cum *Galeno* annotarunt, cordis corpus fibrarum ductu, videlicet recto, transverso & obliquo fabrefactum esse.

At in corde elixo, aliter se habere deprehenditur fibrarum structura: omnes enim fibræ in parietibus & septo circulares sunt, quales in sphinctere; illæ verò, quæ sunt in lacertulis secundum longitudinem exporretis, obliquæ: sic fit, dum omnes fibræ simul contractæ sunt, ut contingat & conum ad basin à lacertulis adductum esse, & parietes in orbe circumclusas & cor undique contractum esse,

esse, & ventriculos coarctari; proinde, cum ipsius actio sit contractio, functionem ejus esse sanguinem in arterias protrudere, existimandum est.

Nec minus *Aristoteli de principatu cordis* assentiendum; à cerebro motum & sensum non accipere, nec à jecore sanguinem; sed principium venarum & sanguinis esse & hujusmodi.

Qui ipsum redarguere conantur, illud principale argumentum omittunt, aut non intelligunt, quod cor nempe primum subsistens sit, & habeat in se sanguinem, vitam, sensum, motum, antequam aut cerebrum aut jecur facta erant, vel planè distincta apparuerant, vel saltem ullam functionem edere potuerant.

Adde; suis propriis organis ad motum fabricatis, cor, tanquam animal quoddam internum, diutius consistit: quasi, hoc primo facto, ab ipso postea fieri, nutriri, conservari, perfici, totum animal, tanquam hujus opus & domi-

domicilium, natura voluisset : cor tanquam in republicâ princeps) penes quem primum & summum imperium ubique gubernans sit ; à quo tanquam ab origine & à fundamento omnis in animali potestas derivetur & dependeat.

At amplius circa arterias plurima similiter veritatem hanc illustrent & confirmant, quando consideratur cur arteria venosa non pulsât, cùm numeretur inter arterias ; aut cur in venâ arteriosâ pulsus sentitur, quando pulsus arteriarum à sanguinis impulsione est ; aut quod arteriæ in suâ tunicarum crassitie & robore tantum à venis differant, quia sustinent impetum impellentis cordis & prorumpentis sanguinis.

Hinc, cùm natura perfecta nihil faciat frustra & in omnibus sit sufficiens, quanto arteriæ propinquiore cordi sunt, tanto magis à venis in constitutione differunt, & robustiores

res sunt & ligamentosæ magis; in ultimis verò disseminationibus ipsarum, ut manu, pede, cerebro, mesenterio, spermaticis ita constitutione similes sunt, ut oculari tunicarum inspectione, alterum ab altero, internoscere difficile sit. Hoc autem iustis de causis sic se habet, nam quo longius arteriæ distant à corde, eò minore multo vi, ictu cordis per multum spacium refracto, percutiuntur.

Adde, quod cordis impulsus, cùm in omnibus arteriarum truncis & ramulis sufficiens sanguini esse debeat, ad divisiones singulas quasi partitus imminuitur: adeò ut ultimæ divisiones capillares arteriosæ videantur venæ, non solum constitutione, sed & officio & sensibilem pulsum aut nullum aut non semper edant, nisi cùm pulsat cor vehementius, aut arteriola in quavis particula dilatata, aut aperta magis est. Inde fit ut in dentibus quandoque & tuberculis, quandoque
in di-

in digitis sentire pulsum, quandoque non possumus. Unde pueros (quibus pulsus semper sunt celeres & frequentes) hoc uno signo febricitate certo observavi; & similiter in tenellis & delicatulis, ex compressione digitorum, quando febris in vigore esset, facile ex pulsu digitorum percipere potui.

Ex alterâ parte, quando cor languidius pulsat, non solum, non in digitis, sed nec in carpo, aut temporibus pulsum sentire contingit, ut in lipothymia, hystericeis symptomatibus, asphyxia, debilioribus & morituris.

Hic ne decipiantur, monendi sunt Chyrurgi, quod, in amputatione membrorum, tumorum carnosorum excisione & vulneribus, sanguis vi prodeat quidem ab arteriâ, sed non semper cum saltu exeat; & quod exiles arteriæ non pulsant, præsertim si ligatura compressæ fuerint.

Præterea quod vena arteriosa non solum arteriæ constitutionem & tuni-

cam habeat, sed quod tam multum, in crassitie tunicæ, non differat à venis, quàm aorta; ratio est, quia majorem à sinistro ventriculo impulsu sustinet aorta, quàm illa à dextro; ideo tanto molliori tunicarum constitutione, quam aorta est, quanto dexter ventriculus cordis & pariete & carne, sinistro infirmior; & quantum pulmones in texturâ & mollitie, ab habitu corporis & carnis recedunt, tantum differt venæ arteriosæ tunica, ab aortæ.

Semper hæc omnia ubique proportionem servant, in hominibus, quanto enim magis torosi, musculosi & durioris sint habitus, & cor habeant robustum, crassum, densum & fibrosum magis; tanto auriculas & arterias proportionabiliter in omnibus, crassitie & robore habent magis respondentes.

Hinc quibus animalibus, læves ventriculi cordis intus sunt, absque villis,
aut

aut valvulis & pariete tenuiore (ut piscibus, avibus, serpentibus & quam pluribus generibus animalium) in illis arteriæ parum aut nihil à venis differunt in tunicarum crassitie.

Amplius pulmones tam ampla habent vasa, venam & arteriam, ut truncus arteriæ venosæ, excedat utrosque ramos crurales & jugulares: & tanto referta sunt sanguine, ut per experientiam & autopsiam, monitu etiam *Arist.* (nec decepti inspectione eorum, quæ vidimus in dissectis animalibus) sciamus, quod ex eorum vulnere sanguis totus effluerit: causa est, quia in pulmonibus & corde promptuarium, fons & thesaurus sanguinis & officina perfectionis est.

Similiter arteriam venosam & sinistrum ventriculum abundare videmus (in Anatomicâ dissectione) tanta copia sanguinis & ejusdem quidem coloris & consistentiæ, quo dexter ventriculus & vena arteriosa replentur,

similiter nigricante & grumefcente: quoniam illinc huc continenter peragrat pulmones sanguis.

Denique vena arteriosa dicta, vulgo constitutionem arteriæ, arteria venosa venæ, habent: quia revera, officio & constitutione & omnibus, illa arteria, hæc vena est, contra quam vulgò creditur. Præterea vena arteriosa tam amplum habet orificium: quia multò plus defert sanguinis quàm alendis pulmonibus sit necessarium.

Hæc omnia phænomena inter dissectandum observanda & plurima alia, si rectè perpensa fuerint, antè dictam veritatem videntur luculenter illustrare & planè confirmare, simulque vulgaribus opinionibus adversari: cùm, quando ob causam ita constituta sint hæc omnia, difficile cuiquam admodum sit (nisi quo nos modo) explicare.

F I N I S.

Exer-

Exercitationes Anatomicae duae

De Circulatione Sanguinis,

A D

J. RIOLANUM,

J. Filium.

E X E R C I T A T I O I.

PRODIIT non multis abhinc mensibus, Clarissimi RIOLANI Opusculum Anatomicum & Pathologicum propter, quod, ipsissimâ authoris manu mihi transmissum, gratias lubens refero : gratulor equidem fœlicitati illius Viri, quod institutum maximâ dignissimum laude perficiendum suscepit.

Omniū morborū sedes ante oculos

los ponere, onus est, non nisi divino ingenio exatlandum; gravem sanè subiit provinciam, qui morbos, penè intellectus aciem fugientes, oculis prospiciendos tradidit. Decent hæc conamina Anatomicorum principem: nulla enim est scientia, quæ non ex præexistente cognitione oritur, nulla-que certa & plenè cognita notitia, quæ non ex sensu originem duxit.

Quocirea res ipsa & tanti viri exemplum, laborem meum efflagitans, animum invitat, meam quoque Anatomiam medicam ad medicinæ usum maximè accommodatam literis mandare & huic adjungere. Non, ut ille, solùm locos morborum ex cadaveribus sanorum indagando & secundum mentem aliorum, morborum species, qui iis in locis videri potuissent, recensendo, sed ut, ex multis dissectionibus corporum ægrotorum, gravissimis & miris affectionibus confectorum, quomodo & quali-
ter

ter partes interiores in situ, magnitudine, constitutione, figurâ, substantia & reliquis accidentibus sensibilibus, à naturali formâ & apparentiâ (quam vulgo omnes Anatomici describunt) permutentur, & quàm variis modis & miris afficiantur, enarrandum susciperem.

Sicut enim sanorum & boni habitûs corporum dissectio plurimum ad philosophiam & rectam physiologiam facit; ita corporum morbosorum & cachecticorum inspectio potissimum ad pathologiam philosophicam. Quippe eorum, quæ sunt secundum naturam, contemplatio physiologica est prius à Medicis noscenda, quoniam, quod secundum naturam est, id rectum & tum sui tum obliqui regula, cujus luce errores affectusque præternaturales definiendo, Pathologia postea clariùs innotescit, & ex Pathologiâ, usus & ars medendi, novaque plurima remedia inveniendi occasiones occurrunt.

Neque quisquam facilè crederet, quantum in morbis, præsertim chronicis, interiora pervertantur, & quanta partium interiorum monstræ in morbis gignantur. Ausim dicere, plus una dissectio & apertio tabidi, aut morbo aliquo antiquo vel venenato confecti corporis, ad medicinam attulit commodi, quàm decem corporum strangulorum.

Non igitur improbo doctissimi & expertissimi *Anatomici Riolani* institutum, sed summis laudibus celebrandum puto, quippe ad medicinam utile admodum, quod physiologicam partem illustrat: non minus interim medendi artii proficuum fore existimo, si non solum locos, sed unà locorum affectus oculis conspiciendos exhiberem, vel observatos & perlustratos enarrarem, & ex multis meis dissectionibus experientiam meam recorderer.

Verùm quæ, in illo libro, de circuitu

cuitu sanguinis à me invento, traducta sunt, & ad me unicè spectare videntur, à me perpendenda prius & potissimùm veniunt. Non enim parvi faciendum, de re tantâ, tanti viri iudicium (qui omnium, quotquot sunt huius seculi, Anatomicorum facilè Princeps & Coryphæus æstimatur) sed plus, quàm aliorum omnium vel applaudentium vel repugnantium, duenda huius unius viri sententia in gloriam, aut censura respicienda & pensanda. Ipse igitur *Enchir.l. 3. c. 8.* motum sanguinis nostrum in animalibus agnoscit & in nostras partes, nostramque de circuitu sanguinis sententiam venit; non tamen ex toto & apertè: ait enim *lib. 2. c. 21.* quod sanguis in portâ contentus non circuletur, ut sanguis in venâ cava, & *lib. 3. cap. 8.* esse sanguinem qui circulatur, & vasa circulatoria esse, scilicet, aortam & venam cavam. Negat tamen eorum propages circulationem recipere, quia

effusus, inquit, sanguis in omnes partes, secunda & tertia regionis, ibi remanet ad nutritionem; nec refluit ad majora vasa, nisi vi revulsus, in maximâ inopiâ sanguinis vasorum majorum, vel impetu & æstro percitus affluat ad majora vasa circulatoria. Atque ita (paulò pòst) sive sanguis venarum perpetuo ascendat naturaliter, sive remeet ad cor, sive sanguis arteriarum descendat sive discedat à corde, attamen, si vena minores brachiorum & crurum fuerint depletæ, potest successione vacuati, venarum sanguis descendere: quod clarè demonstravi, inquit, contra Harvæum & Wallæum. Et quia Galenus & quotidiana experientia confirmet anastomoses venarum & arteriarum, & necessitas circulati sanguinis, videtis, inquit, quomodo fiat circulatio sanguinis citra perturbationem & confusionem humorum & veteris Medicina destructionem.

Quibus verbis apertum est, quâ de causâ permotus clarissimus Vir sanguinis circuitum agnoscere partim,

tim, partim denegare velit, & cur titubantem inconstantemque de circuitu opinionem astringere conetur. Nempe, ne veterem medicinam destrueret, non veritate ductus (quam non cernere non potuisset) sed magis ob cautelam, veretur apertè loqui, ne veterem medicinam offenderet, aut forsan ne traditam, ab ipso in Anthropologia, Physiologiam retractare videretur. Nam sanguinis circuitus veterem medicinam non destruit, sed promovet magis; medicorum Physiologiam & speculationem de rebus naturalibus ostendit, quamvis doctrinam Anatomicam de usu & actione cordis, pulmonum, cæterorumque viscerum, redarguat. Hæc quod ita sint, facilè cùm ex ipsius verbis & confessione, tum ex iis, quæ hic subiungam, apparebunt; scilicet, totum sanguinem, ubicunque fuerit in corpore vivente, moveri & mutare locum (tam qui in venis majoribus &

eorum propaginibus & fibris, quàm qui in partium cujuscunque regionis porositatibus continetur) à corde fluere & ad cor refluere continuè & continenter & nusquam sine detrimento manere: licet, quod non repugno, quandoque quibusdam in locis velocior aut tardior ejus motus fiat.

Primum itaque negat solummodo doctissimus Vir, sanguinem propaginibus venæ portæ contentum circulari; quod redarguere, neque negare potuisset, si vim argumenti sui non dissimulasset: ait enim (l. 3. c. 8) *Si in singulis pulsationibus cor admittat guttam sanguinis, quam expellit in aortam & intra horam bis millenas pulsationes edat, necessum est magnam sanguinis portionem transire.* Idem quoque de mesenterio affirmare necessum habet, quando, per arteriam cœliacam & mesentericas artērias, plus quàm gutta sanguinis pulsationibus singulis intruditur & impingitur in mesenterium & ejus ve-

nas:

nas : adeò ut vel aliquò exire pro ratâ ingredientis proportionē debeat necessariò, vel venæ portæ rami tandem disrumperentur.

Nec (quod hoc dubium solvit) probabiliter dici, aut fieri potest, ut per easdem arterias influat & refluat, Euripi in morem, irritò & vano labore, sanguis mesenterii: nec relapsus è mesenterio per easdem vias & transvasatio, quâ exonerare voluit mesenterium sese in aortam, veresimilis est; aut contra vim ingredientis prævalere contrario motu potest: nec datur vicissitudo ubi continuè, continenter & incessanter, certum est influxum fieri: sed eâdem necessitate, quâ in corde arguitur sanguinem impactum in mesenterium aliò exire, compellitur.

Hoc manifestum est, nam aliàs omnem circulationem eo argumento & subterfugio everteret; si idem, eâdem verisimilitudine de cordis ventriculis dicendo, affirmaverit: quod nempe
in sy-

in systole cordis impellitur in aortam sanguis, & diastole remeat, aortaque sese in cordis ventriculos exonerat, ut ventriculi vicissim in aortam: atque ita neque in corde neque in mesenterio circulatio, sed fluxus & refluxus vicissitudinarius, vano labore, agigaretur. Si itaque in corde, ob dictam rationem à se probatam, necessario sanguinis circulatio arguitur, eadem argumenti vis in mesenterio quoque locum habet; sin verò in mesenterio nullus sanguinis circuitus, neque similiter in corde, utraque enim affirmatio, hæc scilicet de corde illâ de mesenterio, ejusdem argumenti vi, mutatis verbis, pendet stabiliturque aut cadit similiter.

Dicit, in corde impediunt regressum sigmoides valvulæ, nullæ sunt verò in mesenterio valvulæ. Respondeo neque hoc verum esse, in ramo enim splenico, quinetiam quandoque in alijs, repertæ valvulæ. Præterea
in

in venis valvulæ non ubique requiruntur, neque in profundis venis artuum, sed in cutaneis magis, reperiuntur: ubi è minoribus ramis profluens naturaliter sanguis, satis proclivis est in majores ramos fluere, & retro meare plus quàm satis impedit, compressione musculorum circumjacentium & qua patet iter cogitur, ibi valvulis quid opus est?

Quantum autem sanguinis singulis pulsationibus in mesenterium impellitur, perinde computatur ac si in carpo mediocri ligaturâ venas è manu ingredientibus, non verò arterias ingredientibus, constrinxeris (majores etenim sunt arteriæ mesenterii quàm carpi) si quot pulsationibus distendi vasa manus & tumescere in molem totam manum numeraveris, dividendo & subductione facta, multò plus quàm guttam sanguinis ingredi (non obstante ligaturâ) singulis pulsibus, nec retro meare posse; quin potius replendo,

plendo, manum totam vi distendere & in molem efferre reperies. Eâdem quantitate sanguinem ingredi mesenterium, per analogiam, colligere licet, si non majori, quanto majores arteriæ mesenterii sunt quàm carpi.

Si quisquam viderit & cogitaverit quantâ difficultate & molimine, compressionibus, ligaturis apparatusque multiplici cohibetur impetuosus profiliens sanguis, è rescissâ vel disruptâ minimâ arteriolâ, quantis viribus (veluti si syphone ejaculetur) omnem apparatus projicit, propellit, aut pertransit, vix puto, crederet verisimile, quidquam retro meare posse contra tantum ingredientis sanguinis influxum & impulsum, præcipuè unde non pari vi repelli queat. Quapropter hæc animo secum revolvens, è mesenterio, contra influxum per arteriâs adeò impetuosum & fortem, sanguinem è venis portæ per easdem vias obrepere & ita mesenterium exonerare,

rare, haud puto animum induceret ad credendum.

Insuper si non, circulari motu moveri sanguinem & mutari, arbitretur Vir doctissimus, sed semper eundem in mesenterii propaginibus stagnare, supponere videtur, duplicem esse sanguinem, diversumque, diversoque usui & fini inservientem; & proinde diversæ naturæ in venis portæ & cavæ: quia hic circulatione indiget ad sui conservationem, ille non indiget; quod neque apparet, neque ipse doctissimus Vir demonstrat verum esse.

Præterea addit Vir doctiss: (*Enchir. l. 2. c. 18.*) *quartum genus vasorum mesenterio, quæ venæ lacteæ dicuntur, (inventæ ab Assel.) quibus positis, videtur astruere, omne alimentum ab intestinis extractum per ipsas ad jecur, officinam sanguinis, derivari, quo inibi concocto & in sanguinem transmutato, (dicit l. 3. c. 8.) ad dextrum cordis ventriculum traducitur, quibus positis, inquit, omnes difficultates quæ olim movebantur,*

bantur, de distributione chyli & sanguinis, per eundem canalem, cessant; nam venæ lacteæ vehunt chylum ad hepar & proinde seorsum isti canales sunt & seorsum obstrui possunt. Verum enim verò cum sanguinem in ramis portæ, in sinum hepatis numerosissimè distributis contentum, neget doctissimus Vir, hepar pertransire posse, ut sic circulatio fiat; quomodo (si è lacteis lac in jecur transfundatur & inde per cavam ad cordis ventriculum pertranseat,) & unde hoc verisimile esse demonstretur, scire velim, præsertim cum & spirituosior & penetrativus magis sanguis, quàm chylus aut lac in illis lacteis vasis contentum, apparet, & adhuc ab arteriarum pulsu urgetur, ut alicubi viam inveniat.

Doctissimus Vir mentionem facit tractatus cujusdam sui de circulatione sanguinis, utinam viderem, forsan respiscerem.

Sed enim Vir doctissimus si maluisset,

luisset, in portæ venis & cavæ ramulis, ponere circularem motum sanguinis (uti dicit libr. 3. cap. 8. *in venis sanguis perpetuò & naturaliter ascendit, sive remeat ad cor, sicut is in omnibus arteriis descendit sive discedit à corde,*) non video, inquam, quin hoc posito, omnes difficultates, quæ olim movebantur de distributione chyli & sanguinis per eosdem canales, æquè cessarent; ut & ultra non necesse haberet seorsum vasa chyli inquirere aut ponere.

Quandoquidem, sicut venæ umbilicales ab ovi liquoribus succum alimentativum absorbent, deferuntque ad nutriendum & augmentandum pulum, adhuc embryonem existentem, ita venæ meseraicæ ab intestinis chylum sugunt & in jecur deferunt, idemque officium adulto præstare quid prohibet asseverare? cessant enim omnes motæ difficultates, cum in iisdem vasis non duo contrarii simul motus supponantur, sed & idem continuus motus.

tus per meseraicas ab intestinis in jecur supponatur.

De venis lacteis quid sentiendum alibi dicam, cum de lacte tractavero, in diversis recens natorum partibus reperto præsertim humano; reperitur enim in mesenterio & omnibus ejus glandulis, in thymo quoque & axillis etiam: è mamminis infantum lac obstetrices emungunt, ut putant, in salutem.

At insuper doctissimo *Riolano* non modò in mesenterio contentum sanguinem circulatione privari placuit, sed neque propagines venæ cavæ, aut arteriæ, neque ullas partes secundæ aut tertiæ regionis circulationem recipere affirmat: adeò ut vasa circulatoria tantum nominet numeretque venam cavam & aortam, cujus *libr. 3. cap. 8.* rationem reddit valde infirmam. *Quia effusus, inquit, sanguis in omnes partes secundæ & tertiæ regionis, ibi remanet ad nutritionem; nec*
refluit

refluit ad majora vasa, nisi vi revulsus & inopiâ sanguinis maximâ vasorum majorum, vel impetu percitus affluat ad vasa circulatoria.

Remanere quidem illam portionem quæ in nutrimentum abire debet necesse est; aliàs enim non nutriret, si non in locum deperditi assimiletur & cohæreat unumque fiat: at verò totum influentem sanguinem ibi remanere, ut tantilla portio convertatur, non est necesse: non enim tanto sanguine quantum pars quævis in suis arteriis, venis & porositatibus ubique continet, pro alimento utitur; neque dum affluit & refluit necesse ut aliquid nutrimenti interius relinquatur, quare multo minus ut nutriat necesse est ut totus permaneat: sed & ipse doctissimus Vir, eodem libello quo hoc affirmat, penè ubique contrarium asseverare videtur; præsertim ubi circulationem in cerebro describit; & quatenus per circulationem cerebrum remittere

tere (ait) sanguinem ad cor; & ita cor refrigerari. Hoc modo & omnes partes remotæ cor refrigerare dicuntur: unde & in febribus cum præcordia vehementer ardore febrili torrentur & æstuant, nudatis artubus, remotis stragulis, refrigerium ægrotantes cordi quærunt.

Dum, ut in cerebro, affirmat Vir doctissimus refrigeratum sanguinem & ardore contemperatum, cor deinde per venas petere & refrigerare: videtur Vir doctissimus necessitatem quandam insinuare, uti à cerebro, ita ab omnibus partibus circulationem esse, contra quàm antea apertis verbis dixerat. Sed enim cautè asserit & ambiguè, non refluere ex partibus secundæ & tertiæ regionis sanguinem, nisi, inquit, vi revulsus & maxima inopiâ sanguinis majorum vasorum, vel impetu affluat ad majora vasa circulatoria; quod verissimum est si vero sensu hæc verba intelligantur:

nām

nam per majora vasa, in quibus inopia causat refluxum, puto ipsum intelligere venam cavam, aut venas circulatorias, non arterias: nam arteriæ nunquam deplentur, nisi in venas aut porositates partium, sed continuè à pulsu cordis infarciuntur, in venam cavam & vasa circulatoria, è quibus cùm sanguis cito pede labitur & ad cor properat, maxima statim inopia sanguinis foret, nisi omnes partes incessanter sanguinem in ipsas effusum refundere-

Adde etiam quod impetu sanguinis intrusi & compulsi singulis pulsationibus, & in omnibus partibus secundæ & tertiæ regionis contentus sanguis, de porositatibus in venulas, de propaginibus in majora vasa cogatur, partium circumjacentium motu & compressione: ab omni enim continente compresso & coarctato eliditur contentum: ita motibus muscutorum & artuum, venarum propagines inter-

interobrepentes pressæ & coarctatæ, sanguinem de minoribus ad majores trudent.

Quod sanguis autem in singulas partes continuè & incessanter ab arteriis impellitur & impetum facit nec refluat haud dubitandum; si admitatur, quod in singulis pulsationibus arteriæ omnes simul distendantur à propulso sanguine, & (ut ipse Vir doctissimus fatetur) diastole arteriarum à systole cordis fiat; neque semel egressus sanguis unquam intra ventriculos cordis regreditur propter occlusas valvulas: si hæc, inquam, Vir doctus, ut videtur, supponat, manifestum erit singulas partes cujusunque regionis, in quas infarctu & impetu sanguis vi detrusus propellitur, si non remeet, distendi. Adde quod, quò usque pulsant arteriæ, eò usque influxus & impetus pertingat: sed in omnibus cujusunque regionis partibus sentitur; & ubique pulsus vel
in sum-

in summis digitis & sub unguibus est : nec aliqua particula est in toto corpore , vel phlegmone vel furunculo dolens , quæ lancinantem pulsationis arteriarum motum & solutionem continui tentantem, non persentiscat.

Verùm ampliùs, quod ipse sanguis è porositatibus partium regrediatur, in cute manuum & pedum manifestum : quandoquidem, in summo gelu & frigidis temporibus, adeò refrigeratas manus & artus videmus, præsertim puerorum, ut, ad tactum ipsum, glaciei frigiditatem penè referant, adeoque stupore percitas & rigentes , ut vix sensum retineant , nec moveri queant, tamen interim sanguine saturæ, conspiciuntur rubræ aut lividæ; quæ partes recalescere nullo modo possunt, nisi, per circulationem propulso, scilicet, sanguine refrigerato & spiritibus & calore orbato, in ejus, locum ab arteriis influens novus calens & spirituosus sanguis, partes refo-

I veat,

veat, recalfaciat, motumque & sensum restituat: neque enim igne vel externo calore magis, quàm mortuorum membra, redintegrarentur ac restituerentur, nisi ab interno influente calido refocillarentur.

Re verâ iste circulationis præcipuus usus quidem & finis est, cujus gratiâ sanguis suo continuo cursu & influentiâ perpetuâ revolvitur & in circuitum agitur: Nempe, ut omnes partes ab ipso dependentes, primò calido innato in vitâ & suo esse vitali & vegetativo retineantur, & omnia sua munia peragant, dum (ut physiologi loquuntur) ab influente calore & spiritibus vitalibus sustentantur & actuantur: ita duorum extremorum; nempe frigoris & caloris beneficio, corporum animalium temperies, in suâ mediocritate, retinetur.

Ut aër enim inspiratus sanguinis nimium fervorem, in pulmonibus & centro corporis, temperat, fuliginum-

numque suffocantium eventilationem procurat, ita vicissim sanguis æstuans, per arterias in universum corpus projectus, extremitates omnes fovet: nutrit, in vivis sustentat & ab externi frigoris vi extinctionem prohibet.

Iniquum itaque foret & mirum, si singulæ particulæ cujuscunque regionis, transmutatione sanguinis & circulationis beneficio non fruerentur, quarum gratiâ potissimum videtur à naturâ instituta circulatio.

Itaque ut concludam, videtis enim quomodo circulatio sanguinis fiat citra confusionem & perturbationem humorum, in toto corpore & singulis particulis, tum in majoribus, tum minoribus vasis, idque ex necessitate, in partium omnium beneficium; sine illâ, neque refrigeratæ & impotentes unquam restituerentur, aut in vivis permanerent. Satis quoniam patet omnem influentiam caloris confer-

servantis per arterias adventare & circulationis operâ fieri.

Quare mihi videtur, doctissimum *Riolanum*, cum negat quibusdam partibus inesse circulationem, magis officiosè in suo *Enchiridio* loqui, quam verè; ut scilicet quamplurimis placeret & neminem oppugnaret, & humaniter magis, quàm graviter, veritatis studio, scripsisse. Sicut quoque videtur agere, cum sanguinem per septum cordis & incertos quosdam (*libr. 3. cap. 8.*) cæcosque meatus, in sinistrum ventriculum pervenire maluerit, quàm per amplissima & patentissima pulmonum vasa, arteificio valvularum regressum impredientium fabricata: rationem impossibilitatis & incommoditatis quam alibi dicit se proposuisse, videre cupio. Mirum esset cum eadem magnitudo, constitutio & fabrica sit aortæ & venæ arteriosæ, si non earum idem officium.

Sed

Sed illud valdè improbable, magnum flumen totius massæ sanguineæ per tantillos cæcosque septi meandros in tantâ copiâ ventriculū sinistrum petere, quæ responderet, tum ingressui à venâ cavâ in dextrolatere cordis, tum egressui de sinistro, qui ambo tam ampla requirunt orificia.

Sed inconstanter quoque hæc protulit, nam (*libr. 3. 6.*) pulmones cordi tanquam emunctorium & emissarium constituit, & ait, *pulmo afficitur ab isto sanguine transeunte, dum ejus sordes eò confluunt simul cum sanguine.* Sic etiam dicit, *labem pulmones acquirunt à visceribus intemperatis & malè moratis, quæ suggerunt cordi sanguinem impurum, cujus vitium non potest emendare cor, nisi per multas circulationes.* Idem ibidem, circa missionem sanguinis in peripneumoniâ & communicatione venarum cum vasis pulmonum contra Galenum dicit. *Si verum sit naturaliter sanguinem*

I 3 nem

nem transire à dextro cordis ventriculo ad pulmonem, ut deducatur in sinistrum ventriculum, inde in aortam; atque si sanguinis circulatio admittatur, quis non videt in affectibus pulmonum, sanguinem majori copiâ eò confluere & opprimere pulmones, nisi evacuentur primò liberaliter, dein partitis vicibus ad eos sublevandos; quod fuit consilium Hippocratis, qui in pulmone tumente, ex omnibus corporis partibus, capite, naso, lingua, brachiis, pedibus detrahit sanguinem, ut minuat quantitas, atque revellatur à pulmone, & educit sanguinem donec corpus fuerit exsangue. Suppositâ circulatione (inquit ibidem) facilius deplentur pulmones, per venæ sectionem: si rejiciatur, non video, quomodo sanguis possit inde revelli; nam si refluat, per venam arteriosam, in ventriculum dextrum, obstant valvulae sigmoides, & e cordis ventriculo dextro regressum, in cavam venam, sistunt valvulae tricuspides. Ergo, per circulationem exhauritur sanguis, sectis venis brachii & pedis. Simulque destruitur

Fer-

Fernelii opinio, scilicet, in pulmonum affectibus, sanguinem esse potius detrahendum, è brachio dextro quàm sinistro, quia sanguis non potest remigrare in venam cavam, nisi ruptis duobus claustris & odicibus in corde positis.

Addit insuper eodem loco (libr. 3. cap. 6.) Si admittatur circulatio sanguinis & transeat sapius per pulmones, non per septum medium cordis, duplex circulatio sanguinis assignanda; una qua perficitur à corde & pulmonibus, dum sanguis, à dextro cordis ventriculo profiliens, traducitur per pulmones, ut perveniat ad sinistrum cordis ventriculum; nam, ab eodem viscere exsiliens, ad idem recurrit, deinde, per alteram circulationem longiorem à sinistro cordis ventriculo emanans, circuit universum corpus, per arterias & per venas, ut recurrat ad dextrum cordis ventriculum.

Poterat hic addere doctissimus vir, tertiam circulationem brevissimam, è sinistro nempe ventriculo cordis,

ad dextrum, circumagentem portionem sanguinis per arterias & venas coronales, suis ramulis per cordis corpus, parietes & septum distributas.

Qui admittit, inquit, unam circulationem non potest alteram repudiare. Ita addere potuisset, *non potest tertiam dene-
gare.* Quorsum enim pulsarent arteriæ coronales in corde, si non sanguinem eo pulsu impellerent? & quorsum venæ (quarum officium & finis est sanguinem ab arteriis ingestum recipere), nisi ut sanguinem è corde tranarent?

Adde insuper, in venæ coronalis orificio valvulam (ut ipse Vir doctus fatetur *lib. 3. cap. 9.*) sæpissimè reperiri ingressum prohibentem, egressui reclinantem: ergo tertiam certè non potest non admittere circulationem, qui alteram universalem & per pulmones quoque & cerebrum (*l. 4. c. 2.*) sanguinem transire admittit. Neque enim, in singulis partibus cujuscunque regionis, fieri similiter à pulsu in-
gress-

gressum sanguinis & per venas regressum, omnesque proinde particulas circulationem recipere, haud potest denegari.

Ex his verbis ipsissimis itaque Viri doctissimi clarè patet, qualis ipsius est sententia, tum de circuitu sanguinis per universum corpus, tum per pulmones cæterasque omnes partes: nam ipse, qui primam circulationem admittit, apertè patet reliquas non repudiare. Quî etenim fieri potest, ut, qui circulationem per universum corpus toties affirmaverit & per vasa circulatoria majora, ipse, ullis propaginibus aut ullis partibus, secundæ aut tertiæ regionis, universalem circulationem inesse repugnaret? Tanquam si omnes venæ & majora, quæ vocat, vasa circulatoria, in secundâ regione corporis non esse, ab omnibus & ab ipso numerarentur.

An per universum possibile sit esse circulationē, quæ non per omnes partes?

tes? ubi negat, titubanter propterea agit & in negationibus vacillat & verba solum dat; hic ubi asseverat, cor datè loquitur & firmis additis rationibus, ut philosophum decet, & , super hanc sententiam, tanquam medicus expertus & vir probus consulit, in periculosissimis morbis pulmonum, extremum sanguinis emissionem esse remedium, contra *Galenum* & *Fernelium* suum dilectissimum: ubi si dubitasset, longè absit à tam docto viro Christiano, quod posteris experimenta per mortes, vitæque humanæ discrimina commendaret; aut à *Galeno* vel *Fernelio* summx apud ipsum authoritatis, sine apertâ ratione recedere voluisset. Quicquid denegaverit itaque circuitus, vel in mesenterio, vel aliis partibus, siue venarum lactearum, siue veteris medicinx in gratiam, siue alicujus alterius respectu, id humanitati & modestiæ tribuendum & condonandum est.

Hactc-

Haftenus fatis puto manifefte appa-
 rere , ex ipfius viri clariffimi verbis
 & argumentis , circulationem ubique
 efle , & fanguinein ubicunque fuerit
 locum mutare & per venas cor pete-
 re ; & idem mecum doctiffimus Vir
 sentire videtur. Ideo non opus eft ,
 inò fupervacaneum foret , huc meas,
 quas in libello de motu fanguinis ra-
 tiones edidi , ad hujus veritatis con-
 firmationem ampliozem transferre :
 quæ , tum ex fabricâ vaforum , positio-
 ne valvularum , aliisque experimentis
 & obfervationibus defumuntur ; præ-
 fertim cùm nondum viderim Tracta-
 tum doctiffimi de *circulatione fanguinis*,
 neque adhuc ulla argumenta viri do-
 ctiffimi , præter nudam negationem,
 repererim , quibus adductus circula-
 tionem , quam univerfalem , quamvis
 in plerisque partibus , regionibus &
 vafis repudiat , admittit.

Verùm quidem quod , tanquam
 pro fubterfugio , adduxerim *Galen*i au-

thoritatem de anastomosi vasorum; sed tantus vir, Anatomicus expertus, curiosus & diligens, prius, de majoribus arteriis ad venas majores, anastomoses easque patentes, visibiles, tanto torrenti & massæ sanguineæ profluvio, gurgites proportionales & orificiis propaginum (quibus aufert circulationem) majores patefacere & ostendere debuisset; antequam vias notas probabiliore & patientiores repudiaret; ubi eæ sint & qualiter fabrefactæ: num ad intromittendum tantummodo sanguinem in venas idoneæ, (uti ureterum insertiones in vesicam urinariam cernimus) & non ad remeandum, vel quo alio modo fuissent, tenebatur demonstrare & declarare. Sed (nimis forsan audacter dico) nec ipse Vir doctissimus, nec ipse *Galenus*, neque ulla experientia, unquam sensibiles anastomoses conspexerunt, aut ad sensum ostendere potuerunt.

Ego quâ potui diligentiam perquiriti,

fivi, & non parum olei & operæ perdididi, in anastomosi explorandâ, nusquam autem invenire potui vasa invicem, arterias scilicet cum venis, per orificia copulari: libenter ab aliis discerem, qui *Galeno* tantum ascribunt, ut ad verba ejus jurare ausi sint.

Neque in jecore, liene, pulmonibus, renibus, aut aliquo viscere est aliquis anastomosis, licet in illis coctis, usque quò friabile totum redderetur parenchyma, & tanquam pulvis, ab omnibus vasorum fibris esset excussum & acu detractum, ut omnes cujusvis divaricationis fibras, omnia capillamenta evidenter cernere potuerim. Audacter igitur affirmare ausus sum, neque anastomoses esse vel venarum portæ cum cavâ, arteriarum cum venis, aut pori cholidochi capillarium ramulorum, qui, per totam hepatis simam, dispersuntur cum venis.

Hoc solummodo in jecore recenti observare licet, omnes propagines ve-

næ

næ cavæ , per gibbam hepatis perrep-
tantes, tunicas habere infinitis puncti-
culis cribrosas, tanquam in sentina, ad
decumbentem sanguinem recipien-
dum fabrefactas. Portæ rami non si-
militer se habent, sed in propagines
divaricantur, & ut utraque distributio
horum vasorum, hujus in sinâ parte,
illius in gibbâ, ubique ad externam
usque visceris umbonem excurrant si-
ne anastomosis.

Tribus, duntaxat, in locis quod
æquipollet anastomosi reperio. 1. In
cerebro, è soporalibus arteriis in ba-
sin perreptantibus, frequentes & im-
plexæ fibræ oriuntur, quæ plexum
choroidem postea efformant, & ven-
triculos transeuntes, tandem in sinum
tertium, ubi officio venæ fungun-
tur, unitæ desinunt. 2. In vasis sper-
maticis, præparantibus vulgo dictis,
arteriolæ è magnâ arteriâ deductæ,
venis, dictis præparantibus, quas co-
mitantur, adhærent, & tandem intra
tunicas

tunicas illarum ita recipiuntur, ut ultima quasi eadem habeantur: adeò ut ubi ad testiculorum particulam superiorem, coniformem processum, corpus varicosum & pampiniforme dictum, desinunt, incertum planè sit an venæ an arteriæ an utriusque fines æstimemus. 3. Pariter & arteriarum, venam umbilicalem adeuntium, ultima stamina in venæ illius tunicis obliterantur.

Quid dubitandum, cum per tantam voraginem arteriæ magnæ, ejus ramuli sanguinis impulsu & infarctu distenti, tam magno & conspicuo etiam torrente depleri debeant; num sensibiles saltem & visibiles transitus, vortices & gurgites iis natura deneget; si omnem sanguinis fluxum eò divertere & proinde minores propagines & partes solidas, influxus beneficio omnino privatas esse, voluisset?

Denique, hoc unum experimen-
tum


tum commemorabo, quod, ad anastomoses declarandas & earum (si quæ sint) usum, ad transitum sanguinis de venis in arterias per illas vias & regressum evertendum, sufficiens esse videtur.

Aperto pectore cujusvis animalis & ligatâ venâ cavâ juxta cor, adeò ut nihil illâc in cor migret & confestim rescindantur arteriæ jugulares, illæsis venis, utrinque. Si inde arterias, datâ portâ ilico inanitas conspexeris & non pariter venas; manifestum fore arbitror, nullibi sanguinem è venis in arterias, nisi per cordis ventriculos derivari. Alioquin enim venas, ex illarum arteriarum effluvio (ut notavit *Galenus*) brevissimo spatio temporis, similiter ac arterias, sanguine destitutas cerneremus.

Quod restat *Riolane*, & mihi & tibi ipsi gratulor; mihi ob sententiam quâ circulationem exornasti, tibi etiam, ob librum doctum, politum, succinctum,

Etum, quo nil magis elegans, mihi
transmissum; pro quo gratias habeo
amplissimas; laudesque meritas refer-
re & debeo & cupio; me autem tanto
oneri imparem esse fateor: plus enim
dignitatis *Riolani* nomen subscriptum,
quam encomia mea (quæ velim maxi-
ma) Encheiridio allaturum scio. Vi-
vet in æternum celebris libellus, no-
minisque tui gloriam (pereunte etiam
marimore) posteris enarrabit. Anato-
men pathologiæ summâ cum gratiâ
conjunxisti, osteologiâ novâ utilissi-
mâ magno cum fructu locupletasti,
inactè istâ virtute Vir insignissime, &
me ama, qui te fœlicem simul & lon-
gævum & ut omnia tua celeberrima
scripta sempiternæ laudi tibi sint, ex-
optat,

GULIELMUS HARVEUS.

*Exercitatio altera*

A D

J. RIOLANUM

J. Filium.

In quâ multa contra Circuitum Sanguinis objectiones refelluntur.

L A B O R I S mei partem multis retrò abhinc annis (doctissime R I O L A N E) obstetricante prælo, in lucem edidi. Nullus verò propemodum existit dies, à circuitus sanguinis natali, nec minutissimum decursi temporis spatium, in quo non benè & malè de circulatione à me inventâ audiui: alii tenellulum adhuc infantem convitiis lacerant, tanquam luce indignum, alii contrà alendum esse fœtum, diju-

dijudicant, scriptisque meis favent & tuentur; illi magno cum fastidio oppugnant, hi ingenti cum applausu patrocinantur: hi me abundè experimentis, observationibus & autopsia confirmasse circuitum sanguinis, contra omnem argumentorum vim & impetum existimant; illi vix adhuc satis illustratum putant & nondum ab objectionibus vindicatum. Sunt autem, qui me inanem vivarum dissectionum gloriam affectasse clamitant, & ranas, serpentes, muscas, aliaque viliora animalia in scenam adducta, levitate puerili vituperant & irrident, nec à maledictis abstinere. Maledicta autem maledictis rependere indignum philosopho & veritatem inquirenti judico; satiùs & consultiùs fore arbitror, tot malorum morum indicia, verarum luculentarumque observationum luce, diluere.

Ne oblatrent canes, aut suam ne evomant crapulam, aut ne inter philosopho

losophorum turbam annumerentur quoque cynici, evitari non potest: verum ne mordeant, aut vesanâ suâ rabie inficiant, vel canino dente rodant ipsa veritatis ossa & fundamenta, cavendum est.

Vituperatores, momos, scriptoresque convitiis labe fordidos, ut, nunquam legendos mecum statui, (à quibus nihil solidum aut præter maledicta egregium sperandum) ita multo minùs responsione dignos judicavi. Utantur suo malo genio, vix unquam benevolos lectores habituros puto; neque (quod præstantissimum & maximè optandum) sapientiam donat Deus optimus improbis, pergant maledicendo, donec ipsos (si non pudet) pigeat, vel denique tædeat.

Ad viliorum animalium inspectionem cum *Herachlito* apud *Aristotelem* in casam furnariam (sic dicam) introire si vultis, accedite, nam neque hic Dii desunt immortales; maximusque omnipo-

nipotens pater in minimis & vilioribus quandoque conspectior est.

In libello de cordis & sanguinis motu in animalibus, illa tantùm adhibui ex multis aliis observationibus meis, quibus aut errores redargui, aut veritatem satis stabilitam iri arbitrabar; plurima alia, dissectionis ope, sensu perceptibilia, tanquam redundantia & inutilia dereliqui; quorum quædam in gratiam studiosorum, qui illa efflagitant, paucis verbis nunc addam.

Tantum valet apud omnes Galeni magna authoritas, ut multum hæsitare video nonnullos, circa experimentum illius, de ligaturâ arteriæ super fistulam, intra cavitatem immisissam, quo demonstrari videtur pulsus arteriarum fieri à facultate, per tunicas à corde transmissâ, & non à sanguinis intra cavitates impulsu, & proinde arterias dilatari ut folles, non ut utres.

Hoc

Hoc experimentum memoratur à *Vesalio*, viro Anatomes peritissimo, sed neque *Vesalius*, neque *Galenus* dicit, experimentum hoc fuisse ab ipsis, sicut à me probatum; tantummodo præscribit *Vesalius*, consulitque *Galenus* veritatis indagandæ studiosis, quò certiores fierent, non cogitans aut intelligens, difficultatem illius operis, neque, cùm fit, vanitatem: quandoquidem, licet omni diligentia administretur, nil tamen pro illius opinionis confirmatione facit; quæ pulsus causam esse tunicas asseverat: sed magis declarat ab impulsu sanguinis concitari. Nam super calamum aut fistulam quamprimùm ac vinculo arteriam strinxeris, supra ligaturam arteria, statim ab impulsu sanguinis desuper impacti, dilatatur: ultra orbitam fistulæ, inde & fluxus inhibetur & impetus refringitur; ita ut arteria vinculo subdita, obscure admodum pulset, quia est sine impetu transeuntis sanguinis.

guinis, eò quod supra ligaturam reverberatur.

Sin verò infra fistulam abscissa arteria fuerit, videre licebit contrarium ex saltu sanguinis projecti & per fistulam impulsu, sicut solet evenire (ut in libello *de sanguinis motu* notavi) in aneurisinate, ab exesis arteriæ tunicis, hoc (intra membranas enim continentur sanguis) non tunicam arteriæ dilatam, sed circumpositam ex membranis & carne cystim præter naturaliter factam pro continente habet.

Inferiores arterias, trans aneurisina, pulsare valdè exiliter senties, quando superius & præsertim in aneurismate ipso, pulsus magni & vehementes apparent; quanquam ibi pulsationem & dilatationem fieri, ab arteriarum tunicis, aut facultate cysti communicatâ, fingere non possumus, sed planè ab impulsu sanguinis.

Sed enim, quò *Vesalii* error & aliorum inexperientia appareat evidentior,

tior, qui afferunt (ut opinantur) partem fistulæ subditam non pulsare ligato vinculo, expertus dico, subditam partem pulsaturam, si rectè fiat experientia, & cùm solveris vinculum, ubi afferunt subditas arterias repulsare, ajo, minus pulsare partem subditam soluto, quàm stricto vinculo: nam sanguinis è vulnere profilientis effusio omnia perturbat & irritum experimentum & vanum reddit: adeò ut nil certi ob impetum sanguinis, ut dixi, demonstrari possit.

Si verò (quod experientiâ mihi cognitum est) denudaveris arteriam & digitis compressis detinueris rescissam partem, poteris, ex arbitrio, multa tentare, ut veritas planè tibi elucescat. Primum, singulis pulsibus allisum sanguinem in arteriam descendentem perferentes, quo arteriam dilatari videbis. Poteris quoque sanguinem, pro libitu tuo, exprimere & dimittere; si exilem partem orificiû
laxa-

laxaveris, singulis pulsibus subsultu ejaculari & (quemadmodum diximus in arteriotomiâ aut perforatione cordis) singulis contractionibus cordis sanguinem ejici, in arteriæ dilatatione, manifestum erit perscrutanti.

Quod si toto & continuo fluxu perpetim emanare siveris, & sive per apertum caniculum sive aperto orificio erumpere permittas, in ipso flumine tum visu, tum tactu (si manum applicueris) omnes ictus cordis, omnemque ejus rhythmum, ordinem, vehementiam, intermissioneinque persentisces; haud aliter quàm si in volam manus per syphonem diversis & variatis ejaculamentis, projectam aquam percipere liceret, sanguinem exilientem variato impetu & inæquali, tum visu tum motu percipies. Tanto quandoque impetu ex rescissâ arteriâ jugulari erumpentem observavi, ut sanguis manui allisus, per quatuor vel quinque pedes, refractus reverberatusq; resiliret.

Sed quò clariùs, quod in dubio est, appareat, pulsificam vim non per arteriarum tunicas à corde manare, habeo, è nobilissimi viri cadavere, arteriæ descendents portionem, cum duobus cruralibus ramis, spithamæ lòngritudine, exemptam, in os fistulosum conversam; per cujus cavum, dum vivebat nobilissimus vir, descendens arteriosus sanguis in pedes, subditas arterias suo impulsu agitabat; in quo tamen casu, arteria idem passa, tanquam si super canaliculum fistulosum constrieta & ligata foret (secundum *Galenì* experimentum) ut neque dilatari, eo loci, neque arctari, ut foliis, neque vim pulsificam à corde inferioribus & subditis arteriis communicare, aut per soliditatem ossis facultatem, quam non susceperat, deducere potuerit. Nihilominus inferioris arteriæ pulsum agitari in cruribus & pedibus, optimè memini, dum vivebat me sæpissimè observasse; fui enim ipsi

Me-

Medicus assiduus, ille mihi amicus necessitudine conjunctissimus. Quare in illo nobilissimo viro, necesse inferiores arterias ab impulsu sanguinis, ut utres, dilatatas fuisse, non, ut folles, ab expansione tunicarum: siquidem, idem inconueniens, eademque interceptio facultatis pulificæ, necesse est ut obveniat, tunicæ arteriæ in calamum & tubulum ossæum totaliter conversæ, quæ calamo vel tubulo constricto, quò minùs arteriæ subditæ pulsant, obvenit. Alio quoque Viro nobilissimo & fortissimo, aortam partemque magnæ arteriæ juxta cor in os rotundum conversam novi.

Ita *Galen*i experimentum, vel saltem ejus analogon, quod industriâ non inventum, sed casu repertum est, satis manifestum facit, interceptionem pulificæ facultatis constrictione vel ligatura tunicarum arteriæ non impediri, ut inde arteriæ subditæ non pulsarent. *Galen*i experimentum (ex

K 2

quo

quo opinionem *Vesalius* ex dictis patet, confirmatam iri speraverat) merito redargui.

At non propterea omnem motum etiam tunicis arteriarum denegamus, sed, quem cordi tribuimus, concedimus, nimirum coarctationem & systolem, vel à distentione ad constitutionem naturalem regressum, ab ipsis tunicis fieri. Sed hoc annotandum, non, ab iisdem, dilatari & coarctari, sed à diversis causis & instrumentis, ut in motu omnium partium & ipso quoque corde observare licet. Ab auriculâ hoc distenditur, à se ipso contrahitur; ita arteriæ à corde dilatantur à se ipsis subsidunt.

Poteris & aliud experimentum eodem tempore facere. Si duo acetabula ejusdem mensuræ repleveris, alterum arterioso profiliante sanguine, alterum venoso ex venâ ejusdem animalis extracto, poteris sensu statim & postea, cum coagulati refrixerint
ambo

ambo sanguines, quænam sit differentia, inter utrumvis, observare : contra eos, qui aliam speciem sanguinis in arteriis fingunt, quam in venis : nempe in illis floridiorē & nescio quomodo, spiritu copioso ebullientem, efflatum, (ad exemplum lactis aut mellis super ignem effervescentis & intumescents) ampliorem locum replentem faciunt.

Si namque sanguis, è sinistro cordis ventriculo in arterias impulsus, adeò in spumofam & sufflatam naturam fermentaretur, ut una aut altera gutta totum aortæ cavum distenderet, procul dubio, detumescente illâ fermentatione, ad quantitatem guttarum quarundam rediret (hanc causam assignant aliqui, cur, in mortuis, inanitæ arteriæ reperiuntur) & idem, in cotylâ arterioso sanguine plenâ, conspiceretur. Ita enim & in lacte & in melle refrigerato obvenire experimur. Quod si in utrâvis cotylâ sanguis eodem penè colore & non multum dissimili

consistentiâ coagulatus fuerit, similiter & serum exprimens; & pariter si utramque mensuram, dum calet & dum friget, compleverit, sufficiens erit cuivis, ad fidem faciendam & ad quorundam insomnia rejicienda, puto argumentum. •

Neque aliam speciem esse, sinistro quam dextro cordis ventriculo, sanguinis & sensu indagare poteris & ratione; proportionabiliter enim venam arteriosam unâ spumante guttâ distentam coaffirmatum opportheret & proinde eundem & similiter effervescentem & fermentantem sanguinem dextro quàm sinistro; quandoquidem ingressus venæ arteriosæ & aortæ egressus æquipollens & æquiparabilis est.

Tria potissimum adducuntur ad hanc opinionem inducendam de diversitate sanguinis: unum, quod arteriotomiâ floridiorem sanguinem extractum vident: alterum, quod in dissectione

sectione

sectione corporum mortuorum, tam sinistrum ventriculum cordis, quàm arterias omnes adeò inanitas, reperiunt: tertium, quod sanguinem arteriosum spirituosiorem & spiritibus repletum intelligunt, & ita majorem multò locum occupare cogitant: quorum omnium causas & rationes, quibus ea sic appareant, ipsa inspectio prodit.

Primum, quod ad colorem pertinet; semper & ubique exiens sanguis per angustum foramen, quasi percolatur, est tenuior & levior pars, quæ supernatare solet, hæc quia magis penetrativa est, eliditur: sic in phlebotomiâ, sanguis, majori fluxu aut vi erumpens, è majori orificio, longiusque prosiliens crassior, corpulentior & colore obscuriore est: sin ex parvulo foramine & angusto guttatiinque emanaverit (ut solet è venâ solutâ ligaturâ) floridior, tanquã enim transcolatus, exit pars solummodo tenuior

K 4 & pe-

& penetrativa magis, ut in hæmorrhagiâ narium, vel extractus per hircines, vel cucurbitulas, vel quovis modo per diapedesin exiens, floridior cernitur: quia tunicæ ob crassitiem, durtiemque angustiores redduntur, nec adeò facilè reclinantes, ut exeunti sanguini viam præbeant patentem: sicut quoque contingit obesis corporibus, cum ex pinguedine subcutaneâ, venæ orificium opprimitur, sanguis tenuior & floridior tanquã arteriosus appareat. Ex adverso si sanguis è rescissâ arteniâ liberè profluens acetabulo accipiat, venosus apparebit; multò floridior sanguis in pulmonibus, & exindè exprimitur, quam in arteriis reperitur.

Vacuitas arteriarum in corporibus mortuis (quæ forsan imposuit *Erasistrato*, ut arterias spiritus tantum æreos continere existimaret) inde evenit, quod quando subsident (meatibus occlusis) pulmones, nec ulterius respirant, per ipsos sanguis liberè nō potest transi-

transire: perseverat tamen interim per temporis spatium cor in expellendo, unde & sinistra cordis auricula contractior & ventriculus, pariterque arteriæ inanitæ & sanguinis successione non repletæ, sed vacuæ apparent: si simul cor pulsare cessaverit & pulmones respirando transitum præbere, ut in iis, qui aqua frigida submersi suffocantur, aut syncope & morte subitanâ extinguuntur, pariter repletæ & arteriæ reperirentur.

Quod ad tertium attinet de spiritibus, quinam sint & qualiter in corpore & quali consistentiâ, an separati & distincti à sanguine & partibus solidis, an commisti, tot tanque diversæ opiniones sunt, ut non sit mirum, spiritus, quorû natura in ambiguo ita relinquitur, communi ignorationis subterfugio inservire. Vulgò enim scioli, cum causas assignare haud norunt, dicunt statim à spiritibus hoc fieri, & omnium opifices spiritus introducunt, &

uti mali Poëtæ , ad fabulæ explicatio-
nem & catastrophën Θεὸν ἀπομυζαντὶς
advocant in scenam.

Fernelius & alii , spiritus aëreos &
invisibiles substantias , supponunt ;
probant enim esse spiritus animales
(eodem modo quo *Erasistratus* in arte-
riis) quia in cerebro cellulæ reperiun-
tur, quas, cùm non datur vacuum, spi-
ritu in vivis repleri concludunt. To-
ta tamen schola Medicorum, tres spi-
rituum species constituit, naturales
per venas, vitales per arterias, & per
nervos animales tranari spiritus : unde
dicunt Medici. ex *Galeno*, quandoque
partes cerebri consensu laborare, quia
prohibetur facultas cum essentiâ, id
est, spiritu, quandoque citra essen-
tiam. Insuper, præter influentes hos
tres ordines spirituum, totidem im-
plantatos videntur asserere. At nos
neque in venis, nervis, arteriis aut cæ-
teris partibus vivorum dissectionibus
explorando ullos invenimus. Alii cor-
poreos

poreos spiritus faciunt, alii incorporeos; qui corporeos volunt, quandoque sanguinem vel sanguinis tenuissimam partem, copulam animæ, quandoque in sanguine contentos (ut in nido flamina) & continuo fluore insitos spiritus sustentatos subintelligunt, quandoque sanguini contradistinctos. Qui spiritus incorporeos affirmant, non habent ubi insistant; sed & per potentias spiritus agnoscunt, ut spiritus concoctivos, chylicativos, procreativos & tot spiritus quot facultates aut partes.

Sed & Scholastici, spiritum fortitudinis, prudentiæ, patientiæ, omniumque virtutum & spiritum sapientiæ sanctissimum connumerant, omneque donum divinum. Malos item & bonos spiritus, assistere, possidere, deferere, vagari suspicantur: morbos à caco-dæmone, tanquam à cacochimiâ, opinantur causari.

Quanquam nil magis incertum &

dubium quàm de spiritibus doctrina tradita, tamen, ut plurimum omnes Medici cum *Hippocrate* concludere videntur, corpus nostrum ex tribus compositum esse partibus, scilicet continentibus, contentis & impetum facientibus; per impetum facientes spiritus interpretantur. At si pro impetum facientibus, spiritus intelligendi, quicquid in vivis corporibus vim habet impetum agendi, spiritus nomine compellaretur. Nec ideo omnes spiritus sunt aëreæ substantiæ, nec potentiæ, nec habitus, ut neque incorporei.

Sed quod ad propositum nostrum præcipuè spectat, omisso aliorum omnium significationum tædio, spiritus, per venas aut arterias excurrentes, à sanguine non separantur, ut nec flamma à nidore inflammabili; sed sanguis & spiritus unum & idem significant, nec diversi sunt, ut vinum generosum & spiritus ejus. Nam uti vinum
num

num ulteriùs vinum non est (amisso omni spiritu) sed vappa, aut acetum, ita neque sanguis sine spiritu sanguis est, sed æquivocè cruor; veluti manus lapidea aut mortua non ampliùs manus est, ita nec sanguis sine spiritu vitali, sanguis; sed corruptus statim censendus, si spiritu destitutus fuerit. Spiritus itaque qui in arteriis sanguini arterioso inseparabilis præcipuè inest, aut actus ejus est, sicut vini spiritus in vino & aquæ vitæ spiritus, aut sicut flaminula in vini spiritu accensa & sese nutriendo vivens.

Igitur sanguis, plurimùm spiritibus imbui dicitur, non quod illis turgeat, aut fermentetur, aut infletur, ut majorem locum desideret & requirat (quod experimento allato per acetabulorum mensuram certissimè dijudicare poteris) sed hoc sicut vinum, majoribus viribus & impetu agendi & efficiendi quod polleat, secundum mentem Hippocratis intelligendum est.

Idem

Idein itaque, sanguis; in arteriis, qui venis inest, licet spirituosior agnoscat & majori vi vitali pollere: non autem in quid magis aërium convertitur, aut vaporosior redditur. Non putandum nullos esse spiritus, nisi aërios; aut nullum impetum faciens, præter flatus & ventositates; sic neque spiritus animales, naturales, vitales, qui in solidis partibus, videlicet, ligamentis & nervis (præsertim si tot statuantur species) inhabitant, intra cœcos meandros contentos, tot aërias diversas esse formas, aut vaporum species arbitrandum.

Qui spiritus, in corporibus animalium, corporeos agnoscunt, sed consistentia aëriâ, vel vaporosâ, vel flameâ, ab illis scire libenter velim. An sine sanguine, huc, illuc, transire, refluxere & vagari tanquam corpora distincta possint? An verò sanguinis motum sequantur spiritus, tanquam vel sanguinis partes sint, vel indissolubili

lubili connexu & interruptâ exhalatione alligati: adeò ut neque derelinquere partes possint, neque transire sine sanguinis influxu & refluxu & transitu.

Si enim, sicut vapores aquæ attenuatæ calore, spiritus sint ex sanguine; quomodo, in continuo fluore & successione, partium existent pabulum? neque à pabulo remoti manere sine continuâ evanescentiâ possunt: proinde neque influere, neque refluere, neque transire quavis, neque permanere, sine sanguine influente, refluxente, transeunte, tanquam eorum vel subiecto, vel vehiculo, vel pabulo sequi necesse est.

Deinde scire ab illis velim, qui spiritus in corde fieri docent & eos ex vaporibus vel exhalationibus ex sanguine (sive calore cordis sive concussione) suscitatos aëri inspirato permiscunt & componunt. An non tales spiritus, sanguine frigidiores mul-

tò

tò sint æstimandi : quandoquidem partes ambæ , ex quibus componuntur frigidiores multò sint, aër videlicet & vapor : vapor enim aquæ ferventis , multò ipsâ aquâ tolerabilior, flamma quævis minùs comburens quàm carbo ellychnii , & carbo ligni quàm ferrum, aut æs candens.

Unde videtur magis, spiritus hujusmodi, calorem suum à sanguine acceptum referre , quàm sanguinem à spiritu incallescere : & tales spiritus potiùs fuligines & effluvia excrementitia sanguinis & corporis , (veluti odores) quàm naturales censendos opifices ; præsertim cum tam citò, virtutem (si quam habent, à sanguine suo origine, acceptam) amitterent , fragiles adeò & evanidi existentes.

Unde quoque probabile foret, pulmonum expirationem datam esse , ut eâ (vapores efflando) eventaretur & depuraretur sanguis ; atque inspirationem , ut sanguis pertranseundo inter-

ven-

ventriculos duos cordis, contempera-
retur, ambientis frigore : nè exan-
descens & intumescens, quadamque
fermentatione inflatus (sicuti effër-
vescens mel & lac) adeò distenderet
pulmonem, ut suffocaretur animal :
quemadmodum sæpiùs in periculoso
asthmate vidimus : cujus etiam *Gale-
nus* causam referens, dicit ab obstru-
ctis levibus arteriis illud contingere,
videlicet, vasis venosis & arteriosis.
Hoc sum expertus, à suffocationis
asthmaticæ summo discrimine, cucur-
bitis affixis & multâ subito gelidâ af-
fusâ aquâ, liberatos fuisse non paucos.
Hæc forsan satis superque de spiriti-
bus hoc loco, quos definire & docere,
quid sint & quales, in *tract. physiologico*
debemus : tantum addam.

Qui de calido innato, tanquam na-
turæ ad omnia communi instrumento,
tractant ; & influentis caloris, ad om-
nes partes fovendas & in vitâ retinen-
das, necessitatem docent ; eum non
sine

sine subiecto existere agnoscunt : quia ob celeritatem influxus & refluxus (in animi pathematibus præsertim) huiusque caloris motum velocem, corpus mobile non proportionabile reperiunt ; spiritus introducunt, tanquam corpora subtilissima, maximè penetrativa & mobilia ; eosque haud aliter, quàm operationum naturalium divinitatem mirabilem, ab illo communi instrumento (videlicet calido innato) provenientes, efferunt : illos spiritus, sublimes, lucidos, æthereos, cœlestis naturæ, divinos, vincula animæ, esse consimiliter comminiscuntur ; veluti vulgus imperitorum, quorum operum causas non capiunt, Deos immediatos authores opinantur & prædicant.

Unde calorem influentem, in singulas partes perperam per spiritus influxum, eumque per arterias adventantem, decernunt, tanquam si sanguis, nec tam citò moveri, nec penitus insinuari,

finuari, nec tantopere fovere potuisset. Eoque provecti sunt hujus opinionis fiducia, ut contentum in arteriis sanguinem esse negent.

Sed levissimis argumentis conantur astringere, sanguinem arteriosum specie differentem esse, vel aëriis hujusmodi spiritibus, repletas esse arterias & non sanguine, contra ea omnia, quæ *Galenus* adversus *Erasistratum*, tum ab experientia, tum ratione petitâ attulit.

Verùm enim verò, sanguinem arteriosum, non ita differre, superiori experimento & sensu, satis manifestum; sanguinis influxum & spiritus non separatos à sanguine, sed, ut ejusdem corporis, per arterias influere, sensus quoque facere potest manifestum.

Observare licet, quando & quoties extrema, manus, pedes vel auriculæ rigent & frigent, & influente calore rursus restituntur, quod simul
con-

contingat eas partes colorari & calefieri & repleri, venasque antea exiles & oblitteratas ad apparentiam tumefieri: unde & quandoque cùm subito recalescunt, dolore afficiuntur partes: ex quibus apparet, id, quod influxu suo calorem advehit, idem esse quod replet & colorat: hoc autem præter sanguinem nihil aliud esse potest, sicut antè demonstratum est.

Longiori discissâ arteriâ & venâ, quivis sensu percipere evidenter potest, cùm viderit partem venæ citeriorem, versus cor, nihil sanguinis emittere; partem verò ulteriorem profundere copiosum & nil præter sanguinem. (qualiter postea, pag. 249. in experimento meo commemorato in jugularibus internis factò) Contrâ rescissâ arteria, sanguinis parùm, ex parte posteriore dissectâ manat, citerior verò pars, tanquam è syphone, violento impulsu merum sanguinem ejaculat.

Quo experimento constat, quâ
tran-

transitus in utrisque fit, an hâc , an illâc ; constat item, quâ velocitate, quo motu sensibili, non sensim & guttatim, quâ violentiâ insuper effusio fiat. Sed ne quis subterfugiendo prætendat spiritus esse invisibiles : dimittatur orificium vasis dissecti in aquam, vel oleum ; si enim quidpiam exiret aëreum per bullas erumperet visibiles. Hoc enim inodo, crabrones, vespas & hujusmodi infecta, in oleo demersa & suffocata, ultimò aëris bullulas è caudâ, dū moriuntur, emittunt ; unde ita respirare vivos non est improbabile.

Animalia enim omnia , aqua submersa & suffocata ultimò , cū profunduntur & subsidunt , bullulas , ex ore & pulmonibus , emittere solent, cū spiritum reddunt.

Constat denique eodem experimento , in venis valvulas ita exactè claudī, ut aër inflatus non penetret, multò minùs sanguis. Constat inquam sensu, neque sensibilibiter, neque insensibilibiter,

liter, neque sensim, neque guttatim; sanguinem per venas à corde elongari.

Ne quis tandem eò confugiens dicat, hæc ita esse cùm turbatur natura, & præternaturaliter constituta sit, non verò cùm sibi relicta liberè agat. Quandoquidem in morbosâ & præternaturali constitutione, eadem apparent, quæ in naturali & sano statu; dicendum & existimandum non est, quod si, discissâ venâ, tantum sanguinis ex ulteriori parte emanare videatur, id præter naturam fieri, quia turbatur natura: non enim dissecctio partem citeriorem claudit, quo nihil exinde exeat, aut exprimi queat, siue turbetur natura siue non.

Alii similiter contendunt dicendo, quanquam abscissâ arteriâ propè cor, in tantâ copiâ singulis pulsibus prorumpat statim sanguis, quod non propterea semper cor integrum, integrâ arteriâ, tantum pulsu pellat. Verisimi-

mi-

milius tamen est, omnem pulsum aliquid impellere, neque posse sine aliqujus contenti propulso, pulsum continentis esse. Tamen quidam, quò se defenderent & circulationem vitarent, non verentur affirmare & asseverare, arterias, videlicet, in viventibus & secundum naturam sese habentibus, adeò plenas, ut ne ultra pauca grana sanguinis admittere valeant, & consimiliter de cordis ventriculis. Sed extra dubium est, quodcumque & quousque dilatari & contrahi, arteriis & ventriculis conceditur, recipere sanguinis quantitatem cavitatibus respondentem, idque ultra multa grana esse debere. Nam si ventriculi ita distendantur (ut vidimus quandoque in Anatomiâ vivorum) quoad nil amplius sanguinis admittere possint, restitat cor ab impulsu, tensum renitensque si permaneat, suffocatione mortem inducit.

Sanguis dum movetur, an attrahatur,

tur, an impellatur, an suâ intrinsecâ naturâ sese moveat, satis, in libello *de motu cordis & sanguinis*, dictum est: ut & de actione, functione, dilatatione, contractione cordis, qualiter fiat ea, simul cum arteriarum diastole: sic ut, qui exindè argumenta contradicendi sumant, quæ dicta sunt, vel non intelligere, vel nolle visu rem explorare, videantur.

Haud quidquam puto in corpore attractum demonstrari posse præter alimentum, idque successione partium sensim in loca deperditi, sicut lucernæ oleum à flammâ.

Unde, omnis attractionis sensibilis & impulsione, commune organum primum illud est, quod nervi habet naturam, vel fibræ, vel musculi; nempe ut sit contractile quod (seipsum contrahendo) abbreviari possit, & ideò tendere, adducere, aut propellere: sed hæc fusiùs & apertiùs alibi in organis animalium motoriis declaranda.

Adeò

Adeò iis qui circulationem repudiant, quia neque efficientem neque finalem causam vident, neque cui bono fiat, hæc pauca ad demonstrandum adhuc adjungam. Prius in confesso esse debet, quod sit circulatio, antequam propter quid fiat, inquiratur: nam ex iis, quæ in circulatione & hæc positâ obveniunt, usus & utilitates, investigandæ veritatis sunt plures. Sunt enim in Physiologiâ, Pathologiâ & Therapeiâ recepta, quorum causas, non novimus, esse tamen nullus dubitat; videlicet, febrium putridarum, revulsionis & purgationis excrementorum; ea omnia, tamen, circuitus beneficio intelliguntur.

Quicunque itaque circulationem controvertuntur, eò quod problemata medicinalia (stante circulatione) solvere non possint; aut in morbis curandis, & medicamentis usurpandis, apparentium causas exinde colligere nequeant; aut causas receptas à præ-

L

cepto-

ceptoribus falsas esse videant; aut approbatas priùs opiniones relinquere indignum putent; & per tot sæcula traditam disciplinam, veterumque auctoritatem, in dubium vocari nefas existiment.

His omnibus respondeo, naturæ
 ✕ opera facta manifesta sensui, nullas opiniones, nullamque antiquitatem morari: naturâ enim nihil antiquius, majorisque auctoritatis.

Ad problemata non solubilia (uti putant) è medicinalibus observationibus, tanquam impedimenta sanguinis circulationi, objiciunt, & suos errores declarando, opponunt.

Stante circuitu phlebotomiâ non revelli, cùm sanguis nihilo minùs parti affectæ impellatur.

Excrementorum pravorumque humorum transitum, per cor nobile viscus & principale metuendum.

Effluxum excretionemque mirantur, cùm quandoque ex eodem corpore,

porc, diversis partibus, immò ex eodem foramine, eodemque tempore, nonnunquam malus & corruptus sanguis egreditur; cùm, si continuo fluxu sanguis agigaretur, per cor transiens permisceretur concussus.

Hæc & hujusmodi plurima, è Medicorum schola prolata, quæ fieri possint dubitant, nam repugnare videntur, quo minùs circulatio admittatur. Neque satis factum opinantur (sicut in Astronomiâ) nova systemata ordinare, nisi omnia phænomena solvant.

Non aliud hoc loco respondere visum est, quam circulationem non eandem, ubique & semper, esse; sed multa contingunt, ex sanguinis motu velociori vel tardiori, cordis propellentis robore & infirmitate, sanguinis copia, conditione, vel constitutione, partium densitate, obstructione & similibus. Crassior sanguis per angustos meatus ægriùs transit, pertransiens

per jecoris parenchyma magis transcolatur, quàm per pulmonum.

Non pari cursu, per carnis & parenchymatis rariorem texturam propellitur, ac per nervosarum partium compactam consistentiam. Tenuior enim & purior & spirituosior pars, citiùs permeat, crassior, terrestrior & caco-chymica, diutiùs subsistens, repudiatur. Pars nutritia (ultimum alimentum, sive ros, sive cambium) magis penetrativa est (siquidem ubique apponenda, vel ipsis cornibus, plumis, unguibus, pilis denique) si omniquaque enutritæ partes secundum omnes dimensionès augmentantur.

Excrementa quibusdam locis propterea secernuntur & coagmentantur quæ aggravant, aut concoquuntur: neque excrementa, vel pravos humores, semel segregata, neque lac, pituitam, sperma, neque ultimum alimentum (rorem & cambium) cum sanguine revolvì necesse puto, sed adhærere

hærere quod nutrit, ut agglutinetur, oportere.

De quibus omnibus, plurimisque aliis, in propriis locis determinandis & declarandis, nempe Physiologiâ; reliquisque artis medicinæ partibus; nec de circulationis sanguinis consequentibus, inconvenientiis, vel convenientiis, convenit disputare, priusquam ipsa circulatio stabilita sit, & pro concessio admittatur.

Astronomiæ exemplar non hic imitandum est, ubi ex apparentiis duntaxat & ipso quod sit, causæ & ipsum propter quid investiganda veniunt. Sed sicut quis eclypseos causam perquirens, si supra Lunam sisteretur, ibi eorum causam discerneret, quæ sub sensum cadunt, sensu, non ratiocinio sensibilibus; nulla alia certior demonstratio ad fidem faciendam adduci poterit, quàm sensus & αὐτὴν ὁρᾷ.

Aliud experimentum insigne, apud omnes studiosos veritatis, cupio ex-

ploratum, quo & pulsus arteriarum ab impulsu sanguinis fieri & illustrari perspiciatur.

Intestinorum canis, vel lupi, vel cuiusvis animalis inflatorum & exiccatorum (qualia apud pharmacopœos vidimus) si in quâvis longitudine, pars abscissa, aquâ impletâ, utrinque ligetur, ut sit tanquam farciimen. Poteris ab unâ parte, digiti ictu, pulsâ & vibratâ, in alterâ extremitate adversâ, applicatis digitis (ut supra carpi arteriam solemus pulsum indagare) omnem ictum & motus differentiam clarè sentire, atque hoc modo) ut etiam in omni venâ corporis turgente, sive viventis, sive mortui) poterit quispiam tyronibus omnes pulsum differentias, in magnitudine, frequentîâ, vehementîâ, rhythmo ad sensum æmulando & docere & indigitare.

Tanquam enim in longâ vesicâ repletâ & in tympano oblongo, omnis ictus unius extremi in altero simul
cer-

cernitur, sic proinde in hydropo ventris, sicut quoque in omni abscessu liquidam materiâ oppleto.

Solemus anasarcam à tympanite distinguere; si enim omnis impulsus & vibratio, in uno latere facta, clarè in altero sentiatur tactu, tympanitem sensimus; non, ut falsò existimatur, quia sonum tympani refert, & flatu tantum fiat (quod nunquam accidit) sed quia, uti in tympano, omnis ictus levissimus pertranseat, & vibratio quævis percurrat: serosam enim & ichorosam, qualis urina est, substantiam subesse denotat, & non aut lentam, aut viscidam, ut in anasarcâ, quæ impressa ictus & impulsione vestigia servat, non transmittit. Hoc experimento in medium adducto, oritur potentissima objectio, contra sanguinis circuitum, à nemine, qui contrà me scripserit, observata, aut opposita.

Quandoquidem in hoc experimento, pulsus systoles & diastoles, vide-

mus fieri posse, sine exitu liquoris, in arteriis idem posse ex ictu cordis contingere, sine circuitus necessitate, quis suspicabitur, & similiter Euripi in morem, illinc huc & vicissim, hinc illuc sanguinem agitari. Verum alias hanc difficultatem solvimus sufficienter, & nunc quoque dicimus, in arteriis viventium hoc non esse, quoniam continue & continenter, auricula cordis dextra, ventriculum implet sanguine, cui tricuspidēs valvulæ regressum negant, & simul auricula sinistra sinistrum, & uterque ventriculus in systole, projicit sanguinem & protrudit, quem sigmoides valvulæ non sinunt remeare. Aut igitur alicubi expulmonibus & pariter ex arteriis emigrare, continuè & continenter debere; aut tandem alicubi stagnans & infarctus, vel continentia vasa dirumperet, vel cor ipsum distendendo suffocaret; ut in vivâ dissectione anguis (in libello meo de *sanguinis motu*)

ad

ad sensum contingere annotavimus.

Ad hoc dubium declarandum, duo experimenta, inter multa alia commemorabo, quorum priùs antè retuli, quo clarè apparet sanguinem in venis, continuo & magno conatu & fluore, versus cor semper currere.

In jugulari venâ internâ denudatâ damæ vivæ, (coram multis Nobilibus & Rege Serenissimo Domino meo assistentibus) per medium divisâ & abruptâ, ex parte inferiori, è claviculâ surgente, vix guttæ quædam prodierunt sanguinis; quando magno impetu & rotundo fluore prorumpente, longiùs deorsum è capite per alterum illius venæ orificium, sanguis uberri-
mè scaturiret.

Idem quotidie poteris observare in phlebotomiâ profluente sanguine: si uno digito, paulò infrà orificium, venam comprimas, affatim fluor sistitur: quâ compressione solutâ, abunde denuò effluit, ut priùs.

In quâvis visibili longâ venâ cubiti, sursum extensâ manu & omni sanguine deorsum è manu, quoad poteris, depressio: videbis venam, quasi (relictâ in cute foveâ) collapsam: quamprimum verò summitate unius digiti comprimās, statim partem, manum versus, oppleri, turgere & (adveniente è manu sanguine) tumesceri percipies.

Quid causæ est, quod, si detento spiritu & inde compressis pulmonibus, multo ingesto aëre, simul vasa pectoris comprimantur, inde sanguis in faciem & oculos multo rubore compellatur?

Quid, quod (ut *Aristot.* in problematibus) omnes actiones, cum vi & robore magis obeuntur, detento anhelitu quàm laxato?

Quare è venâ frontis vel linguæ, compressione juguli & retento anhelitu elicitur sanguis uberior.

Ego aliquando in cadavere huma-

no noviter strangulato, intra duas horas à suspensione, aperto pectore & pericardio, (antequam faciei rubor evanuerat) auriculam dextram cordis & pulmones, plurimum distentos & infarctos sanguine, multis attestantibus ostendi, præcipuè verò auriculam, ad maximi hominis pugni magnitudinem, turgentem adeò ut disruptam iri putares. Quæ moles die sequente, refrigerato penitus corpore & per alias vias cruore dilapso, detumescens evanuerat.

Ita, ex his & aliis experimentis, satis constat sanguinem per venas omnes, ad cordis basin, procurrere, &, nisi transitus daretur in alias vias, coaccrvari in corde & ipsum eo obrui: uti ex alterâ parte, si non ex arteriis efflueret, sed regurgitatus reperiretur, appareret quantum opprimeret.

Aliam observationem addam. Vir nobilis Eques Auratus Dominus *Robertus Darcy*, progener doctissimi viri

& mihi amicissimi Medici celeberrimi Doct̃oris *Argent* : cū erat consistente ætate , sæpè de dolore quodam pectoris oppressivo , conquestus est, (præcipuè nocturno tempore) ita ut quandoque lipothymiam, quandoque suffocationem à paroxifino metuens, vitam inquietam & anxiam degeret. Multa incassum tentavit , omnium Medicorum consiliis usus , tandem ingravescente morbo, cachecticus & hydropicus factus, tandem in uno paroxifino vehementer oppressus, obiit. In hujus cadavere (præsentē D. Doct̃ore *Argent*, qui tunc temporis præfident Collegii Medicorum erat , & D.D. *Gorge*, Theologo & Prædicatore egregio , qui illius Parochii Pastor fuit) ex impedito transitu sanguinis, de sinistro ventriculo in arterias, paries ipsius ventriculi sinistri cordis (qui satis crassus & robustus cernebatur) disruptus & perforatus amplo hiatu sanguinem effundebat ; erat enim fo-

ramen tantæ magnitudinis , ut facile aliquem ex meis digitis reciperet.

Alium virum cordatum novi , qui præ-irâ & indignatione, ob acceptam injuriam à potentiôri & illatam contumeliam, adeò æstuans exardescibat, ut auctis irâ & odio in dies (ob inhibitam vindictam) & animi passione vehementi , quo maximè exulceratus erat, nemini patefacto, tandem in mirum genus morbi incidit, summâque oppressione & dolore cordis & pectoris miserè conflictabatur , ut adhibitis experitissimorum Medicorum auxiliis non proficientibus , in scorbuticâ tandem post aliquot annos cachexiam incidens, contabuerit & mortuus fuerit.

Huic tantummodo aliquid solaminis accidit , quoties & quamdiu , tota pectoris regio, à fortissimo viro comprimeretur, & (sicut pistor panem subigit) depfaretur & tunderetur. Amici ipsum veneficio , à maleficâ affectum putabant, aut cacodemone obsessum.

Huic

Huic quoque arteriæ jugulares, pollicis magnitudine distentæ (tanquam utravis esset aorta ipsa, aut arteria magna descendens) altè & vehementer pulsabant & tanquam aneurismata duo oblonga apparebant, unde & arteriotomiam circa tempora tentavimus, sed nullo levamine.

In cadavere dissecto inveni cor & aortam, adeò distenta & sanguine referta, ut cordis moles & ventriculorum cavitates, bovini cordis magnitudinem, compensarent & æquipollerent. Tantæ, sanguinis cohibiti vel conclusi, vires sunt, tantusque impetus.

Quanquam (per experimentum pridem allatum) impulsus fieri, sine exitu (conquassatâ hinc inde aquâ) poterit in farcimine prædicto, idem tamen non potest sanguini, in vasis viventium contingere, sine summis & gravissimis impedimentis & periculis.

Veruntamen exinde manifestum est, sanguinem in suo circuitu, non eâdem velocitate & celeritate ubique transire, neque eâdem vehementiâ, in omnibus locis & partibus & temporibus: sed pro ætate, sexu, temperie, habitu corporis, cæterisque rebus contingentibus internis, vel externis, naturalibus, vel non naturalibus, multum variari.

Non enim per vias & meandros occlusos, obstructos, aut impeditos, eâdem celeritate transit, quâ per apertos reſeratos & patentes, neque per corpora aut partes densas, constrictas, infarctas, uti per raras, relaxatas & deobstructas. Neque cum debiliter, lentè & molliter fit impulsus, ita expeditè procurrit, aut penetrat, uti cum vi & robore impingitur, vel vehementiâ & copiâ cogitur.

Neque crassus ipse sanguis, aut solidior, aut terrestrior factus, adeò penetrativus, uti cum serosior, attenuatus

nuatus & liquidior existit.

Proinde rationabiliter existimandum est, sanguinem in circuitu suo, tardiùs pertransire per renes, quàm per cordis substantiam: celerius per jecur, quàm per renes; per lienem, quàm per jecur; per pulmones, quàm per carnes, aut alia aliqua viscera similis consistentiæ.

Similiter contemplari licet, de ætate, sexu, temperie, habituque corporis molli vel duro, de ambientis frigore densante corpora, quando vix venæ appareant in artubus, aut color sanguineus cernitur, aut calor sentitur, à pastu liquidiore factò sanguine ab accessione alimenti.

Ita quoque venæ, conspicuè magis & liberè effundunt in phlebotomiâ, calefacto corpore, quàm refrigerato. Videmus cùm ab animæ passione, (dùm administratur phlebotomia) inciderit pavidus in lipothymiam, statim sistatur sanguinis effluxus & pal-
lor

lor exsanguis totam corporis superficiem occupet, rigeant membra, sibilent aures, oculi occæcentur & convellantur. Campum invenio ubi longius percurrere & latiùs speculando exspatiari possum. Sed enim tanta hinc veritatis elucescit lux, quâ tot problemata explanari, tot dubia solvi, tot affectionum & morborum causæ & curandi occasiones investigari possunt, ut peculiarem tractatum postulare videantur. De quibus omnibus, in observationibus meis medicinalibus, admiratione digna tradam.

Quid enim magis admirari contingit, quam quomodo in omni affectu, appetitu, spe vel timore, corpus nostrum diversimodè patitur & vultus evariatur ipse, & sanguis hùc aut illùc subterfugere videtur? Irâ rubent oculi, constringitur pupilla in verecundiâ ruboreq; profunduntur genæ; timóre, infamiâ & pudore pallida est facies, rubent auriculæ tanquam malè audituræ;

turæ; cupidine tactis adolescentibus, quàm celeriter impletur nervus sanguine & erigitur, ac tenditur. Scire autem Medicis est observatione dignissimum & utilissimum, quare omnem dolorem, sanguinis emissio, cucurbitulæ & arteriæ deferentis fluxum compressio & coarctatio artificiosa, (præsertim intereà dum fiunt) tanquam incantamento sedant & auferunt: hæc, inquam, ad observationes, ubi clarè enodantur, referenda.

Perperàm, anatomicâ dissectione confirmanda & ex *autopsiæ* quæ sunt credenda, inepti & inexperti, dialecticis & longè petitis argumentis, conantur vel evertere, vel stabilire. Quicunque scire desiderat, an sit nec ne, quod in quæstione sensibile & visibile est, is vel expertis credere, vel ipse videre teneatur oportet; nam nullâ aliâ certitudine clariori erudiri, aut doceri poterit.

Quis vinum dulce, mustumve aquæ
potum

potum antecellere, iis, qui nunquam degustârunt, persuadebit? Quibus argumentis, Solem esse lucidum & suprâ omnes stellas splendentem, à natiuitate cœcis, confirmabit? Sic de sanguinis circuitu, quem tot sensibilibus ad autopsiam experimentis confirmatum, jam per tot annos, habuerunt omnes. Nemo inventus est, qui rem sensibilem (videlicet motum fluxus & refluxus) sensibilibus pariter observationibus redarguere, aut experientiam allatam infringere, experimentis valuit; imò contrarium astruere ex *αὐτοψία*, ne tentavit quidem.

Cùm interim non desint, qui, ob inexperientiam & rudem ignorantiam anatomicam, nihil quidquam sensibile, in contrarium quod afferrent, habentes, vanis quibusdam & fictis, ex præceptorum auctoritate receptis assertionibus & non probabilibus suppositis, sed quibusdam captiuiculis vacuis obstrepunt; multis verbis insu-

insuper, iisque haud dignis, sed maledictis, nec sine convitiis & contumelia oblatrant :- quibus nihilo plus agunt, quàm ut dent operam, vanitatem & ineptias suas & malos mores, argumentorumque (quæ à sensu petenda essent) inopiam prodere ut cum falsâ sophisticâ ratione, adversus sensum insanire videantur. Haud aliter, quàm maris siculi ventorum turbine concitati fluctus, contra scopulos intrâ Charybdin allisi, fremunt, & refracti & reverberati spumant, hi contrâ sensuum ratiocinium.

Si nihil admitteretur per sensum, sine rationis testimonio, aut contra quandoque rationis receptæ dictamen, jam nulla essent problemata disputanda. Si non certissima per sensum fides foret, eaque ratiocinando stabilita, (ut in suis constructionibus Geometri solent) nullam perfectò admitteremus scientiam: quippe, ex sensibilibus de sensibilibus demonstratio

stratio rationalis, Geometrica est.

Ad cujus exemplar, abstrusa & à sensu remota, ex apparentibus manifestioribus & notioribus, innotescunt. Meliùs multò *Aristoteles* non admonet lib. 31. de gener. anim.) de generatione Apum disputans: *rationi fides adhibenda*, inquit, *si quæ demonstrantur, conveniunt cum iis, quæ sensu percipiuntur, rebus: quæ cum satis cognita habebuntur, tum sensui magis credendum quàm rationi.*

Unde probare vel improbare vel reprobare omnia ab examinatione minutim factâ debemus: examinare verò & experiri, an rectè an perperam dicta sint, ad sensum deducere oportet & sensus iudicio confirmare & stabilire, ubi si quid fictum, non latet. Unde *Plato* in Critias difficilem non esse earum rerum explicationem asserit, quarum experientiam habere poterimus. Neque apti ad scientiam sunt auditores, qui nullam experientiam habent.

Quàm arduum & difficile sit, nullam

iam experientiam habentibus, illa, de quibus experientiam aut sensibilem cognitionem non habent, docere & quam inepti & indociles, inexperti-que auditores sint ad veram scientiam, cæcorum de coloribus, surdorum de consonantiis judicia planè ostendunt. Quis unquam maris fluxum & refluxum, quis ex diagrammate geometrico, angulorum quantitates, aut laterum rationes, cæcos docebit? aut eos qui neque mare viderunt, neque diagrammata?

Inexpertus in anatomicis, in quantum, propriis oculis & proprio exinde conceptu, rem non tenet, cæcus in iis quadantenus existimandus & ineptus ad doctrinam, non enim, de quibus disputet Anatomicus, neque ex quibus in rei naturâ insitis, desumat argumenta, quidquam ritè novit; sed cuncta illi pariter ignota sunt, tam quæ concluduntur & colliguntur, quam ex quibus.

Nulla

Nulla autem possibilis cognitio est, ex non præexistente cognitione, eâque notiori: hæc una potissimùm causa est, cur tam incerta & conjecturalis nostra, de cœlestibus corporibus, scientia sit. Ab iis, qui causas & rationes omnium scioli adeò profitentur, scire velim, quare uti ambo oculi, simul hæc atque illuc, & quaquà versus sese intuendo moveant, nec singulatim, iste illuc, hic istuc, se convertat oculus, ita nec ambo cordis auriculæ? &c.

Quia febrium causas, aut pestilentia, aut quorundam medicamentorum mirandas proprietates, ipsorumque causas non norunt, an propterea essent negandæ?

Cur fœtus in utero, non respirans aërem, usque ad mensem decimum, ob defectum respirationis non suffocatur? Cùm natus in septimo, vel octavo, quamprimùm aërem inspiraverit, inhibita postmodum respiratione,

tionem, ob defectum aëris suffocetur ? Quare in utero existens, vel adhuc intra secundinas nondum exitum adeptus, vitam sine respiratione retinere poterit? quamprimum verò aëri semel expositus, nisi respiraverit, vitam retinere non possit ?

Quoniam multos video hæerere & de circulatione dubitare, & aliquos oppugnare ea, quæ de me non penitus intellexerunt; in eorum gratiam, breviter quid dictum velim, quæ ex libello *de cordis & sanguinis motu*, recapitulabo. Sanguis in venis contentus (suo quasi fundo) ubi copiosissimus (in venâ scilicet cavâ) juxta cordis basin & auriculam dextram, sensim ab interno suo calore incalescens, & attenuatus turget & attollitur (fermentantium in modum) undè auricula dilatata suâ facultate pulsificâ se contrahens, propellit eum confestim in dextrum cordis ventriculum, qui impletus suâ systole, subsequenter sese

seſe ab illo impulſo ſanguine expediens (cùm egreſſum valvulæ tricufpides impediunt) in venam arterioſam eundem (quâ patens porta datur) compellit, quò illius diſtentionem faciat. In vaſe arterioſo, jam ſanguis adverſus valvulas ſigmoïdes recurre impotens, ſed quia inſpiratione, ſimul & expiratione, extenti, ampliati & reſtricti ſint pulmones & unâ quoque vaſa ipſorum, huic ſanguini viam, tranſituinque, in arteriam venoſam præbent: ex quibus auricula ſiniſtra, ſimul & pariter cum auriculâ dextrâ, motum, rhythmum, ordinem & functionem peragens, eundem, in ſiniſtrum pariter ventriculum, ſanguinem intromittit, quem dextra in dextrum: unde ſiniſter ventriculus ſimul & pariter cum dextro (quando regreſſus unde venerat propter eadem valvularum retinentium impedimenta prohibetur) in capacitatem aortæ & conſe-

M

pellit:

pellit: arteriæ hoc subitaneo impulsu repletæ, cùm non ita subitò sese exonerare possunt, distenduntur, impelluntur & diastolen patiuntur.

Unde cùm continuè & continenter idem reïteretur, colligo, arterias, tum in pulmonibus, tum per universum, tot ictibus cordis & impulsionebus, sanguine adeò tandem distentas & infarctas iri, ut vel cessaret omnino impulsus, vel disrumperentur vel dilarentur adeò, ut omnem massam sanguinis à venis exhaustam continerent, nisi alicubi effluente sanguine exonerarentur.

Idem quia etiam de cordis ventriculis ratiocinium repletis & ab auriculis infarctis sanguine, nisi pariter sese deplerent in arterias, tandem ad extremum distenti ventriculi, ab omni motu destituti fixique permanerent. Hæc collectio mea demonstrativa & vera est & necessaria, si vera sint præmissa: illa autem vera esse vel falsa,

falsa, sensus nos facere debet certiores, non recepta ratio; *αὐτεψία*, non mentis agitatio.

Sanguinem præterea in venis, assevero semper & ubique, de minoribus in majores currere, & versus cor ab omnibus particulis properare: unde colligo, quam copiam (continuè intronissam) arteriæ receperunt per venas traditam, eandem reverti, tandemque eò refluere, unde primùm pelle-retur, & eo modo in circuitum sanguinem moveri, fluxu & refluxu à corde per impulsum, cujus impetu per omnes arteriarum fibras cogitur: postea, ab omnibus partibus, continuato fluxu, regredi per venas successivè à quibus absorptus & exhaustus traducitur: hæc vera esse docet sensus ipse & à sensibilibus collectio necessaria omnem dubitandi ansam tollens.

Denique hoc est, quod enarrare & patefacere, per observationes & experimenta conabar, non ex causis &

principiis probabilibus demonstrare, sed, per sensum & experientiam, confirmatam reddere, anatomico more, tanquam majori auctoritate, volui.

Ex his notandum, quantam vim & violentiam, concitatumque vehementiam in corde & arteriis majoribus, tactu & visu percipimus. Pulsus systolen & diastolen (in animalibus majoribus calidioribus) non dico, in omnibus vasis sanguinem continentibus, eandem esse, neque omnibus sanguineis animalibus; sed talem & tantam in omnibus, ut exinde fluxus sanguinis & citatior cursus, per arterias exiles, partium porositates, venarumque omnium ramos, necessariò fiat, & exinde circulatio.

Nam neque exiles arteriæ, neque venæ pulsant, sed duntaxat majores & cordi viciniore pulsant arteriæ: eò quòd non ita subito emittant, ac impellitur sanguis. Experiri poteris in dissecatâ arteriâ, ita ut liberè exeat san-

sanguis prout immittitur, nam pleno gurgite exiliente sanguine, in illâ vix pulsus persentiri, quia datâ portâ transcurrens sanguis illam non distendit.

In piscibus, serpentibus, frigidioribusque animalibus, cor tardè & debiliter pulsât, ut vix in arteriis pulsus percipias, sanguinem quia transmittunt lento admodum gradu. Undè in his, ut etiam minoribus arteriarum ramulis in homine, nulla tunicarum cum venis distinctio, quia sanguinis impulsu non percelluntur.

Rescissam & apertam arteriam, (ut dixi) pertransiens sanguis non impellit, neque ea pulsât, unde clarè cernitur, arterias neque innatâ facultate pulsificâ, neque à corde demandatâ, sed solo sanguinis impulsu, diastolen pati: nam tum pleno ipso in fluxu longius profluente, tam systolem quandam, quàm diastolen discernere & tactu percipere poteris, & ut antea dixi,

omnes pulsationis cordis differentias, rhythmum, quinetiam & ordinem, vehementiam, intermissioneinque in emanante fluore, (sicut in speculo imaginem) evidenter agnoscere.

Quemadmodum, cum aqua, vi & impulsu syphonis, per fistulas plumbeas in altum cogitur, singulas compressiones instrumenti, (per multa licet stadia distent) in ipso aquæ exeuntis fluxu, singulorum ictuum ordinem, principium, incrementum, finem, vehementiam observare & distinguere possumus, ita ex abscissæ arteriæ orificio. Ubi notandum, uti in exemplo aquæ, continuum effluxum esse videmus (licet modò longiùs exiliat modò propiùs) ita in arteriis, præter sanguinis concussionem, pulsum, vel vibrationem, (quæ non in omnibus, æquè cernitur) continuum exindè fluorem motumque fieri, quò usque primùm sanguis (in auriculam nempe dextram) ubi incepit, regreditur.

Hæc

Hæc in rescissâ aliquâ arteriâ longiori, (ut jugulari) quam intra digitos si comprehenderis, exitumque modereris sanguinis, magis aut minùs pulsare, amittere pulsum & recuperare, pro tuo libitu poteris explorare, ut clarè discernantur.

Sicut, integro pectore hæc manifesta hoc modo fiunt, ita aperto pectore & exentis exinde pulmonibus, amissoque motu respirandi, brevi experiri poteris; scilicet, contrahi auriculam sinistram, inaniri, albidiores fieri, & tandem cum sinistro ventriculo pulsum intermittere, omittere, destituere & pariter ex rescissæ arteriæ foramine, minùs & minùs sanguinem, subtiliori filo & infirmiori pulsu, proruere, & denique deficiente nimirum sanguine & ventriculi sinistri impulsu) nihil ultra emanare.

Præterea ligatâ venâ arteriosâ experiri poteris & auriculæ sinistræ pulsum auferri, & illâ solutâ restitui, pro

arbitrio. Eodem hoc experimento, in moribundis, evidenter cernes; quod sicut prius à motu & pulsu, ventriculus sinister defistat, postea sinistra auricula, deinde dexter, ultimò auricula dextra, quod ita à quo incipiat vitalis facultas & pulsus primò, deficiat ultimò.

Quibus per sensum exploratis, manifestum est, sanguinem non per septum cordis, sed per pulmones tantum pertransire, duntaxat à respiratione commotos, non collapsos & requietos: hinc probabile est, quare in embryone (cùm nondum respirat) natura pro transitu sanguinis, in arteriâ venosâ (quo materia sinistro ventriculo & auriculæ sinistrae suggeratur,) foramen ovale aperit, quod adolescentibus & liberè spirantibus occludit.

Patet quoque, cur opprimi & infarciri vasa pulmonum, vel in morbo graviore lædi respirationem, adeò peri-

periculosum & lethale signum sit.

Patet non minus, quare sanguis adeò rutilans sit pulmonum; tenuior enim est, ut qui inibi transcolatur. Notandum amplius ex Epilogo antedicto, iis qui causas circulationis efflagitant, cordisque virtutem, omnium effectrice[m] suspicantur, & pulsum, ut transmissionis, ita attractionis, generationisque sanguinis authorem credunt cum *Aristotele*; itidem à corde spiritus fieri, vitalemque calorem influentem arbitrantur, idque cordis innato calore, tanquam immediato animæ instrumento, vel vinculo communi & ad omnia vitæ opera peragenda organo primo: & ita sanguinem & spiritus motum, perfectionem, calorem & omnem sanguinis rationem (quam *Arist.* dicit inesse sanguini uti in aquâ calidâ & in pulte ebulliente) à corde tanquam ab origine mutuari, corque causam primam esse pulsationis & vitæ existimant.

Apertè si loquar, hæc ita esse, (ut vulgò recepta sunt) non opinor: multa enim sunt, quæ me in aliam sententiam ire suadent in generatione partium observanda, quæ hic recitare non expedit, sed propediem forsan miraculosiora, majoremque lucem naturali philosophiæ allatura, à me in publicum dabuntur.

Interim dicam tantum & sine demonstratione proponam (bonâ cum veniâ doctissimorum virorum & antiquitatis reverentiâ) cor cùm dicatur omnium in corpore principium, author, fons & origo, primaque vitæ causa esse, unâ cum venis, arteriis omnibus, contentoque sanguine id subintelligendum est. Sicut cerebrum, cum suis omnibus nervis sensoriis, organis & spinali medullâ comprehensum, unum sensus organum adæquatum (ut loquuntur) est. Si verò per hoc vocabulum cor, corpus cordis, cum ventriculis & auriculis tantum sub-

subintelligatur, non puto esse sanguinis opificem, neque sanguineam, vim, virtutem, rationem, motum, aut calorem, ut cordis donum habere.

Deinde neque eandem esse causam diastoles & distentionis, quæ systoles & contractionis, sive in arteriis, sive in auriculis, sive ventriculis cordis, arbitror: sed pulsus pars quæ diastole dicitur, aliam habet causam à systole diversam & semper omnem systolen ubique præcedere debet.

Distentionis primam causam, calorem innatum esse, primamque distentionem esse in sanguine ipso, (fermentantium in modum,) sensim attenuato & turgente, in eoque ultimò extinctam puto. *Aristotelis*, pultis vel lactis in modum, exemplo assentior eò usque, ut illa elevatio, aut depressio sanguinis, non fiat à vaporibus, exhalationibus aut spiritibus, aut aliquo in formam vapoream, vel æriam concitato; neque sit causata, ab externo

M 6

agente,

agente, sed ab interno principio, regulante naturâ.

Neque cor (ut aliqui putant) tanquam anthrax, focus (instar lebetis calidi) caloris origo est & sanguinis, sed magis, sanguis calorem cordi (ut reliquis omnibus partibus) tribuit, quam recipit, utpotè omnium in corpore calidissimus.

• Cordi arteriæ & venæ coronales assignantur, in eisdem usûs, quibus cæteris partibus inserviunt, videlicet ad caloris influxum, pro fotu & conservatione ipsius: ideo calidiores omnes partes, quo magis sanguineæ, & quò sanguine magis abundant, calidiores convertibiliter dicuntur. Eâdem ratione, cor suis cavitatibus insigne, officina, fons, focus perennis, censendus est, non ratione corpulentiae, sed contenti sanguinis instar lebetis calidi. Hâc ratione jecur, lien, pulmones, cæteræque partes calidæ reputantur, quia multas venas vel vasa

con-

continentia sanguinem habent.

Atque hoc modo autumo, calorem nativum, seu calidum innatum, ut omnium operationum, commune instrumentum, sic pulsus quoque efficiens primum esse. Hoc non adhuc constanter assevero, sed tantum pro thesi propono. Quid in contrarium objiciatur à viris doctis & probis, sine verborum scurrilitate, convitiis, vel contumeliis, scire libenter velim, & si quis hanc rem susceperit, pergratum mihi fecerit.

Hæc itaque transitus sanguinis & circuitus, tanquam partes & vestigia sunt. Nempe de auriculâ dextrâ, in ventriculum, de ventriculo per pulmones, in auriculam sinistram, inde in ventriculum sinistrum & in aortam, omnesque per arterias à corde, per partium porositates, in venas, & per venas, ad cordis basin, quàm celeriter revertitur sanguis.

Uno experimento, quisquis cui placuerit,

cuerit, hoc discernere per venas poterit, ligetur brachium (ut solent) mediocri ligaturâ & tandiu brachium movendo, permaneat ligatum, quousque omnes venæ adprimè turgeant; & infra ligaturam tota cutis insigniter rubescat, tùm profundatur manus aquâ gelidissimâ vel nive, donec collectus infra ligaturam sanguis refrigescat factis; dein solutâ subitò ligaturâ senties ex sanguine frigido revertente, quàm celeri cursu sursum ad cor properet, & quam mutationem reversus in corde faciat: ut mirum non sit, quosdam à solutâ ligaturâ, post phlebotomiam in lipothymiam incidisse. Hoc experimentum monstrat, quod infra ligaturam venæ turgeant non sanguine attenuato & spiritu vel vaporibus inflato, (talem enim ebullitionem, immersio in frigidum deprimeret) sed solo sanguine, eoque, qui in arterias, vel per anastomoses, vel cæcos meandros, reverberari non potest.

Docet

Docet insuper quomodo per altos montes nivosos oberrantes, morte sæpe de improvise opprimantur, atque alia multa hujusmodi.

Sanguinem pertransire, per omnes partium poros & quaquã versum meare posse, ne durum videatur, unum addam experimentum. Laqueo strangulatis & suspensis, accidit idem, quod brachio ligato, ut trans chordam, scilicet facies, oculi, labia, lingua, partesque omnes superiores capitis, plurimo infartiantur sanguine, maximo rubore perfundantur, turgescantque usque ad livorem: in hujusmodi cadavere, soluto laqueo, quacunque positione collocaveris, intra non multas horas, videbis omnem sanguinem, vultum & caput deferere & à supinis & sursum positis partibus, in pronas & subjectas, per poros cutis, carnis, cæterarumque partium (suo quasi ductum pondere) decumbentem & omnes illas partes infra
positas

positas & cutem potissimum replentem, atro tabo colorare. Quantò magis sanguis vivus & spirituosus, vivo corpore, apertis porositatibus penetrativus, quàm cruor mortuus coagulatus, præsertim per habitum corporis frigore mortis densatum, viisque stipatis & compressis: tantò facilior per quascunque partes, transitus in vivis est & pronior.

Ingenio pollens, acutissimus vir, *Renatus Cartesius* (cui ob mentionem mei nominis honorificam plurimum debeo.) & alii cum ipso, cùm extractum cor piscium super planam tabulam expositum, pulsam æmulari, colligendo seipsum, vident quando erigitur, attollitur & vigoratur, ampliari, aperiri, ventriculosque suos, exindè capaciores esse autumant; quod haud rectè mecum observant.

• Collectum enim cùm est, tunc temporis, coarctari potiùs capacitates ejus omnes & in suâ systole esse,

non

non diastole certum est : ut neque est, quando tanquam enervatum collabitur & relaxatur, in suâ diastole & distentione, neque ventriculi exinde ampliores sunt : sic in mortuo, non dicimus in diastole esse cor, quia à systole concidit relaxatum, collapsum, omni motu destitutum & requietum, non distentum : distenditur enim & in suâ diastole propriè est, cum ex impulsione sanguinis per contractionem auricularum impletur, ut in vivorum anatomie evidenter satis apparet.

Latet acutissimum virum, quantum differant relaxatio & relapsus cordis & arteriarum, à distentione vel diastole ; & quod eadem causa distentionis, relaxationis & constrictionis, non sit ; sed potius contrariorum effectuum causas contrarias, diversorum motuum, diversas, sicut adductionis & extensionis, in quovis membro, oppositos esse musculos antagonistas, sat omnes Anatomici norunt : sic contrariis

trariis motibus, aut diversis, contraria & diversa activa organa, à naturâ, necessariò fabricata.

Neque mihi arridet, causa efficiens pulsus, quam posuit (secundum *Arist.*) eandem fore tam systoles quàm diastoles, nempè effervescentiam sanguinis, tanquam ebullitione factam. Sunt enim cordis motus, subitanei ictus, celeresque percussiones: nihil verò ita quasi nictu oculi, fermentatione, vel ebullitione, assurgit & collabatur: sed lentè sufflatur, quod affatim deprimitur. Præterquam quod in dissectionis, autopsiâ cernere liceat, ventriculos cordis, ab auricularum constrictione, distendi & repleri, & prout magis vel minus replentur, augeri; distentionem etiam cordis, motum quendam violentum esse, ab impulsione, non ab attractione aliquâ, factum.

Sunt aliqui, qui existimant, quod sicut ad plantarum nutritionem, impulsu

pulsu alimentum non indigeat, sed sensim ab indigentibus particulis, attrahatur in locum deperditi, ita neque animalibus, esse aliquem impulsu necessarium, quandoquidem similiter vegetativa facultas in his, atque illis, opus suum perficiat, verum diversa ratio est. Calidum influens perpetim requiritur, ad animalium membra fovenda & in vivis vivifico calore conservanda, &, ab externis injuriis refracta, restituenda, non ad nutritionem duntaxat.

Hæc de circuitu: qui, si vel impeditur, vel pervertitur, vel nimium concitatur, multa periculosa morborum genera & symptomata admiranda consequuntur; tam in venis, ut varices, apostemata, dolores, hæmorrhoides, hæmorrhagiæ; quàm in arteriis, ut tumores, phlegmones, dolores intensissimi & lancinantes, aneurismata, sarcofes, fluxiones, suffocationes subitaneæ, asthma, stupor,
apo-

apoplexia & alia innumerabilia. Quomodo subitò quandoque, instar incantamenti, auferantur & curentur quædam putata immedicabilia, non est hujus loci, ut enarrem.

Inter medicinales observationes & in pathologiâ, ea tradere potero, quæ nunquam hæctenus à quovis observata comperio.

Concludam, ut tibi satisfactionem pleniorē faciam (*Doctissime Riolanè*) qui in mesentericis venis, circulationem non fieri existimas, ligetur porta juxta jecoris cymuni, in vivâ dissectione (quod facilè poteris experiri) idem ex venarum, infra ligaturam, turgescentiâ, quod in administratione phlebotomiæ, ex ligaturâ in brachio, accidere videbis, quod transcursum inibi sanguinis patefaciat.

Sed cùm opinari videaris sanguinem, de venis in arterias, per anastomoses, regredi posse; ligetur, in vivâ dissectione, vena magna descendens,
juxta

juxta divaricationem ramorum cruralium; arteriam verò rescindas, sic quia datur porta; omnem massam sanguinis, ex omnibus venis (etiam ex cavâ ascendente) breviter pulsu cordis exhaustam fore videbis: tamen ultra ligaturam, venas crurales & inferiores partes duntaxat repletas. Quod, si aliqui in arterias per anastomoses regredi potuisset sanguis, nullatenus accideret.

F I N I S.

INDEX

Exercitationum Anatomicarum

G. H A R V E J I.

A.

- A**ctio Cordis quid, *Pag.* 51, 166
 Aër non ingreditur arterias in dia-
 stole, 4
 Aër non ingreditur arteriam veno-
 sam, neque cordis ventriculum finistrum,
 16
 Aëris inspirati usus, 194
 Alimentum quomodo in naturam partium
 transmutetur, 240
 Alimentum pediculorum intestina pertransire
 quomodo percipiatur, 149
 Allium pedum plantis alligatum expectorat,
 141
 Anasarca & timpanitidis differentia, 247
 Anastomoses arteriarum cum venis nullubi
 inveniuntur, 204, 205, 285
 Aneurisma probat arterias pulsare non vi pul-
 sificâ à corde per earum tunicam prove-
 niente, sed sanguine in earum cavitatem
 propulso, 11, 215
 Aneurisma ex rupta vel lassa arteria sangui-
 nem intra membranas continet, 215
 Animalia pulmonibus carentia unum habent
 cordis sinum, 12, 57. *quam* duobus ven-
 tri-

INDEX.

- triculo prædita, 152. vivunt alimento,
136. perfectiora perfectiori indigent ali-
 mento & calore, 152
- Animalia penè omnia cor habent, 45
- Animalia quamquam corde non instructa, 148
 quare cor non habeant, ibid.
- Animalia quadam pro corde vesiculam ha-
 bent, 46; 150, 159. rarius pulsant. quando,
 quomodo se habeant, 46, 150
- Animalia sanguinea omnia cor habent, 151.
 datur ibid., ratio.
- Anser cerebrum habet sine ventriculis, 159
- Aorta juxta cor in os rotundum mutata, 219
- Aorta propagines circulationem non recipiunt
 secundum Riolan. 177. rejicitur, 188
- Argumentum contra circulationem potentissi-
 mum, 247. hoc refellitur, 248.
- Arteria cruralis portio in os fistulosum con-
 versa, 218. omnes ab aortâ, hac à corde
 oritur, 53. nil præter sanguinem conti-
 nent, 3, 6, 236. eodem tempore omnes pul-
 sant, 2, 3, 19, 36. capillares minus pul-
 sant, 168, 268. non distinguuntur earum
 extremitates à venis, 168. distribuunt
 sanguinem per totum corpus, 2, 6, 7, 19,
51, 52, 54, 82, 85, 101, 107, 140, 195. æ-
 rem in diastole non introsumunt, 3, 4, 5,
 & sequ. non distenduntur ut folles, sed ut
 utres; quia implentur, 9, 10, 213, 215.
219, 266. calorem non refrigerium à corde
 in par-

- in partes vehunt, & quò pulsus edunt vehi-
 mentiore, eò citius deplentur, 95. in qui-
 busdam animalibus à venis non differunt,
 11, 171. non pulsant, vi pulsificà à corde
 descendente, aut illis innata, 11, 215, 218,
 269. à veteribus dicebantur vena, 36, 85.
 ubi robustiores, 167, 170. sanguinem sal-
 tu & impetu propellunt, 10, 33, 58, 92,
 115, 184, 215, 217. nisi sanguinem per ali-
 am viam exonerarent quam qua in ipsas
 sanguis ingreditur, tandem disrumpere-
 ntur, 82. sanguinem è venis non nisi per cor
 recipiunt, 93, 116, 208. ligata vel compres-
 sa versus cor intumescunt, versus extrema
 inaniuntur, 100, 106. non habent val-
 vulas, 121. tunicâ, supra fistulam ejus ca-
 vitati inditam, ligatam, ejus ulterior pars
 non pulsabit, 144. quare pulsent, 266, 268.
 experimentis probatur, 269. non deplen-
 tur nisi in venas & partium porositates,
 266, & sequ. 277, 279, & sequ.
 Arteria venosa est vena, 172. vulgaris ejus
 usus rejicitur, 15
 Arteriarum, venam umbilicalem aduentium,
 ultima stamina in vena illius tunicis obli-
 terantur, 207
 Arteriosa venâ ligatâ non pulsat auricula si-
 nistrâ, 271
 Asthma ex obstructis ramulis per pulmones dis-
 seminatis, 233
 Au-

I N D E X.

- Auricula dextra siue vesicula , auriculam referens, dicitur , primum vivens & ultimum moriens, 44, 160, 272. dextrâ pulsante, quiescente corde persentitur in ventriculo quadam palpitatione, 39, 42*
- Auricula ante cor moventur, 38, 40, 41, 163. dicuntur primi sanguinis motores, 160. in fatu quare majores, 163. in motu fiunt albidiores, 40, 41, 271. magna moles in noviter strangulatis, in refrigeratis minor, 251. quomodo repleantur, 40. ratione cordis est imbecillis vel robusta, 162, 170. sese contrahendo sanguinem in ventriculis propellunt, 160, 161*
- Auricularum prima generatio, 164. usus, 160, 162*
- Autopsia non longe petitis rationibus probandum, 258*

B.

- B** Otalli. error de transitu sanguinis in sinistrum ventriculum, 64

C.

- C** Alidum influens ad quid requiratur, 283. innatum in partes spirituum operari fluere perperam tradunt, 234. internum refocillat membra, 194
- Calor natus omnium operationum instrumentum, 277*

N

Car-

- Cartesii, circa piscis exentum cor error,* 280
Cartesium later differentia relapsus & diaflo-
les cordis & auricularum, 281
Causa ob quam sanguis in phlebotomiâ lon-
gius profilit, 113. quâ minus rectè Riola-
nus de circulatione judicat, 197. qua mi-
nus accurate de animalium partibus judi-
cent, 57. qua auctorem impulit ad cogi-
tandum de circulatione, 81
Cautio chyrgica, 169
Cerebrum consensu quomodo quandoque labo-
ret, 226. cum organis omnibus sensoriis
unum est sensus organum, 274. in quibus-
dam est sine ventriculis, 158
Chylus in hepate moratur, 143. per lacteas ad
hepar secundum Riolanum, 185. quomodo
ad hepar tendat sine lacteis secundum Au-
ctorem, 141, 187
Cibus quomodo deglutiatur, 50
Circulatio fit in propaginibus aortæ & vena
cava, contra Riol. 188. indiget propulfore,
137. non destruit veterem medicinam, 179.
non fit in venâ portâ secundum Riol. 177.
refellitur, 180. & sequ. ob qua variat,
243. autopsia probanda, 246. qua per uni-
versum corpus fit, etiam in singulis parti-
buz, 202. quomodo fiat, 48, 82, 86, 131,
277. sanguinis est in singulis particulis,
179, 180, 195, 201, 267. probatur, 87, 89,
98, & sequ. 105, 108, 116, 130, 265, 267.
Circu-

INDEX.

- Circulatione impedita multa oriuntur incom-*
moda, 283. una admissa, altera non potest
negari, neque tertia repudiari, 200
- Circulationem fieri per ramos porta in sima*
hepatis distributos, 186, 284. in mesenterio
fieri probatur contra Rioli. 180, 182, & seq.
- Circulationis lassus & calumnia, 110. usus &*
necessitas, 83, 133, 194, 195, 241
- Concoctio debet esse perfecta, 136*
- Constitutio & motus cordis aliter est quam*
pulmonum, 2. soporalium arteriarum in
cerebro, 206
- Contagium probat circulationem, 139*
- Contextus cordis maximam cum pulmonibus,*
hesitandi causam in distribuendo sanguine
præbuit, 27, 52. vena cava cum arteria
venosa in fœtu, 60. vena arteriosa cum
arteria magna in fœtu, 61. horum usus à
nonnullis traditus rejicitur, 62, 63
- Contrariorum effectuum cause contrarie, 281*
- Copia sanguinis cor transeuntis arguit ejus*
motum circularem, 88
- Cor aliquando movetur, aliquando quiescit,*
26, apparet, ibid. anguilla sine auriculis
etiam in minimas particulas divisum pal-
pitat, 41. columba, postquam moveri de-
sierat, digito madefacto saliva, admotoque
calide, iterum pulsavit, 42. dum movetur
tria precipue animadvertenda, 27. I. Mu-
cro accedit ad basin, pectus fecit & pulsus
facit,

facit, ib. II. undique sed magis secundum
 latera constringitur, ibid. unde hoc manife-
 stum, ibid. III. duriusculum evadit, ibid.
 hæc simul fiunt, 29. dum movetur albidie-
 ræ est coloris, 28, 29, 99. undique constrin-
 gitur, 27, 29, 99, 281. eodem tempore cum
 arteriis non est in diastole, 8. eo quo move-
 tur non distenditur, neque sanguinem re-
 cipit, 30, 32. esse primam causam pulsatio-
 nis, vita omniumque actionum, non existi-
 mat Harvejus, 273. Et sequi, quomodo di-
 catur actionum author, 274. fons, officina
 vitalis spiritus: Sol microcosmi: perfectio-
 nis causa sanguinis: auctor omnium, vita
 fundamentum, 5, 12, 83, 84, 133, 134, 136,
 274. non tantum cordis corpus intelligitur,
 275. in cadavere à retento sanguine bovini
 magnitudine, 254. in embryone movetur,
 63. in exanguibus quomodo moveatur, 45.
 in frigidioribus tarde Et languide pulsat,
 269. in omnibus animalibus non est distin-
 cta neque separata particula, 148. in per-
 fectioribus quale desideratur, 151. in qui-
 busdam non discernitur, 149. quibusdam
 non pulsat tempestatibus frigidioribus, 46,
 150. in quiete quomodo, 27. in systole
 movetur secundum omnes fibras contra
 Vesal. 28, 30, 31. majori copiâ sanguinem
 in partes propellit, quam ad nutritionem de-
 sideratur; vel alimenta vel tota sanguinis
 massa

INDEX,

- massa suppeditare potest, 86, 88, 89, 91, 96, 102, 117, 132. moribundum, 38. non est primum vivens, neque ultimum moriens, 44. non immerito ab Hippocrate musculus, 165. non potest se extendere ut in se ipsum aliquid in diastole attrahat, 161. nunquam est sine ventriculo, 158. per contractionem auricularum in suâ diastole impletur, 89, 281, 282. pulsu sanguinem per totum corpus pellit, 84, 116, 137, 140. quibus robustum, 155. quomodo ab extremis partibus refrigeretur, 190. quomodo in embryone moveri incipiat, 45, 164. quomodo appareat, 164. semper habet sibi adjunctam auriculam, 46. singulis contractionibus sanguinem propellit, 29, 52, 87, 89, 99. tanquam lebes à contento sanguine calet, 276. collectum est in systole, 280. exemptum aut mortuum dum collabitur non est in diastole, 281. una semi hora plus quam mille pulsus facit, 88*
- Corde affecto corrumpitur animal, 135*
- Cordis corpus non est sanguinis nec ejus motus & caloris opifex, 275. sed ratione ventriculorum, 276. Cordis & auricularum motus aperto pectore, 271. eorum motus ordo, 272. ventriculi in motu non ampliantur contra Cartes. 281*
- Coronales arteria & vena cordi calorem & conservationem addunt, 276*
- N 3*
- Dia-*

D.

- D**iaſtole arteriarum à ſyſtole cordis, 192.
 cordis & arteriarum non ſiunt ſimul,
 33. cordis eſt ejus diſtentionio, 281. ſi ſanguinem à corde attrahat, non poteſt eodem tempore arteria aërem recipere, 8
- D**iaſtole & ſyſtole non ſiunt ab iſdem cauſis, 275, 281
- D**ifferentia à colore ſumpta non arguit ejus diverſam ſpeciem, 223. inter pulſum & reſpirationem ſecundum Galenum, 2. reſapſus & diaſtoles cordis, 281. ſanguinis arterioſi & venoſi, 7. ſunt ab inanitione arteriarum & repletionem venarum non arguit diverſam ſpeciem in utroque ſanguine, 224
- D**ifficultas reſpirationis in tertianis, 139
- D**ifficultates in chyli diſtributione diluuntur, 187
- D**iſſectio corporum ſanorum & morboſorum ad quid neceſſaria, 175. unus tabidi quantum commodi, 176
- D**olor quomodo tanquam incantamento ſedatur, 258
- D**urities cordis à tentione, 28

E.

- E**bullitio & elevatio ſanguinis reſutatur, 278, 282
- E**xanguia nihil pulſans hyeme habent, 46
- E**xperimentum quo Galenus probat nil præter ſan-

INDEX

sanguinem contineri in arteriis, 6, 220. probare videtur arterias pulsare vⁱ pulsificâ à corde proveniente, 9, 213 non potest commodò adhiberi 10. contradicatur, 214. & sequ. 220. Vesalius cum aliis rejicitur, 216.

F.

- F** Acultas pulsifica non provenit à corde per arteriarum tunicas, 11, 215
Fatus in utero non respirat, editus in lucem defectu aëris suffocatur, 263
Febrium tertianarum calor, 140
Fernelius in pulmonum affectibus sanguinem è dextro brachio detrahendum autumans, refellitur à Riolano, 199
Fibræ cordis quales, 165. Galen. refellitur, ibid.
Foramen in portâ hepatis in fœtu exstat, 143. usus, ibid. ovale parte qua arteriam spectat obtegitur membrana, 60. ejus substantia, ibid. 61, 272. ovale quare in fœtu, 272
Frigus de improvviso viatores opprimit, 279. in extremis partibus unde, 134
Fuligines arterias in systole emittere vulgo creditur per carnis & cutis poros, 2. rejicitur in sequ.

G.

- G**eneratio animalium procedit ex non animali in animal, 44. pulli in ovo quomodo incipiat, 43
Generationes tempestatum & meteorum, unde, Ha-

H.

- H**æmorrhogia per se sedatur, 95
Hæmorrhoidalis vena, unde, 147. ejus
 usus, ibid.
Hepar in embryoæ fere nullius usus, 143. ejus
 prima generatio, 144. in fatu posterius ge-
 neratur, 143
Hippocrates quomodo sanguinem miserit in
 tumefcente pulmone, 198

I.

- I**mpulsio & vis sanguinis à corde, 116
Impulsus sanguinis distendit arteriam, 10.
 quod exemplo probatur, 246
Incommoda quam ex ligatâ arteriâ, 5
Inconstantia Riolani proditur, 197. & sequ.
Inexperiti difficile docentur, 259. 262. & sequ.
Inspiratio facit ad transcolationem sanguinis
 per pulmones, 71, 77

L.

- L**acertula ventriculorum cordis ab Aristot.
 Nervis, 32, 162. usus, ibid. 154. in
 quibusdam non reperiuntur, 155. in sinistro
 ventriculo robustiores, 156
Lanio nisi jugulum boum secuerit, antequam
 cor pulsare desinit, totum sanguinem non
 exhauriet, 96
Ligatura est stricta vel mediocris, 103. stri-
 cta brachio injecta quid liceat observare,
 104. quid hac soluta, 105 & sequ.
 Ligatura quâ differetia 108 frustra sæpius qua-

INDEX.

re adhibita, 102. usus in medicina, 102, 103
Liporhymia causa in sanguinis missione, 109,
 278. in *liporhymia* sistitur sanguis, 56.
 ejus symptomata, 257

M.

Massa sanguinis media è jugularibus &
 cruralibus vasis evacuatur tantum
 in mortuis, 5, 9. è venâ cavâ in arterias
 cordis pulsu transit, 86, 88, 97. per aper-
 tam arteriam brevi effluit. 6, 92, 93
Materiam serosam, & pus empyicorum in ar-
 teriam venosam absorptam per urinas ex-
 cretam experientia probavit, 20
Medicamenta exercent intus vires exterius ap-
 plicata, 140. quomodo deferantur ad cor, 141
Morborum præcipue chronicorum effecta, 176
Motum cordis diligentius perlustrans, quid ob-
 servabit, 51
Motus cordis cognitu difficilis, 22. definitur,
 28. deglutitioni comparatur, 50. in ani-
 malibus moribundis, 38. in quibus mani-
 festior, 26. quomodo fiat, 48, 282. similis
 est musculorum, 28
Motus duo auricularum & ventriculorum vi-
 dentur unus esse, 49
Motus & usus cordis & arteriarum à prio-
 ribus traditus, rejicitur, 21
Motus in corde quatuor loco, non tempore dis-
 tincti, 8, 37
Motus localis in animalibus, unde, 161

<i>Motus proprius cordis non est diastole,</i>	30
<i>Motus quidam sanguinis deprehenditur auricula dextra pulsu cessante. non calore,</i>	42.
<i>sanguinis celeritas experimēto probatur,</i>	278
<i>Mors,</i>	132
<i>Mortis genera duo,</i>	100
<i>Musculi in motu quomodo sint constituti,</i>	28

N.

N <i>atura providentia in chyli distributione,</i>	142
<i>Natura in fœtu duobus ventriculis utitur quasi uno,</i>	65
<i>Notitia omnis ex sensu,</i>	174
<i>Nubecula in ovo, cui gallina incubuerat. in aquâ ostensa, medio punctum sanguineum apparebat,</i>	478
<i>Nutritio pulli in primâ ejus generatione,</i>	144

O.

O <i>bjectiones quædam confringuntur quibus annihilari posset argumentū à copîâ sanguinis cor transeuntis sumptum, 77 & seq.</i>	
<i>Opinio de ventriculorum usu & officio absurda convellitur 13. vulgaris de arteriarum diastole & systole,</i>	3
<i>Ordo quo cor pulsare desinit,</i>	39
<i>Origo venæ coronalis positi væ gastricæ, & epiploicæ, 147. earum disseminatio & usus, ib.</i>	

P.

P <i>ars nulla de repente opus magnum perficit, 53. nutritur sanguinis motu, 83. quo</i>	
---	--

INDEX.

- Sanguine*, ib. *quomodo dicatur calidior*, 276
Partes algentes circulatione, *calorem recipiunt*,
 134. *quâ ratione valere dicantur*, 276
Physiologia Medicis scitu necessaria, 175
Plant- animalia cor non habent, 148, 149
toto corpore pro corde utuntur, 149
Poresitates in septo cordis nulla sunt, 18
Portio sanguinis exclusi debet respondere
quantitati contenti, 89, 98, 117
Pulmones non habent eundem usum cum arte-
riis & corde, 5. *quare circa cor fabrefacti*, 2.
quare facti secund. Hier. Fabr. ab aq. p. 17
Pulmonum sanguis quare rutilans, 273. *sub-*
stantia, 19. *spiritus secundum Columbi-*
num conficiunt, 6
Pulsatio in effluente sanguine conspicuus, 263.
moderari potest in rescissâ arteriâ, 271
Pulsus arteriarum non fit vi pulsificâ descen-
dente à corde per earum tunscar, 216, 218.
causa, 35, 37, 40, 51, 132, 192. *copinio Car-*
teli rejicitur, 282. *cordis & arteriarum*
sunt contractiones, 40. *cordis in exangui-*
buis, 45. *usus arteriarum differt à pectoris*
atque pulmonum, 2. *contra Galenum*, qui
refellitur, 11

Q. Vanitate magnâ sanguinem cor trans-
 it. 115. & sequ.
Quicquid in animalium in animali fit, istud pri-
imum deficit, 45

Ram.

R.

- R** Amicruralium vasorum in os fistulosum
 conversi, 218. splenici usus, 147
 Refutatio opinionis de diastoles & systoles ar-
 teriarum usu, 3
 Respiratio & pulsus non fiunt iisdem causis, 11
 Respirationē ladi in magnis morbis lethale, 273
 .Respirationis usus, 233
 Retentio mēstruorum ex timore, 118

S.

- S** Anguis à corporis circumferentiā ad cen-
 trum moveri est pronus, 138. aliquis
 in parte manet nutritionis ergo, 189. con-
 tinetur natura in arteriis, 54, 55. cor in-
 greditur non attractione, sed pulsu auricu-
 larum, 195. quo ductu moveatur. 101, 131,
 191, 193, 278, 279. & seq. 68, 69, 72, 77,
 78, 82, 265, 266. palpitetne ante motum
 auricularum dubitatur, 44, hic citius, illic
 tardius, movetur, 180, 244, 255. quomodo
 circuletur secundum Riolanum, 178, 188,
 190. contradicatur, 185, 189, & sequ. in
 adultis, cur potius transcolatur, per pulmo-
 num parenchyma, quàm ut in fœtu per
 vias patentes, 67, 69, 70, 72, 78, 272.
 magnā quantitate cor transit, 116. non
 transit medium cordis parietem, 19, 56, 65,
 196, 272. per easdem arterias non fluit at-
 que refluit, 181, 182, 183, 134, 192. quo-
 modo dicatur spirituosus, 229. quomodo
 mo-

INDEX.

- moveatur per cor in pulmones, ductibus,*
qui in fatu reperiuntur, nondum oblitera-
is, 64. quomodo per cor transeat, 248. ex-
perimentis probatur, 249. necessario in alias
partes demigrat, 148, 166. per venas ad
cor, per arterias à corde in circuitum move-
tur, & à quo incepit regreditur, 267, 270.
à cordis corpore, nec vim, nec motum, nec
calorem accipit, 275. omnium calidissi-
mus, cordi calorem non contra tribuit,
276. transit aperta via è venis in arterias
per sinus cordis, 58, 59, 64. fit hoc potissi-
imum in imperfectioribus & primum cres-
centibus, 78, venosus non differt ab arte-
rioso, 220, 222, 235
Sanguinem è dextro ventriculo in pulmones
distribui, probatur à Gal. 73, & sequ. 131
Sanguineum magis calet, 276
Sanguinis fermentationis causa quomodo ca-
lor innatus, 273. motus celeritas experi-
mento probatur, 278. ebullitio, elevatioque
refutatur, ibid.
Sanguinis quantitas in ventriculo contenti, 87
Scientia ex praexistente cognitione oritur, 174,
263
Sensibus habenda fides, 245, 260, & sequ.
267
Septi cordis usus à nonnullis traditus, rejici-
tur, 18. ejus substantia, ibid.
Septum cordis à retento sanguine ruptum, 252
Spiri-

Spiritus, quid quales, an à sanguine separati,
225. & sequ. disputatur.

Systole arteriarum & cordis non fiunt simul,
8, 33, 34. *cordis confestit in motu,* 30, 33

Systoles causa prima, 275

T.

T *Abes quomodo ex merore & amore,* 136

Timor cohibet effluxum sanguinis in phlebotomiâ, 118

Timpanitidis & anasarca differentia, 257.

non dicitur à sono tympanum amulante, ib.

Tumor ex lapsu magnâ celeritate enatus, 112

V.

V *Alvula demonstrant sanguinem per arterias in corpus distribui, per venas ad cor regredi,* 125, 128, *in jugularibus quam ob causam secundum aliquos,* 122. *rejicitur. in sinistro ventriculo arctius quam in dextro clauduntur,* 158. *in venâ coronali reperta,* 200. *ligato brachio, præcipuè in varicosis, veluti nodi apparent,* 125. *quædam, quanquam in quibusdam locis non inveniuntur, ad amussim clausæ non destruunt tamen quæ de illis dicta,* 129. *semper reperiuntur in canibus & bobus circa venarum cruralium divisionem,* 121. *uobique non necessarie,* 183

Valvularum binarum coherentia, 120, 123.

usus, 124. *cordis usus,* 157. *nutræ usus & situs,* 158. *semilunarium situs,* 73.

ne-

INDEX.

necessitatem ex Gal 74, & sequ. situs & usus, 75, 129, 121, 122, 123, 127, 128, 183. tricuspidum numerus, 13. situs, 157 usus, 13, 157. in quibusdam animalibus non reperiuntur, 155, 157. usum inventor non est assecutus, 125

Vasa circulatoria secundum Riolanum, 188

Vasa umbilicalia duo in ovo, 144

Vasorum spermaticorum unio, 206

Venâ arteriosâ ligatâ tollitur motus auriculæ sinistrae, 272, & vera est arteriar, 48, 172. ejus tunica, 170, 172. orificium ejus quare amplum, 172. eundem cum arteriis sanguinem contineri, 7, 220. & sequ. tria ad hanc opinionem evertendam obijciuntur, 222. refelluntur in sequ.

Venæ deferunt sanguinem ad cor mediate vel immediate ab arteriis acceptum, 35, 86, 99, 101, 201. in anatomia sanguine abundantes inveniuntur vacuis arteriis, 93, 224. non fit in fœtu, neque unum cordis ventriculum habentibus, 94. non fit in morte subitâ extinctis, 225. mesentericæ qualem succum contineant, 142. plurimæ coeunt, 110. pro arteriis dictæ, 36, 85. umbilicales in ovo succum alimentitium ab ejus liquoribus absorbent, deferuntque ad nutriendum pullum, 187

Vena ligata versus cor detumesceat, 98, 99, 106, 111, 114

Vena-

- Venarum duplex genus non ratione latens, sed officio secundum Aristotelem,* 84
- Vena umbilicalis hepatis manifeste transit,* 143
- Vita à quo incipit etiam desinit,* 271
- Ventriculi cordis semper sanguine repleti, 72. in fatu, 153. eorum diversitas quare in homine.*
- Ventriculis quiescentibus non pulsant arteria, 33*
- Ventriculorum arctatio, unde, 32. in extensione cordis sanguinem non trahunt, ibid, cordis, eadem actio, pulsus, atque motus, 12*
- Ventriculus sinister cor videtur efficere, dexter ejus famulus, 152. crassior & robustior dextro, 156. dexter pulmonum causa factus, sanguinem per totum corpus fundit,* 154
- Vesicula in basi cordis piscium posita, refert auriculam vel ejus analogon,* 41, 58
- Via circa cor, per quas in fatu transit sanguis, post menses, immo annos, fatu in lucem edito, aliquando inveniuntur,* 63

JACOBI DE BACK

apud Roterodamenses Me-
— dici ordinarii

DISSERTATIO
DE CORDE.

Cum copioso
Tam Rerum quàm Capitum
Indice.

EDITIO TERTIA.



ROTTERDAMI,
Ex Officinâ ARNOLDI LEERS.
c13 13 c1x.

DE
H A R V E J O
ET
B A C C I O,

Ad Lectorem

E P I G R A M M A.

Iam nova lux oritur, jam fas est cernere ve-
rum,
Huc ad sis Medicæ, cui placet, artis opus.
Ecce tibi monstrat naturæ mira latentis
HARVEIUS; cujus BACCIIUS au-
get opes.

Zacharias Sylvius.

Reve-

Reverendo Doctissimo Viro

G U I L I E L M O

H A R V E J O


Medico Regio.

Cogitanti mihi sub cujus nominis
præsidio, nostra hæc de Corde
disserdatio lucem visura, hone-
stius & majori cum decore, pro-
diret; nullo eam melius & potiori jure, di-
candam, imo decorandam putavi, quam si
non perituro tuo nomini, Doctissime *Har-
veie*, consecraretur; nulli quàm tibi decuit
offerri, siquidem tibi soli in illam jus est, tibi
soli sui ortus debet principium, te sine lucem
non vidisset, neque in publicum prodiiisset
unquam: fateor candide, nisi tuo invento
excitatus, invitatusque, neque veteris doctri-
næ limites egrediendi, neque partium mihi
naturam ulterius investigandi unquam data
fuiisset occasio. Eam itaque tibi lubens me-
ritoque dedico & voveo: in quo duo mihi
præstare videor; animi ego mei gratitudi-
nem ostendo; Doctissimusque Vir, incompa-
rabili ingenii sui acumine acq̃uiritæ doctrinæ
fructuum primitias nanciscitur. Paucum equi-
dem, ex nostrâ hæc oblatione, tuo nomini,
A 2 quod

quod jam per integram Europam notum , ad Indos & longè diffitos orbis tractus, cælo cre- hitur, accedit. Plura debere scimus , sed quia in magnis voluisse sat est , sufficiat cum nostrâ hâc dissertatione, dum majora facere non de- tur , oblatu tibi gratus animus Petitionem oblationi annectimus enixè rogantes, ut quas penes te innumeras , tuâ diligentia repertas, circa humani corporis fabricam , observatio- nes habes, uti ex tuo edito *de motu cordis & sanguinis exercitatione* liquet, earum nos par- ticipes facere , & communi usui exponere, omnesque veritatis amantes tibi multò de- vinctiores reddere, digneris: præcipuè verò tuum

J. D E B A C K.

A D



A D

LECTORES ALLOQUIUM,

In quo tractantur honores & reverentia artis inventoribus debiti: sentiendi libertas pluris habita: artis medicæ fundamentum veritas: *Harvejus* circulationis sanguinis author: hac multa veterum statuta inversa: Authoris scribendi causa: Medicinæ compendii brevis norma.

Quanti apud Antiquos habiti, qui, sedulo nitentes, communi bono & concivium saluti invigilantes, coævis posterisque suos labores & inventa communicarent, statuta antiquitus præmia, tributique honores satis luculenter ostendunt. Medicinæ inventores inter Deos, qui studiis, liberalibusque artibus excelluere inter Musas Pernaßique cultores numerati; divinis omnes honoribus af-

ficiebantur. Hac semper, urbium, rerum-
publicarum, regnorumque fundatoribus,
cura fuit, ut hujusmodi pramiis tamquam
ablectamento & stimulo ad meliores artes
& scientias subditorum ingenia incitarent :
nec in eo acquiescentes, sed magnâ ipsorum
opera pluribus in locis instructa aedes, quibus
publicis alendos sumptibus, lautisque addi-
tis pramiis, doctrinâ excellentes ad se alli-
cerent extraneos. Sunt & erecta ad eru-
diendam juventutem gymnasia, quæ præ-
ceptorum doctrinâ imbata ad similes ten-
dens honores, veterum inventis sua superad-
dere novis pramiis invitabatur. Neque ar-
tium inventorum meritis honoribusque po-
sterorum sedula diligentia & conatu quip-
piam derogari judicabatur, quasi, non inte-
gram, aut omnibus absolutam numeris, tra-
didissent artem; satius erat, ab ipsis jacta
esse fundamenta, quibus tamquam tramite
& viâ pedibus insistere artis filii, ut in scien-
tiis aptè erudiri, vel sciendi amore seu desi-
derio flagrantibus ad multò altiora evehi pos-
sent. Ne perfectionem suæ arti attribuere
vide-

videretur, ab excusatione divinus Senex aphoristicam doctrinam incipit: Vita brevis, æs longa: bene pensâre, non solum unius vitam, sed omne ævum artis nostræ longitudo superavit, quæ perfectionem nondum adhuc nacta; eandem apud posteros inveniet fortè nunquam; tam præcepti perscrutandi occasio, tantaque judicandi difficultas est! tanto magis, si neque æger, neque astantes, reliquaque Medico officium facienti obsequantur: præcipuè si certis animi devinctis regulis ulterius ad veritatem indagandam excurrere impediuntur. Hippocratis non satis astimandus interpretes, lib. 3. nat. facult. cap. 10. Quisquis (non artis perfectionem summam) quid supra vulgum scire desiderat, ait, non naturâ modò, sed doctrinarum rudimentis præstare cæteris, veritatis tanquam insano amore teneri, nocte dieque contendere, quæque à clarissimis viris tradita sunt discere, judicare, multoque tempore explorare, ac quæ rebus sensui patentibus consentiant,

quæque rursus dissentiant confidere
re debere. Præterea idem Galenus, an-
ti inquirendæ veritatis libertatem æstimat,
ut 6. epidem. 4. aphor. 7. tyrannidem
vocitet alicui sententiæ sine demonstratio-
nibus decentibus quempiam teneri velle.
Etiam 6. epid. sect. 2. aphor. 17. acri-
ter reprehendit magistro sese alligantes &
sine examine dedentes : Qui alicujus,
inquit, seipsos vel servos, vel liberos
pronuntiarunt, hi, ubi scriptum ab
ipso aliquid inventum est, confestim
comprobant, tum temerè, tum in-
consultè. Manifestum ex hisce est, quam
candidè veritatis lucem clara hæc Medicinæ
lumina, in artis Iatricæ decorem, & com-
munem hominum salutem, dilexerint, ut
veritatem inquirendi, rationes scrutandi,
& de re qualibet ipsis ducibus sentiendi li-
bertatem, tyrannidi & servitio præferant.
Qui excellere in arte medicâ velit, nec ju-
rare in alicujus auctoris sententiam, sed ab
omni sectæ genere alienus, nudam tantum
veritatem sectari eique subscribere debet :
sic

*sic enim claustris confractis, & sui juris red-
dita (secundum Lucret.)*

Vivida vis animi pervicit, & extra
Processit longè flammantia mænia
mundi:

Atque omne immensum peragravit
mente, animoque.

Unde refert nobis victor quid possit
oriri,

Quid nequeat; finita potestas deni-
que cuique

Quanam sit ratione; utque altè termi-
nus hæreat.

*In horum Heroiūm relictâ doctrinâ, à tene-
râ adolescentiâ instructus & quasi educa-
tus, tradita ab ipsis dogmata serio sum am-
plexus, & quasi religio fuit ea defendere:
& meritò, si quidem artis Patres ejusdem
nos filios crearunt: iis debemus, quod in ar-
te profecimus; & cognitionem, ad quam
sumus evecti, ipsorum adjumento & tradi-
torum ope, acquisivisse fateri cogimur. Præ-
terea juramento Hippocratico astricti artis*

filiis sese invicem fratribus & quorum auxilio artem addidicere, parentum habere loco tenantur. Si itaque patri honorem & reverentiam debet filius, quid ni nos artis filii nostros patronos & genitores revereri cole-reque tenemur?

Horum monitu fixum mihi immotumque in animo semper habui ad Doctoratus honorem admissus, nihil in praxi tentare, nisi ad hoc rationis examine inducerer; vel si ab alio quidquam benefactum dictumve audirem, quin de re obviâ rationes investigare, quibus ad minimum mihi ipsi satisfaceret, conarer. Tali mihi instructo animo, ante annos circiter quindecim contigit in manus incidere Guiljelmi Harveji Exercitationem Anatomicam de motu cordis & sanguinis, cum jam ante quinque vel sex annos in lucem prodierat, quamplurimis insignis doctrinæ viris in sententiam tractis. In hac (relictis plurimis veteris doctrinæ statutis, cujus ego fundamenta jeceram) sanguinem non per venas ab hepate in singulorum partium nutritionem, earundem atra-

tractione, moveri: sed, à corde per arterias, eundem, in totum corpus dicto usui, impelli, & superfluum per venas remeare, ut in corde denuo refocillatus (sic illi visum) & novis imbutus spiritibus, omnibus membris deintegrò reportaretur & circulari motu continuo sæpius, idque parvo temporis spatio, reduceretur per eandem viam. Hanc ego rem novam examino, quæ primo aggressu facile refutari posse videbatur, sed justâ exagitata trutinâ, adhibitâ cum ratione autopsiâ, inexpugnabilis, imo cogente veritatis stimulo, ambabus amplectenda ulnis reperiebatur. Quid faciendum? Anne relinquendus Hippocrates, postponendusque Galenus? Minimè: si veritatem, rationibus, ipsisque sensibus munitam, sectamur, sumus Hippocratis, sumus Galeni. Nihil contemnendum, ait Senex, nihil judicandum temerè. Clarissimorum virorum scripta, hic, anne sensibus pateant, anne dissentiant, examinare jubet: veris fundamentis rationalis & dogmatica Medicina nititur, & nisi quod veritate comprobatur,

batum, firmum stabileque judicandum est. Accrevit indies hæc primo putata in Medicinâ heresis, ut non solum Angliæ nativi soli Academias, sed & Germaniæ, Galliæ, Italiæ, & Belgii nostri Universitates perambulaverit, & præter ingentem doctissimo-
rum virorum numerum, etiam Professores pluribus in locis sibi addictos reddiderit: quorum nonnulli publicis lectionibus, disputationibusque, nec non editis scriptis opinionem hanc tandem divulgaverunt perquam magno studiosorum applausu; ut vix reperias creatum Doctorem, cui sanguinis circulatio non innotescat, imo arrideat. Sed quemadmodum, ex uno supposito vero, mille desumuntur consequentia, cum ratione convenientes; atque, uni destructæ, positiones innitentes mille vacillant & corruunt: sic contigit concessio, statutoque sanguinis circulatorio motu, innumera veteris doctrinæ statuta inverti; unde totus docendi ordo turbatus, præposterè & sine certâ methodo doctrinâ omnino confusè instituitur & addiscitur, quàm, positionibus catenatim co-
hæren-

herentibus & certo ordine instructis, stabiliri decet. Hæc ratio est, quod omnes in aliquibus non satis convenientes, aut in causâ motus sanguinis, aut in ejusdem modo, aut in effectu dissentiant: vel rem tamquam nimis laboriosam & collegis invisam, ulterius non investigantes, relinquunt: cum prius, rationibus & autopsiâ adducti & evicti, Harveji inventum de motu sanguinis suscepissent, & editis scriptis approbassent. Mihi verò cum hujus rei examen negligere, aut vacillantibus insistere pedibus, non satis decorum videretur; rationes, quo usque meo animo satisfactum foret, versare & perquirere suscipio, & partium actiones & usus, novo examine indagando, destructum ordinem brevi methodo redintegrare & illustrare tento. Sed cum tanto hoc non peragitur silentio, quin inter collegas, aliosque familiares eâ de re quam sapissimè sint orti sermones; quin etiam in Anatomicis demonstrationibus aliquando, quæ de circuitu sanguinis occurrerent, attacta sint & ventilata: unde accidit, cum nonnulli ea, idque

idque seriâ disquisitione, perscrutarentur, semper novis occurrentibus dubiis, ut à me sedulò & amicè petierint, ut, quæ de materiâ hæc præmeditata haberem, publicis scriptis in communem usum divulgare vellem: quod quamvis mihi senescenti molestum foret, secundo supra trigesimum jam ferè elapso anno, quo me praxi dedidi, & uti sit, theoricam aliquo modo Medicinam reliqui, (si eam hæc de circulatione materia non resuscitasset) & tam propriis negotiis, quàm praxi occupatio vix tempus superesset, quod huic operi largiri possem; ut tamen amicis complacerem, me invitum recusantemque sivi exorari tandem, eò usque, ut Eximii Viri D. HARVEII, de cordis & sanguinis motu, tractatui (quem de novo ARNOLDUS LEERS Bibliopola vigilans prælo excudendum commisit) quod ad eandem materiam faciat, aliquid adderem. Dissertationem itaque de corde scribere sum aggressus, partim, quia cum Doct. Harveji materiâ convenit; partim etiam, quia cordis examen esse

exactius tractandum & seduliori curâ perscrutandum existimo. Hujus enim opinata excellentia & splendor, tantum, cum Medicorum, tum Philosophorum veterum & neotericorum mentes, tanquam fascino, devinxit, oculosque occacavit, ut clarum veritatis lumen non videntes, nulla, nisi obscura & imaginatione concepta, pro veris recipiant.

Mentibus itaque hasce caligines & cata-
 ractas oculis adimere dum aggredier, ne
 mihi imponatur unicè rogo, me veteribus
 suos honores, artisquæ patribus debitam re-
 verentiam, fraternamque cum artis filiis
 concordiam velle diminuire, si pauxillulum,
 quod mente concepi, tanquam in concilium
 vocatus, quando de reformanda Medicina
 methodo agitur, in medium adfero. Ne
 verò eam magis turbare velle videar, (velu-
 ti si circulatorio motu introducto anima na-
 turales & vitales confundi facultates mihi
 non satis sit) & veterem de corporis œcono-
 miâ doctrinam omnino rejicere, & ne-
 gatis spiritibus Hippocraticam corporis hu-
 mani

mani divisionem, ab omnibus huc usque receptam ejusque doctrinae fundamentum, me invertere, accuser; isti malo fore remedium confido, si de eo in ipso me limine excussem & liberem.

Analitica docendi methodus, ad humanae naturae indagationem explicationemque, semper commodior Medicinae proceribus dum visa fuit, ex Hippoc. scriptis divisionem desumpsere, quae corpus in continentiam, contentam & impellentiam partiuntur. Continentia vocarunt partes solidas, contenta humores, impellentia spiritus. Sed, spiritibus quae adscribitur substantia subtilitas, mobilitatem quidem & ad motum promptitudinem inducere potest, non verò activum motum; praeterea si aliqui dentur, contentorum nomine merentur; vita etiam destituti, ut ab alio moveantur, necessum habent: si itaque divisionem hippocraticam firmam stabilitamque velimus, aliud quid quaerendum est, cui impellendi vis & potestas competat meliusque quadret. Fiet hoc, si viventem hominem in continens, contentum & im-

& impellens dividamus : per continens intelligendo corporis massam solidam , prout ab Anatomico tamquam subiectum tractatur ; per contentum , sanguinem sive alimentarium humorem , prout à corpore sive substantiâ solidâ continetur . Neque est , quod inferamus , plures in corpore reperiri humores , cum omnes , quotquot sunt , faciant ad sanguinis constitutionem ; vel enim concurrunt tanquam partes constituentes ; vel ejus excrementa inutilia ad excretionem separata sunt . Impellentis nomine non spiritus , sed incorporea anima est insignienda , quæ , nam inepta contineri , est in toto & quâlibet parte totâ , cum omnibus suis facultatibus : ab hac omnis impetus & impulsio ; hac vivificante & impellente , partes dispositæ actiones edunt & peragunt .

Generalem de homine doctrinam Antropologiam voco , partes cujus statuo , secundum hanc divisionem , Psychologiam , Somatologiam , & Hamatologiam , in animæ , corporis & sanguinis doctrinam : ab anima enim impellente , corpore disposito operante ,

rante, sanguine adjuvante, seu tanquam medio concurrente, omnes, quotquot in homine spectantur, tam occultæ, quàm evidentes, peraguntur functiones.

Psychologia doctrina est, quæ animam humanam, ejusque effectus rimatur. Hac, *ψυχὴ* dicta, est hominis ipsa forma, sine quâ talis (scilicet homo) esse non potest, omnium motuum & functionum insita causa. Ab Aristotele *ἡ ψυχὴ* etymo notatur, (quod Hermolaus Barbarus perfecti habiam vertit) diciturque actus primus corporis organici potentia viventis.

Lubet Ludov. Vives præclare dictum hic inferere. Anima est agens præcipuum (inquit lib. 2. de anim.) habitans in corpore apto ad vitam. Agens nominatur, quasi artifex: nam quod agit quippiam per instrumenta, in eo ipso vis inest agendi illud ipsum, ut in pictore pingendi præcipuum additur. Nam si quis calorem, vel humorem, vel spiritus, aliquid dicat agere in corpore, sciat, illa omnia non per se agere,

re, sed ab animâ id habere, ut agant. Ergo anima ipsa artifex est, non aliunde: in eo utique corpore viam suam mutuans.

Verè illi actus nomen quadrat, quia suum corpus actuat: imo merè activa est nullis passionibus obnoxia. Passivum & immortale uni subjecto convenire nequeunt: siquidem quod patitur tandem interit.

Afferto huic objiciet fortè aliquis, quæ Medici de animi affectibus statuunt: imo Hippoc. lib. 2. aphor. 6. Si dolentes dolorem non sentiunt, mens ægrotat.

Verum est plerosque animum & mentem cum anima confundere, imo humana menti omnes animæ qualitates tribuere.

Differunt tamen inter se anima & animus; quod illa vitæ sit & qua vivimus; hic consilii & quo sapimus: unde Philosophi etiam sine animo vitam manere, & sine mente animam durare, dicunt.

Animi pathemata, passionēs, non animæ, sed mentis aut animi, à sensuum organorum affectionibus, excitata mutationes

nes sunt quas corporis dispositiones cum anima percipit, non patitur : percipere enim, non pati, sed agere est.

Animatum (forte animal) hinc dicitur, quidquid in se motus principium habet. Pro actionum & effectuum in corpore elucescentium diversitate, diversas animæ ponimus potentias & facultates.

Facultas est animæ agendi functionesque edendi per corporis actiones semet exerens vis & aptitudo.

Quibus singulis, ut in actum ducantur, concessa propria sunt organa, quæ vulgò pro actionum auctoribus habentur; quamvis sola animæ ad agendum instrumenta sint.

Animam in corpore tria præcipuè moliri cernimus; vitam nimirum, vitam meliorem commodioremque, & tandem perennem: pro tribus hisce actionibus, tres ei præcipuas adscribimus facultates, sub quibus dein reliquas tamquam inservientes comprehendimus.

Vitam dum corpori anima procurat, illam vim, facultatem vitalem sive naturalem

lem aut etiam vegetativam nuncupamus ; fluxile verò, quod ipsi assiduo deperit, tamquam œconomus, novo pabulo resarciendo, quia sustentat & auget ; œconomicam dicimus.

Hanc dividimus in preparatricem, dispensatricem & assimulatricem, quæ, magnâ ex parte, hæc nostrâ dissertatione ventilabuntur.

Pabulum quod omnino dissimile est nutritionis gratia (quæ similis appositione peragitur) ut simile reddi & in eandem cum nutriendo substantiam converti possit, novam, corpori partive aptam & propriam formam induat necesse est.

Sed tam magnum opus quia non protinus, & primo aggressu (uti apud omnes, credo, in confesso est) perficitur : si quidem ipsi addi, quod utile ad tam alienam massam subigendam, & adimi, quod est inutile, ad mutationem ineptum & nocivum, requiritur. Cùmque una pars tanti oneris sit impar, plures ad hoc exequendum desiderantur, in quibus assumptum nutri-

trimentum suas metamorphoses subeat.

Tres sunt evidentiores, quas patitur formarum mutationes; convertitur enim in chylum, chymum, & sanguinem; unde facultates emergunt chylica, chymifica, & hematopoetica: quibus addi possunt, quia ad hanc contribuunt, bilifica cystis, & melancholifica vasorum atrabiliariorum, &c.

Dispensatrix animæ facultas est quâ illa omnibus & singulis partibus nutrimentum suppeditat: hæ enim propter continuum alimonii effluvium, novo semper refocillari, foveri & vigorari debent ut ad suas actiones aptentur & incitentur. Auricularum & cordis ad hoc servitio, cum arteriarum adjumento, utitur.

Auriculæ (sic, ab aurium figurâ, dictæ) corpora concava venarum sunt tamquam appendices, carnosæ fibris ad faciliorem contractionem donatæ, insitæ cordis lateribus, ad ejus basim & principium seu ingressum ventriculorum, à quibus earum sinus solis valvulis, foris apertis sed intus clausis, separantur; promptuaria sunt sanguinis, in
qui-

quibus per venas, communem cum illis habentes cavitatem, tam è toto quam pulmonibus redux sanguis colligitur, ut in cordis ventriculos deponi possit. Numerus pro ventriculorum numero variat: quibus animantibus unus contigit iis una itidem est auricula, quibus duo, duæ.

In fatu tenello ante cordis formationem, vesicula, quæ progressu temporis in auriculas abit, apparet pulsans, dispensatricis munere fungens, sed illo crescente vesicula sive auricula tantò labori impotenti cor in adjuvmentum additur.

Cor durâ vastâque contractili carne (tamquam rusticus ad laborem) instructum, in amplis, dum quiesceret, ventriculis receptum sanguinem, per patentia ostia, valvulis regressum inhibentibus munita, magnâ vi & impetu scmet, ab accepto onere expediens, in arterias protrudit. Hoc dum fungitur cor ministerio, agenti & dispensanti animæ, ad totius corporis nutritionem materiam suggerit. Hinc omnes ejus emanant dignitates; hinc rex, Microcosmi Sol, calor

loris fons & focus, omnium actionum, ipsiusque vitæ auctor nuncupatur: quamvis solum molestiam, quàm à distendente sanguine patitur, excutere intendat.

Arteriæ, teretes, concava duplici satisque firma, ut tanto impetui sint pares, tunica donatæ, in omnes nutriendas partes sanguinem tamquam canales deducunt.

Hunc agendi modum, qui multorum subsultuum & collapsuum seu contractionum interventu perficitur, pulsationem & pulsum, hancque animæ vim, facultatem pulsificam vulgò nominant.

Assimilatrix facultas ea animæ vis est, qua corpori sanguinis particula familiares jam redditæ secundum omnes dimensiones appositæ in propriam & eandem formam ducuntur. Dicimus, sanguinis particulas, partim ob tam minutam divisionem, quâ dirimuntur, etiam minimis corporibus secundum omnes dimensiones jungi posse: partim quod omnis sanguis tam minutim divisus familiaris non sit, sed plurimum inepti cum eo fluat, quod in venas denuò re-

meat,

meat, & quandoque magnam partem prius assimilati, & in constitutione morbosâ rursum liquati, vel hoc novitio dissoluti, secum rapit multis iterum circuitibus alterandum & purgandum.

Si pari cum dissoluti quantitate nutrimentum ad partis restorationem concurrat, dicitur nutritio: si majori, accretio sive auctio; si verò minori vel si partem assimilati secum rapiat, maceratio vel extenuatio vocatur.

Facultatibus hisce plures aliæ inserviunt; à partibus enim (tàm ubi præparatio & assimilatio fit, quàm unde dispensatio) præparandum, assimilandum & dispensandum recipi & admitti convenit; ibique pro tempore, si opus est, retineri, & tandem propelli: hinc facultates emergunt, receptrix, retentrix, concoctrix, & propultrix, vel, si mavis, expultrix.

Attrahtricem ullibi usu venire, præterquam ad inspirandum, aliosque motus locales qui musculorum ope perficiuntur, equidem nescio: siquidem partes omnes fortio-

res, in debiliores sua onera deponunt, quæ in quiescentes fortiores, vel dispensatoris beneficio adjunctæ, per patentiores vias sese expediunt. Quidpiam ab aliquâ parte attrahi ad sui distentionem non est verisimile: extendi enim pati est, cum attrahendi actione non quadrans.

Recipere & admittere partes in sua penetralia videmus (quamvis violenter & à fortius agente mittatur) naturaliter, quod familiare est, uti & alienum & molestum, si modò per patentes convenientesque ductus vel in, à naturâ concessa, receptacula id ipsum, molestiam arcendo, deponere possint.

Præter naturam (quod propriè violenter fieri creditur) accipiunt partes debiliores, à fortioribus subito influxu, quod familiare minus est; vel paulatinâ congestione in alveis morborum materiam, à quâ commodè liberari non poterant, in perniciem admittunt.

Retentio ad aliquod tempus summè partibus necessaria est; ventriculo ad cibi digestionem; intestinis ad tenuioris chyli ex-
pres-

pressionem; moram trahit in suâ cysti, tam ad conservationem, quàm in requisitam necessitatem bilis; in vesica lotium, uti & in recto alvine feces ad munditiem & honestatem; omnibus summoperè partibus reficiendis nutrimenti, jam ad equitatem redacti, retentio, ob adhesionis & assimilationis causam, competit; sic seminis in prostaticibus, foetus in utero, lactisque in mammis ad proli propagationem, educationemque.

Concoctrix est ea animæ vis, quâ alimentum dissimile, vel quod in corpore nocivum est, additione vel abstractione, in benigniorem naturam, ut in corporis substantiam facile verti possit, alteratur.

Concoctiones pro subjecti varietate variant, & varias habent appellationes, inter quas generaliores sunt $\pi\acute{\iota}\varsigma$ & $\pi\acute{\iota}\pi\upsilon\sigma\iota\varsigma$.

Pepsis est cibi in propriam nutriendi formam alteratio.

Pepasimum generaliori significatu Galen. 6. epid. comm. 5. omnem deductionem ad mediocrem temperiem appellat;

comm. 2. verò lib. 1. epid. morbi & eorum quæ præter naturam sunt coctionem: sic ut Pepsis circa nutrimentũ, Pepasmus circa causam morbificam versetur quarum coctiones sunt. Differunt præterea quod in hæc major pars tamquam inutile adimatur, in Pepsis aliter in bonâ constitutione eveniat. Sed quia additione & detractioe utraque peragitur, si morbificum in parte quapiam infixum hærens affluente sanguine diluatur & dissolvatur, resolvi & discuti dicitur, si non, putrescens corrumpitur, vel in pus convertitur, unde resolutio, discussio, putrefactio, suppuratio, quæ omnes coctionum modi sunt.

Propultrix vel Expultrix (si ita MAVIS) ea est facultas, cum quâ vita primum incipit, & quâ cessante, vita tandem desinit. In animalis primordio, ab humoris appulsu elevata vesicula cum sese contrahit, ut influxum promoveat, protrudatque elevantem liquorem, & pulsus & vite primum signum dat.

Sic enim unumquodque naturâ comparatum

ratum est, ut à noxio & quantitate qualitateve molesto abhorreat, illudque quantum potest contractione removeat: contractione, inquam, quâ omnes totius corporis peraguntur motus tam naturales & æconomici, quàm animales & voluntarii: suâ sponte quidquid per vim elevatur & extenditur ad naturam & priorem constitutionem conatur reverti.

Considerandum quod nulla pars in alterius commodum propulsionem intentet, ut alteri, scilicet, subveniat in auxilium; sed semet ipsam à molesto & nocivo, hoc expellendo, liberare nitatur: quamvis sic cor & partes omnes sunt dispositæ, ut hæc omnium actio, proprio respectu, peculiaris contractio & expulsio sit, ab animâ tamen agente in totius corporis commune commodum instituitur & dirigitur.

Meliolem corpori vitam largitur, quando, sensu & motu, atque omnium maximè rationis beneficio, id decorat. Animalē hanc vim, quâ à vegetabilibus animalia discernit, vocamus; ab hisce verò hominē rationalem.

*Animalia, vegetabilibus longè superiora, voluntariis motibus, cœlestium astrorum motus dignitate excedere, cùm judicentur; in quonam meliori illustriorique excellentia seu eminentiæ solio rationem, homini super cæteris attributam, collocabimus? Huic, in mundi exordio, cerebrum (sentiendi voluntarièque movendi præcipuum organum) tam concinnè de meliori luto fabricavit Prometheus, ut anima, divino ore inflanda, aptum accommodatumque foret instrumentum, quò suo origini dignas ederet actiones. Hoc substantiâ molli & mobili ad singulas cordis pulsationes respondente, meningibus exquisitissime sentientibus septâ constans, median-
tibus nervis (qui ex substantiâ hâc meningibusque miro modo intertextæ productiones sunt) sensoriis externis continuum, in perenni motu existens, & pro. communi sensorio. inserviens, objectorum affectiones externis sensoriis receptas facillime percipit: perceptas idæas seu signaturas in memoriâ recendit; quas phantasia resuscitans, si sola, appetitui, si concurrente ratione & intellectus.*

judi-

judicio, voluntati offert: quò loco motiva executrici facultati imperet, ut convenientia prosequatur vel disconvenientia fugiat, ad salutem & incolumitatem.

Perennem & perpetuam vitam dum in individuo, ob substantiæ, unde componitur, ineptitudinem, conservare non potest, id in alio, novam speciem producendo, efficere anima conatur, quam facultatem procreatricem appellamus.

Quæ est novæ prolis, seu similis individui creandi producendique potestas.

Hujus rei, quia multis occultata involucribus, quamvis perceptio sit difficilis, unde & ardua præcul omni dubio ejus explicatio, paucis nihilominus, quæ super eâ materiâ (Harveianâ luce viam monstrante) ut meæ menti satis facerem, concepimus, in medium (sub pactâ conditione tanquam in concilium admissus) afferre aggrediar.

Est tanta eximii viri Guil. Harveji in naturæ penetralia scrutando diligentia & sagacitas, & in observata tradendo, tam candida sinceritas, ut ejus tradita, quæ om-

nium fide facillè merentur, amplecti non erubescamus in perpetuam ipsi laudem cedet, quod invenerit, communique commodoliberaliter tradiderit de sanguinis motu & animalium generatione,

quæ longa vetustas (bris.

Occulit arcanis oracula mersa tene-

Procreatio ab uno non dependet indivi-
duo, duorum utriusque sexus concursu, ter-
tium producitur; quorum singula in com-
munem hanc rem sua contribuunt: *mas*
potentiam, *fœmina* materiam, *conceptus*
actum, utriusque complementum.

Procreationis sunt diversæ partes; gene-
ratio, formatio, & parturitio.

Generatio est prolifici seminis effectio, &
ad animam cujusque adipiscendam formam
via, fœcundatione & conceptione peragitur.

Verum semen est Aristoteli (lib. 1. de
generat. anim. cap. 18.) quod, ex ambo-
bus cœuntibus originem trahens, utriusque
sexus naturam obtinet.

Sic, quod maris & fœmine cœuntium
fructus, futuri fœtus semen est, conceptus.

vocatur, aliquid præexistens, à quo fœtus creatur & producitur.

Quod verò à generante provenit quamvis generationis sit principium & causa efficiens, genitura dici debet, non semen: quia, quod ab utrisque coëuntibus requiritur, non habet; scilicet vim plasticam & materiam, in quâ illa in actum duci possit.

Mari genitura, ex sanguine, tamquam materiâ, quem arteria, spermatica dicta, in filamenta innumera divisâ, ne eo affatim influente obruantur, in testibus elaboratur, & à sanguineâ massâ (quam in capillares numerosas venulas, retiformem plexum cum arteriarum filamentis venulis perquam similibus, constituentes deponunt) separatur, mediantibusque vasis ejaculatoriis, per variciformes parastatas in prostatas glandulas deducta, ad usum ab iis conservatur, vel in rariore coitu cum sanguine, quem adduxere ad nutritionem arteriæ, in venas remeat.

Mulier non omnino absimilem materiam, partes spermaticæ vulgò dictæ, produ-

cunt, quam variis consideratione dignis rationibus adductus, venerandus Senex, generaturam esse vel quidpiam ad generationem facere, Aristotelem secutus, negat.

Instrumenta, huic materiae generandae adscripta, esse inepta, neque omnibus inesse, & quibus insunt, nunquam eodem modo reperiri, asserit: testes quia femellis, coitionis tempore, sicuti masculorum, non alterentur, & huiusmodi humore turgcant; quia ejaculatoria dicta vasa aliter disposita (quae uterinis animalium cornibus quadrare dicit, uterique tubas vocat) alteri usui inserviant; quia uterum neque in coitu, neque postea talis materia ingrediatur, sed tamquam excrementum excernatur (quamvis aliqua humorem quendam, in coitu, emittant) ad conceptum necessario non requiri concludit.

Sed cum tantus ad hanc materiam in corpore muliebri cernatur apparatus; & exsecutis testibus animalia foeminina castrentur & infœcunda reddantur; denique cum humorem hunc incitata & in coitu (quam-

vis non omni) cum voluptate vel majori vel minori mulieres ejicient : ignoscet eximius Vir) si hasitandi mihi dubitandique occasionem hæc præbeant ; primò , num tamquam medium , inter genituram masculam & uterum interveniat hæc materia , quæ cum familiarior & naturalis magis corpori , à quo producta , quàm externè adveniens sit , suo concursu , facilius atque commodius uteri corpus , novâ temperie , à maris geniturâ inficitur , quâ concipiendo & semini sive conceptui in suo sinu generando aptum reddatur : temperies enim hæc cum sine materiâ traduci non possit , muliebris interventu , viri genituræ apta portio ab utero secundum corpus non verò secundum cavitatem , æqualius admittitur ; ut inde fecundetur , & ad conceptum , prolis exordium , in sinu suo , producendum aptetur . Secundo , num ad fœtus , jam auctioris , alimoniam & augmentationem conferat : siquidem ad pulli nutritionem duplex pabulum , albumen & vitellus , concurrat , num similiter & fœtus duplex sibi alimentum , per placentam vi-

tello, per tubas albumini respondens, hauriat.

Quidquid sit, nisi viri amplexu, ejusque geniturae interventu foemini uter (ad generationem corpus & cavitatem seu sinum, conceptionis locum, contribuens) fecundetur, id est, secundum corpus sive substantiam, seminificam vi imbuatur; neque in sua cavitate semen concipiet, neque ad maturitatem, ut sit plantarum semini, oviparorumve ovo, simile & analogum, foetus scilicet praexistens principium, producet.

Natura in operibus sibi consona, similibus usibus consimiles partes instituit, eademque via & methodo, in rebus generandis & procreandis, tam in viviparis quam oviparis, procedit: quippe ordine quo in ovario ovum, & ex eo postea pullus, sic in utero conceptus, & ex eodem foetus formatur & producit.

Ovum Aristoteli est, ex cuius parte animal gignitur, reliquo in alimentum cedente. Conceptui conditiones haec conveniunt, est-

estque membrana obductum, sine testa ovum: in hoc differunt, quod ovum, in se habens quidquid ad pulli constitutionem & augmentum facit, conceptus sit foris expositus, unde pullus procreatur: conceptus verò, quia ad incrementum plus alimenti à matre requirat, est ovum intus manens, donec fœtus perfectionem adquisiverit.

Animalium brutorum, novem mensibus utero gerentium, accuratâ crebrâque sectione (nam eodem modo generationes fiunt) compertum est, coïtus tempore & postea, ne quidem alicujus rei vestigium in utero reperiri, neque maris genituram, neque aliud quippiam in cavitate ejus herere: utcrus solum major & aliquantulum crassior conspicitur floridiore colore: unde affectum corpus facile colligere est, ejusque mutatam cum aliquâ materiâ temperiem: post mensem ferè, hâc interiorâ versus migrante, minorem uterus molem præ se ferre incipit; interioris cavitatis pariete, tamquam si inflaretur, intumescente; ut per omnem fere sinum, tam tener-

lavis-

lævisque evadat, ut totus molliſſimâ pulpoſâ ſubſtantiâ, etiam carunculas, in eo ſitas (quæ inde nihilo majores paululum albeſcunt) involvente, oppleatur.

Paulo poſt hæc tuberantia flacceſcens paulatim ſubſidet atque extenuatur, hoc tempore per mediam uteri cavitatem mucosa quædam filamenta ducuntur, quæ junctâ muccilaginoſam tunicam exhibent, plexum choroidem per cerebri ventriculos excurrentem, referentem.

Hæc poſt aliquot dies aquoſâ, albâ, lentâ & albugineâ materia impletur, & uteri lateribus, ut nihilominus facile ſeparari poſſit, aliquantulum adheret.

Conceptus hic verus eſt, & utriuſque ſexus virtute præditum, verum ſemen: Ariſtoteli eſt ovum membranâ obtectum, cui putamen detractum ſit: eidem pro ovo habetur, id, ex cujus parte animal gignitur, & reliquum cibus eſt ei, quod gignitur.

Viviparinum itaque ovum cum ratione dicitur; hoc conſtituunt bini humores totidemque membrana ſeu tunica.

Humores sunt albugineus & cristallinus.

Albugineus copiosior & alteri comparatus turbidior paululum est, fracti gallinacei ovi, tenuiori & liquidiori prius effluenti humori respondens.

Cristallinus humor, cristalli instar transparens & limpidus, priori purior & crassior: ovi crassiori albumini perquam similis.

In hoc fortè tertius reperitur humor, Fabricii cicatriculam seu maculam in ovo representans, qui Harvejo oculus vere dicitur, quia vitelli tunica adherens, albus, planus, & circularis aviculæ pupillam referat, sed ideo (ut opinor) magis, quia ex eo, tamquam arbori ex oculo, pullo omnis origo & vita exurgat: opinionem hanc mihi parit, quia præter duos numeratos humores evidentes, in ovo is reperiatur; dein quia sicuti, in plantæ semine, oculus, gemma & germin protuberans cernitur, sic in hujus fere mediotallo futuri fœtus exordium punctum primò saliens, dein vesicula pulsans, reperitur & conspicitur. Hoc notandum, quod

quod cristallini hujus binarium ternariumve numerum ventura totidem proles æmulantur.

Humores hi viviparorum conceptibus omnibus semper insunt, & quoniam ovo in testâ concluso in pabulum tot cedere cernuntur totidem fœtui cum suis secundinis migrare in substantiam confido: differre etiam ab aqueo humore, in quo natare postea fœtus deprehenditur, & à quo consistentia variat, existimo & hunc prioribus absumptis è secundinarum interiore superficie in chorii sinum exsudare ut fœtui pro aëre inserviat, scilicet ut hic in eo moveri, & humectando nutrimento frui possit.

Membrarum sive tunicarum exterior & solidior chorion dicitur: hac per uterum cavum extensa, totum conceptum involvens & continens, immediatè liquorem albugineum, & postea aqueum in suo sinu amplectitur.

Altera tunica, amnium dicta, exteriore multò tenerior est & transparens; humorem cristallinum circumdans, intra prioris
ambi-

ambitum, in albugineo natat. Si gemellificus sit conceptus (ubi bini reperiuntur humores cristallini) binæ continentes membrana sive tunicae, exterioris, totum conceptum involventis, amplexu, cum albugineo humore, colligatae conspiciuntur.

Hæ sunt in sinu fœcundati uteri conceptus conspicuæ partes; si semen, ovum aut conceptus vocitetur, ad idem res redit; præexistens quidpiam est & fœcundati uteri fructus ex quo fœtus formatur & produci-
tur.

Sive fœcundatio fiat à solâ contaminante qualitate sine materiâ; sive subtilissimam materiam, temperiem & vim polificam inducentem, adjunctam habeat, quæ à solâ maris geniturâ, vel fœminæ tamquam medio interveniente (unde non solum utriusque parentis similitudo sed & avorum, & quandoque morbi, liberis induntur) sin minus: hoc certò constat in congressu seu coitu, nec virilem nec muliebrem genituram (vulgò semen nuncupatam) ab utero in suo sinu recipi; sed circiter mensem integrum
ina-

inanem reperiri & tandem ab exiguo initio, hominis in utero, brutorum verò in cornibus, conceptionem fieri,

Dum hisce scribendis occupatus sum, videre mihi contigit muliebrem effluxum, conceptum scilicet integrum, nonâ circiter, post pragnationem, septimanâ rejectum, ex rotundo oblongum minoris ovi gallinacei magnitudine, cineritio colore albescentem: hic flaccidus nonnihil subsidebat; satis crassam quamvis levis textura, habebat tunicam; pars acutior, cui rubescentia filamenta tamquâ lanuginea (non aliter quam si ibi abruptus esset) appendebant, nigredinem quandam, à contento simili grumescenti sanguini, ostendebat, dimidii minoris fabæ magnitudine, quod principium jecoris uterini judicabam. Apertâ scalpelle tunicâ albugineus statim effluxit liquor, manente cristallino satis elato, ut transparente membranula adhuc contineri videretur: in hoc duo conspiciebantur rubescentia corpuscula, minimi digiti latitudine, à se invicem dista, oblonga, in se contracta, magnitudine
& for-

& formâ quâ scrupulam notare solemus; explicabant se in aquâ nonnihil, ut capita, in quo puncta nigra pusilla, tanquam infixi acus vestigia, oculos referebant, aliàs, ut & brachiorum & crurum rudimenta, informia: è contracturâ medio utrique, veluti pulposum filamentum prominebant umbilici productiones; quæ cuncta gemellorum conceptum satis evidenter demonstravere.

Mirum alicui videri non debet, si in acutiori conceptus hujus fastigio inventa placenta sit, cum obtusiori parti adherere soleat: id ob duplicem rationem contingere potuit; enixu enim pars utero annexa nonnihil elongata, altera verò propter gemellorum conceptionem (ubi duo sunt amnii totidem humores cristallinos cum embryonibus continentes) consuetò amplior fuit.

Vidimus aliquando circa duodecimam septimanam expulsos foetus sesqui pollucis longitudine, quibus tam perfectè essent delineata membra, ut in aquâ tepidâ explicatorum, & unguium rudimenta cernere & sexus dignosci, possent. Nuperrime sexdecim heb-

hebdomedarū abortum masculum longitudine quatuor pollicum latitudinē superantē perfectis omnibus membris cernere contigit.

Quemadmodum pulli in ovo formatio peragitur, eodem modo in conceptu fœtus suā formam acquirit: matris siquidem amplexu & interno calore non aliter fovetur, quàm à gallinæ incubatu, vel alterius externi similiter calore blando, ovum ad pullulationem excitatur: cū hac tamen differentia, quod pullo cum ovo nutrimentum producat, ut sic pabulum congenitum consumendo, eoque fruendo vivat; cū fœtus, cui hoc perperam largitur, à matre victum sive nutrimentū obtineat: à quā interim, non magis quàm pullus ab incubante gallinā, aut fovente calore, fabricatur aut formatur, sed ab internā congenitā causā, seu propriæ animæ plasticæ vi; quæ sibi tamquam habitaculum & domicilium instruit & fabricatur, ex materiā primum membranis contentā & conceptui congenitā; dein adultiore fœtu, eā quam à matre per placentam & uteri forte tubas haurit, illā vitello, hac albumini analogā.

In cristallino humore apparet primum punctum saliens ad Solem vel perspicillo conspicuum, hoc in rubescentem vesiculam vel alteram pulsantem migrat, auriculas tempore constituentem; huic allineantur fibræ, venularum & arteriolarum propagines, paulatim majorem rubedinem acquirentes, accrescitque postea massula carnosæ contractilis, ad majus robur, cor scilicet, majori vi in dictas fibras inchoatum sanguinem movens: unde, quæ per integrum prius cristallinum & aqueum dein humorem vagabantur, crescentes, & ad exteriorem tunicam usque excurrentes, umbilicum & placentam efficiunt, hac, tamquam syssarcoseos copulâ, foetus utero accrescit & nectitur; siquidem primum conceptus membrana, placentam annexam non habet, sed obtusiore parte tamquam tenui musco aut lanugine vestitâ accrescentis placentæ principium præbet: cum per interiorem ejus superficiem lævem & lubricam plurima ferantur filamenta, umbilicalium vasorum propagines exhibentia.

Hanc

Hanc vidimus, plus quàm semel, & ante & circa tertium prægnationis mensem, enixam, omnino rubentem & crassam, ut frustum gramati sanguinis referret; quæ undique clausa embryonem vix figuratum, altera verò vice perfectè delineatum, ex umbilico pendentem, contineret: qua propter dubitavi interdum, integram in placentam, & solummodo membranosiorem magis extensilem partem, propter fœtus augmentum extensam, chorii nomen servare: si quidem ab hoc sit inseparabilis, & ex ejus medio umbilicalia vasa omnia membranâ cum eâ communi colligata, pendere videantur, quæ per integrum chorium dispergi solebant.

Placenta ab edulii generis, sic vocati, forma, quam exclusa refert, vel ab hepatis & pancreatis similitudine, uterinum jecur, chorii pancreas, ab obstetricibus matrix, & secundina dicitur: in mulieribus, cæterorum animalium uterinis carunculis annexarum cotyledonum seu acetabulorum vices agit: caro lienis parenchymati similis, mollis &

ex

ex rubro nigrescens, multifidos vena & arteriolarum umbilicalium surculos fulcit, foveat & tuetur: cavâ suâ parte fœtum spectat, convexa uterum, cujus superficiei agglutinatur, non autem inseritur; terminat quippe fœtus vasa, quorum nulla utero largitur aut ab eo admittit.

Umbilicus dicitur fœtus pars, quæ, intestini fere formâ, ex ventris medio enata, tegumento membranoso, securitatis ergo, tria vasa cum uracho involvente, constans, in placentam inserta cernitur.

Fœtus partem vocamus, quoniam secundine, non uteri, sed fœtus, à quo nutriuntur & augmentantur, partes censendæ.

Constat ex duabus arteriis, venâ, uracho, & membrana integente.

Urachus, non ultra trium transversorum digitorum longitudine, in adulto, supra abdomen excurrens, in umbilici membranâ oblitteratur.

Arteriæ ex iliacis ortæ, extraneis fœtus partibus seu secundinis nutritium humorem advehunt.

Vena

Vena è porta trunco excrescens, sub umbilici tegmine excurrent in secundinas, ramulatum divisa, dispargitur, ut ex iis nutritium humorem allectum foetui adducat.

Nutritum, pro foetus constitutione variâ, etiam variat: principio vegetantem vitam degens, & exile primordium nactus, congenitis nutritur, delineatur & formatur humoribus, secundinis suam partem accipientibus, quibus absumptis ab utero partum priori simile nanciscitur, quod ovi albumini non absimile ab utero placentæ offertur: unde verò illud emanet dum res obscura est, suspicari licet. Uterus pregnantem majorem acquirit crassitiem, ejus vasorum exteriorum maxima pars arteriae sunt, interiorum venae: à sanguine arteriis extrinsecus advecto, matrix portionem foetui nutrimento aptam separat placentaque tamquam exudando, largitur, alteram venulae circulationis ordine recipiunt & cordi revehunt. Roris instar accedentem hanc materiam, non verò sanguinem (cui se forte associat à tubis adventans) placenta admit-

tens

tens cum rubescente succo, per arterias umbilicales allato, diluit, & venæ surculis foetui adducendum, bene præparatum apponit.

Hinc indies sanguis augetur; foetus verò grandescens ore humorem vicinorem sugere & in ventriculum admittere incipit (unde & in ventriculo & intestinis superioribus chylus, crassioribus faeces reperiuntur) ut tandem, partibus hisce, ad munia præstanda assuefactis, ipse, in sugendi arte exercitatus, & perfectam maturitatem nactus, liberam auram capturus, promoveatur ad partum.

Partus ut sit naturalis, diversa requiruntur, quæ à parturiente matre & pariendo foetu desumuntur, siquidem mutuas sibi operas invicem præstare tenentur, nisi enim ad actionem hanc æquè maturi paratique contribuant, vix foelix solet esse partus.

Maturus foetus æstimatur qui (cum jam ad æconomicas obeundas functiones dispositæ sunt partes) liberiolem desiderans aërem, capite declivi versus uteri collum inflexus,

flexus, matrem ad commune opus, velit nolit, incitans & urgens, exitum sibi molitur & parat.

Matri matura matrix, ad inferiora, emollita descendit, & orificium aperit, unde chorii pars, cum contentâ aquâ, in vaginam labitur; coxendicis ossium synchondrosis emollitur, & ut fœtui exeunti via pateat, laxatur; totius corporis conspirantis commotio percipitur & concitatus pulsus.

Hiscæ concurrentibus, utriusque constantibus viribus, partum naturalem & fœlicem instare judicamus: qui maximè naturalis censetur, si cum ambientibus membranis excludatur illæsis, non aliter quàm maturus ab arbore fructus integer, seminibus non effluentibus, solvitur: si secus eveniat; membranis ruptis hærente placentâ, quæ interdum difficulter separatur, prava quandoque symptomata inducuntur. Post hunc naturalis magis, si capite deductis ad latera brachiis prodeat, & quo ab hâc positione differat magis à naturali recedere judicatur: quamvis, mortuo fœtu, quæ
pe-

pedibus inchoatur parturitio aestimetur commodior.

Ad viam unde digressus redeo.

Animæ potentiis partes, quibus ea exeruntur, appropriatæ sunt, quæ veluti etiam humores, ab illâ elaborantur & perfectionem acquirunt.

Quamobrem, cum animæ facultatibus numeratis, functionum seu partium actionum etiam numerus sit evidens, easque opera & effectus consequantur, si earum in Psychologia brevibus verbis ordinem complexerim, eundem & in cæteris me demonstrasse confido.

Antropologicam hanc scientiam quia merè physica physiologiam, quæ verò affectuum doctrinam comprehendit, sive naturales, sive præternaturales sint, pathologiam appellandam existimo. Illis actiones corporis perquam benè peraguntur; hisce verò leduntur; in hâc classe de morbo, ejus causis & accidentibus; in illâ de sanitate, causis & similiter accidentibus ejus agitur. Cûrat autem therapeuticus sanitatem con-

servando & deperditam, si Deo visum, restituendo.

Compendiosa hujus norma narrationem dissertationi nostræ præmisimus, ut, quæ in eâ examini subjicimus, non sine methodo prodiri notum sit: in quâ etiam brevitatis adeò fuimus studiosi, ut illa, quæ in rerum obviarum descriptionibus ab aliis tradita & dilucidè satis explicata sunt, repetere superfluum judicando prætereamus, eaque sola, quæ ratione fulta à vulgò receptâ opinionē discrepant, proferamus. Potuissent hæc phylologico comitu & disertiore stylo exornata prodire: sed

*Nobis non licet esse tam disertis
Musas qui colimus severiores.*

Neque etiam decet, materia enim hæc tam longe à communi sententiâ diversa, narranda fabula in modum, prolata videretur: veluti faciunt, qui res viles & abjectas, culicem, pediculum, asinum, rarâ eloquentiâ, quam summis laudibus extollere gestiunt; aut absurda & sensuum om-
nium

nium iudicio falsa, veluti, mulieres non esse homines, aut res multò absurdiores non solum defendere, sed fucatis & sophisticis argumentis veritatis similitudine vestire conantur, ut per ea ingenii alacritatem & in doctrinâ excellentiam ostentarent. Tale mihi in animo nunquam fuit, neque aliâ de causâ quam amicorum instantiis adactus, nullâ arrogantiam aut contradicendi desiderio, sed solo veritatis studio inductus, hæc ad veritatis, semper uniformis sibi que similis, incudem, regulam generalissimam & omnium normam, nullis sophisticis argutiis aut incognitis fictisve vocabulis obscurata, examinanda offerimus.

Non inconueniens nobis visum est, cum, unâ cum observandissimi Senis Gu. Harveji Exercitationibus Anatomicis, & nostram de Corde dissertationem, secundò

ARNOLDUS LEERS prælo excudendam committeret, si & iudicium nostrum de nonnullis, quæ postera hæc ætas, acutissimorum ingeniorum feracissima, post primam editionem, examinanda obtulerit,

aliquibus in locis, ubi commodius id fieri posset, insererem: partim ut de noviter inventis & nostram opinionem exhibeam; partim ut prolatam antehac sententiam, uti decet, ab objectionibus iniquis, liberem.

Quæ rejicite, si veris rationibus & autopsiâ minimè munita, si verò consideratione ea digna & amplectenda judicaveritis, iis fruimini & Valete.



JACOBI DE BACK

Dissertationis de Corde,

Sectionis primæ,

CAPUT I.

De re quapiam laturus sententiam qualis : cor nondum bene perscrutatum : quanti illud aestimarint Veteres : ejus etymii expositio : unius partis in aliam nullum dominium : cor pars servilis : facultates non influunt.

QUI de rei alicujus veritate laturus sententiam est, neque illustris cujusdam viri auctoritate, neque opinionis prius receptæ amore, neque ullius rei studio, moveri, sed iis, quæ oculis videntur, manuum tactu percipiuntur, & ab ipsâ autopsiâ depromptis rationibus confirmantur, fidere debet : quod solius imaginatio-

nis inventum, nullo sensu stabilitum est, licet communiter & ab omnibus ferè receptum sit, non adeò adhæere tenetur, quin potius evidentia, perceptibilibus, sensilibusque rationibus comprobata amplectere velit.

Ratum hoc ante omnia fiet, qui cordis fabricam, motum & usum, veris certisque rationibus examinare statuit.

Momus Jovis opera reprehendens, inter cætera, fenestram in humano pectore requirebat, per quam, & cor, & quod in eo lateret, conspici posset: sed toto aperto pectore, ipsoque corde viso, revisoque toties, tam vivo quàm emortuo, sedulis etiam & accuratis doctissimorum virorum exercitationibus, observationibusque adhibitis, decertatum nihilominus est ante nostra secula in hoc usque ævum, neque adhuc de illius motus causa, effectu & usu inter viros graves & doctrinâ illustres convenit.

Sunt

Sunt qui à semel receptâ opinione nunquam desistentes, cum multis errare malunt, quàm cum paucis bene sentire: alii relictâ autopsiâ, ea sequi gaudent, quæ neque visa, neque sensibus ullis comperta sunt unquam: quibus tamen tanquam fundamentis superstruunt innumera, quæ non aliter, quàm è tripode *Apollinis* prolata, à viris equidem eruditis versatisque sedulò amplectuntur, atque acriter sua quisque omni zelo, allatisque rationibus defendere pergunt: ut dubitares, cuinam parti palmam tradere debeas.

Præbuit nuper clarissimus ingeniosissimusque *Guilielmus Harveius*, Angliæ Regis Medicus peritissimus, & Anatomes in Londinensi Collegio Professor eximius, invento suo de cordis & sanguinis motu, occasionem ex hoc labyrintho tanquam *Ariadnes* filo evadendi; nisi ipse auctor in servando veterum placita curiosior, cor-

di attributum principatum nimis religiosè esset veneratus.

Accessit, quod ævum hoc acutissimorum ingeniorum ferax, tam in arte nostrâ quàm Philosophiâ excellentium, obtulerit nobis incomparabili ingenio virum, extraneum quidem, sed in hoc nostro Belgio degentem, qui doctissimis suis scriptis quamplurima veterum Philosophorum placita rejiciens, aliaque luce clariora dogmata exhibens, novam nobis de causâ motus cordis opinionem fabricavit, à venerandi *Guilielmi Harveji* statuto nonnihil decedens, & quamvis cum illius de sanguinis circularis motus invento consentiat, in cordis tamen motus causâ non convenit, anne jure inter alia, quæ ante hac de corde tradita sunt, examinare aggrediar.

A longo jam ævo audivit cor, non tantum vitæ, sed & universi corporis unicum esse principium, in quo suum anima cœpit domicilium; & è quo
tanquam

tanquam fonte facultates & spiritus vitales scaturiunt. *Platoni* hic irascibilis, *Aristoteli* verò vegetantis, sentientis & ratiocinantis animæ sedes stabilitur. Præterea humidi officina, calorisque nativi focus & fomes, nostri corporis Sol, cujus influxu omnia viscera calent & recreantur, esse gloriatur: adde; hic, ut ajunt, artificiosus *Zenonis* ignis continetur, hic divinus & cœlestis calor servatur, quem *Prometheum* è cœlo furatum, ut hominem vita donaret, Poëtæ fingunt; atque ideo primum movens primusque motor dicitur, primaque & unica, si non conficiendi, saltem perficiendi sanguinis, officina.

Propter tot dotes, tantasque dignitates totius corporis pars nobilissima, quæ digniorem sedem obtinens, tanquam Monarcha proclamatur, microcosmici imperii habenas solus administrans.

*Haud multos regnare bonum est,
Rex unicus esto.*

Hinc Cor à Græco κῆρ, contracto ex κίαρ, quod à κεν urō derivant: & Græcum καρδιαν, quasi Κεαρτῶν à quodam dominio & principatu dictum volunt: cūm potius à verbo καρδαίνω, quod est *moveo, vibro*, deducatur: benè vernacula nostra lingua **hardt** appellatur, quod *durum* Latinis sonat, quia inter partes molles & carnosas durum est: vel quia (nam **harden durare** significat) in actione suâ & motu, sine fatigatione perseverando, durat.

Hisce honoris titulis, imò pluribus, si non divinis & supernaturalibus (nam, cordis calore, sine animæ adjumento, actiones in corpore omnes, præter cogitare, exeri, creditur) tanquam Æsopica cornicula aliarum avium amicta & decorata plumis, ab auctoribus exornatur cor, tantâ confidentiâ & zelo, ut religio foret obloqui vel contradicere: sed videamus, anne
(quem-

(quemadmodum illa, cum singulæ aviculæ jure merito suas repeterent plumas, exuta & nudata saltare non desit) plus quàm saltus ipsi superfuerit, cum, & anima & partes aliæ, sua receperint.

Unius partis in aliam principatum explodit *Phrygius Æsopus* in suâ, de membrorum pro primatus dignitate altercantium certamine, fabulâ.

Sed seriò : quomodo imperabit, quod ipsum agenti animæ pro instrumento inserviens, toti corpori, omni tempore, sine morâ, famulari natum est, & non aliter, quàm asinus molam trahens, prout instigatur tardius aut velocius, vel pro viribus fortius aut debilius, procedit?

At dices cordis opera in vitâ nos indigere non posse : vitamque à cordis motu incipere. Idem evenit in organi lusu, ubi famulus tubos & fistulas follibus primùm inflat, neque sine istâ inflatione luditur, non tamen ille, sed
qui

qui sonos ritè modulatur, ludere dicitur.

Primatus, major dignitas, & perfectio, non ideo alicui parti competit, si ejus operâ priùs anima indigeat, aut si ante alias fabricata sit : ostendunt suo exemplo hoc, umbilicus & secundinæ (foetus enim partes sunt) ante alia membra & ipsum cor formatæ, fœtu verò perfectò & in lucem edito, indignæ & inutiles abjiciuntur.

Perfectiora non primâ aggressione, sed morâ & longiore tempore talia evadunt.

Afferere facultates à parte quapiam influere imaginarium, si non à ratione alienum : illæ enim, animæ ubique præsentis, ad agendum potentiæ sunt : hæc in toto & qualibet parte totâ judicatur esse, cum omnibus suis facultatibus ; & ubique, modò apta inveniat instrumenta, corporis omnes, tamquam artifex, actiones edere in confesso est.

Mem-

Membra ejusdem animæ organa suam ad agendum aptitudinem, cordi non magis, quàm cæteris partibus, cum quibus communi vitâ fruuntur, referre possunt : similiarium temperiem, dissimiliarium conformationem aptâ formâ, situ, numero & magnitudine constantem; & utriusque convenientem unionem, à corde vel parte quâpiam in aliam influere, neminem credere existimo.

Hæc & alia lævia sunt, neque multifacienda tanquam rixæ inutiles: sed, spirituum elaborationem, sanguinis perfectionem, peculiariterque inplantatum calorem, duarum priorum, ut & actionum omnium (quemadmodum censent) authorem, cordi attribui non posse, si evincatur, omnes facile ipsi affictæ præminentia evertentur & corruent.

CAP. II.

Spiritus etymī acceptio: ejusdem veterum definitio: in corpore tale non reperitur: veluti triplex in qualibet parte substantia, sic etiam in sanguine: spiritus & calor malè confunduntur: spirituoſa substantia à sanguine inseparabilis: spiritus animæ & corporis non est vinculum nec animæ instrumentum proximum: animalis facultas per spiritus non ducitur in actum: quomodo sensationes fiunt: spirituoſa partium substantia spiritus non est: Harveji sententia: D. de Reeck quid de iis sentiat.

Spiritus etymon variè accipitur, sed, qui hic in considerationem venit, nonnullis definitur: corpus tenuissimum ac subtilissimum, calidum & purissimum, ex tenuissimâ & maximè sincerâ parte sanguinis genitum. Vel aliis, est substantia tenuissima & rarissima, ex sanguinis vapore & aëre genita, primum & proximum animæ in obeundis functionibus instrumentum.

Ex quibus definitionibus colligitur, spiritum esse substantiam quandam à sanguine diversam, per se & separatim subsistentem: quoniam ex ejus sincerâ & tenuissimâ parte; vel
ex

ex ejus vapore & aëre genitus dicitur.

Sed ubinam, quæso, aliquid tale in corpore unquã factum vel repertũ est?

Triplicem contendunt esse spiritum; naturalem, vitalem, & animale, tribus facultatibus partibusque principibus, unde, singulus (ut ajunt) oritur, accommodatum. Sed in fœtu, ante partium principum non solum aptitudinem, sed deliniationem, plastica functio evidens est: si à spiritu conceptui ingenito fieri putes; à quo ille fovebirur? siquidem novo influenti pabulo sustentari debeat; cederne, contra naturæ ordinem, ingenitus in influentem & vice versa? Si à matre habere dicas: ne quidem sanguinem ab eâ habet, sed propriâ hæmatopoëticâ vi illum sibi parat, etiam ante creatum & ipsum cor: si itaque sanguinem, quem spiritus materiam dicunt, sibi concinnet; debet & hunc sibi efficere, quod ante organorum creationem absurdum, si non impossibile

sibile judicamus. Præterea nec creatæ & perfectæ principes dictæ partes spiritus ullos efficiunt : in hepate naturalem non gigni , jam à longo tempore pro nobis evictum est.

In corde, quod solum pro ductu & transitu (sinuum respectu) inservit, quia nullam sanguis in ejus ventriculis moram trahit , neque ibi ullam, dum nihil ipsi addatur vel adimatur, mutationem subit, effici credibile non est.

Si in cerebro fiant, erit hoc in ventriculis vel substantia : prius herculeis acutissimus *Hofmannus* argumentis evincit (quæ conamine nimis invalido, in suo *Enchiridio* celeberrimus *Riolanus* tentat evertere.) Alterum , ab omnibus, pro ventriculis pugnantibus, non admittitur , neque ab ipso *Hofmanno* probatur.

Si instetur cerebrum , elaborandis spiritibus , per nares & palatum aërem attrahere, neque eo propterea indige-

digere posse : negamus id spirituum causa fieri. Admittitur ille in ventriculis, recrementorum receptaculis, & spatiis inter utramque meningem datis, ut cerebri, quod continuè movetur, liber & impeditus posset esse motus : nam ad ejus systolem accedit, à diastole verò recedit.

Si spiritus ullibi in corpore reperitur, deberet inveniri in corporis habitu, vel contineri vasis ei ascriptis, arteriis, venis, vel nervis : quod asserere imaginarium, neque ullis demonstrationibus firmatum est.

In habitu, sive quâlibet parte corporis, consideratur quidem triplex substantia, spirituosâ, humerosâ, solidâ : sed illas separare, est ipsam partis structuram invertere, non minus quàm si, quod ex quatuor elementis congestum est, in diversas ad sensum existentes substantias dividere, aliquis vellet : dissolutâ hac substantiarum compage, neque tantum viventis

tis pars, sed corporis esse desinit.

Si in vasis reperitur, crit hoc præcipuè ubi maxima ejus judicatur esse copia, in corde scilicet & arteriis. Sed *Galen*i autoritas, & experimentum ab ipsis sensibus petitum, quibus maximè est habenda fides, contrariū edocet, & nil præter sanguinè in arteriis contineri.

Si denudatam arteriam, supra infraq; ligatā, inter duo vincula in longū aperias, nihil præter sanguinem invenies, tantā copiā effluentem, quantam arteriæ capacitas comprehendere poterat.

Si, cum sanguine fluere, quis dicat, & tenuissimam esse partem illius, qui arteriis & venis continetur: quamvis spirituosæ substantiæ spiritus nomen concederemus; concluderemus interea non esse aliquid à sanguine separatum; quomodo separatum esse posset, quod cum sanguine mixtum tam celeri cum eo motu agitur?

Concedimus in sanguine partē esse aëream, quā dum destituitur (nam de
sub-

substantiâ ejus est) cruor, grumus & sanies vocitatur, estq; sanguinis munere exequendo omnino ineptus: sit itaque in sanguine etiam triplex substantia non aliter quâ in quâlibet parte, (crassamentum scil: humor, & aër) sed, sine formæ ejus destructione, inseparabilis.

Qui de spiritu differunt, cum calore adeò eum confundunt, ut, unum posse sine altero esse, negent: quin imo re & substantiâ unum esse, solâ ratione differre, totque calores quot spiritus, debere statui, contendunt; quemadmodû calor quidam fixus partibus singulis est connatus ab ortu primo, cujus ministerio naturales actiones eduntur; sic etiam spiritum à primis natalibus partibus singulis affixum & insitum esse omnium functionû ministrum; proinde, quot sunt partes substantiis & temperamentis differentes, tot esse spiritus fixos specie distinctos concludunt.

Sed quia hic singularum partium calor & spiritus, promptissimè & indefinenter evanescit, debuit, ut ajunt,
à prin-

à principibus partibus alius mitti, influens dictus, cujus continuo accessu, prioris jactura justè reparetur.

Quibus positis (quamvis calorem qualitatem cum spirituosâ substantiâ aptè confundi posse non concedimus) permittimus equidem, nam similia similibus nutriuntur & reficiuntur, sanguinem, qui in vasis fluit, triplici dictâ substantiâ eâque inseparabili præditum posse dici: cùm partes exinde constitutæ, eo nutriantur & reficiantur.

Sed statuendum non existimo, solam partium spirituosam substantiam, sine humerosâ & solidâ refocillari posse in nutritione, nisi suam partem ad justitiam proportionatam etiam hæ accipiant.

Quæro tamen, cùm talis spiritus (liceat sic dicere) sive substantia spirituosâ pertineat ad constitutionem partium & similiter sanguinis, quare distinctè (cùm unum simul ens efficiant,) confide-

siderabitur? nam, non coactè multiplicare entia, est præter omnium Philosophorum edictum, & rationi repugnat.

Sed videamus cui bono, aut in quem usum spiritus animantibus datos existimant, ut sint animæ, ajunt, cum corpore vinculum; quia incorporea & immortalis hominis anima caduco corpori, nisi per intermedium spiritum, copulari non posset.

Quasi verò substantia incorporea cum corpore solido, nisi subtilioris interventu, convenire non posset; dum tamen, non majorem, cum uno quàm cum altero, consensum habeat, omnino hæc vana videtur esse assertio.

Addunt proximum animæ esse instrumentum, quo actiones edit: sed anne hoc de insito, anne de influente dicitur? insitus de substantiâ partis est, sive substantia ejus spirituosâ, quæ aliis combinata, separatas actiones nullas edit: tribuitur sola partibus
anima,

anima, ut, ad actiones edendas, impellens sit, non verò insitus spiritus. Influens verò, dum non vivens, sed à sanguine inseparabilis sit substantia, nisi in partis substantiam cesserit, proxime nihil quicquam, ad actionem edendam, afferre potest.

Pars enim justâ temperie, concinnâ conformatione, & debitâ unione instructa, animæ potentiâ vivificata, & sanguinis motu circulari calefacta mobilisque reddita, actiones quaslibet, meâ sententiâ, perficit.

Magna super facultates animales videtur posse moveri difficultas, à quibus tam sensus quàm motus peraguntur mediantibus nervis; hisce obstructis, compressis aut incisis, ipsâ parte manente integrâ, sensus tamen & motus tolluntur, quia spirituum (uti asserunt) meatus impeditur; hi enim substantiæ tenuissimæ nervorum poros citissimè permeantes, facultatem ad membrum & speciem sensibilem
ad

ad cerebrum gerunt & regerunt.

Re perspectâ & benè consideratâ itus ille & reditus spirituum, neque etiam levissimæ auræ, quamvis liberæ, tam subitus, ne imaginatione quidem, esse posset.

Quare multiplicamus entia & confugimus ad non demonstrabilia? evidentia, quæ sensu percipi possunt, sectanda sunt.

Præstat, meo judicio, id non à spirituum interceptione expectare; sed potius ab impeditâ, quæ cerebro cum nervis communis est, actione, mediante quodam, quo illi à cerebro imbuuntur, humore.

Nam censendum est, spiritus, non minus hic, quàm alibi, substantiam esse spirituosam, è quâ nervi & succus nutritius, quo abundant, non aliter, quàm aliæ partes, & ipse, sanguis compositi sunt; quæque, à carnosâ & solidâ omnino inseparabilis, sola subsistere non potest.

D

Sed

Sed ne quis dubitet de humoris hujus existentia, nervo vel punctum solum laeso tanta copia interdum exstillet, ut ab imperito Chyrurgo compesci vix possit.

Notandum enim, quemadmodum corpus continuè & indefinenter novo nutrimento refocillatur: sic & nervos perpetuè sine intermissione refici, non sanguine immediatè ex arteriis in ipsos deposito, quod fortè soli carni accidit, sed succo ipsis cum cerebro familiari, à quo eum copiosè accipiunt, tam ut ipsis cedat in nutrimentum, quàm ut partibus aliis sensu præditis communicetur.

Nutrimentum à cerebro habere nervos præparatum evidenter demonstrant: primò, quia sunt cerebro, cum spinali medulla, continui, sine læsione inseparabiles, & partes ex substantiæ cerebri meningibus obductâ portione conflatae, ut diceres cerebrum per totum corpus extensum esse.

Præ-

Præterea quod nullas, visibiles ad minimum, arterias & venas habeant.

Neque de humoris hoc copioso proventu, qui continuò in nervos pulsu impellitur; neque de impulsivâ vi in extremas partes eum movente, quasi molle cerebrum tantâ potentiâ præditum non sit, movenda difficultas est: cùm per arterias carotides tantâ copiâ sanguis deferatur in cerebrum, imò multò, majore, nisi foret in usum communem, quam indigeat; tanta etiam vi impellitur, ut hoc, motu continuo pulsatorio, non aliter quam arteriæ ipsæ, inquietum pulset, & simul succum separatoriâ suâ vi à sanguine (cujus superfluum venæ recipiunt) segregatum, vel suâ mole exprimente, vel sequentibus pulsibus moventibus, nervis nutrimentum supeditet.

Hisce positis, facillimè concipitur quomodo moveantur sensus, & sensationes fiant.

Cerebro substantia contigit mollis & mobilis, ut ad singulas cordis pulsationes (ob adductum per arterias carotides sanguinem) respondeat; hæc à meningibus, membranis contractilibus & exquisitissimo, à conformatione, sensu præditis, arctissimè (præcipuè à piâ, quæ sese per omnes ejus anfractus insinuat) amplexa pro communi sensorio animæ inservit.

Illud itaque in continuo existens motu, nervosque (qui sunt ejus substantiæ meningibus obductæ portiones) sibi habens continuos & per omnes sensibiles partes dispersos, cum iis alibilem succum communicet, affectionem vel etiam levissimam in objecto sensorio excitatam, etiam in parte extimâ, percipit.

Vix vel pars aliqua attingitur, vel visibili specie retina afficitur, quin hoc cerebrum cordis pulsu incessanter concitatum, quia ejus motus nonnihil ab hâc affectione mutatur, per-
sen-

sentiscat, & per impressas notiones cognoscat; non aliter quàm in cytharæ chordâ extensâ, inter pulsandum, leviter digito attactâ, sonum mutari animadvertimus.

Hæc actio cùm sit tam subita, (imo citior multo quàm spirituum itus & reditus fieri posset) tanque perceptibilis & evidens; quis non judicabit plausibilis, & majori cum ratione statui debere (cùm hæc cerebrî meningibus septi, &c. continua actio, nervis omnibus per partes sensibiles disseminatis, hoc nutritio humore mediante, sit communis) cùm propter nervi obstructionem, compressionem aut incisionem, partis actio lædatur, id à læsâ potius functione cerebri, cum nervis communi, procedere, quàm ad imaginariam missionem & remissionem nullibi apparentium spirituum confugere: nam impeditâ nutrimenti immisione, cerebrum, quæ ultra ligaturam, aut nervi læsionem

fiunt, percipere, neque eo usque voluntatem exerere valet.

Concludo itaque, cùm neque in toto corpore talis substantia, quæ cum spirituum definitione convenit, reperiatur, neque quæ alicui fini spiritibus attributo competat, nec spiritus esse ullos, nec in corde elaborari posse. Imaginari quidem posse fatemur in quâlibet parte atque etiam sanguine esse substantiam æream, quam spirituosam appellare veteribus placuit; sed illam spiritum posse dici (quia ab humerosâ & solidâ inseparabilis) aut tale quid esse, quod sub spiritus descriptione comprehendi posset, negamus. Hujus rei plures rationes, cùm in refutandâ hæmatosi cordis occupabimur, sese offerent, ad quam antequam descendamus, operæ pretium videtur, quo eam ordine peragi existimem, narrare.

Ne solus interim, tum decantatæ & ab omni ævo receptæ de spiritibus
opi-

opinionem, me opponere videar, illustrum virorum mecum sentientium auctoritates adducere, in sententiæ nostræ confirmationem, videtur operæ pretium.

Nobis astipulatur reverendus sagacissimus Senex HARVEIUS *de gener. animal. lib. exercit. 70.* quanti sit hujus Viri faciendum judicium, ejus asserta & inventa, omnium prædecessorum suppositis anteponenda, facile probant.

Assentitur nobis eximius plurimique æstimandus Doctor ARNOLDUS DE REECK, Hagienſium Medicorum suo tempore primarius: cujus epistolice quæſtionem, quam mihi ornatissimus Medicinæ Doctor J. BLANCKENDAEL, apud Hagienſes magnâ cum laude praxin exercens, communicavit, hic annectendam dedimus.

QUÆSTIO EPISTOLICA

Clarissimi Viri

ARNOLDI DE REECK,

Medicinæ Doctoris, apud Ha-
gienses, suo tempore primarii.

ANtequam de spiritu agimus, prius dicendum est, quid per spiritum intelligamus. Dicunt itaque Medici, in corporibus viventibus & animâ sensitivâ præditis, præter vapores (qui internas ubique opplent cavitates, & quos in corpore, propter calidi in humidum actionem, esse, non est dubitandum) esse insuper in variis partibus, præcipuè autem in visceribus, corde, cerebro & hepate, & in canalibus ab istis visceribus oborientibus, in sensoriis quoque omnibus, aliqua corpora aërea, tenuia, pellucida, levia & mobilia, ex sanguine orta, ex intento peculiari, & speciali virtute, à naturâ procreatâ, parentia animæ imperio, quibus anima tanquam præcipuo instrumento utitur, ad omnes suas actiones obcum-

obeundas, & sine quibus eas exerere non potest, & illa corpora appellant spiritus.

Queritur ergo an tales aliqui spiritus in corpore reperiantur? Videtur autem quod non.

Primò, entia non sunt multiplicanda sine necessitate, sed non videtur aliqua necessitas ponendi in corpore spiritus; ergo: minor probatur; quia in primis nullus sensus ejusmodi spiritus in nobis percipit.

Secundò, Ratio etiam non cogit eos ponere: ergo.

Hoc probatur, primò; quia si propter aliquam rationem spiritus essent ponendi, propter aliquam harum sequentium essent ponendi; sed propter nullam harum debent poni: Ergo.

Vel enim deberent poni, propterea quod essent medium conjunctionis animæ cum corpore; eo quod videatur, quod anima, quæ est spiritualis, nobilissima, ac æthereæ, non potest conjungi cum corpore terrestri & sordido, sine medio participante rationem utriusque: sed propter illam causam

non debent poni : quia anima non indiget illo medio ad sui conjunctionem , etenim forma & materia uniuntur seipsis & immediate : & anima est vera forma, corpus est materia , ut conjunguntur ut materia & forma, & faciunt ens unum per se : ergo non debent uniri medio ejusmodi spirituum.

Vel deberent poni, ut essent anima instrumentum : sed propter illam causam etiam non ponuntur : nam videtur quod instrumenta animæ, seu potius corporis animati, sint potentie & temperamentum, & quod possit sufficienter cum illis agere seu operari : & non requiritur aliud instrumentum, imo videtur, quod anima non posset operari per spiritus, quia res naturales operantur, per instrumenta sibi essentialia, & essentialiter intrinseca : atque spiritus sunt externi corpori animato ; quia non sunt essentialiter animæ , ut patet ; sunt etenim externi ipsi corpori : non enim essentialiter insunt corpori, nec sunt de essentia membrorum, saltem influentes.

Vel

Vel essent necessarii, ut iis mediantibus, facultates influerent, in ipsum corpus: sed, propter illam causam, etiam non sunt necessarii: quia ubi est anima, ibi in virtute sunt omnes facultates ejus; atqui anima est in toto corpore: ergo, in toto corpore sunt essentialiter, quoad actum primum, omnes animæ facultates: ergo de nusquam debent influere: ergo non requiruntur spiritus, ut facultates per eos influant.

Tertiò; si essent ulli spiritus in nobis, essent congeniæ naturæ cum vaporibus sanguinis misceri; si miscerentur, non essent idonei functionibus animæ, itaque frustra essent: ergo.

Videtur itaque quod omnes rationes & argumenta, quibus probatur spiritus esse, facillimè possunt solvi, & nullam habeant necessariam consequentiam.

SECTIONIS II.

CAPUT I.

*Sanguinis definitio: hæmatosis quid: quomodo peragitur: quomodo in sætu exorditur: alendi aptitudo, non color, sanguinem facit: in unâ parte hæmatosis non perficitur: coctiones additione & detractio-
ne fiunt.*

SANGUIS est venis & arteriis contentus, animalis naturæ familiaris humor, ad partium nutritionem, in se materiam aptam continens, toti corpori calorem, cum aliturâ, ad vitæ sustentationem administrans.

Humoris hujus elaboratio *hæmatosis* seu *sanguificatio* appellatur.

1 Duplex in hâc elaboratione cernitur differentia; prior cum in ipsis partibus seu corporis totius habitu peragitur hæmatosis, ubi sanguis multis reiteratis vicibus, corpus circulatorio motu permeando, multis in locis recrementa deponendo, partium-
que

que similitudinem tandem acceptando (neque potest ullibi melius similitudinem habere quàm ab iis, quibus assimilari debet) præparatur, ut in ejus substantiam adaptari possit.

Altera est, ubi noviter assumptum alimentum sive cibus & potus præparatur, ut cum priore mistum, ad corporis penetralia sine noxâ admitti possit, & ad nutriendum, cæteraque sanguinis munia præstanda, aptum reddatur.

Hoc, sine priori modo præparatæ sanguinis interventu, non perficitur; nam noviter assumptum, nisi variis in locis requisitâ additione, largâ dilutione, perfectâque mixtione subactum, tale non evadit. Cum prioris differentię sanguine, vitam inchoari & subsistere, cum secundâ verò sustentari incrementumque sumere certum est.

In primo animalis exordio, conceptus, præexistens utriusque sexus semen,

femen, seu viviparinum ovum, dum materno calore fovetur, in humore cristallino, punctum primò nascitur saliens tam pusillum, ut præ exiguitate visum effugiat, & si non Solis lumini exponatur aut perspicillo exploretur, vix conspiciatur: huic rubescenti tantillum humoris, cui insidet, quantum ejus exiguitas patitur, per vices additur, ut in vesiculam rubentem denique attollatur, quæ manifestiùs renitens & sese contrahens, vitæ conspicuum exorsum præbet; dumque magis magisque, tam dicti, quàm albuginei humoris aliquid admittitur, ipsa in auriculas migrante, corculum ac venarum & arteriolarum principia & propagines delineantur, & rubro colore inficiuntur, ut tandem, grandescente foetu, & congenitis conceptui (albugineo & cristallino) humoribus in sanguinem faciescentibus, nutrimenti penuriam compensans, novum, mater continuè largitetur alibilem

Iem succum , qui in uterino jecore præparatur, sanguineque ab embrione elaborato , & per arterias umbilicales adducto, diluïtur, ut, mediante umbilicali venâ, reducatur fœtui, & ulteriorem perfectionem nactus, copiam sanguinis , quo nutriri & augmentari is posset, augeat.

Per os adultiorem, in utero, aqueum humorem sugendo allicere , credibile est : siquidem maturus in lucem prodire debeat, qualis non esset, si ventriculus & interaneæ partes ad sua munia forent inepti ; aptitudinem nisi antea assuetæ non habent ; neque sugere recens natus , nisi prius edoctus tam citò posset ; quod tam cito dediscit si à mamma abstineat : adde , quod in ovo in aqueo humore rostrum interdum aperire pullus conspiciatur : præterea quod & chylus & excrementa in fœtus intestinis reperiantur, quæ certa per os assumptorum sunt indicia.

Hoc processu, tantillo semper adveniente, quod priori usque diluitur & familiare redditur, hæmatosis inchoatur, & crescente animali ad vitæ finem perseverat.

Non existimo humori, tenello corpori apto, antequam creatum hepar est, & dum adhuc albeat aut rubedinem nondum adhuc perfectum nactus sit, sanguinis nomen quempiam denegaturum; nam alendi aptitudo, non verò hepatis præsentia & rubedo, sanguinem faciunt: plurimum animalium sanguis non rubet; in adultorum venis contentus magis vel minus sanguis esset, prout magis vel minus ruberet.

Alterius verò differentię hæmatosis, cum assumptum alimentum in sanguinem convertitur, incipit: hoc enim à naturâ animalis omnino alienum, per varias mutationes, quas coctiones vocant, familiare simileque primò debere reddi, ut in corporis sub-

substantiam cedere posset, notum factis est.

Omnes hæ coctiones in unum finem inservientes, aptando scilicet nutrimento, ut in sanguinem, corporis alituram, converti possit, hæmatosis causæ dici merentur: sed, cum à parte unâ tam diversæ functiones non peragantur, uni parti sanguificationem imponere est absurdum.

Galeno teste (de placit. Hippocrat. & Plat. lib. 6. cap. 10.) nullum perfectum & magnum opus, repenti unâque aggressione fieri, totamque suam expolitionem ab uno naturali instrumento acquirere potest.

Mutationum sive coctionum harum narrationem, quo scilicet ordine & modo, secundum meam opinionem, eas peragantur, aggressurus, solum, quæ fide merentur, quia cum autopsiâ, tum sensibilibus demonstrationibus, & ad probationem sufficientibus rationibus munita videntur, recitare decrevi.

Ante

Ante omnia scitum velim, quod nullam manifestam & stabilem, alimentum subeat coloris aut consistentiæ mutationem, nisi, vel additione rei utilis & convenientis, vel detractiōe inutilis & animantis naturæ repugnantis, eveniat: & quod nullâ in parte seu membro, dici possit, coctionem fieri ad hæmatosin pertinentem, vel ad ejus perfectionem facientem, ubi alterutra additio aut detractio, vel utraque manifestè & evidenter non præstetur.

Hisce præmissis, in quibus partibus coctiones, & in quibus minimè fiant: quænam ad hæmatosin faciant & quæ non; nec non quæ pars perfectionem sanguini; quæve minimè tribuere potest; facillimè, & luce clarius innotescet: probationem sequens narratio, in singulis periodis, secum afferet.

C A P. I I.

*Alimenti prior coctio : mediante ventriculi humore ;
non calore & contactu perficitur : ad cibi dilutionem
non sufficere potum , qui ipse dilui debet : acidus
sapor in ventriculo non à liene : anne aliquid à
ventriculo feratur in lienem : ejus usus.*

A Ssumptum alimentum, oris salivâ aliquantulum imbutum, (ut tantò facilius ventriculi humorem admittat) linguæ, partiumque oris adjumento in œsophagum, atque ejusdem muscutorum, fibrarumque ope in ventriculum relegatur : ibi humore, quem interior tunica continuò exsudat, perfunditur, contrahendique ventriculi vi miscetur, quantumque potest, subigitur.

Videtur, quò distenditur magis, eò rarior fieri dicta tunica, ejusque pori patentiores, & vice versâ : quare major, cùm aliquid in capacitate ad diluendum contineat, humoris hujus affunditur copia ; quam cùm conciderit, tùm enim & densatur, & diluendi

luendi necessitas tantum non urget.

A solo contactu colorem consistentiamve mutari, ullâ naturali operatione, sine substantiæ additione vel detractiōe, visum fuisse non existimo: speculo alius ab objecti specie color induci videtur, & à calore aqua dilatatur, imo sævum liquatur: sed, recedente objecto & ablato calore, speculum colorem & quod dilatatum, liquatumve est ad naturalem consistentiam revertitur.

Calorem, quatenus homogenea colligit, & heterogenea disjungit, ad coctionem facere confido; quamvis pisces, quorum interanea & ipse sanguis frigent, escam integrè diglutitam cum ossibus perfectè digerunt, & sunt ultra modum rapaces.

Hujus sententiæ veritatem si quis ipsis oculis videre desiderat, justæ magnitudinis piscis stomachum intropiciat, cum alium integrum propastu ingurgitaverit, (quoniam non
totum

totum corpus simul, sed partes exteriores & fundo ventriculi propiores prius digestionem consumuntur) piscis deglutiti superficiem, aliquo elapso tempore, videbit, ferè consumtum digestamque, & circa stomachi parietes, succum (inuccosum quidem, sed escæ minus permixtum) noviter è tunicæ interioris poris, sudoris instar, egressum; ut liquidò pateat hunc subigendo cibo dari; nam hoc maximè subactam & digestam portionem, in intestinis, per pylorum contrahendi vi ventriculi, protrusam conspiciet.

Decet equidem quod alienum est multo copiosoque humore familiari, ab ipso corpore deprompto, sufficienter dilui, (cùm aliter melius simile reddi non potest) ne dissimile ad penetralia permeans, nutriendas partes offendant: adde, quod, nisi in ventriculo cibus humore hoc benè subigatur (dum alibi talis non reperitur, neque etiam elaborandi datur commoditas)

ditas) primæ coctionis vitium non corrigatur postea à secundâ.

Sed ne à potu, qui humectando macerandoque cibo assumitur, hoc fieri aliquis dubitet, certum est, hunc ipsum etiam hoc succo semper dilui, antequâ ventriculum egrediatur (non verò tam longo tempore ad hoc habet opus, siquidem citiùs mollia & potiùs liquida digeruntur crassis) nam aliquo post assumptionem tempore vomitu rejectus crassior & muccaginosior conspicitur; nisi ventriculus malè affectus, & debilis coctionis fuerit, tunc enim liquidior & sæpe acidus prodit, quia benigno hoc succo destitutum ingestum omne acefcit & corrumpitur.

Saporem hunc acidum lieni plures attribuunt, immeritò equidem, dum ab hoc nil quidquam, neque limus, neque humor, neque spiritus acidus ad promovendam digestionem, aut incitandum appetitum, aliamve ob

cau-

causam, ad ventriculum feratur: ratio est, quia nulla est via, neque ulli à liene in ventriculum immediati ductus.

Anne aliquid à ventriculo in lienem deferatur, asserere arduum est: scio existimare viros etiam graves & non contemnendi iudicii, portionem chyli tenuiorem sese insinuare in tunicarum ejus poros (simili modo quo imaginantur admitti ab intestinorum membranis & venis meseraicis tenue, quod post egressum è crasso residuo expressione separatur) & unà cum sanguine remeante per venarum gastricarum ramulos in lienem duci, ibique ex arteriis copiosissimis, in venas transeunti sanguini misceri, & à calore ejusdem lienis subactam, deinde per ductum splenicum, cum hæmorrhoidali in venam portę & hepar confluere.

Hæc cùm obscura sint neque satis manifesta, iis adhibere fidem, aut
con-

contradicere non audeo: tunica ventriculi tantum videtur impedita emit-
tendo humore ad coctionem requisi-
to, ut suspicer, duobus contrariis mo-
tibus, è tunicæ poris in capacitatem,
& è capacitatem in tunicæ poros, præ-
cipuè dum chylicandum adhuc in eo
hæret, uno eodemque tempore infer-
vire non posse.

Nihil probat, quod venæ quæ in lie-
nem ferantur ligatæ, in animali vivo,
versus ventriculum intumescant; hoc
enim omnibus venis ligatis est fami-
liare detumescere versus truncum, di-
stendi verò cis ligamen.

Quare & hic, venæ enim gastricæ
in ramum inferuntur splenicum, &
quidem in liene adhuc latitantem, sed
lienis substantiam, qui per eas mitti-
tur, sanguis non attingit, confunditur
tantum cum ex eo egrediente, & cito
motu, sine morâ in portam, diluendo
chymo, è glandibus mesenterii ibi
concurrente, fertur.

In hunc solum finem & usum (licet ipsi à viris doctissimis & Medicinæ proceribus plures attribuantur) lienem existimo fabricatum, ut scilicet sanguinem, quem copiosè à ramo arteriæ cæliacæ (& præter sanguinem nihil, neque ab aliâ quapiam parte quidquam) accipit, per raram & spongiosam suam substantiam percolatum, in portam deponat, ut ibi, unà cum à reliquorum viscerum nutritione revertente, chymum paucum respectu affluentis sanguinis, suâ copiâ diluat: cujus tanta est necessitas, ut, cum, obstructo liene, sanguinisque motu inhibito, chymus non aptè diluatur, corpus extenuetur à depravato nutrimento, lien verò, à restagnante sanguine, in majorem & molestem increascit molem.

CAP. III.

Venarum lactearum usus : descriptio pancreatis & ejus ductus : ejusdem cum aliis lacteis differentia : usus pancreatis usus : respondetur objectionibus Bartholini & van Horne.

IN intestina postquam est demissus chylus, peristaltico motu quod crassum est ulterius semper movetur, per rarum verò ipsorum corpus, variè arteriis & venis, tam vulgaribus quàm lacteis, perforatum, quod tenue est, exprimitur.

Hæ venæ, scilicet lacteæ, in intestinorum sinu patentes, hoc, (præcipuè ipsarum maxima per pancreatis medium secundum longitudinem excurrentis, manifesto & aperto ore, ipsi cum meatu biliario communi) lactis instar albicans, in suos sinus admittunt, atque rursus à distentione sese liberare conantes, illæ in glandes mesenterii, hæc in pancreas elaborandum promovent Manifestè hoc, cuilibet cum attentione & adhibitâ diligentia ob-

observanti, in canis vivi aperto abdomine, videndum se exhibet, ut nulli sit, quàm propriis oculis, credendum.

Pancreas seu *Callicreas*, *Pandenon* alicui, nonnullis, propter candorem & mollitiem, *lactes*, dicitur. Corpus est carneum, enatum prope primam lumborum vertebram, latum tres quatuorve digitos, à liene secundum suam longitudinem, humani ventriculi parti posteriori ejusque fundo subjacens, & renibus incumbens ad intestinum duodenum & hepatis concavum exporrigitur: præter glandulosam & mollem carnem, membranam quâ vestitur, arterias à cæliacâ, venas portæ continuas, & nervos sexti paris propagines; habet & ductum per ejus carnem variè distributum ac divaricatum.

Ductus hic venarum lactearum maxima, manifesto, sibi cum meatu biliario communi, hiatu ab intestino

jejuno satis conspicuo incipit, secundum corporis latitudinem, & pancreatis longitudinem, calami scriptorii ferè crassitiem adæquans, extenditur: in cadavere nihil quicquam, dum aperitur, continet, aliarum lactearum more, quæ tamen omnes, ob exiguitatem, & quod membranis quibus fulciuntur, nimis sint similes, inanitæ disparescent, visumque nostrum effugiunt; hic verò, propter magnitudinem, & quia per carnem, à quâ facilè discernitur, excurrit, satis est conspicuus: in animali vivo, aliquot post pastum horis, aperto, albo humore impletus tumet, ligaturâ constrictus, intestinum versus intumet magis, ultra verò statim inanitur.

Cui quæso fini lacteus succus adducitur? Anne ut in nutrimentum pancreati cedat? Minimè: est enim humor hic ad nutriendum ineptus: dein arterias habet pancreas ex ramo cæliaco huic operi accommodatas, imò

imò majores multò, quam parva ejus moles requirat : evidens signum etiam alteri usui & majori, scilicet communi bono inservire : nam in molle & spongiosâ carne depositus succus lacteus, sanguine (qui copiosus eò, ob dictam rationem confluxerat) perfusus atque subactus, ejusdem colorem & consistentiam nactus, in venas transfertur.

Assertum hoc de pancreatici canalis usu, duobus præclaris hujus sæculi luminibus arridere non videtur, *Thoma Bartholino* & *Joanni van Horne* Medicinæ Doctoribus, & in Academiis Hafniensi & Lugduno-Batava Professoribus eximiis, in tractatibus, illi, *de lacteis thoracicis cap. 3.* huic, *de novo ductu chyliifero*, circa finem.

Ille citato loco plures recenset, inter alios Clarissimum *Petrum Gassendum* apud Parisienses Matheseos Professore, *Nathanaëlem Higmorum* Artium & Medicinæ Doctorem Oxo-

nienfem, & me cujus nomen non bene novit.

Doctissimus & editis scriptis insignis *Gassendus* in *app. de nutrit. anim.* (unde extractus discursus scepticus, qui Gallicè olim prodiit, *de viâ chyli, & motu cordis*) ipsâ autopfiâ variisque rationibus instigatus, cholidochum ductum non tantum egerendæ cholerae, sed & ingerendo chylo destinatum gestit.

Diligentissimum naturæ indagatorem *Highmorum* inculcat, quod *Anatom. disquis. lib. 1. part. 2. cap. 8.* contra *se Wirsungianum* ductum bilem ex vicinia admittere asserat; quod eo loci non reperio: negat quidem contra *Bartholinum*, bilem in illo ordinariâ naturæ lege contineri, sed, cum in meatum biliarem inhiet in hominibus, facilè, ait, in dissectione, contingere posse, partium commotione, bilem à meatu biliario in eum refluxuere, quod in dissectionibus sæpius se observasse dicit.

Ad

Ad utriusque effati everfionem contendit, in exitu cholidochi valvulam vel potius obliquum ductum prohibere & vetare, in distributione chyli, ne nutritius fuccus excrementis (biliolofo & à pancreate defcendenti) mifceatur. Liceat mihi, doctiffimorum Virorum veniâ, paucula fuper objectum hoc, dum & me res tangere videtur, refpondere.

Bilem excrementum effe in hâc noftrâ differtatione, ante aliquot annos, negavimus; neque excrementi nomine mereri adhuc probatum eft: quale aut quid à pancreate proveniat, neque clariffimus Vir, neque alius quifpiam, novit aut vidit unquam.

Sed quæfo: quomodo hoc vel valvula, vel alicujus ductus obliqua infertio impediet, cum, vel *Bartholina* judice, via in inteftinum pateat, ubi & chylus & putata excrementa concurrunt lacteis offerendâ?

Contra *Higlmorum* illatio infirma

non minus est, siquidem, in homine, uterque ductus simul combinantur extra intestinum, unum & communem constituentes meatum, qui digiti circiter latitudinem per tunicas procedens, unam portam in ejus cavitate efformat: huic appositam valvulam vel aliquam communis ductus obliquam insertionem, bilis in pancreaticum canalem ascensum impedire posse, omnium judicio impossibile est.

Quamvis videatur clarissimus Vir ductui cholidochi differentem à *Wirsungiano* valvulam tribuere, in homine tamen eundem habet uterque exitum; in animalibus quidem suum singuli sunt sortiti: sed pancreatico inferior semper accedit; ut puram interdum bilem, chylum verò non nisi bile perfusum, admittere possit. Hinc petenda credo, ratio est, quare fellis colore stylus argenteus, notante *Wirsungio*, in canalem immissus tingatur.

Con-

Contra me clarissimus Vir infert, quod eadem valvula, sive interior intestini tunica valvulæ æmula, sive obliquus ductus, ne stylum quidem ex intestino, nisi accedente vi, admittat, multòque minus chylo transitum concedat; quod impossibili me inductum experimento defendere asserit.

Quantum ad prius; valvulam ad cholidochi initium nunquam vidi: intestini tunicam interiorem rugosam esse, & plicas habere innumeras orificium abscondentes, scio: si in longum dissecti intestini latera deducas, ut fiat conspectius, omnino disparet, nec spectandum se offert; pressâ verò vesiculâ felleâ, & egrediente nonnihil bilis, oblonga cernitur rimula, cujus labia nonnihil tument; hæc sine ullâ molestiâ, impedimentove, si cautè agatur, stylo vel syringulæ tam liberum concedit ingressum, quàm bili exitum.

Si aquam per syringulam, in com-

munem solum meatum, immixtam injicias, sponte in *Wirsungianum* ad pancreatis extrema fluit, manente cholidochoductu vacuo, ob situm obliquum; si intestinum componas, ut fistula meatusque cholidochum respiciat, totum ductum porumque implebit, ad hepatis interiora excurrent, manente cystis cervice, ultra divaricationem seu pori biliaris exortum, omnino vacuo. Hæc contra exercitissimi *Lyseri* (*cult. anat. lib. 1. cap. 6.*) certissimo experimento, testibus propriis oculis notavimus.

Vidimus præterea, in cane venatico usque emaciato, quem semivivum, aliquot post pastum horis, lacteas thoracicas exploraturi, aperuimus: dissecto abdomine, laceratoque nonnihil omento, & intestinis ab hepate sinistrorsum devolutis, conspiciendum se præbuit (quia nulla obstabat pinguedo) vas lacteum vel cæterarum lactearum in modum albicans in hepatis

tis cavum excurrans, anatis pennæ crassitiem excedens; hoc filo prehensum signamus, dum alia inquirere stabat in animo, quibus peractis, ad vas nostrum redimus, & cholidochum esse præter expectationem invenimus.

Præterquam quod experimentis hisce planum apertumque sit, nullâ valvulâ meatum obsideri, sed per hunc, in utrumque ductum, non minus patere aditum quàm egressum: constat etiam clarissimi Gassendi cholidochum ductum non esse omnino contemnendum: confirmat & nostram de motu bilis in hepar sententiam: sed ante omnia nimis maturè hepatis structum à sagacissimo Bartholino rogi sepulchrumve destruit & evertit.

Hoc quia nec fato, meritâ nec morte peribat,

Sed miserum ante diem, solitas revocatur ad auras.

2. Impossibili me existimat experimento

rimento inductum, chylum in pancreate admitti, defendere. Laboriosam satis administrationem esse equidem fatemur, non verò impossibilem. Experimentum hoc ut feliciter succedat, animadvertendum, ductum hunc in brutis, trium circiter digitorum latitudinem infra cholidochum, ex opposito intestini latere exortum, in posticâ pancreaticis parte, quâ dorsum respicit, in parenchymate absconditum, locum sibi obtinere : è suâ sede itaque devolvatur antrorsum pancreas, ut tunica ejus caroque postica exterior, in medio secundum longitudinem, incidi apte possit, cavendo tamen ne ductus lædatur, sed is, ungue reliquâ obtegente carne laceratâ & contritâ, conspiciendus detegatur; tunc lateralibus singulis furculis seorsim ligatis, truncus constringatur, ut adventans succus ulterius excurrere impediat.

Veniamus ad objecta Clarissimi

van-

van Horne, hæc primo intuitu multò majoris ponderis esse videntur, sed æquâ pensitatâ lance infirmiora nimis & invalida assequendo scopo reperiuntur. Ornatissimus Vir, ut hepaticyminificationis officium adimat, nulum ad hoc chylum ferri gaudet evincere: quod, si lacteas aliò diverti, *Gassendi* chylodochum ineptum, & *Wirsungianum* canalem isti usui non inservire demonstraverit, præstitisse, chyloque omnem ad hepar aditum occlusisse, sibi videtur.

Putat me oppidò falli, quod ductum hunc pro lactearum maximâ habeam; 1. quotquot enim sunt, ait, lacteæ, eo sunt tenuiores exilioresque, quo intestinis sunt viciniore, cujus contrarium in ductu pancreatico evenit: 2. quin & parietum robore plurimum à lactearum subtili membranâ differt. 3. Adde etiam, quod intestinorum plicæ carnosæ, descendente chylo, foramen seu aditum ejus

OC-

occludant : 4. nec tacet interim chylum in eo nec visum unquam, nec videri in vivo animali posse, propter impossibilem ejus vasis ligaturam. 5. Denique quorsum abiret chylus ille cum ad lienem non pertingat ductus, nec à venâ splenicâ exsugari aut recipi ullo modo possit, rogat.

I. Respondemus *Asellium* lactearum inventorem, sic eas indigitasse, non ab exortus modo, sed ab officio & externâ apparentiâ, quod nimirum ad externum intuitum candicarent lactis instar, propter contentum quem vehunt lacteum succum. Neque Clarissimis Viris *Bartholino* & *Pecqueto* vitio vertitur, quod ductus, in thorace similem liquorem venæ subclaviæ adferentes, lacteas thoracicas vocaverint, quamvis, è chyli receptaculo, ampliorem exortum, quam in subclaviæ insertionem, habeant.

II. Naturæ ordine, venæ & arteriæ majores, robustioribus & crassioribus

ribus constant membranis, quàm exi-
liores & pusillæ. Sed ad quid inservit
hæc comparatio? non enim descripsi-
mus vas mesentericum, neque lactea-
rum mesenterii ramum esse diximus;
sed peculiarem pancreatis ductum, à
Wirsungio primò detectum, commu-
nem cum cholidochæ sortitum por-
tam, ab officio, quod ipsi contigisse
existimamus, lactearum maximam vo-
camus. Hoc Clarissimus Vir oppug-
nare incipit, dum, descendente chylo,
intestinatorum plicas carnosas, ait, adi-
tum occludere.

III. Cum veniâ tanti Viri dixe-
rim, impediunt quidem ne pleno gur-
gite sæculentus in foramen apertum
irruat chylus; sed liquidiori ejus par-
ti viam ipsas omnino occludere, nec
orificii fabrica, plicarum dispositio,
nec chyli fluxibilitas videntur astrue-
re. Commodiùs liquidioris magisque
fluxilis chyli pars, per intestinatorum
rugas plicasque colata, defæcataque,
am-

ampliori ore excipitur; cum reliqua magis hærens impactaque, per poros exiliores velamenti bombicini (liceat mihi Clariss. Viri verbis uti) in vasculorum lacteorum oscula, ex crassiore & magis liquidâ parte orbato, exprimi.

IV. Ligandi modum tradidimus, qui si Clar. Viro laboriosior videatur, faciliorem adjungimus, quo tamquam certo experimento veritas explorari poterit. Vas hoc, dum natura nihil frustra facit, non semper inane esse omnes consentire confido; ductuique quia ducendi officium competit, hoc pancreati aliquid adducere, vel ab ipso abducere quidpiam, dictare rationem existimo: qui itaque litem dirimere velit, ligaturam, in animali vivente, hujus ab intestino exortui injiciat; si egerendo natum sit, intumescet supra ligaturam; sin advehendo inanietur.

Diligentissimus *Highmorus* in illo
nul-

nullum conspicuum humorem inveniri, licet, in vivis dissectionibus, filostatim ad intestinum connectatur, asferit.

V. In porosum hinc abscedit pancreatis parenchyina, ibique cum sanguine, quem advexerunt arteriæ cæliacæ rami, dilutus venarum furculos intrat, splenico (non suctione, quod ligatura prodit, sed impulsione) recipiendus.

Quam facilè hujusmodi objectiones corruant, omnibus liquet, quæ condonandæ equidem laudandæque; siquidem, uti ex filicis cum chalybe concussione ignis, sic, è concertationibus amicis, eruitur patescens veritas.

CAP. IV.

Lactearum mesentericarum usus : chymosis rudior sanguificatio : quid chymus : sanguinis in jecore uterino præparatio : natura circa alimentum ordo.

Non aliter de chylo ultra hiatum hunc promotum censendum, è quo, contrahendi vi intestinorum, circumjacentium viscerum comprimente mole, nec non musculorum abdominis continuo motu, exprimitur chyli tenuior portio, & à venis lacteis recipitur in glandes deponenda, unde, cum sanguine supra dicto modo confusa, venulas intrat capillares, è quibus elapsa in venâ portæ, magnâ undique sed præcipuè è liene, peculiariter eo muneri destinato, confluyente sanguinis copiâ, diluitur.

Rudior hæc est sanguinis præparatio, quæ (si propter rubedinem sanguinis nomine meretur) *hamatosis* est appellanda : sed quia nondum cuncta, quæ ad sanguinis constitutionem requi-

requiruntur, sed tantum primam dispositionem, nactus est, actio hæc *chymosis* potius dicenda videtur.

Chymus terrestris & siccæ partis cum humore permistus, vel eorundem mediante calore percolatus succus est, talis dici potest illa materia, quæ venis lacteis continetur, & à chyli crassiore substantiâ segregata est; sed qui à Medicinæ proceribus pro chymo sumptum & hoc est, quod à chylo separatum in venis meseraicis adhuc hærens per irradiationē ab hepate rubro colore (ut ajunt) inficitur; nos etiam hanc materiam, adenibus pancreatis & mesenterii elapsam & venæ portæ ramulis exceptam, chymū vocari posse existimamus: quemadmodum enim, ex sicci & humoris permistione, sapor, vel potius sapidus, constituitur, sic etiam, ex chyli tenuiore portione sanguine dilutā, chymus seu succus sapidus, accommodatur, ut in sanguinem ulterius elat-

elaborari possit, conficitur, veterum chymo, in venis mesenterii, rubescenti æquipollens.

Chymosi huic respondet (dum in utero fœtus hæret) sanguinis in jecore uterino, seu placenta, præparatio, in quâ à corpore uteri descendens succus (elabatur enim albuminis ovi ferè similis, non formâ sanguinis, quod autopfia cùm in brutis cotyledones ab uteri acetabulis avelluntur, & vasorum dispositio demonstrant, matris enim non ultra placentam extenduntur) cum sanguine, per arterias umbilicales, cùm ad nutritionem, tum ad hujus operis administrationem, apportato diluitur & miscetur, primamque dispositionem sanguinis nanciscitur.

Admiranda solertis naturæ, in hoc opere, industria est, de animalis enim vitæ sustentaculo, bonæ matris instar, sollicita, in ventriculo assumptum, prius paucò (respectu consequentis) & mis-

& miscibili succo in pastam, inollem tamen, subigit, è quâ convenientiore & magis aptâ portione, tanquam torculari, expressione separatâ, fæces in cloacam abjicit.

Ne suctione ullâ quispiam succum hunc in lacteas venas aut mesenterii glandulas allectari existimet, sola atque unica ligatura contrarium edocet, ultra quam suctio nulla se extendere, neque quampiam partem in tumorem attollere potest.

Servatam depuratamque instar lactis albicantem in adenibus, dein cum affuso sanguine elaborat & exagitat, in modum nostrorum pharmacopæorum coquorumve, qui materiam medicamini vel juri permiscendam, primum paucò liquore excipiunt ad meliorem mitionē, addito tandem condimento, & reliquo liquore, omnia simul debitè subigunt : sic etiam in adenibus, dilutæ paucò sanguine materiæ, copiosiore affundit natura tan-

tandem, additâ pro condimento bile;
 ne verò quidquam inpermistum præ-
 terlabatur, & corporis thalamum in-
 grediatur aut commaculet, per hepatis
 meandros minutissimos innumerabi-
 lesque filtratum, perfectiùs miscetur,
 & tandem in venam cavam (cordi de-
 ferendum, cum reliquo revertente)
 promovetur.

C A P. V.

*De novo chyli receptaculi & chyli feri ductus invento :
 de vasis lymphaticis noviter repertis : omnium exa-
 minatio : glandium mesenterii usus defenditur.*

ÆVum hoc nostrum dum doctri-
 nâ sagacitateque pollentium in-
 geniorum numero præcedentia secula
 facilè superet, novis artibus & scien-
 tiis locupletatum indies refulget ma-
 gis : inter alias Hippocratica ars plu-
 ribus noviter inventis ornatâ splen-
 dore coruscat. Olim ex Angliâ *de san-*
guinis circuitu & de generatione anima-
lium eximii Harveji gratis offertum
 munus

munus eam decoravit : nunc Gallia, Hollandia, Dania, Suecia etiam sua, ad maiorem ejus splendorem, reperta conferunt.

Ornatissimi Viri *Joannes Pecquetus Diepaus* Parisiensis Medicus in Galliâ, & *Joannes van Horne*, Anatomes in Academiâ Leydensi Professor in nostrâ Patriâ, novum invenere chyli receptaculum ductumque à nemine antea observatum, sed fortuito non opinantibus, dum naturæ arcana in bestiis vivâ sectione scrutantur & rimantur, oblatum.

Inventum hoc adornat *Clar. Bartholinus* Hafniæ Professor, qui in homine primus ductum istum demonstravit, & in eo receptaculi vices lumbares glandulas gerere detexit.

Huic excellenti Viro præterea debemus, quod, recondita naturæ inquirendi desiderio captus inexplibili, facem nobis accenderit, qua obscuriores in animalis corpore tenebras illustrans,

strans, de veritate prioris inventi & plurium aliorum, melius judicandi peperit commoditatem, dum vasa, quæ (lymphatica vocat) in abisso recondita tamdiu latuere, Solis lumini conspicienda exhibuerit. Licet eundem sibi appropriet honorem Doctissimus *Olaus Rudbeck* Suecus, hepatis ductus aquosos & vasa glandularum serosa, in regno & præsentia invictissimæ Virginis *Christinæ*, demonstrasse, non quidem scriptis edidisse, se affirmans.

Inventa hæc non contemnenda, penitior observatione & examine digna, primo intuitu, quam de glandularum mesenterii chymosi sententiam protulimus funditus evertere videntur; & quia inventores hepatis, & chymosin, & hæmatosin, attributum huc usque munus, novo chyli receptaculi & ductus chyliferi seu lactearum thoracicarum invento, eripere non solum gaudent, sed id evidentissime probare, ipsisque oculis spectandum

dum se præbere profitentur. Quæ res, dum nos tangant, si breviter chyli, sic vocatum receptaculum, ductusque chylicos & aquosos cum vasis lymphaticis & serosis examini subjecero, irritum inanemve fore nostrum laborem non confido.

Receptaculum itaque hoc, chyli vesicula, cisterna & penus, sacculus lacteus, inventoribus dictum est; glandulas verò lacteas lumbares, quales in homine esse reperit, Clar. *Bartholinus* vocat.

In lumborum ferè medio; sub arteriis cœliacis & emulgentibus; juxta venam cavam descendentem; inter renes, capsulas atrabiliaris (quas uti & renes contingit aliquando) musculosque psoas; supra lumbares vertebrae; infra mesenterii centrum ipsi subinde superpositum, locum obtinet in brutis, (observante Clariss. *Bartholino*) cum hoc parem elegere in homine situm inferiores duæ lumbares glandulae; sed

tertia dextrum, & superiorem sub appendicum diaphragmatis exortu.

In brutis, quibus unicum contigit, membranofum, molle, & flaccidum est, humore intus contento, apertum aliquot à pastu horis, candicante, alias ferofo refertum & turgidum: in homine corpora glandulosa & solida, similem ut in brutis per anfractus dispersum humorem habent.

Usus receptaculo huic tribuunt, quod chylum per mesenterii lacteas ejusdem majori glandulæ seu aselliano pancreati advectum per ramusculos lacteos excipiat: qui deinde, median-
tibus aliis chyliferis seu lacteis ductibus, eidem receptaculo continuis, per thoracem ad venas subclavias cordi advehitur.

Hoc invento, certam chyli & conspicuam ad cor esse viam repertam, exultant Viri clarissimi & doctissimi, heparque lacteo succo seu chylo, uti ajunt, frustratum nec chymoseos nec hæ-

hæmatoseos officinam esse exclamant.

Sed cùm circa mesenterii basim in hujus receptaculi vicinia plures concurrerent ductus lacteis similimi, quibus in hepar lacteum humorem duci existimaretur; & à magnæ doctrinæ multique judicii Viris, vel truncum alicui parenchymati implicatum, in quo venæ lacteæ coëunt, vel diversos meatulos minores (quorum figuras in tabulis depictas edidere) à glanduloso pancreate emerfos ad hepatis ima progredi statueretur, mansit dubia res, & tamquam clavo suspenfa sub judicio.

Donec clariss. *Bartholinus* solo filo, nodo unico dedaliis meatulis hisce strictè alligato, introitum & egressum tam difficilis obscurique labyrinthi aperiret, ipsis oculis conspiciendum exponens, non ad hepar, sed ab eodem, contrario quam putatum erat motu, ad mesenterium & novum receptaculum, contentum in vasculis hisce humorem fluere.

Nunc actum de misero hepate, antiquo munere defungitur, dignitatibus principatuque exuto parantur exequiæ, epitaphium tumulo inscribitur: Sed in eo insons dormiat, donec iræ huic occurrens, mesenterio, ne à nobis ipsi attributo officio orbus, similes cum hepate pœnas luat, prævisero, ipsi gratiam cum Viris præclarissimis, & è carcere egrediundi veniam impetram.

Venis lacteis receptum chyli candentem succum diximus, non rectè ad hepar, sed in mesenterii glandes ferri, indeque admixto aliquantulo sanguine in venarum ramulos depositum, per portam hepati adduci. Huic asserto obstare fortè judicabitur, quod novo invento omnem chylum per lacteas venas in receptaculum, vel impulsus, vel suctione allectum, ipsâ autopsiâ demonstrari creditur, & per thoracicos chyliductus venis subclaviis infundi, cordique in sanguinem dege-

degenerandum advehi. Attentâ consideratione res digna est. Quoad nomen non videtur cum receptaculo quadrare nec ductibus convenire quod chylum ferre dicantur: chymus seu percolatus succus indigitatur subtilior pars, à chylo impuritibus scatente, separata; neque ultra intestina, servato nomine, solet chylus extendi. Clar. *Asellius* suas venas à colore & succo lacteo quem vehunt, lacteas non verò chyliferas dixit: solus Clar. *Gassendus* ductum biliarium chylodochum nuncupavit, quamvis injustè, quod chylum tamquam per hiantem meatum (qui aliàs per plicas rugasque intestinorum satis apte depuratur) in hepar eâ viâ duci opinaretur; potiori equidè jure, quàm si lacteas, quæ per exiles poros colatum, recrementis purgatū, & nonnihil alteratum, chymum admittunt, chyliferas appellasset. Sed de nomine contendere, quamvis ad explicationem rei plurimum facere

F 3 soleat,

soleat, idem quod de lanâ caprinâ rixari esse putatur.

Sed neque receptaculum neque ductus ejus thoracici recipiendo aut ferendo succo lacteo sunt propriè destinati: dedicantur potius humori, quem semper omni tempore & maximâ copiâ accipiunt & gerunt, scilicet lymphatico seu aquoso, sic impropriè dicto. Verum quidem est succi lactei partem (parvam alterius respectu, quæ portæ ramis affluit) mesenterii glandibus elapsam, cum dicto humore, dispensationis chymi tempore, in receptaculum aut lumbares glandulas deponi: sed dum hoc accidentariè, neque omni tempore eveniat, & multò minori proventu, quàm alter, confluat, statuendum confido humori lymphatico, liceat sic dicere, & receptaculum & thoracicos ductus adpropriandos esse.

Vix sanæ mentis judicaretur, qui portæ venam cum suis ramis, quia
hu-

humorem lacteum vel chyli succum sanguini admixtum, (cujus forte centesimam partem non adæquat,) vel chyli feram vel lacteam vocaret: quoniam vix alia in comparatione hæc inter humores miscendos est differentia, quàm quod succi lactei color à sanguine rubescat, aquosus verò, qui achromatistus & coloris expers est, à lactei albedine inficiatur.

Sed quis qualisve aqueus vel lymphaticus hic humor sit, paucis inquiramus.

Observandum animalis corporis partes in sanguineas & exangues vulgo dividi: illæ sanguine nutriuntur, quem cum abundantius & majori copia accipiant, quàm pro nutrimento indigeant, superfluous non omnino similis (plurimis enim constat dissimilibus, quæ assimulari nequeunt, particulis) in capillares primùm furculos & tandem in venas majores reneat circulatorio motu. Hæ quævis san-

guine carere videantur, non sunt interim achymæ nec exuccæ. Diximus hujus dissertationis pag. 74. nervos continuè & indefinenter, à cerebro, cujus sunt propagines, nutrimento refici, & magnâ quantitate nutritium hunc humorem partibus sensu præditis communicare. Hic succus in partibus hisce abundans, qui ob dissimilitudinem nutriendo ineptus est (non aliter quàm de sanguine dictum est) in subtiles primum rivulos & tandem in majores, ad hoc usque ævum veteribus reconditos, relegatur.

Est itaque humor hic, re ipsâ, non aquosus & lymphaticus (sed si talem, propter apparentiam externam, quis vocare velit, non repugnamus) sed sanguineus, imo sanguis, cui, uti pagina 88 diximus, non color sed alendi aptitudo nomen indit.

Aquam & serum renes à sanguine separatum, vesicæ offerunt, cutis in sudores & insensibiliter exhalat, &
oculis

oculis finitimæ in lachrymas interdum effundunt: si nutriendæ partes sanæ (de morboſis, unde hydrops, alia ratio eſt) privatâ coctione aquam ſepararent peculiaribus vaſis expurgandam, eam cum recrementis in veſicam, inteſtina, aliave naturæ convenientia loca mitterent, non verò ſanguineæ maſſæ cordi deferendæ ſua excrementa affunderent.

Sed ne quis ſanguinem, propter nutriendarum partium convenientiam, colore mutatum eſſe dubitet; vaſa, quibus continetur, venæ ſunt & ſurculi à venoſo trunco exorti, qui in albentes & membranofas, tam viſcerum quàm extremorum membrorum & artuum, partes inferuntur: ſive in abdomine, thorace, brachiis, cruribus, aliifve corporis locis examinentur, bartholinâ face adhibitâ, non aliter, quàm ſi ſolaribus radiis illuſtrarentur, huiusmodi eſſe, reperiuntur: ut concludere non verear me-

senterii glandes , hoc novo invento minime gravari : quid de misero hepate sit expectandum , hoc nodo soluto , postea videbitur.

C A P. VI.

Bilis sanguinis condimentum , hepatis excrementum non est : vesiculæ syntaxis : quomodo in ex bilis generetur : ejus necessitas : per porum biliarium ducitur cum portione chymi in hepar : per cholidochum ductui pancreatico & intestinis offertur : de porta & cavâ venâ : hepatis reviventis usus.

PAradoxon proferre fortè videbor, cùm sanguini bilem pro condimento addi statuam, quæ tam à veteribus quàm neotericis excrementum (quamvis utile ad movendas fæces) judicata est, tamquam animalium, quæ dulcibus gaudent & nutriuntur, naturæ omnino contraria; sed adferendas rationes, ipsâ autopliâ stabilitas, demonstraturas existimo, bilem hepatis non esse excrementum, neque ab eo in cystim felleam deponi; sed ab ipsius membraneo corpore,

re, ad hoc disposito, à sanguine, per arterias cysticas rami cœliaci propaggines, advecto separatam, in propriam cavitationem, pœnum & promptuarium, ut inde necessitate postulante, sanguini addi, & hæmatosum juvare possit.

Cystis cholidochus, vesicula biliaria, sive folliculus felleus constat substantiâ membranâ contractili & extensili; præter reliquis visceribus communem, propriam habet tunicam validam, quæ omni fibrarum genere firmatur; figuram obtinet rotundam, oblongam tamen, & tandem in longiorem apicem desinentem, constituentem cavitationem ad visum inaccessibilem; nam unicum tantum habet meatum, seu ductum intus apertum, foris clausum, septus enim est valvulis bili egressum quidem concedentibus, sed regressum omnino impredientibus.

Vesiculæ huic concessæ sunt, præ-

ter à sexto pari ad sensum nervos, arteriæ & venæ cysticæ, illæ rami cœliaci, hæ venæ portæ propagines; illæ sanguinem ipsi apportant, hæ superfluum & opere defunctum à vesiculâ in portæ venam regerunt: quod ex sanguinis motu, vasorum naturâ, constitutione valvularum, & adhibitâ in vivente animali ligaturâ omnes animadvertere possunt.

Præter has, quamvis constituentes partes nullas habeat, nihilominus turgentem bilem (quâ usque tumens & plena est) vel pressâ, contractâ, aut à copiâ irritata in meatum apertum sibi continuum exonerat, quàm tamen à nullâ parte vicinâ remotâve accepit vel accipere potuit.

Vesica urinaria, quamvis intuenti undique clausa videatur, ut ad extensionem inflata ne quidem vento pateat, habet tamen ureteres, ductus membraneo corpori obliquè insertos,

tos, urinam renum vi à sanguine secretam deferentes; sed vesicula hæc, exceptis arteriis, quæ nisi sanguinem, prout in vasis continetur, afferunt, nullos meatus habet, per quos aliquid accipere possit.

Hiscæ positis, concludendum puto hepatis non esse excrementum bilem, nec ejus separatoriâ vi à sanguine discerni: quoniam in eo nec segregandi locus, neque ipsa separata bilis, neque ullæ viæ, per quas in vesiculam duci separata posset, reperiuntur. Deinde, cum aliunde vesiculæ bilis non affertur, neque aliud quam sanguis (quem copiosè satis arteriæ tribuunt) in sola ejus tunica admittitur; credendum existimo ipsius tunicæ idiosyncrasinâ à sanguine bilem segregari, & per ejusdem poros, quasi exsudando, in cavitatem deponi & in usum asservari.

Ne quæso alicui mirum & imaginarium hoc videatur; sic nobis destillat

stillat in os saliva; sic humorem præparando chylo exsudat interior ventriculi tunica; sic urina in renum sinus deponitur; in abscessuum etiam pelluculis hoc modo diversa coacervatur materia, pro partis unde ea dimanat naturâ.

Hujus in vesicula collectæ bilis necessitatem evidenter ostendere credo, quod omnibus animantibus insit, usque adeo ut proverbio suam formicæ bilem inesse dicatur: sed videamus, an ne, sanguini eam addi, ex evacuationis modo, necessariò non sequatur.

Strictior vesiculæ cervix magis elongata antequam meatum biliarium constituat, cholidochum dictum, habet in suo sinu valvulas, quæ præterquam, quod à meatu hoc nihil in vesiculam ingredi patiantur, ipsius effluxæ bilis regressum præpediunt: quod videndum se exhibet, cum expressam ex vesiculâ bilem digitis re-

pri-

primere conamur, nullo enim studio in eam repelli potest.

Meatus hic in duos dividitur ductus, quorum unus, primum in duos, dein in plures & innumeros divisus furculos per hepatis parenchyma excurrit; hunc porum cholidochum ad alterius meatus differentiam nominamus: hujus ope, succo chyloso temperata, hepati advehitur bilis, quæ ejus meandros minutissimè divisa permeans, & è portæ venâ affluenti mista sanguini, in cavam promovetur.

Alter ulterius progressus, pancreatico ductui sociatus, cum quo postquam unum efformaverit meatum, in jejuni principium obliquè, inter utramque intestini tunicam aliquantulum deductus, inseritur; ut unum, cum hoc ipso, in intestino foramen efficiat; quò expressam, cum lacteo humore bilem confundat, & pancreatici, vel foramen egressam venis lacteis cum chyli præterlapsi succo præparandam exhibeat.

Patet.

Patet hujus veritas primò, quod duos simul liquores sine confusione concurrere, dein, quod succum chyli crassiorē intestina exprimere, & venas lacteas eundem admittere, non verò bilem tenuiorem, absurdum, imò impossibile, videtur.

Decet huic albo insipido & dulci liquori bilem addi, cū ut hujus acrimonia & flavus exsuperans color, albo crudo incoctoque succo in adenibus temperetur; tū ut illius adhuc tarda, pigraque constitutio excitetur & promoveatur.

Si alter, scilicet ad intestina progrediens meatus obstruatur, vel ab externâ compressione eo usque conniveat, ut bili via ad intestinum succoque chyloso introitus impediatur, plura inconvenientia contingunt, neque bilis calor & ferocia affuso humore lacteo mitigatur, nec pacatur; neque in pancreate & mesenterii glandibus, succo lacteo vigor additur: atque
ideo

ideo non diluta temperatave bilis per priorem meatum tantô majori copiâ in hepar, & inde cum sanguinis massâ in corporis habitum fertur, icterum excitans, flavoque colore totum corpus tingens.

Qui potum largius hauriunt (ventriculo enim citius cibo elabitur) quàm bilis effusio tingere possit, aqueam & non tinctam urinam reddunt: parum etiam ab assumpto cibo, pallidius mejitur lotium, quia potu lento, prius majore copiâ elapso, bilis quantitas inæqualior est, quàm cùm crassior promovetur chylus.

Contingit itidem, quibus, ob conniventem aliquâ de causâ meatum, bilis nisi per intervalla exoneratur, iis aliquando aqueam nullo colore tinctam excerni urinam, quæ, post parvum temporis intervallum, referato vel exonerante se ductu cholidocho, colorata rursum redditur.

Dictis rationibus & allatis exemplis,

plis, bilem non hepatis excrementum esse, sed in meliorem & communem usum, in folliculo generatam coacervari prius, & suo tempore tam chylo affundi, quàm hepati largiri, mihi persuadeo.

In venâ portæ concurrunt, magna sanguinis copia à liene missâ, chymus in pancreate alteratus, unâ cùm in mesenterii adenibus præparato, sanguis ab aliorum viscerum nutritione effæctus, etiam ex hæmorrhoidalibus venis affluens, & tandem nonnulla bilis portio, quæ solùm confusa, neque sibi invicem debitè permista, non minimum corpori nocumentum afferre possent; quod sapientissima natura providens, hepar apposuit, per cuius interanea, tamquam per cribrum, quæ confusa diximus, agitata adeò comminuuntur miscenturque, ut in unam massam redigantur, quæ sic salutaris facta, reliquo sanguini in venâ cavâ additur.

In hepate enim venæ portæ radices, & cavæ insignis rami innumeræ propages exporriguntur, quæ ejus parenchyma permeantes, tandem junguntur, & sibi invicem adnascuntur: uti diceres unam venam prius in furculos plurimos divisam, postea rursus coëuntem.

Patet hoc, si portæ vena, immisâ fistulâ, infletur, quod cava videatur intumorem attolli: ipsis oculis etiam conjunctiones hæ cernuntur, si hepati cocto omnis caro pectine cautè adimatur, quâ separatâ & elutâ, venarum se substantia perquam benè videndam exhibet, ut divisiones coitionesque exiles eleganter conspici possint.

Est itaque hepatis munus, suarum venarum beneficio, parenchymate munitarum, præparatam alibi materiam, (chymum scilicet & bilem, cum sanguine ad diluendum, maximè à liene, & aliis alendis partibus affluxo,
addito

addito per arterias parvas, ad parenchymatis nutritionem, advecti superfluo) in unum naturæ familiarem liquorem, cæteri massæ sanguineæ addendum, redigere, citra magnam & manifestam moram, quam nonnulli ex venarum propaginibus in hepatis substantiâ delitescantibus non unitis, (dum in his portionem sanguinis crassiorem morari, ut attenuetur, putant) probare conantur: quamvis tantum sint arteriarum ramulis correspondentes venulæ, per quas, aliarum omnium more, sanguis subito motu transit.

Tot concurrentium & confusorum exquisitâ mixtione, supplementum perfectionemque hepar chymosi imponit; quod dum præstat, quamplurimum ad sanguificationem contribuere videtur; cujus tamen consummationem à pulmonibus expectandam censemus.

Hisce variis mutationibus coctionibus-

nibusque alteratum, & in venâ cavâ cum eo, qui è toto remeat, confusum, sanguinem alimentarium esse, & ad corporis nutritionē aptum affirmant, qui per venas eum in omne corpus distribui contendunt: sed cū assertio hæc, ut mihi videtur, aliorum rationibus satis superque evicta sit, eam intactam relinquo.

Affirmat etiam exemplum foetus, nam in utero simili sanguine nutritur: sed aqueus ipsi, pro aëre, humor sanguini attenuando satis est; cū in lucem edito, is sine aëre nutritius esse non possit.

Hepar, nec chymoseos nec hæmatoseos officinam, nominari nec esse posse, contendunt in doctrinæ summo culmine locati præclarissimi Viri, receptaculi chyli, ductuumque chyli-ferorum & lymphaticorum vasorum inventores, hoc præcipuo nixi fundamento, quod chylum non recipiat: non recipere probatum putant, quod
venæ

venæ lactææ, quibus chylum, si non omnē, saltem totum à sordibus crassioribus purgatum, recipi asserunt, in truncum non desinat ad hepar tendentem. Fuit hoc argumentum ab iis allatum, quibus venarum *Asellii* lactearum usum evertere curæ erat; cū ad visum & conspicuè eò debere duci chylum existimarent.

Foret etiam doctissimorum Virorum plausibilis, & absque omni dubio iusta veraque assertio, si evidenter & ad conspectum, chylus ad hepar teneretur ferri; sed cū hoc contra naturæ sit ordinem nimis infirma nec recipienda. Hæc corporis securitati consulens, nihil ad ejus penetralia alieni aut nocivi admittit, nisi multo priùs sanguine, alienam qualitatem compescente & obtundente, dilutum sit.

Hinc est quod præter tantam sanguinis diluviem, à viscerum nutritione refluï, & liene animal donaverit, quò

quò per spongiosum parenchyma filtratum, ab arteriis acceptum sanguinem, tam liberaliter largitetur, in non alium finem, quàm diluendo chylo, ut à pancreate & mesenterii glandibus contaminatum, rubroque colore tinctum, in splenicos & mesentericos ramos effusum, probe diluat, & salutarem hepati advehat.

Lacteum omnem succum ad receptaculum non ferri, demonstratur
 1. quod alii ductus eidem operi inserviant, ut cholidochus & pancreaticus.
 2. Quod omnis qui per lacteas in mesenterii glandes chymus ducitur, ad receptaculum non derivet; non respondent enim à glandibus abducentes adducentium numero: 3. non debuissent ramusculi, sed mole majores ductus efformari, ut aliorum numerum in magnitudine & capacitate compensarent, quàm reperiuntur. 4. Non deberent àlio impediri opere, siquidem chymi distributionis tempore,
 non

non minor succi lymphatici, sic dicti, copia, per ductus hosce vehitur, quàm ante & postea; quoniam is semper pari mole (nisi à causâ extraordinariâ) ad eos, à nutriendis partibus, fluit, qui tamen eo tempore, quamvis colore mutantur, majores tumidioresve non videntur. 5. Quod portæ rami & majores & numero plures in promptu sint; ideoque diluendo chymo, eumque devehendo cum sanguine ad hepar, paratiores. 6. Adde, quod ea via à primo ortu à naturâ strata sit, cum fœtui per umbilicalem venam, portæ in sinu hepatis continuam, omnem nutritium, à matre derivantem, succum natura affunderet: ut, eâdem quâ nutritionem inceperit, per eandem etiam viam continuaturam, neque ab eo opere & viâ ante obitum, destitutam, concludere liceat.

Evictis itaque objectis & ab accusationibus liberû hepar in antiquum, quo

quo ab omni ævo fungi solet, munus & principatum, cum omnibus dignitatibus, ipsi jure debitis, restituatur.

Non derogabit quippiam ejus dignitati, si paululum chymi cum succo aquoso, (sic dicere liceat) à partibus membraneis resultante, ad sanguinis, qui à capite & artibus superioribus descendit, renovationem, in subclavias venas ascendat: decet enim ut suam partem habeat, cum tantâ copiâ reficiatur per hepar, qui ab inferioribus partibus in cavam refluit: est enim chymus pauxillus & alter humor laudabilis & aptus, ut rubenti sanguini misceri & in pulmone eventilatus, corpori nutriendo in pabulum largiri possit.

CAP. VII.

Sanguinis ut sit nutritivus duo necessaria : ejus mobilitas unde : sætini qualis inservit : quæ causa quod in lucem is prodeat : quis aëris in corpore usus : quare infans non perforato podice & urinario meatu citò moriatur : sanguis venosus alendis partibus ineptus, nutritio quomodo fiat ; quanta aëris ad nutritionem necessitas : ejus varii in mixto effectus.

UT corpori in alimentum cedere sanguis valeat, duo apprimè necessaria sunt, mobilitas & urgens aliquod, quibus juvantibus ad loca nutrienda fluere aut moveri possit : hoc, dum à sanguine non dependeat, sed tanquam movens à mobili diversum sit, ad hæmatosin nihil contribuit : illa, scilicet fluxibilitas mobilitasve, ad ejus constitutionem pertinens, ab hæmatopoëticâ vi accedere debet, & hæmatosi acceptum referri.

Sanguinem mobilem fluxilemque reddunt serum seu aqua, & immixtus aër, (quorum hic meritò primum humidum dicitur.)

Calo-

Calorem hisce annumerare non audeo; calidus in corpore sanguis interdum grumescit, cùm nimirum est extravasatus; frigidus in piscibus, & in cadaveris venis contentus fluere non desinit; è venâ extractus in pelvi nonnunquam fluidus permanet, qui in vase terreo rariore collectus densatur.

Sufficiant itaque priores duo, cum hoc discrimine, quod à serosiore sanguine membra mollia, flaccida, & torpida; ab aëreo (nam aër, in dissolutione rei, separatur receditque melius) solidiora, robustiora & vegetiora reddantur.

Hic quamvis animantibus conveniat, & necessarius sit (cùm ut partes nutriendas pervadere, tum ut, ejus compage dissolutâ, quod conveniens est assimulari, & noxium separari excernique facilius posset) fœtui tamen dum in utero est, liquidum serosum à matre haustum nutrimentum,

nutriendis & augendis tenellis flaccidisque membris, sufficiens est.

Cùm verò grandescit, præterquam quòd, solidius alimentum desiderans, naturâ aëre indigeat, quo etiam opus habet ad facilitandum cordis & cerebri motum. Hæc enim continuò moventur, & alternâ diastole & systole exagitantur, neque à tenello existente fœtu impediuntur; cum corde enim totum pectus, cum cerebro ipsum cranium cute vestitum, cedentia attoluntur & concidunt.

Tembore solidescendentibus membris, ossa indies majorem nanciscuntur duritiem, motuique magis resistunt: crescente interim corporis cordisque robore, pulsus & cerebri motus majores fiunt, quâ procedente discordia, fœtum liberioris motus appetentiâ instigatum, ad locum mutandum, aëremque quærendum incitari, partumque urgeri contingit.

Infante in lucem edito, seriò no-

-tan-

tandum est, aëre attracto sanguinem humectari subtilioremque reddi, unde excrementa (quæ gestationis tempore fuerant pauca) augentur, serumque, tunc minus utile, excernitur copiosius: adcò ut, infantem natum non perforato urinario meatu, vel podice, (qui in utero vegetus & sanus vixerat) antequam suxerit, pulsemve ullam sumpserit, vel saltem non magnâ copiâ, brevi tempore extingui, cernatur.

Ex horum consideratione edoctus, mihi egomet persuadeo, sanguinem hunc, neque ullum venis contentum (effæctus enim & crassior est) partibus alendis esse aptum, nisi aëris debitâ copiâ absolutè mixtus & vivificatus, in earum etiam minimas particulas admitti queat. Nutritio enim non externâ appositione exequitur, sed cum nutrimentum non tantum parti, sed ejus etiam minimæ portiunculæ secundum omnem dimensionem debitè additur & assimulatur.

Ab aëre, primo humido, corpore tenuissimo, fluxibilitatem hanc afferri sanguini, satis patet; primò, quia nullus in partes per arterias mittitur, quin prius eventulatus, & à fuliginibus inutilibus purgatus, cum eo perbenè elaboretur: dein, quia is assiduè sine aliquantulâ morâ hauritur, ut sanguini subigatur.

Si quis solummodo ad cordis motum & refrigerium necessarium dicat, piscium is exemplo evincitur: præterquam enim, quod hi usque frigeant, aquam assiduè ad singulas cordis pulsationes absorbent, & per branchia emittunt, quâ & refrigerio, si opus habeant, & cordis motui, satisfaceret: iis tamen à naturâ concessa vesicula est, in quâ aërem secum deferunt, ut sub aquâ degere possint, neque semper in superficie natare cogantur, aëris captandi causâ: si enim, excipulo vel nassâ capti, aut alveolo servati, diutius sub aquâ detineantur, & aërem

recipere impediuntur, tandem vesiculæ
aëre consumpto, suffocati moriuntur.

Confirmat etiam aëris insignes effectus lapidescibilis materia, ob aëris combinationem, aquæ instar fluxilis; ea vix ipsius petraë poris egressâ lapideam duritiem obtinet, sine alicujus visibilis rei separatione, aëre facilè suâ sponte vel aliter disjuncto, ambienti sese copulante.

*Sic & corallum, quo primum contigit
auras*

*Tempore, durefcit, mollis fuit herba
sub undis.*

In humano corpore, per exiguos poros, liquores exire conspiciamus, qui corporis superficiem vix egressi, crassescere & in muccum converti, exiguis poris omnino imparem, cernitur, sine tamen rei alicujus ablatione manifestâ: quod ideo aëri imputandum insensibilitèr separato, censeo.

CAP. VIII.

Sententia Columbi de vitalis sanguinis officinâ: rationes probantes: pulmonum constructio: de arteriâ & venâ pneumonicâ, hanc non esse arteriam neque illam venam: vena & arteria in sætu duobus exertibus è cordis ventriculis prodeunt: segregationis causa: venarum auriculæ exertibus appositæ, quæ illarum partes, non cordis.

IN pulmone aëris cum sanguine
 mixturem institui, & hinc vitalem
 fieri, *Realdus Columbus* Anatomicus
 celeberrimus omnium primus, *lib. de
 re anat. II. cap. 2.* censuit: considerans
 enim venæ arteriosæ capacitatem, ob
 magnitudinem alendis pulmonibus
 imparem, alteri etiam usui eam desti-
 natam judicavit: deinde cum pulmo-
 nis substantia sine vitali sanguine sub-
 sistere nequeat, qui in eo esse depre-
 henditur (nam qui tussiendo ejicitur, è
 pulmone floridus, tenuis, pulcher e-
 greditur, qualem arteriosum Medici
 asserunt) hoc modo argumentatur: Si
 sanguis vitalis aliunde pulmoni non
 tribuatur, necessariò in eo gignitur;
 sed

fed aliunde non tribuitur : nam neque ab aortâ ramum ullum habet ; neque per arteriam venosam (quæ ob valvularum constructionem sanguinem à corde non admittit , pulsaret enim si admitteret) quidquam accipit ; Ergo, &c. Gigni etiam sequitur , cùm arteriam venosam sanguine , non fumis fuliginibusve , plenam & sine pulsu esse (qui à corde proficiscitur) viva sectio demonstret.

Hisce confirmatus , rationibus ait ; (ipsa verba recitare lubet) *Aërem per nares & os inspiratum suscipit : nam arteria aspera vehiculo per universum pulmonem fertur ; pulmo verò aërem illum undè cum eo sanguine miscet , qui à dextro cordis ventriculo profectus , per arterialem venam deducitur . Sanguis huiusmodi ob assiduum pulmonum motum agitur , tenuis redditur , & undè cum aëre miscetur , qui & ipse in hac collisione , refractioneque preparatur : ut simul mixti sanguis & aër , per arteria venalis ramos suscipiantur : tam-*

demque per ipsius truncum ad sinistrum cordis ventriculum deferantur: deferuntur, verò tam bellè mixti, atque attenuati, ut cordi exiguus præterea labor supersit.

Ubi major commoditas datur & occasio, ibi, perfectionem hanc, sanguinem nancisci credibile est: pulmonibus semper præsens aër, & conveniens compositio contigit: est enim ipsis caro mollis, levis, rara, spongiosa, triplici vasorum genere adeò intertexta, ut spongiæ instar aut spumæ in modum perforata reddatur. Vasa sunt vena & arteria pneumonica, & arteria aspera, quorum usus ex relatione sequenti facilè innotescit.

Arteria pneumonica (vena arteriosa malè nuncupata) prope basin ex editiore loco dextri cordis ventriculi orta, vix pulmones intrat, (paulum ultra ductum oblongum in fætu apertum, in adultis verò oblitteratum, quo ea arteriæ aortæ continua inseparabilisque existens, utriusque unitatem

osten-

ostendit) quin in duos ramos secetur, quorum alter ad dextram, ad sinistram alter partem abit, hisce iterum bifariam sectis, & in minutissimos furculos divisis, per integram, ad extremam usque eorum substantiam excurrit, & sanguinem huic operi contribuit.

Huic respondet multâ ramulorum serie per eandem substantiam dispersum vas, nulli alteri visceri commune, aspera arteria dicta, quæ fistula est oblonga, ex cartilaginibus semiannularibus, bronchia dictis, & membranis invicem connexis efformata, semper aëri patula, ex humiliore faucium sede incipiens, œsophago incumbens primum, mox supradicto modo etiam divisa, & per pulmonum substantiam dispersa, ipsisque pneumonicæ arteriæ furculis combinata aërem ad hoc opus sanguini addit, cum quo is, pulmonum motu subigente, perfectè mixtus attenuatur, ut fu-

ligines & excrementum crassius (quorum hoc tussiendo expectoratur, illi, expirantur) separari, & in bronchiâ deponi possint, sanguis verò pulmones nutriendi causâ pervadere, & venæ pneumonicæ exiles propagines intrare, valeat.

Vena hæc, cavæ non solum substantiâ & constitutione similis, sed continua, ut sine laceratione disjungi nequeat (malè arteria venosa appellata) oritur è cordis sinistri ventriculi summo, principio carnosio, lato, (auricula à similitudine & propter sinistrum ventriculum cui annexa est, sinistra dicta) concavo, quod tanquam spincter se contrahens, collectum sanguinem in ventriculum deponens hoc distendit, non aliter quàm vena cava à parte dextrâ: arteriæ hæc se comitem reddens, eodemque modo divisa, (unâ cum arteriâ asperâ) per pulmonis omnes particulas vagatur, ut in capillaribus aut minoribus suis furculis,

lis, aliarum venarum more, acceptum sanguinem in maiorem truncum deferat, & contrahente se auriculâ, ad singulos cordis quietes, in sinistruum ventriculum deponat.

In fœtu longè aliter hæc sese res habet: cui, cum serosum, sive à sero & modico à matre accepto aëre fluxile redditum (uti antea dictum est) nutrimentum pro tenellis mollibusque membris sufficit, pulmonum usus quiescit, ibi uterque cordis ventriculus, simul eodemque motu, tamquam unus (quem solum pulmone carentia animantia habent) sanguinem à venis in arterias movendo infervit.

Natura enim in venturum usum cum duos necesse deberet fabricare ventriculos, utrique venæ & arteriæ tribuit exortum, ut in utroque à venâ receptum sanguinem in arteriam ab utroque etiam exponeret: hinc factum, quod, quemadmodum arteria pro ventriculorum numero, è dextro
atque

atque sinistro exortum nacta, etiam vena ex utroque diverso principio exoriatur in eundem finem tendente: sic tamen ut pulmoni ferianti (nutriri enim debet) ex arteriæ dextro exortu ramulus apportans, è venæ verò sinistro principio superfluum sanguinem reducens contigerit; qui, crescentibus pulmonibus & dein majori munere fungentibus, in maiorem excrecentes molem, anastomoses magnitudine longè superant, magis etiam, quia, in lucem infante edito, communes postea inutiles meatus (ductus arteriosus & foramen ovale) oblitterantur non solum, sed multum crescere desinunt: non tamen usque adeò mutantur, quin ductus obturatus magni ligamenti instar, continuitatem arteriæ pulmonicæ cum aortâ, & venæ cum cavâ, solâ membranulâ clausus, meatus apertè satis demonstrent.

In hoc, ab arteriæ exortibus, venæ discrepant, quod hujus utriusque prin-

principium, amplo varicoso & (ob carnem, quâ tanquam spinctere obducitur) mobili, cordique continuo, appendice (auriculam vocant) stipetur: quorum dextrum sinistri capacitatem longè superat, causa fortè est (nam violenter sanguis dum ad cor impellitur, hujus operatione & contractione, impeditus auriculas extendit), quod totius corporis motus & contractiones, pulmonum, licet aliquando ultra modum inflentur, violentiores sunt.

Auriculæ venarum potius partes sunt quàm cordis, quia cum illis cavitate habent communem, à cordis verò sinubus, valvulis sunt separati; dein solis venis, non verò aliis vasis, contingunt, in quarum substantiam carneis fibris aliquantùm excurrunt: adde, quod auricularum motus à cordis distincti diversique sint. Hæc consideratione digna, quia ad veritatem quæstionis propositæ indagandam, viam.

viam & lumen præbitura sunt, non o-
mittenda censui. Sunt quidem & aliæ,
quæ mediatè ad hæmatosin faciunt
partes, quia sanguinem, ab inutilibus,
rebusque noxiis liberando, elimant, &
puriorē aptiorēque reddunt, præ-
ter dictos pulmones, (scilicet renes,
vesica, intestina, cutis, palatum, inter-
na oris tunica, aures, nares, oculi, &c.)
quæ sunt dispositæ, ut ab allato san-
guine, simili in nutrimentum assumpto,
reliquum utile adhuc in venas depo-
nant, inutile aut in suos sinus, aut per
corporis circumferentiam excernant;
sed quia longior earum foret narratio,
brevitati studens eas præteribo.

CAP. IX.

*Ad loca nutrienda sanguinem debere moveri: quando
& quomodo vita incipiat: bullula in auriculam mi-
grat, cui in subsidium venit cor: hujus situs & com-
positionis ratio: quale instrumentum animæ cor.*

Diximus modò aliquod urgens,
quo ad loca nutrienda jam mo-
bilis omnibusque numeris absolutus
san-

sanguis moveretur, esse necessarium; suâ sponte enim eo non fluere, neque à partibus attrahi, sanguinis natura (gravia solum, nisi urgeantur, deorsum tendunt,) & autopsia demonstrant. Quo modo id ab animalis ortu incipiat, & per integram vitam perduret, sub diligentis etiam scrutatoris iudicio, narrare lubet.

Vita, incipere & primam inchoationem sumere, videtur, cum in animantis primordio disposito, juvante calore homogenea congregante, & heterogenea separante, liquoris nonnihil in id, quod jam solidescere cœpit, & venæ principium representat, irrepens, hoc in bullulam seu vesiculam attollit, quæ, primum renitendo, dein sese contrahendo, in arteriæ primum rudimentum eundem liquorem agit, hoc denuò rediente & contrahente se vesiculâ, reiteratis sæpè vicibus; à rudi membrorum deliniatione, crescente magis motu,
partes

partes nutrimentum & majorem perfectionem adipiscuntur, liquorque sanguinis consistentiam & colorem, à quo dum carnosarum accretio, vesiculæ (quæ nonnullis animalculis sufficiens per vitam perennat) auriculæ formam induenti caro, cum cordis primo exordio, adnascitur, quod auriculæ in subsidium, ut sanguinem ulterius propellat, creatur.

Huic muneri ut par sit, locatum est, non in corporis medio seu centro, quod umbilicus obsidet Anatomicis, sed in pectore, loco capiti propiore, huic tanto commodius sanguinem tributurum, qui suâ sponte in decliviora facilè fluit; dein ut in eo coctis septum impedire in pericardii capacitatem moveretur.

Carnem duriores, ita tamen ut contractilis sit, accepit rudi Minervâ elaboratam, non aliter (si licet exemplis, in parvis, grandibus uti) tamquam toscanâ architecturâ constructa.

columna, quæ, portando pondere, rusticè ædificio fabricata supponitur, sic carnea hæc moles, ut suâ vastitate ingentem laborem, cui destinatur, ferre valeat, à naturâ animali concessa est.

Duos caro hæc facit sinus, dextrum nimirum & sinistrum, quorum ille, quia sanguinem in pulmones vicinos movet, minus crassos habet parietes, & dextro cordis lateri quasi adnascitur; sinister verò, quia in universum corpus sanguinem dispensat, multò crassiore carne sepitur.

Sinubus hisce respondent communia vasa valvulis munita, venæ scilicet cum suis appendicibus seu auriculis, & arteriæ, quarum illæ foris apertæ intus clausæ, arteriæ verò intus apertæ foris clausæ, tam patentibus orificiis, ut, sanguinis transeuntis copiam non exiguam esse, ostendant evidenter.

Nulla præter hæc apportantia aut reagentia, communi operi accom-

mo-

modata vasa habet; solummodo ad nutritionem, sanguinem apportantes arteriæ coronariæ exiles, ab aortâ, antequam pericardio excidat, exortæ, ejus basi inseruntur, cum suis conjugibus venis, quæ è cavâ, mox ubi cor transiit, enatæ cordis basi communicantur, ut superfluum sanguinem colligant, & venæ cavæ cordi relegendum restituant.

Sic constructum in pericardii sinu pendulum, solum basi seu latiore parte (pericardio & exortis vasis median-tibus) aliis partibus in thoracis medio, connectitur; cæterum verò corpus, à lato principio, coni instar, in apicem seu mucronem, versus sinistrum latus antrorsum exporrectum, desinens, & pericardii aquæ motum facilitanti innatans, ubique liberum existit.

Hinc fit, ut, in actione quando cor est (quæ omnium simul fibrarum contractione peragitur) ad immobile prin-

principium liber apex trahatur, sursum elevetur, & tamquam saltum faciens, pectus externè perceptibili pulsu feriat.

Concludo itaque, cum partibus nutrimentum apponi requirat necessitas, neque parti ulli, corde excepto, ad hoc sit concessa commoditas (docet vasorum consensus, auricularum connexio, valvularum dispositio, fibrosæ contractilisque carnis vastitas, conveniens situs, omnium debita compositio, & ipsis oculis sanguinis à contractione protrusio, in animali vivo, conspicua) cor esse animæ instrumentum sanguinem venosum ab auriculis acceptum, in arteriis urgens & transmittens, cujus ea ministerio toti corpori nutrimentum dispensat.

Hoc solo cordis usu (cui obloqui ipsis sensibus est derogare fidem) qui majori ejus æstimatione capti obcæcatique sunt, minimè contenti, cor multò præstantiora munia obire, credunt,

dunt, atque, toti caloris & vitæ auctorem causamque efficientem esse, volunt: hoc verò quia spirituum & sanguinis adminiculo præstari putatur, & spirituum & ipsius sanguinis officinam esse contendunt.

C A P. X.

Conringii pro cordis hæmatosi argumenta: eorum refutatio.

Q Uamvis ex narratione præcedenti rationes erui possint, quibus contrarii evidentiam demonstrare facile est, tamen non satisfacisse mihi videor, si ad argumenta, quæ clarissimus Vir *Herman. Conringius* in *Helmstadiensi Juliâ Academiâ* Professor plurimi faciendus pro hæmatosi cordis profert, responsum non dederim: hæc ordine, quo ex ejus *de gener. & mot. nat. sanguinis lib. cap. 34.* ea excerpti, recensere non gravabor.

I. *Arteriarum principium cor esse in confesso est; ab eodem principio autem non minus*

minus & venas derivari vel oculi testantur
luculentissimè : est igitur cor omnis san-
guinis quoque principium & primaria ori-
go ac officina.

2. Firmat idem sanguinis omnis ad cor
fluxio & ex corde promanatio: (neque enim
ad ullam aliam partem aut ullum aliud
viscus omnis sanguis tendit, non ex ullo alio
omnis profluit) aſt omnis motus boni obti-
nendi gratiâ instituitur, adeoque in corde
omnis sanguis maximum bonum suum adi-
piscitur.

3. Ad hoc, cor primo omnium inter
alias generatur partes, sanguinemque &
gignit & continet, nullo alio viscere adhuc
nato; ut in ovis altero tertiove ab incubatu
die videre est, & doctissimorum virorum
auctoritate probatur: est autem hoc certo
argumento, ex aptâ dispositâque materiâ,
sine alterius visceris adminiculo, posse cor
sanguinem conficere, imo omnem primum
sanguinem, unde corporis partes consti-
tuuntur, quique adeo exquisitissimè est ela-
boratus, à solo corde excoqui.

4. *Constat* praterea in nonnullis sanguinem generari, jam corrupto jecinore ac liene, modò cor sit robustum, ut calore suo, hepatis licnisque labem queat compensare: quælibet item circa cordis temperamentum passio facit, ut, aut bene, aut secus, sanguis totius corporis excoquatur. Itaque vel hoc solo, in sanguine conficiendo, vim ac facultatem cordis colligere liceat.

5. Alendi aptitudinem à corde esse, argumento est, quod nulla pars corporis nutritur, nisi sanguine in corde ante elaborato: In fœtu sanè sanguis, materia partium, primò omnium in corde spectatur, & ipsummet hepatis parenchyma, procedente tempore, hinc generatur. Frustra omne quod nutrit, in corde est elaboratum, nisi elaboratione illâ sanguis præparetur, ut possit eò rectius altere. Constat porrò eum, qui ex hepate jam profluxit, sanguinem, saltem sæpe si non semper, crudiores esse, quàm ut in partium nutrimentum possit cedere: nec tamen omnis ille vel denuo ab hepate coquitur, vel manet inutilis, à corde

de itaque adipiscitur ut fiat idoneus.

6. *Quia omnis calor animalis ab uno est corde, dubitandum non est, omnem sanguinis ultimam perfectionem à corde esse, adeoque cor esse primariam sanguinis omnis officinam.*

I. Quantum ad primum attinet; concessio, arterias & venas à corde exoriri, inde non sequitur, cor earum esse efficiens principium; neque auctoris mentem esse puto, unam partem ab alterâ existentiam habere; omnes siquidem in exordio deliniationem naturæ suo tempore perficiuntur.

Neque existimo ab eodem sustineri, sanguinem esse propter venas & arterias, sed has sanguinis causâ (ut sint vasa deferentia, non verò efficiencia) esse factas; neque sic concludere; *quod efficiens venarum & arteriarum causa est, itidem est sanguinis*: sed potius à consequentiâ sumpto argumento dicere (nam ubi venarum &

arteriarum est exortus, ibi earum fuit prior necessitas, quæ est à sanguine continendo) ubi prius venæ & arteriæ reperiuntur & principium habent, ibi & prius reperitur & principium habet sanguis, atqui hoc in corde. Ergo, &c.

Resp. Non sequitur ubi sanguis primùm est conspicuus, ibi ejus esse exortum, non aliter quàm si argumentaretur, à trunci principio oriuntur radices (si comparatione hâc uti liceat venæ sunt corporis radices) ergo arboris succus nutritius.

Exoritur sanguis ab invisibili principio (prout ego capio) nam, per poros venularum rudimenta, ex animalis primordii particulis, liquor sanguini analogus (vel potius sanguis cum particulis adhuc tenellis quadrans) concurrat; hic (extentione bullulam seu vesiculam quæ tempore formam aëriculæ induit) facit & attollit, ejusque diastolem ciet, atque illi primum renitendi, dein contrahendi ansam præ-

præbet : diastole enim, quam systole, ordine prior est. Quomodo enim aliquid se contrahet quod prius agentis extensionem non passum sit?

Unde sequitur, sanguinis, ab invisibili ortu, concursum, vesiculæ efficiens esse principium, non verò vesiculam concurrentis sanguinis : quemadmodum rivulorum scaturigines, hos, qui multis concurrentibus flumen efficiunt, non contra flumen rivulos.

Manifestum itaque est, quamvis è corde venarum origo & exortus conspicuus, non ideo à corde exoriri sanguinem, sed ad cor confluere. Quod ordine prius est, consequentis causa dici potest, non contra.

In ovo, antequam cor formatum est, conspicitur primum pulsans vesicula, quæ à sanguine dilatata rubescit, seque contrahens, omnem rubedinem deponit, albescit denuo, & dispareret ; indicium sanguinem ante vesiculam (quæ auricula, non verò cor, fit)

exstitisse, & ipsam à sanguine rubescere non verò sanguinem à vesiculâ.

II. Firmatur quod dictum est; quia sanguinis ad cor fluxio est, aliunde suam habere originem certum est: cum pace mihi respondere liceat; ad nulum viscus omnem sanguinem (ubi is mutationem aliquam subit) quàm pulmonem tendere; nec ex ullo alio, omnem numeris absolutum, quantumque fieri potest perfectum profluere, quàm pulmone, & ratio dictat & autopsia demonstrat.

Fœtus, cui pro nutrimento, seriosior sufficit sanguis, pulmonis operâ non indiget, neque corde mutationis causâ opus habet, modò dispensante ejus motu frui possit.

Non movetur equidem ad pulmones sanguis, nisi ut melioretur, si iis carere potuisset adultum, & multo sanguine pollens animal, modo quo dum in utero degeret, in venturum usum fœtui non essent fabricati.

Per-

Peragitur hæc melioratio , non intentione pulmonis , sed agentis animæ : partes sanguine oneratæ eum, aut renitentiâ , suâ mole , aut contractione , ulterius , ut inde liberentur, movent : sic cor, ab exprimente auriculâ, sanguine ad distentionem impletum, ut ab istâ molestiâ liber fiat, eundem promovet.

Instituitur itaque, in bonum partis moventis, motus, non verò semper rei motæ, quod in recrementis evidens est : alterius etiam gratiâ partes non agunt, sed, in proprium commodum, quæque familiaria admittunt & noxia abigunt. Sub isto numero comprehenditur cor, cujus intentio non est, cùm in aortam sanguinem impellat, partibus nutrimentum præbere, sed sibi illatam molestiam arcere ; cæterum gubernantis animæ munus est, organis ritè dispositis, singulis partibus alituram largiri.

III. Partes omnes in principio

H 3

ob.

obscuram quanquam habeant delineationem, conspicitur tamen primò pulsans vesicula, quæ temporis progressu, carnosior facta utriusque auriculæ formam adipiscitur: quare, si aliquid primùm nasci dici mereatur, ante partes alias auricula generatur, quæ, præterquam quod omnium prima movetur, etiam ultima à motu desistit: non verò carnosæ illa pars ventriculos constituens, in cuius carne & sinuum dispositione, motum omnem (quamvis is ab eo, qui primus in embrione & ovo conspicitur, diversus sit, & eundem subsequatur) omnemque potentiam & facultatum scaturiginem collocant.

Sed neque hæc ipsa (auricula scilicet) sanguinem generat, sed à toto confluentem accipit, à quo etiam producit.

IV. Vitiato jecinore vel liene, non tamen ultra metam corrupto, sanguinem generari bonum, aut non excess-

excessive pravum, certum est: unius interdum leve vitium, cæteris juvenibus sanis, natura sine magno detrimento tolerat: sed hepate vel liene omnino aut graviter corrupto, corpus aut cor posse sanum esse vel robustum, non credo.

Constat liene obstructione laborante, quoniam sanguis inde non bene diluitur, cor palpitationibus vexari: mala etiam, quæ partes toti inservientes afficiunt, toti corpori obesse solent.

Pluribus ad unum opus contribuentibus partibus, earum unâ vel alterâ malè habente, si tota non abolitur operatio, (diminutè vel depravatè sæpè peragitur) cæteris sanis hoc imputandum est; cordi id ascribere est inconveniens, præcipuè cùm nondum constet ejus operâ ad sanguificationem esse opus.

Asserere inde grave est quamlibet, circa cordis temperiem; passionem

facere ut sanguis aut benè aut secus excoquatur, nam plures partes sunt, quarum perversâ dispositione aliarum eucrasia evertitur, modò in consensum trahantur: quid vetat corde malè affecto, propter viciniam pulmones vel alias affici, quæ ad hæmatosim pertinent? dein ut plurimum cordis temperiem, ab alterius depravatâ, vitiari contingit, ut cordis affectus alterius symptoma, non verò causa sit. A quâ parte læsa læditur actio, ab eâ sanâ editur.

V. Nullam partem ali, nisi sanguine, qui prius cordis ventriculos transierit, in confesso est; nutrimentum verò in eo elaborari, ut melius alere possit, negamus; sed in fœtu sanguinem in vesiculâ prius conspici, & dein hepatis parenchyma, imo, ipsius cordis carnem temporis progressu inde generari, verum est: sed quonam inde desumpto argumento probetur, sanguinem, in auricularum sinubus, vel
cordis

cordis ventriculis mutari elaborarive, aut aliquam alendi nancisci aptitudinem, non video.

Neque quidquam urget ex hepate perſapè profluxiſſe ſanguinem crudiore, is multis reïteratis circulationibus excoctus, & à recrementis purgatus, idoneus redditur, neque opus habet ut in hepate denuò coquatur aut in corde perficiatur; ſolum, ut hujus ope, poſtquam in pulmone novam ſingulis vicibus polituram na-ctus, in arterias impellatur, neceſſarium eſt.

VI. A corde omnem animantibus calorem accedere verum eſt, non quia cæteris viſceribus magis calet, ſed quia, per accidens ſcilicet, hujus motu is in partibus, per quas ſubitò tranſit ſanguis, excitetur: ſignum evidens ſanguini in corde à calore perfectionem non accedere, adeoque cor primariam ſanguinis officinam non eſſe.

CAP. XI.

Instantia supra datam responsionem à Cartesii methodo desumpta : quare venosus arterioso sanguis crassior : sanguificationis organum cor non esse, neque ipsi consummationem imponere probatur.

PRO instantiâ super hâc responsione inservit, & sanguinem elaborari in corde probare videtur, cum ibi evidentem mutationem subeat : hoc firmatur asserto Clarissimi Nobilis Viri R. Cartesii, qui in probationem sui ignis, quem statuit à Deo in animantium corde conditum, omnis motus & actionum (sic etiam circulationis sanguinis) auctorem esse, hæc method. pag. 47. adfert. *Differentia quæ observatur inter sanguinem qui è venis exit, & eum qui ex arteriis promanat, aliunde oriri non potest, quàm ex eo quod transeundo per cor rarefactus & veluti destillatus fuerit, atque ita subtilior, vividior & calidior sit, statim atque inde exiit, hoc est, cum in arteriis continetur, quàm esset paulò ante*

antè-quàm in eas ingrederetur, hoc est, cum in venis stabulabatur. Et si probè attendatur, comperietur, hoc discrimen non apparere manifestè, nisi in viciniâ cordis; minùs autem in locis ab eo remotioribus.

Assumit Clarissimus Vir arteriosum sanguinem venoso tenuiorem esse; neque abs re, siquidem vénosus effatus nonnihil aëreæ substantiæ deposuit, & quam adhuc servavit fortè, fuliginosior & tardior, vivacitatem priorem non retinuit; cui accedit, quod liquoris nonnihil insensibili transpiratione, etiam cum sudore & urinâ separatum & excretum sit: si crassitiem aliquam in partibus exterioribus refrigeratus acceperit, cum frigore hanc deposuisse confido, antequam ad cor deventum sit.

Concessio arteriosum venoso tenuiorem esse, tenuitatem arterioso accedere posse negat, nisi quod à cordis calore sit rarefactus & quasi destillatus (de cordis calore paulò pòst agere-

decrevimus) ratio ejus est, statim ab exitu subtiliorem, vivaciorem, & calidiorem esse quàm antè introitum. Si clarissimus. Vir introitum prioris & exitum posterioris ventriculi intelligit, concedimus sanguinis consistentiam imò colorem nonnullam accepisse mutationem, non verò in corde, sed in pulmonibus ob rationes antedictas: si verò de singulorum exitu & introitu loquatur, expressè negamus, sanguinem ventriculum dextrum consistentiâ aliâ egredi, quàm intraverat; neque unquam demonstrabitur sinistrum ventriculum sanguinem crassiores ingredi, quàm paulò post egreditur.

Sanguificationis organum cor nominare quam sit absolum exinde patet; quod ea, non ab unâ parte seu instrumento, sed à pluribus perficiatur; dum enim plures sanguinem constituentes res concurrere, & diversimodè elaborari conveniat, (quemadmodum

dum non omnis fert omnia tellus) nec una pars, res specie tam diversas supeditare, nec tam diversas operationes præstare, nata est.

Si porrò consummationem sanguini à corde imponi quis dicat, hisce credo argumentis evincetur.

Primò, quia in corde sanguini nihil quidquam additur vel adimitur: in ventriculo adjicitur cibo potuique assumpto liquor ex ejus tunicis in capacitatem exsudans; in intestinis tollitur quod crassius & ineptum est; in pancreate & mesenterii adenibus chymo sanguinis justa quantitas additur, quæ ad majorem dilutionem in portæ ramis, administrante liene aliisque visceribus, egregiè augetur, ut tandem ab hepate, additâ, mediante suâ cysti, bile, absoluto per dedalios meandros cursu, exinde una, undique similis, massa constituatur.

Cordis operâ nihil hujusmodi sanguini advenit, dum nulla sunt admini-

nistran-

nistrantia vasa, quæ vel quidquam adferant, vel ab eodem separati aliquid abducant.

Arterias coronarias iisque junctas venas præstare hoc nullus puto existimat; minores enim sunt quàm ut communi & tam magno operi intervenire possint.

Solent per quam benè auctores, Medicinæ proceres, ex vasorum magnitudine, dum cernerent longè majora parti cuiusdam contigisse, quàm pro administrando nutrimento indigeat, metiri, alterius gratiâ, à nihil frustra faciente naturâ, id esse factum: liceat sic etiam nobis, ab eorum exiguitate sumpto argumento, concludere, non alteri muneri, quàm alendo cordi coronarias esse datas: tanto magis, cum partibus aliis secundum hanc ferè proportionem vasa tribui constet.

Si sanguini à corde impartiretur perfectio, ad minimum aliquam inde sub-

subiret mutationem, cùm nulla percipi possit, sed qualem ab auriculâ accepit dexter ventriculus, talem in pulmonis arteriam exonerat, talem etiam, qualem sinistra largitur auricula, sinister aortæ sanguinem tribuit; mutationem vel color, vel consistencia proderet.

Qui cordi hæmatosin ascribunt, ventriculo ejus sinistro majorem inesse potentiam statuunt, sed videsis, quanta exinde sequatur absurditas, pulmones imperfecto alerentur sanguine, quia ab aortâ, vel sinistro ventriculo, ne quidem arteriolam accipiunt; neque retrogradè perfectum, sanguinis motu & valvulis impredientibus, habere possunt.

Ratum itaque sit & certum, cordis ventriculos sanguini solummodo meatum, quem cum venis & arteriis habent communem, exhibere; carnem verò eundem fortius impellere: cùm enim venæ auricularum adju-
men-

mento in longè diffita membra sanguinem invalidæ impellere non possent, cor ipsis pro juvamine adjunctum videtur, ut viribus pollens majoribus, auricularum defectum suppleat.

SECTIONIS III.

CAPUT I.

Anne cordi major insit quàm visceribus aliis calor : affirmantes veterum rationes impugnantur : Cartesii de calore sententia : hanc quanam applausibilem faciunt, cordis compositione & rationibus venientibus : auricularum motus cordis prior & posterior.

DUCIT nos ordo ad tertii propositi examen : Anne cordi major quàm visceribus aliis insit calor ! Quæstionis hujus affirmantes partes eo usque sustinent veteres quotquot sunt & nostri ævi philosophi, ut tamquam axioma à nemine vocetur in controversiam, & quemadmodum nummos, ad id quod cognitissimum est, probant vulgò, eodem quasi modo huic sententiæ, tan-

tanquam firmo omnibusque cognitissimo fundamento, superstruunt unanimiter omnes cordis præëminentiam & principatum super aliis partibus, omnesque eidem potentias ab omni ævo concessas, & nostris etiam temporibus ascriptas.

Aristot. de juvent. & senect. lib. cap. 4.
ex corde principium caliditatis, & animam tamquam in hâc parte ignitam, dependere dicit.

Galen. lib. de form. fœtus cap. 3. cor, quasi ignis focum, animalia sortita esse asserit.

Ab hoc calorem, quo corpus animalis ad tactum calidum apparet, in omnia membra diffundi vulgò existimant.

At tactus de calore sententiam ferre potest, neque fides abroganda de proprio objecto ferenti iudicium: aperto vivi animalis pectore, tantus calor in corde tactu non percipitur, neque exploranti major quàm aliorum viscerum observatur.

Me-

Medici omnia quantum possunt sensu dijudicant, & quod imperceptibile est, nullum esse dicunt: annon jure major in corde calor esse negatur, quia tactu imperceptibilis? Non inferendum est manus cuticulam nimis esse densam, neque eandem frigidior; per moram innotesceret, multum enim refrigerati luculenti ignis calorem non statim sentiunt, quem postea non ferunt.

Animadvertendum etiam est ad cordis substantiam, num sit ad hujusmodi calorem satis apta: potenter agenti respondere debet idoneum subjectum, caro tanto calore ferendo non est, si ab eo humorum fiat ebullitio, ipsa caro facile elixaretur vel assaretur: non satis est lampadi oleum, sed & elichnium requiritur subsistens & in flammâ durabile.

Calor hic cordis est ingenitus vel ascititius, ille à novo adventitio succo tandem diminueretur & extingueretur,

retur, siquidem aliquid addi non potest quod æquè calet, nam à corde ipso tamquam ignis foco calefieri debet, atqui omne agens reactionem patientis ferre debet, unde tandem obtunditur; tepidum etiam caloris æstus mitigare notum est.

Aliunde debet accedere affcitus, sed unde, quæso, is procedet? an à parte minus calente mittetur? an à pabulo sustentabitur extraneo? aliud pro nutrimento cordi non advenit, quàm per arterias strophaleides; neque earum sanguis alius est, quàm qui toti corpori in nutrimentum exporrigitur.

In aliis partibus calor hujusmodi vel major fortè excitaretur, sunt aliæ concipiendo calori aptiores, sicciore nimirum; quo etiam densiore inhæreat subjecto calor, eo intensior est.

Clarissimus Vir *Renatus des Cartes*,
cujus ingenium non solum admiror,
sed & philosophiam maximi facio,
lib.

lib. meth. p. 40. & 42. auctor est, in corde humano Omnipotentem excitasse five collocasse calorem seu ignem non lucentem (haud absimilem illi, quo foenum incalescit, quando non siccum satis congestum est, aut quo mustum super vinaceis relictum ebullit) omnes corporis actiones exercens præter cogitare, quod solum hominibus, tanquam ab animâ rationali procedens, inter animantia proprium esse autumat.

A calore hoc sanguinis guttas in cordis sinus illabentes ait statim inflari & dilatari (aliorum liquorum modo cum guttatim in vas excessivè calens cadere sinuntur) unde tam arterias (nam eodem tempore portionem in eas aliquam dicit illabi) quàm cordis parietes attolli, valvulas intermedias aperiri, & in toto diastolem excitari; sanguinem verò, quia in arteriis refrigeratur, detumesce, valvulas dictas claudi; tam cordi quàm arteriis indu-

ci systolen; venarum valvulas aperiri, ut novo sanguini liberum faciant introitum, contendit.

Hunc sanguinis motum necessario sequi, ait, ex organorum dispositione, quam oculis videmus, calore digitis perceptibili, & sanguinis naturâ, quam experiëntiâ cognoscere possumus.

Placuit multis hoc effatum, applausibilis equidem est motus in animalibus causam è re evidenti colligere, quam ad animam, cujus nos nescire naturam fateri cogimur, confugere: cui accedit, quod animalis vita, à calore inchoari, & in frigus terminare, quam evidentissimè cernatur.

Sed ab organorum dispositione, perceptibili calore, sanguinisque naturâ (ad quorum tribunal Cl. Vir causam suam dijudicandam offert) tamquam staterâ benè pensatâ re, sanguinis quidem talem circulatorium esse motum, sed à longè aliâ causâ procedere, patebit.

De

De calore egimus, organorum videamus dispositionem. Cordi concessa sunt quatuor communi operi vasa inservientia, duæ venæ, totidem arteriæ, binis ventriculis, dextro & sinistro aptatæ; utrique vena contigit & arteria, à venis acceptum sanguinem in arterias pari quantitate exponunt: venæ dotatae appendicibus si-ve loculis carnosiss (auriculas vulgò vocant) contrahendi vi præditis, præter innumeras, quibus, propter commodiorem sanguinis profectionem, scatet, valvulas in cordis introitu habent quinque, quæ à sanguine trans-eunte, spontè aperiuntur, à conante regressum clauduntur; quarum tres venæ cavæ ad orificium dextri ventriculi, duæ venæ pneumonicæ orificium sinistro ventriculo occludentes, contingere.

Arteriæ neque in meatibus valvulas, tamquam inutiles, (quia ipsarum actio est ubique una, nam omnes simul

mul eodemque tempore dilatantur; simul omnes, eodem momento, ad priorem constitutionem tendentes contrahuntur, vel ob externam prementem molem collabuntur) ulla, neque appendices seu auriculas, sed earum loco, cor affixum habent, in cuius exitu ab utroque sinu tres patentes, itidem adnexæ sunt valvulæ, quæ, à sanguine regredi nitente, propter arteriarum contractionem, clauduntur.

Organis sic ritè dispositis, ipsis oculis æquus iudex tumentes sese auriculas cernit contrahere, & contentum sanguinem nullis resistentibus valvulis in ventriculos exprimere, atque cor exinde in tumorem attolli, & in diastolen exsurgere; hoc distentum, dum onus suum conatur contractione excutere, clauduntur à compressione, quæ prius patuere, valvulæ auriculis appositæ, spontè viam concedentibus, quæ arteriis respondent.

Sed

Sed quia necesse non est, ut paribus viribus utrique concurrant ventriculi; dexter in solos pulmones eosque vicinos, sanguinem deponit; sinister verò toti corpori ministrando inservit, eundem extremis longeque diffitis, imo resistentibus partibus largitur.

Hinc monet cordis dispositio hauriendam esse rationem, quare tantâ carneâ mole sinister sepiatur, cum dextro tam tenuis, alteri comparatus, contigerit paries.

Notandum insuper, ob eandem rationem, valvulas cordis operationi resistentes, imparibus donatas esse fibris (lacertulos vocant) in sinubus à parietibus exortis & valvulis insertis, ut sint tamquam funes & retinacula, quæ inhibeant, ne, in contractionibus, eæ ultra metam adaectæ, retinendo sanguini reddantur inutiles: in sinistro enim ventriculo copiosiores & multo firmiores reperiuntur.

Arteriæ dum patentibus valvulis hoc sanguine affatim & insultu implentur, in molem attolluntur & in diastolem exsurgentes, pulsus faciunt; renitentibus verò & sese contrahentibus iisdem, à sanguinis compressi mole, clauduntur valvulæ earum oribus oppositæ, &, ne is denuò in cordis sinus recurrat, impediunt.

Hunc, propter cordis dispositionem, consecutaneum in motu ordinem, imò ipsam actionem, agendi que modum, in vivo animali, præcipuè majori (quia cordis collapsus & exsurgentia ob magnitudinem melius potest discerni) & moriente (cùm sint tunc tardiores motus) non solum visu, sed etiam tactu percipere facile est.

Cor fibras suas contrahens, & coactis viribus basi innitens, quo tempore mucronem attollit, pectusque, exterius perceptibili pulsu, percutit, fit ad visum mole minus, & ad tactum

præterquam quod contractius & durius sentiatur, ejus diminuta quantitas, cùm elevatur apex, apprehendente manu perbellè observatur sciscitaturque.

Addamus rationes. Partium omnium actiones cum contractione peragantur, quare cordi hoc denegabimus? constat enim carne contractili, instar musculorum firmiore tamen & validiore.

Adde quod, si hæc ab inflatione & detumescencia sanguinis attolli & concidere deberet, inepta foret; nam tam vasta consistentia, forti & vehementi actioni, magis convenit; flaccidior passioni aptior est.

Si à præcedente auricularum contractione, quâ sanguinem ex exonerant, cor in molem attolli videatur, non imputanda diastole est calori dilatanti: sed prius verum: ergo.

Auricularum motum præcedere, & semper à principio præcessisse, in ovib.
fin-

singulis consequentibus diebus apertis
luculentissimè apparet. In hisce pri-
mùm vesicula pulsans conspicitur, cui
in dextram auriculam mutatae, tan-
dem cor adnasci cernitur.

Hoc & ratio monet ; nam au-
ricula eundem pulsandi rithmum,
quem vesicula habebat, servat, cor
ab eo diversum & distinctum motum
habet.

Auricularum quia motus prior est,
à cordis motu non dependet, ab eâ
agente cor immediatè attollitur, non
vice versâ, nam immediatè à corde
nihil accipiunt.

Manifestum hoc etiam est, quia,
corde non amplius pulsante, imo
mortuo ; adhuc auricula quælibet suo
ventriculo respondens pulsat. Non
pulsante plus ventriculo sinistro pul-
sat proxima auricula ; eâ mortuâ, si-
nus dexter adhuc vivere cernitur ;
quo cessante, supervivit dextra auri-
cula ; hac à motu abstinente vel ad

minimum conspicuo, observatur tremulus nonnullus in sanguine motus, à levi auriculæ morientis conatu in mobili sanguine (ut opinor) excitatus.

Partium itaque dispositio agendique ordo quasi digito indicat cor impletionem attolli; non verò ab intenso calore, sanguinem ineptum ad tam subitam elevationem, dilatante extendi; ingenitaque vi molestâ arcendi, suâ contactione acceptum in arterias deponere, sicque alternas diastoles systolesque, ab auriculis cordi, à corde arteriis excitari.

C A P. II.

Quanam ex sententiâ de sanguinis inflatione Cartesii consequantur absurda.

VIdeamus quænam doctrinam hanc de sanguinis subitâ inflatione & quasi ebullitione sequantur absurda.

Cogitur clarissimus Vir statuere uno eodemque tempore peragi & cordis

dis & arteriarum diaftolen: quod si verum, inutiles sunt harum ostiis appositæ valvulæ, quod, cùm natura nihil facit frustra, absurdum est asserere.

Notum est arteriis nullas contigisse, quia earum una, ubique per totum corpus, est simul incipiens & desinens diaftole & systole, quæ si per cordis sinus simul extenderentur, non minus ibi valvulæ, quàm in arteriis, frustra neæ essent.

Adde quod nulla etiam illarum valvularum esset necessitas, quia nihil in arteriis, quod sanguinis regressum urgeret, repèriretur; contrahendi vi non pollent, clarissimo Viro auctore; neque in corpore conceditur frigus constrictione reperiens, quale etiam clarissimus Vir non desiderat, sed solum minorem calorem, quo sanguis detumescat, ut systolen faciat.

Secundò; sequeretur valvulas arteriis junctas, à refrigerato & detumef-

mescente sanguine claudi; quod est illo tempore, cùm eas claudere sanguis minus valeat, aut opus sit, scilicet cùm minus plenæ sunt arteriæ: verbo dictum sit, cùm non conceditur occasio, nec potentia; nam propriâ non clauduntur contrahendi vi, neque cordis (quàm in epistolis ad Lovaniensem Medicum negat) neque arteriarum, sanguinem urgente, seu comprimente.

Præterea, si cordis systole fiat cùm in arteriis refrigeratur sanguis; sit hoc, aut quia in iis, densato sanguine, conceditur è corde egressuro locus; aut quia unâ refrigeratur, qui in cordis sinubus est sanguis; ut unâ concidat.

Si prius verum, subsequitur cordis systole illam, quæ in arteriis est; hoc est, distincto tempore fit; quasi dicas; à frigore densatur sanguis, qui in arteriis est, quique inde fit mole minor, hinc aperiuntur valvulæ, & elaboratur

itur è ventriculis sanguis alius, quod
 mane uno tempore fieri non potest;
 probatur, quia, si valvulæ arteriarum
 post cordis diastolen statim claudun-
 tur, detumentibus adhuc arteriis (nisi
 illa cessaret non clauderentur, nam
 sanguis egrediens, & extraneo non
 minus in agendo pollens non sineret
 eas claudi) fieret utraque clausio &
 apertio harum valvularum in arteriæ
 systole.

Si posterius verum; quare non re-
 frigeratur à frigidioris sanguinis gut-
 tis ingredientibus? venarum siqui-
 dem arterioso frigidior, magis etiam
 in pulmone refrigeratus; atqui ab hoc
 inflatio augetur: unde sequitur, quod,
 in uno eodemque objecto, minus fri-
 gens majores edat effectus magis fri-
 gido.

Denique si, quod à calore liquefcit
 aut rarefit, id ipsum à frigore dures-
 cit & densatur: tenuitatem à cordis
 calore acceptam, in arteriis causâ fri-

goris etiam amittet sanguis, quod si verum, quomodo poterit poni inter venosum & arteriosum differentia, quæ Doct. Harveio pag. 47. *methc.* obijcitur?

Non accipimus responsionē (p. 136. & sequent. *epistol. quæst.* I. *Beverovic.*) datam ad objectionem Medici Lovaniensis (*eiusdem libri pag.* 124.) in quâ præterquam quod concedat Clarissimus Vir sanguinem ex arteriis per extremitates in venas influentem, nullam ibi pati mutationem, ait, *in venis semper esse aliquas guttas, quæ ex arteriis non fluxerunt, quia nempe ab intestinis in illas semper aliquid humoris illabitur; itemque venas omnes unâ cum hepate instar unius vasis esse spectandas: nec non, contra positionem (pag. 47. *method.*) propriam, sanguinem debere easdem qualitates, quas acquirit à corde, in omnibus arteriis retinere. In hepate sanguinem fieri rubrum, atque ideo in venis nisi rubrum reperiri.*

Ab

Ab intestinis ad corporis venas non est via nisi per portam & hepar, quod ipsum nisi ramum à cavâ habet, cujus sanguis contra flumen natâre non didicit, neque illi magis, quàm è corporis habitu remeanti, valvulæ patent.

Præterea, si densatur & incrassatur sanguis magis, quò longius à corde recedit, quomodo capillares imò multò minores arteriolas ingreditur, etiam corporis poros permeabit ut alat? corporis enim minutissimæ portiunculæ, secundum omnes dimensiones nutriuntur & augentur, non externâ appositione.

Pedetentim etiam sanguinis motus progrediretur, si inflatione tamquam ebullitione & refrigeratione peragi debeat (velocitas, quæ à calore datur, à frigore adimitur) præcipuè si guttatim procederet; etiam si tantum guttæ maxima pars simul è corde egrediatur, licet guttæ magnæ sint:

maximè tale est) refrigeratur? non est credibile: venæ arteriis magnitudine respondentes, non alium quàm ab aliâ carne remeantem accipiunt.

Hiscè adde, quod ligaturâ in vivo animali interceptâ aortâ, oculis cerneretur inflatio sive ebullitio, nec tam subitò cessaret præcipuè adhuc pulsantè corde.

Cor è corpore exemptum, nullo ventriculorum servato ordine, si secundum longitudinem, vel transversim, utcumque libitum fuerit, in plura frustula dissecetur, nullis servatis ventriculis (qui occludi debent antequam latera elevari possint, in auram alias abiret elevantis ictus) unumquodque frustulum aliquamdiu salit, imo sese contrahendo & erigendo, ambientis aëris molestiam conatur excutere, postque singulos insultus (quibus frustula minora fieri facile cernitur, præcipuè si majora inspiciantur) laxatum concidit, ab opere

desistit, & post quietem exilem, primò satis brevem tandem longiorem, erectionem repetit; si interim acu vel stilo pungatur, aliâve molestiâ afficiatur in diversos novosque se erigit subsultus ut injuriæ externæ se opponat, sine ullo caloris, ebullitionis, aut dilatationis, ingredientisve humoris indicio.

Non aliter in corpore cor integrum solet, à distendente sanguine illatam molestiam, sese contrahendo, arcere, postque singulas actiones ab opere desistere & quiescere, quo tempore denuo ab auriculâ novo sanguine impletur & obruitur, ipsique rursus contrahendi occasio offertur.

Contractionis hujus cum calor, ebullitionis aut dilatationis auctor (cujus omnino contrarium effectum patet esse) causa dici non possit; ab animâ opifice, actionum omnium causâ efficiente, secundum ubique ab omnibus receptam opinionem, ego ad
con-

contractionem vivificatum corpus impelli existimo.

Nullæ corporis dispositi actiones peraguntur, nisi cum partes arcent aliena & molesta; contractione una pars alteram movet extenditque; in contractione & subalternâ quiete consistit vita, quæ à contractione inchoatâ, quiete terminatur.

Ab hâc opinione non abducit me Clarissimus Vir suâ quæstione Lovanienſi Medico, *Epist. quæst. Beverovic. pag. 127.* pro exempti cordis motus causâ disputans: *quo pacto ab animâ humanâ ille motus pendeat, qui etiam in cordis partibus divisus reperitur, cum animam rationalem indivisibilem esse, & nullam aliam sensitivam vel vegetantem sibi adjunctam habere sit de fide?* Cæterorum animantium motum animæ non videtur hâc quæstione derogare, difficultatem solum movet super animâ humanâ, quæ me minus angit, hæc enim sub nullâ dimensione comprehensa

hensa & incorporea, cum non amplius suo corpore finita est, nec circumscriptionem, nec divisionem ullam pati potest, nec passura est, antequam extremo die suo corpore denuo vestita judicanda resurgat.

C A P. III.

De calore sanguinis : caloris definitio : elementorum qualitates in mixto manent : unus in omnibus calor solo gradu differens : quomodo calor è sanguine elicatur..

EX hisce ego satis superque elici posse confido, nullos in corde elaborari spiritus; nullamque sanguinem in eo pati mutationem, multo minus perfectionem acquirere; denique majorem in corde quàm aliis visceribus nullum esse calorem. Quid de principatu, & imperio, quo in corpore polere dicitur, sentiendum restet, sit penes æquos judices.

Unum adhuc solvendum superest; unde scilicet calorem nanciscatur sanguis, & unde partibus vividus reficiens-

ciensque calor accedat, si à corde eundem non habeat: certum enim est calorem cum sanguine in partes omnes deferri, partium inde calorem augeri, easque inde refocillari; quò etiam plus habemus sanguinis cò nos plus calere.

Calor tactibilis qualitas, calidique subjecti forma, elementi ignei est effectus: definitur Philosopho qualitas activa, homogenea congregans, heterogenea segregans: motu hæc peraguntur, motu mixti compages dissolvitur, & singula dissoluta ad sua primordia moventur, cùm ignis activâ suâ vi mixti (quod contrariorum unionem constat) partes movendo concitat & disjungit: singulis ad sua tendentibus, facillimè igneæ particulæ, ubi major est confluxus, junguntur, unde ignis vires assumens, majorem combustibilium particularum motum, excitat.

Præbuit hoc fortè ansam Doctissimo Viro H. Regio, quod (*disput. medic. prim.*

prim. thesi 17. & fundament. physic. p. 98.)
calorem vocaverit. variam agitationem seu motum insensibilium particularum.

Mihi non motus aut agitatio esse videtur, sed aliquid, quod motu è subjecto producitur modo dicto: è quo facilè capitur ratio, quare, quò motus sit fortior & celerior, faciliùs in rebus calor excitetur; nam heterogenea quantò citiùs magisque separantur, tantò igneæ particulæ, in omnium rerum fabrica convenientes, commodius conjunctæ vires suas exerunt & calorem inducunt; qui augetur, cùm, aliarum rerum compagem dissolvendo, sibi igneas particulas, ex istâ materiâ effluentes, copulet.

Constant enim cuncta quatuor elementis, quorum singula suis integris concurrentia viribus, dum mixtum constituitur, qualitates integras servant, & datâ occasione exercere nituntur,

tur, naturaliterque exerunt, quantum compages ferre potest, & quamvis eas potentiori formæ subjicere cogantur, non tamen intereunt, neque etiam unum in alterum mutatur.

Nullius exitium patitur natura videri.

Ignæ particulæ in tantum ab aliis concurrentibus elementis obtunduntur, ut tamquam sopitæ nullas exerere vires possint, & ne sensum aliquando moveant, imo omnino extinctæ videantur; quæ tamen motu & contritione, præsertim in rei dissolutione, aliâve juvante causâ, unitæ, non solum calefaciunt, sed interdum urunt & flammam movent.

In nimis fortiter mixto, quàm ut dissolvi queat, illæ externi ignis adjumento adeò nonnunquam intenduntur, & in actum moventur, ut alias elementares mixti partes longè superent, quæ tamen, externo agente ablato, ad naturalem constitutionem mox redeunt.

Quam-

Quamvis ignis actiones, pro gradus excedentiâ , tam in animali, quàm in re inanimatâ , varias edat ; in omnibus nihilominus unus idemque calor est, elementaris scilicet, neque præter eum ullus alius reperitur, siue constituens , sustentans , seu interimens dicatur ; siue cœlestis, naturalis, temperamentis, innatus, insitus, influens, siue præternaturalis, febrilis, universalis, particularis, siue alio quovis nomine indigitetur, solo modo & graduum exsuperantiâ distinguitur, non secundum formam.

Neque aliter differt , qui externo tactu percipitur in vivente, ab eo, qui ad compositionē partis alicujus confluit, cujus forma etiam post mortem aliquamdiu persistit, quamvis omnis antea perceptibilis calore effluerit, totumque cadaver frigere sentiatur, donec putredine ejus compages dissolvatur, & singulæ partiæ ad sua primordia recedant, quo motu
igneæ

igneæ conjunctæ, calorem faciunt tactu perceptibilem; præcipuè eventilatione prohibita; eâ enim liberâ, in auras diffarentur antequam uniri & sensibilem calorem efficere possent.

Si in corpore vivo alicubi contingat infarctum putrescere, id tandem eruptione factâ turgens, cætero humori mixtum ejusdem calorem auget; nam acrimonia, aut alienâ qualitate molestâ partes irritando, & ad celeriores propulsionem eas incitando, sanguinis efficit motum citatiorem, unde major calor inducitur: non aliter (si non magis) quàm si cibus potusve calefaciens, multas igneas in se habens particulas, pro nutrimento assumptus esset.

Quemadmodum extra animalis corpus excitatur produciturque calor, cùm scilicet suis vinculis liberatur, sic is, in eodem, motu creatur, & è nutrimento educitur: hoc à partibus (ab animâ vivificatis & impulsis) agi-

agitatur, concitatur, minutissimèque dividitur, in quâ actione, celeri & indefinente motu convenientes ignei (liceat sic dicere) atomi, vires suas, uniti, calore manifesto, elucescere faciunt.

C A P. IV.

Quæ requirantur ut sanguis possit calefieri: sanguis unde mobilis: quomodo fiat nutritio: minutissimè sanguis divisibilis.

R Equiritur in actione hâc seu caloris in animali productione, primo sanguinis mobilitas; dein aliquod movens; denique viarum dispositio per quas moveri, & quibus, tamquam terminis, movendus contineri possit.

Mobilitatem partim à sero habet, sed maximè ab aëre, qui in pulmone sanguini additur, hoc mediante in tenuissimas partes indefinitè divisibilis omnes etiam quam densissimas partes pervadere potest.

Tanta

Tanta est inter divisibilitatem mobilitatemque affinitas, ut quò aliquid facilius minutiusque dividi natum est, eò est mobile magis. Mobilitas summo opere sanguini est necessaria propter nutrimenti distributionem.

Nutritio enim humoris nutritii cum singulis partibus unio est & assimilatio, quòd nutrimentum unum simile vivens deveniat, cum parte nutriendâ, non externâ appositione peragitur, sed id membrorum etiam minutissimas particulas eatenus penetrare & pervadere debet, ut iis secundum omnes dimensiones addi & uniri queat.

Observandum itidem est, non totum, qui advehitur, sanguinem uniri: habet siquidem in se idem varias & diversas particulas, quarum nonnullæ isti, cæteræ alteri parti magis convenientes & aptæ sunt; nullæ tamen, nisi similes quæ sunt, appositæ adhærent & debite assimilantur, reli-

reliquæ ineptæ ultra tendentes in venas remeant: si major, quàm quæ exhausta est, copia additur, fit accretio; si verò portio prius adhæsi una rapiatur, fit decretio & partium extenuatio.

Sanguinis mobilitatem demonstrat ipse præparandi modus, non enim in vasa lactea nisi tenuior mobiliorque chyli portio admittitur, quæ postquam mesenterii glandes & pancreas prius transierit, percolato venoso sanguine diluta, & aliquantulâ bile mixta, vastam parenchymatis hepatis substantiam percurrit, & tandem in pulmonibus aëre imbuta mobilitatis requisitam perfectionem adipiscitur; quàm autem mobilis, divisibilisque sic præparatus sanguis sit, docet quæ in singulis partibus nutritio & auctio hoc mediante peragitur.

Quantum etiam ea divisio ad caloris præbeat educationem, ipsa experientia testis est, attrita siquidem & levi-

levigata medicamenta multo citius potentiusque agere, quàm integra conspiciamus.

Galenus locum afferre lubet, qui, lib. I. de med. simplic. facult. cap. II. sic habet. Eorum, quæ facultate calidâ esse in confesso est, nullum omninò nos calefacit priusquam tenuissimè sit comminutum: piper integrum corpori appositum, nullam caliditatem edit: si pollinis instar cuti lingueve inspergatur, excalefacit; præcipuè si fricetur.

C A P. V.

Quare moveri sanguis debeat: præcipuum movens instrumentum cor: transeuntis copia unde colligatur: cordi auxiliantur arteriæ: harum agendi vis probatur: quid ad motum singulæ præstent partes.

MObilitas hæc sanguinis ad caloris productionem non sufficit sola, nisi enim is à quodam urgente impellatur, & motu celeri concitetur, non calefieret; particulæ quoniam igneæ nisi conjunctæ calefaciunt;

ciunt ; motu eæ celeri eliciuntur, dum enim præ aliis celeritate pollent, ante alias exsiliunt, & vinculis liberatæ cœunt, ut vires exercean.

Quamvis, ut moveri possit, sit dispositus sanguis, quia tamen vitâ destituitur (non minus quàm spiritus, si ulli in corpore reperiuntur) semet ullo modo movere non valet : ab animâ enim omnis est actio : neque aliquid nisi animatum sentire, aut se movere potest, solum ea corpus & ejus partes vivificat, quibus ordine & debitè aptatis suas potentias in actum ducit.

Hæc anima motrix & impultrix ad opus hoc in primis cordis utitur ministerio, quod vastâ contractili carne dotatum, acceptum ab auriculis sanguinem (sine aliâ, quàm semet à molesto pondere liberandi, intentione) in arterias onus hoc, sese contrahendo, promovet, tam crebris & celeribus pulsationibus, ut ex illis, nec non
con-

contracti & dilatati cordis comparatione, ostiorum patentium magnitudine, & arteriarum per totum corpus ad singulas cordis contractiones, tangibili elevatione, factâ conjecturâ colligere facilè quisvis possit, quàm celeriter perenni motu sanguis partes omnes pererret atque transeat.

Cordi in actione hâc secundant arteriæ & cæteræ partes omnes : illæ impletæ & cordis agendi vi distentæ, cùm contrahuntur & vicinarum mole premuntur in singulas partes, pro renatâ, eundem dispensant : pneumonica scilicet in pulmones, aorta in integrum corpus, nullâ gravitatis, aut levitatis factâ differentiâ : neque enim levior sursum, aut gravior deorsum tendit; sed uno impetu sine aliquo discrimine ad minùs renitentes, aut magis inanitas partes movetur.

Ne quispiam existimet, quoniam dictum antea est, ab impellentis cordis actione, in arteriæ vulneratæ dia-

stole, sanguinem impetu proflire, ideo sanguinem propellendi omnem vim à solo corde manare, neque arterias ad id quippiam tribuere, quoniam, dum implentur, exsilire is videatur.

Non concluditur inde sanguinem in arteriarum systole ulterius non moveri; collabuntur enim & contrahuntur ut denuò in diastolen insurgere queant, & quamvis tunc è vulneratâ arteriâ tam magno impetu, ut salire possit, non egrediatur, elabitur tamen quemadmodum è venâ, & quantum concidentia labia effluere admittunt.

Quanta arteriarum in protrudendo sanguine sit potentia, manifestè ab injectâ ligaturâ patet, vix enim eâ, in vivente, arteria etiam magna constringitur, quin statim ultrâ vinculum, tempore, quo vix tres quatuorve pulsationes peragerentur, omnino inanitur, quamvis à corde, impedi-

diente

diente fasciâ , nullum procedentem sentiat impulsu.

Partes omnes & singulæ nutriendæ, dictatum arteriarum actione , sanguine seu aliturâ usque adcò imbutæ , (ut etiam distendantur & intumescant) alienum omne & molestum naturaliter exprimere & expellere tentant: nam præterquam quod renitentiâ & suo pondere receptum seu contentum humorem removere natæ sint , qui plures in se particulas etiam dissimiles, quæ in substantiam viventem verti & assimilari non possunt, continet; dein , quia sine cessatione aut requie, indefinenter novus priori succedât, ad hoc illæ tanto magis invitantur. Hujus veritatem remeantis , è corporis habitu in venas , sanguinis proventus docet.

CAP. VI.

Sanguinis motui destinata via : quomodo ea disposita : quare venis non arteriis valvula : quare ex cordi : quousque vasorum ductus extendantur : quid pro corporis habitu accipiendum : non necessaria, ad sanguinis motum, manifestæ anastomoses : de iis Cartesii, item Harveji sententia.

PArtes vias constituentes, per quas sanguis meare, & quibus tamquam terminis contineri ejusque calor conservari possit, sunt cor, arteriæ, totius substantiæ pori, & venæ cum suis appendicibus.

Vena cava cum ramis & suâ auriculâ, dexter cordis sinus, & arteria pneumonica simul meatum faciunt, quemadmodum vena pulmonis, ejus affixa auricula, cordis sinister ventriculus & arteria aorta cum suis propaginibus alterum. Horum singulus unus est & continuus, omnino immunis, quod ipsis oculis est conspicuum, valvulis tantum pluribus in locis recursum impredientibus obsitus.

Hæ

Hæ venis, in cavitatibus, plurimæ & innumeræ sunt adnatæ, cùm, quia partium corporis inæquales sunt motus, tùm, quia externo compressu, ob tunicarũ mollitiem facilè connivent, unde sanguinis non solum motus impediri, sed is magno corporis damno retrorsum preni posset, nisi à naturâ valvulis id præventum esset.

Ad cordis introitum & egressum tantum ob primam rationem sunt adnatæ, scilicet, quia auricularum, cordis & arteriarum non est unus, sed diversus motus: arteriis nullæ sunt concessæ, quia uno impetu à cordis actione elevantur, atque eâ cessante simul contrahuntur & concidunt; dein quia propter substantiæ duritiem vicinarum partium mole non facilè sicut venæ comprimuntur.

In meatibus hisce sanguini à corde aut arteriis nihil quidquam, præter concitator motus accedit, omne quod habet per venas additur; non

quod ipsæ aliquid de suo tribuant, sed totum, quod in meatu seu capacitate continetur, à partium substantiâ defluxit.

Ductuum descriptorum principia unà cum venis incipiunt, sicut termini unà cum arteriis desinunt, quæ utræque partes similes sunt, sic dictæ, quia sibi ubique sunt similes, & quælibet earum pars simili nomine, vena & arteria vocitetur.

Ubi igitur illæ eatenus partium substantiæ inseruntur, & divaricationibus seu divisionibus plurimis adeò implicantur, ut nomen & similitudinem omnino amittant, vena aut arteria appellari desinunt, sed pro substantiâ, quæ ad partium nutriendarum structuram confluit, accipiuntur.

Ibi cum venis incipiunt ductus, & cum arteriis desinunt, nomenque amittunt: & quemadmodum, quod iis continetur sanguis, sic, quod solidum

dum in toto ultra terminos est, corporis habitus & substantia nuncupatur: hæc poris undique pervia, sanguini per dictos meatus advecto, in p. lmonibus prius subtilisato & mobili reddito, per intima sua penetralia transitum concedit, ut etiam minima partis portiuncula secundum omnem dimensionem nutriri & augeri possit.

Non necessarium esse existimo, anastomoses arteriarum & venarum ad intuitum manifestas statuere, si quidem per ipsam corporis substantiam is exquisitè divisibilis permeare potest; per carnosam quidem velocius, quàm per compactiorem; tantâ tamen actionis concordia, ut una alterius operi non obsit, aut (dum corpus sanum existit) illud impediat.

Clarissimus Vir R. *Cartesius* hæc anastomoses tam ponit esse necessarias, ut, per has solas esse datam viam ad sanguinis circulationem perficiendam,

dam, credat; imò tam manifestas & patentes, ut, ex arteriis per earum extremitates in venas influentem, nullam ibi pati mutationem, & si venosi & arteriosi sanguinis sit aliqua differentia, hanc ipsi, quia aliquid ab intestinis & hepate affluerit, acquiritam afferat (quod paucis verbis refutavimus.)

Inventi hujus laudem Medico Anglo tribuendam dicit, quod glaciem illam fregerit, scilicet dubium solverit, quare venæ non inaniantur, & arteriæ non rumpantur, cùm omnis sanguis, qui cor transit, ex illis, in has influat.

Verum quidem est, quod Venerandus *G. Harvejus*, suæ circulationis doctrinam magis possibilem susceptibilemque averfantium mentibus dum reddere conatur, (quoniam aliqui, ut ipse ait, nil nisi adductis auctoritatibus admittunt) *Galen*i locum (*de usu part. 6. cap. 10.*) afferat; ubi is in toto mu-

mutuam anastomofin atque osculorum apertionem arteriis simul cum venis esse dicit.

Sed Venerandus Vir solummodo, in quantum prodesse possit, locum illum citat, quamvis per corporis habitum transire sanguinem ejus mens sit: neque sine ratione, siquidem dicto modo fiat nutritio,

Præterea manifestum est, quod, si pars quæpiam, ubi nulla omnino conspicua est vena, vulneretur, sanguis inde exsudet, aut effluat: confracta ossa, totius corporis partes siccissimæ & solidissimæ; carnem, sanguinis indicium, in fragmentorum labiis producunt, (quam mobilibus fragmentis adnatam non semel vidimus) quæ illa concrefcunt & invicem colligantur, hæc tempore ossescente & in calum degenerante.

CAP. VII.

*Motu calorem excitari probatur, tam in non animalis
quàm animalibus: de loco ubi is educatur: conclu-
sio.*

Constat itaque sanguinem esse summè mobilem, & in minutissimàs particulas indefinitè divisibilem; cor etiam, arterias & omnes totius corporis partes eundem indefinenti, forti & quam velocissimo motu, per meatus primùm apertos & impeditos, dein corporis substantiam exiguis poris perviam & transitum, dum sana sunt omnia, non impedientem, celerè & potenter urgere.

Motu calorem excitari manifestum est: videmus, quæ fricantur, incallescere; collisos silices scintillas emittere; gravi concitato motu etiam ligna flammam concipere: cùm tamen, sicuti etiam stirpes, metalla & inanimata, quia immobilia sunt, frigeant.

Ani-

Animalia etiam minora & imperfecta, licet vitâ fruantur, ob motus exiguitatem, non modò non calent, sed ad contactum frigent, non obstante, quod ad eorum constitutionem & fabricam satis copiosè igneæ particulæ confluerint: quod millepedes, locustæ, cantarides, suo probant exemplo, nam si introsumentur, aut externè humano corpori applicentur, urunt & exulcerant.

Si cursu aut alio quovis exercitio corpus exagitetur, unde sanguis celeriori motu cicatur, totum corpus inde magis incalescit; quod itidem fit, cùm cibus acribus & medicatis vel meraciore potu, copiosiore nutrimento, aut aliâ de causâ, sive salubri, sive morbificâ, partes corporis irritatæ sanguinem solito citius promoveant.

Auctore Galeno (*de morb. causis lib. universa corpora plus incalere solent motu improbo, vel ex putredine. calidioris corporis,*

poris viciniâ, vel ex astrictione, alimento calido.

Si proximas causas enumerare quispiam desiderat, hæ sunt, quæ particulas igneas jungunt, aut in actum educunt: alimento administratur materia, è quâ motu ex eliciuntur; calidi viciniâ ad edendas vires juvantur, mixti vel partis formâ manente; impeditâ eventilatione præcavetur, ne diffilentur, & in auras abeant.

Motu itaque calorem è rebus educi certum est: sed ubinam, aut ubi loci in animali id contingit, an in cordis ventriculis? Siquidem hoc sine morâ movetur, primum præcipuumque promovendo sanguini interserviens organum est; deia quia omnis ad illos sanguis confluit.

Verum est, cor, non primum quidem ordine, sed præcipuum movendi sanguinis instrumentum, dispensatoris officio fungi, cujus operâ in universum corpus nutriendis partibus
cla-

elaboratus distribuitur : sed quoniam manet ibi compacta & integra sanguinis massa, cujus compositio caloris augmentum quantum potest, impedit & averfatur, cordis ventriculis ascribi non potest, quod sanguini calorem augeant, vel quod in illis ex eo calor eliciatur.

Existimo ego, ubicumque nutritio fiat, ibi evidentissimè hanc actionem peragi ; atque partes, dum nutriuntur, incallescere : tunc sanguinis compositio dissolvitur, isque minutissimè dividitur ; tunc etiam compedibus liberatæ igneæ particulæ & unitæ, vires suas calefaciendo exerunt.

Quod si, pro temperamenti exigentiâ, partiumque compositionis & unionis tolerantia, debite peragatur, calor blandus & naturalis excitatur ; actiones etiam totius corporis omnes, secundum naturam rectè, prout in sano requiritur, eduntur.

Sin verò sanguis quantitate qualitateve,

tateve, tam propter internas, quàm
 externas causas, peccans, vel exerci-
 tia inmodica, animive affectus mayo-
 res, & quæ concitatiores, quàm par
 est, motum excitare possunt, calorem
 modum excedentem accendunt, cor-
 poris actiones turbantur, febres indu-
 cuntur, & in quâlibet parte, secundum
 temperiei & meatuum dispositionem,
 symptomata moventur: quorum enu-
 meratio dum metas nostras excedat,
 satius erit demonstrasse, cor, in ani-
 malis corpore, nullam habere præfe-
 cturam aut principatum, neque spiri-
 tum officinam, neque sanguinis fon-
 tem esse, quia majori nullo præ cæteris
 visceribus calore pollet.

A P P E N D I X.

Anne Harvejus sentiat cordis ventriculos in systole dilatari, ut sanguinem recipiant; & in diastole constringi ut eundem extrudant: tale è Cartesii suppositis sequi: cujusnam potius de systole & diastole sit sententia

NON video quâ ratione sit inductus Clarissimus Vir R. Cartesius, ut asserat Venerandum D. Harvejum sentire, cordis ventriculos in systole dilatari, ut sanguinem recipiant, & in diastole coarctari, ut illum in arterias extrudant. Staterâ hanc rem pensemus æquâ.

Clariss. Vir, cor propter subitam sanguinis elevationem, & quasi ebullitionem, (*epist. quest. Beverov. p. 176.*) à calore ejus insito excitatam, non aliter quàm si in vas excessive calens guttatim quendam liquorem infundas (*method. pag. 42.* intumescere & in diastolen attolli, eo tempore, dum
per-

percutitur pectus, & externè pulsus sentitur, existimat.

Venerandus *Harvejus*, cor, eodem tempore, quo pectus ferit, fibras omnes tendere, semet erigere, undique contrahi, depleri & inaniri, atque in systole esse, asserit, & probat.

Idem tempus, quo hic systolen fieri contendit, ille diastolæ tribuit.

Anne propterea *Cartesio* licitum est *Harvejo* ascribere, quod ejus menti contrarium est? ac si cor dicat dilatari & sanguinem recipere in systole, quia *Cartesius* eo tempore systolen fieri contendit, quamvis ipse diastolen tunc fieri asserat & demonstret: pari jure idem de *Cartesio* posset dicere *Harvejus*, sed videamus in quem sit cudenda hæc faba.

Venerandus Doctor *Harvejus* animantis corporis indagator argutus, in cordis motu duo observat tempora, unum motus, scilicet quo cor seipsum movet & in actione est; alterum
quie-

quietis, quo ab actione cessans, movetur & extenditur ab auriculis sanguinem immittentibus.

Hæc tempora ait manifestius posse distingui, accuratiusque observari, in frigidioribus animalibus; omnium optimè, in aliis calidioribus, cum mori & languidius tardiusque corpore pulsare incipiat.

Tunc enim temporum periodi sunt longiores, qui in vegeto propter brevitate vix discerni possunt; tunc etiam cernitur, peractâ systole, cor ab actione desistens quiescere, atque (in animali scilicet moriente) esse laxum, flaccidum, enervatum, & quasi inclinatum jacere.

Hoc tempore, ait, auriculæ se tendunt, constringunt, & sanguinem in ventriculos impulsu movent, quos dum distendunt, diastolen faciunt: quâ perfectâ, scilicet cum summè distentum sit, cordis motum incipere, dicit; quo tempore undique sese
con-

contrahens & basi innitens erigitur, minorisque magnitudinis & longiusculum, mucronem sursum elevat, & pectus percutit.

Tempus hoc systolen, prius diastolen vocat: prius incipit depleto corde, & ab opere quiescente, desinit corde impleto; alterum tunc exordiens corde fibras omnes tendente & contrahente peragitur, & opere peracto desistit.

Sit penes æquum judicem, anne Venerandus *Harvejus* sanguinem in systole in cordis ventriculos dilatatos recipi, & in diastole, dum illi coarctantur, in arterias extrudi sentiat: præcipuè cum, pendente sub iudice lite, determinatum non sit, cujus sit potior sententia.

Enucleemus Clarissimi Viri de systole & diastole placitum, & scrutemur annon id, quod in alio carpit, è propriis scriptis manifestè consequi pateat.

Siqui-

Siquidem diastole & systole sua habent tempora, quibus mensurantur, & à se invicem distinguuntur; videamus quomodo principium unius & terminus alterius discerni, ex ejus supposito, possint.

Diastoles & systoles differentiam dignoscimus, vel solo tactu, pingui, ut ajunt, Minervâ, (quod in arteriâ explorandâ magis usu venit) vel adhibitâ ratione.

Priori modo, quia cordis (uti etiam auricularum & arteriarum) extensio diastole est, systole verò contractio; quod magis summæ extensioni tempus prope est, diastoles, quemadmodum systoles, extremæ contractioni proximum statuitur: diastole in mediâ ad dilatationem viâ incipit, & in mediâ ad contractionem desinit; reliquum systole tempus adscribitur.

Altero modo, qui adhibitâ ratione est, incipere judicatur (cùm secundum Clariss. Viri sententiam sumatur),

tur) incipiente ebullitione, scilicet cum intumescere cum sanguine cor exordiat: systolen verò, cum, à refrigerato sanguine, concidere incipiat.

Quo velis modo capiatur, necessario sequitur sanguinem in systole cordis ventriculis admitti, & in dilatatione seu diastole, eundem in arterias demitti.

Super priorem modum non cadit dubitatio: posteriori modo sequi restat demonstremus, quoniam apertis verbis hoc ipse non asserat.

Sed pag. 44. & sequenti lib. method. inquit. *Simul atque duæ sanguinis guttæ sunt ingressæ, nimirum in unamquamque cavitatem una, quæ statim rarefiunt & dilatantur propter calorem, quem illic inveniunt; quâ ratione sit, ut totum cor intumescere faciant, simulque pellant, & claudant quinque valvulas, quæ sunt in egressu, unde manant.*

Videtur Clarissimus Vir asserere sanguinem intrasse antequam rarefactio

ctio incipiat, postquam, enim inquit, intrarunt guttæ, sanguis rarefit, qui facit diastolen, unde in systole intrasse manifestum.

Docet etiam consequentia: sanguis in ventriculos intrat, cum apertæ sunt venarum portis appositæ valvulæ, egreditur verò iisdem clausis, arteriarum apertis: atqui Clarissimo Viro valvulæ venarum in systole cordis apertæ, in diastole clausæ, ergo sanguis in cordis systole ventriculos intrat, non in diastole.

Præterea à dilatato sanguine in arterias intrante fieri earum diastolen supponit, systolen verò ab in iis refrigerato. Quare in arteriis, è quibus systoles causa manat, introitus & condensationis tempora magis distincta erunt, quàm in corde, à quo causa diastoles petitur, introitus & dilatationis?

Sed quid multis demonstrationibus opus est? Doctissimus *H. Regius* Medicinæ

dicinæ in Ultrajectinâ Universitate
 Professor Cartesianæ Philosophiæ e-
 gregius sectator, *fundam. physicor. libr.*
pag. 183. expressis verbis diastolen pul-
 sus partem dicit, *quâ cor à rarefcente*
sanguine ex venâ cavâ in dextrum, & ex
arteriâ venosâ in sinistrum in systole illapso
secundum latitudinem & profunditatem
dilatatur & intumescit.

Et paulò pòst. Neque hæc pulsus pars
 ex eo pro systole cordis habenda est, quod
 abscisso vivi animalis cordis mucrone, ven-
 triculi ejus hic arctari sentiantur & con-
 spiciantur. Nam diastole cordis non ex ven-
 triculorum dilatatione, sed ex ipso cordis
 tumore, qui etiam arctatis ventriculis con-
 tingere potest, est æstimanda.

Concludendum itaque est, Claris-
 simum Virum (nam sanguinem acci-
 pere non possent, quin dilatentur,
 præcipuè à guttis, uti ipse ait, satis
 magnis; quia viæ sunt valdè amplæ
 & vasa, unde proveniunt, vehemen-
 ter impleta sanguine & à quibus de-
 tumes-

tumescunt, dum inaniuntur, auriculæ) statuere, quod in Venerando Doct. *Harvejo* carpit, ventriculos in sytrole dilatari, ut sanguinem recipiant, & in diastole arctari, cùm sanguis in arterias extrudatur.

Annon optimo jure Venerandus Doct. *Guilielmus Harvejus* dicere posset Clariss. *Ren. Cartesii* de motu cordis sententiam proprio experimento jugulari: quo infantis *Harveji* opinionem expugnatam & jugulatam ire contendit? Quoniam eatenus jam devenimus, ut horum doctissimorum virorum discrepantes opiniones sciamus, videre non erit abs re, ex utriusque collatis rationibus, cujusnam sententia de systole sit applausibilior.

Cùm ferè ab omni ævo diastolen, se extendendo & tanquam follis, sanguinem in ventriculos trahendo, cor repleti diceretur, atque id fieri, illo tempore, quo pectus ferit, & foris pulsatio sentitur, receptum esset; obser-

observavit Venerandus *Harvejus*, isto tempore non diastolen (quâ cor, dum ab opere & contractione desistit quiescens, à sanguine, auricularum systole, in ventriculos immisso, in majorem molem extenditur) neque cor distendi, neque sanguinem recipere, sed systolen peragi: quæ cordis est actio, sanguinem in ventriculos receptum, in arterias propellens, easque in diastolen attollens.

Animadvertendum, ait, cor, cum se movet, contrahi & tendi (aliarum partium more, quæ similiter in actione contrahuntur) unde fit contractus, quod tam ad conspectum quam contactum patet, quia minoratur, & durius & magis renitens percipitur.

Hanc consequentiam probat exemplo musculorum, qui dum se contrahunt, duriores & magis renitentes percipiuntur: præterea, quod fibræ, dum contrahuntur, abbreviantur & incrassantur, sic etiam cordis substantia

tia & parietes, eo tempore, incrassantur.

Ventriculos sanguine non impleri eo tempore probat, quia arctiores & constrictiores fiunt & minus capaces, dein, quia inaniri videntur; per inflatum enim vulnus cum saltu sanguis exit, cordis contractione expressus: denique albidius fit cor, quod dum impletur, sanguinei coloris fit saturum; in piscibus & frigidioribus animalibus magis conspicuum.

Omnes partes, dum in actione sunt, vigorantur, quiescentes verò flaccidæ & molles sunt; pulsationis tempore cor, quia in actione est, vigoratur, contrahitur, semet erigit in tantum, ut pectus percutiat.

Hæ sunt, ex tractatu de motu cordis & sanguinis *Harveji*, excerptæ rationes, quibus inductus, cordis motus duo esse tempora, demonstrare nititur; unum motus, quo sese contrahendo pectus ferit, in quo systole per-

L

agitur;

agitur; alterum verò quietis, quo diastole fit, & cor sanguine impletur & distenditur.

Clarissimus *Cartesius* cordi nullam attribuens actionem propriam, sed ejus motum à nullâ præcedente potentiâ sive animæ facultate, mechanice excitari asserens, à calore, ipsi implantato, sanguinem dilatante, & ejusdem ebullitionem excitante, in diastolen cor attolli & pulsare pectus existimat, hisce motus rationibus, uti eæ in *respons. ad Medic. Lovan. epist.* habentur.

In cuniculo vivo postquam cordis mucro fuit abscissus, ejus basis manens adhuc vasis appensa pulsavit satis diu, atque in eâ commodissimè aspexi duas illas cavitates, quæ ventriculi cordis appellantur, in diastole fieri ampliores, & in systole arctiores.

Et paulò post: Nota, ut hoc experimentum rectè fiat, non solum mucronis extremitatem, sed mediam partem totius cordis esse abscindendam, vel etiam amplius:

plius: idque in cuniculo timido animali, non
cane esse tentandum.

In canibus enim ventriculi cordis varios
habent anfractus, quorum singulae cavitates
dilatatione sanguinis ita exienduntur, ut
interim generalis cujusque ventriculi cavi-
tas angustior reddi videatur. Denique:
Atqui tunc illud ditatari, vel ipso tactu pro-
bari potest, manu enim prehensum multo
durius in diastole, quam in systole senti-
tur.

His Doctissimus D. Regius fundam.
physic. pag. 183. addit: Si tum temporis
cor & arteriarum vulnerentur, ex tumido cor-
de & dilatatis arteriis, sanguis eodem tem-
pore exsilire conspicitur.

Præterea pagina sequenti: Quo
tempore arteria impulsus cessare sentitur,
eodem momento videmus latus cordis, ster-
num spectans, concidere, ibique maximè
ubi orificio aortae respondet; dextrum verò
latus & sinistrum, versus dexteram sinistram-
que costas, collabascit; mucro recedit à ba-
si, totumque cor, teste sensu tactus, laxum,

flaccidum & molle evadit. Vulnerato autem corde & arteriis, nihil sanguinis tū temporis ex iis egreditur, & vulnera eorū concidunt.

Hæ sunt utrimque allatæ demonstrationes, eadem ferè, in contradicentium tamen probationem, à viris fide dignis; quid dicemus?

Et vitulâ tu dignus & hic?

Non videor, ne Clariss. Viro auctoritatem minuam, ejusve fidei quidquam derogem, hoc interrogans satisfecisse injurio cuidam blateroni, anonymo tamen, qui in defendendo Cl. *Cartesio* causam Dei se fortè agere existimans, molossi instar, cui amicos etiam allatrare innatum est, manuscripto injuriarum pleno inculcat quod nihil ad illud respondeam: cū responsione eum nostrâ indignum judicem, silentio hæc præterire decreveram: sed quid sibi vult bonus Vir, quod Clar. Virum vel inscitix vel malitix insimulem? dicamque nescivisse differentiam quæ est inter cor vegetum & moriens, quod

quod illud partibus omnibus validis
 novo impulso sanguine in diastolen
 elevetur , cùm hoc eodem tempo-
 re , quia sanguine vel non satis im-
 pleatur , laxum flaccidumque decum-
 bat ? aut dicam ignorasse quod inter
 cor integrum & ultra medium am-
 putato mucrone discrimen sit , quia
 propter sanguinis effluvium elevari
 ineptum est , solo contractivo motu ,
 quo systole peragitur, remanente ? An-
 ne verò vult malâ fide exemplum al-
 latum contendam ? quod cuniculum
 eligat , animal uti parvum , pusillo
 corde donatum , in cuius motu magna
 non potest observari differentia , aut
 in cuius corculum digitus innitti
 non potest , quò undique contractio-
 nem compressionemque sentire quis
 posset ? & cuius ultra medium mu-
 cronem abscindi vult , ut coniformi
 figurâ vitiatâ (quâ cohiberi & conti-
 neri solent) extrorsum se trahere fi-
 bræ , & ventriculos dilatare videren-

tur? Ignoscant benevoli Lectores, si ab impudente homine illata injuria extorserit, quod tanto Viro debita reverentia reticere coëgerat. Satis mihi esse cogitaveram, penes æquos judices relictâ causâ, cùm inter elatos ad tantum doctrinæ culmen Viros lites componere nostrum non sit, solâ distinctione Venerandi Senis sententiæ favere.

Dictum siquidem est, diastolen & systolen duplici modo posse distingui; priori sive pingui Minervâ si eæ considerentur (scilicet si diastole dicatur, cùm cor summè tumeat, systole verò cùm minùs tumeat) videbuntur Clarissimi *Cartesii* & Doctissimi *Regii* allatæ rationes aliquid inferre posse.

Sed si ratio adhibeatur, cognoscetur systolen incipere in summâ diastole, scilicet, cùm cor summè à sanguine extensum, fibras tendens sive contrahens, eundem in arterias exprimat; desistere verò ab actione

hâc,

hâc, cùm ulterius tendere seu contrahere fibras non valens, easdem laxet, novæ diastole occasionem præbens: incipit cùm cor agere desinat, nam hæc quiescente peragitur; finitur, dum novam contractionem cor exorditur.

Hoc itaque modo diastole systoleque consideratis, etiam cæcus videt, secundum Venerandi *Harreji* sententiam firmissimis demonstrationibus stabilitam, esse concludendum; dum diastole sit, cor quiescere, sinus impleri & patentiores fieri, parietes extendi & tenuari, ipsum secundum omnes dimensiones mole augeri: in systole, actione propria se movere, vigorari, parietes contractione incrassari, ipsum minorari mucronem erigere, sinus angustari, & expressione depleri, sanguinem in arterias protrudi, easque interea inde in diastolen exsurgere, eo tempore, quo eriguntur auriculæ.

Magis erunt hæc manifesta, si consideretur, in vivente aut vegeto corpore, cordis latera non concideret, neque, eo uti profertur modo, laxum, flaccidum & molle collabascere versus dextras & sinistras costas, sed hoc in moriente animali solum evenire: cujus exempla profert Ven. *Harvejus*, ut tempora proprii motus & quietis cordis, evidentius distinguerentur; & manifestè (dum tarda sunt omnia) cor se movere & contrahere in systole, in diastole verò ab actione quiescere, demonstraret.

Animali sano cuncta hæc tam citò peraguntur, ut vix à contractione desistat cor, quin, ab urgente sanguine, contrahentibus auriulis, per patentes vias, impleatur nictu oculi interdum citiùs; ita ut impletionem & depletionem discenere arduum sit, si non impossibile.

Eodem etiam tempore è cordis & arteriæ vulneribus sanguinem exsilire.

verum

verum est; in illius systole, in hujus verò diastole, ab eodem urgente & se contrahente corde: hoc enim inanitum, dum ab auriculâ impletur & attollitur in majorem molem, quamvis exeat interea sanguis, saltu tamen non profilit; auriculæ actio quippe non satis valida est: deinde inaniti sinus, qui implendi sunt saltum impediunt; sed validior cordis contrahendi vis sanguinem per utrumque vulnus exsilire facit, è proprio, dum sanguinem exprimit, ex arteriæ, cùm illam implendo extendat.

Ornatissimus doctissimusque Vir *H. Regius*, quamvis eodem, quo cor pectus ferit, tempore ejus esse diastolen statuatur, non tamen cum *Clariss. Cartesio* ventriculos tunc dilatari & extendi à sanguine dilatato asserit; sed tunc temporis eos coarctari & angustari, candidè concedit: sed ut generosè, strenui ducis instar *Spartam* acquisitam defendentis, sui effati verita-

tem defenderet, diastolen non à ventriculorum amplitudine metiendam esse, sed eandem à parietum incrassatione induci sustinet: quod præmoniti (quisque enim suorum dictorum est interpres) facile admittimus, sed de cæteris paribus idem postulamus pariter concludat: sic, ad idem redeunte re, alternæ tam auricularum, quàm cordis & arteriarum systolæ erunt & diastolæ; incipiet diastole auricularum, quam sequetur, in auricularum systole, cordis, & hanc arteriarum dum hoc systolen patitur, sive de cavitatibus, sive de parietibus id intelligatur. Sed auriculas & arterias dilatari cùm impletæ majores fiant, cor verò diastolen pati cùm latera vel ejus caro incrassetur & sinus coarctentur, inconveniens judicamus & absolum.

Addamus pauculas hæc nostras, quibus Rev. *Harveji* stabiliri sententiam posse judicamus, rationes.

Si

Si rarefieret & majorem molem acquireret in dextro ventriculo sanguis, majus orificium debuisset pneumonicæ arteriæ (sit idem de aortâ dictum) tribuere natura, quod trans-eundo sanguini esset patens satis: ipsa quantitas, in diastole quæ intravit, exire debet sequenti systole, cujus si moles augeretur, portâ indigeret majore pro sanguinis augmento: non minus, quàm videmus cavæ venæ foramen, quo cordi aptatur, respondere amplitudini partis, quæ supra cor est, & simul ejus, quæ infra cor est.

Nihil urget dicere, per angustius foramen, majori pressione & vi, copiosorem liquorem posse transire: ad transeuntis molem transmittentia vasa crescere solent.

Accedit, quod contrarium cordi habere motum, & concidere auriculas, cùm cor attollitur, confessione ipsius *Cartesii* conficit; atqui eo tempore, quo cordis, secundum *Harvejum*,

fit diastole, ex deplentur & collabuntur; dum verò sese contrahendo pectus ferit, replentur & intumescunt. Ex hisce manifestè apparet, esse concludendum, cor, eo tempore quo pectus ferit, sese contrahendo movere, sanguinem in arterias exprimere, & in suâ systole esse: cùm verò ab actione hac desistat, & quiescat, à sanguine impleri & extendi, cavitates ampliores, latera verò tenuiora reddi, totum mole, secundum omnes dimensiones, augeri & in diastole esse, longè aliter, quàm Clarissimus Vir opinatur.

F I N I S..

Differtationis de Corde.

Sectionum & Capitulorum
E L E N C H U S.

AD Lectores alloquium, in quo tractantur,
honores & reverentia artis inventori-
bus debiti : sentiendi libertas pluris habi-
ta : artis Medicæ fundamentum veritas :
Harvejus circulationis sanguinis auctor ;
hæc multa veterum statuta inversa : au-
ctoris scribendi causa : Medicina compen-
diū brevis norma. Pag: 5

S E C T I O N I S I.

CAP. I. De re quâpiam laturus sententiam
qualis : cor nondum benè perscrutatum :
quanti illud æstimarint Veteres : ejus ety-
mi expositio : unius partis in aliam nullum
dominium : cor pars servilis : facultates
non influunt. 55

CAP. II. Spiritus etymi acceptio ejusdem
veterum definitio : in corpore tale non re-
peritur : veluti triplex in qualibet parte
sub-

I N D E X.

*Substantia, sic etiam in sanguine: spiritus
& calor malè confunduntur: spirituosâ
substantia à sanguine inseparabilis: spiri-
tus animæ & corporis non est vinculum nec
anima instrumentum proximum: animalis
facultas per spiritus non ducitur in actum:
quomodo sensationes fiant: spirituosâ par-
tium substantia spiritus non est: Harveji
sententia: D. de Reeck quia de iis sen-
tiat.* 64

S E C T I O N I S II.

C A P. I. *Sanguinis definitio: hamatosis quid:
quomodo peragitur: quomodo in factu exor-
ditur: alendi aptitudo, non color, sangui-
nem facit: in unâ parte hamatosis non per-
ficitur: coctiones additione & detractiōe
fiunt.* 34

C A P. II. *Alimenti prior coctio mediante
ventriculi humore, non calore & contactu
perficitur: ad cibi dilutionem non sufficere
potum, qui ipse dilui debet: acidus sapor in
ventriculo non à liene: anne aliquid à ven-
triculo feratur in lienem? ejus usus.* 91

C A P. III. *Venarum lactearum usus: de-
scriptio pancreatis & ejus ductus: ejus-
dem*

I N D E X.

dem cum aliis lacteis differentia: ductus pancreatici usus: respondetur objectionibus Bartholini, & van Horne. 98

C A P. I V. Lactearum mesentericarum usus: chymosis rudior sanguificatio: quid chymus: sanguinis in jecore uterino preparatio: natura circa alimentum, ordo. 114

C A P. V. De novo chyli receptaculi & chyli-feri ductus invento: de vasis lymphaticis noviter repertis: omnium examinatio: glandium mesenterii usus defenditur. 118

C A P. VI. Bilis sanguinis condimentum, hepatis excrementum non est: vesicula syntaxis: quomodo in ea bilis generetur: ejus necessitas: per perum biliarium ducitur cum portione chymi in hepar: per chelidochum ductus pancreatico & intestinis offertur: de porta & cava venâ: hepatis reviviscentis usus. 130

C A P. VII. Sanguini ut sit nutritius, duo necessaria: ejus mobilitas unde: fatui qualis inservit: qua causa quod in lucem is prodeat: quis aëris in corpore usus: quare infans non perferat podice & urinario meatu citò moriatur: sanguis venosus alien-

I N D E X.

alendis partibus ineptus : nutritio quomodo fiat : quanta aëris ad nutritionem necessitas : ejus varii in mixto affectus. 145

C A P. VIII. *Sententia Columbi de vitalis sanguinis officinâ : rationes probantes : pulmonum constructio : de arteriâ & venâ pneumonicâ , hanc non esse arteriam neque illam venam : vena & arteria in factis duobus exortibus è cordis ventriculis prodeunt : segregationis causa : venarum auricula exortibus apposita , quæ illarum partes, non cordis.* 152

C A P. IX. *Ad loca nutrienda sanguinem debere moveri : quando & quomodo vita incipiat : bullula in auriculam migrat , cui in subsidium venit cor : hujus situs & compositionis ratio : quale instrumentum anima cor.* 160

C A P. X. *Conringii pro cordis hamatofi argumenta : eorum refutatio.* 156

C A P. XI. *Instantia supra datam responsionem è Cartelii methodo desumpta : quare venosus arterioso sanguis crassior : sanguificationis organum cor non esse , neque ipsi consummationem imponere probatur.* 178

SECTIONIS III.

C A P. I. *Anne cordi major insit quàm visceribus aliis calor : affirmantes veterum rationes impugnantur : Cartesii de calore sententia : hanc quam applausibilem faciant, cordis compositione Et rationibus renitentibus : auricularum motus cordis prior. Et posterior.* 184

C A P. II. *Quanam ex sententiâ, de sanguinis inflatione Cartesii, consequantur absurda.* 196

C A P. III. *De calore sanguinis : caloris definitio : elementorum qualitates in mixto manent : unus in omnibus calor solo gradu differens : quo modo calor è sanguine eliciatur.* 206

C A P. IV. *Quæ requirantur ut sanguis possit calefieri : sanguis unde mobilis : quomodo fiat nutritio : minutissimè sanguis divisibilis.* 212

C A P. V. *Quare moveri sanguis debeat : principium movens instrumentum cor : transcurrentis copia unde colligatur : cordi auxiliantur arteria : harum agendi vis proba-*

probat^{ur} : quid ad motum singula præstent
partes. 213

CAP. VI. Sanguinis motui destinata via :
quomodo ea disposita : quare venis non *ar-*
teriis valvula : quare ea cordi : quo usque
vasorum ductus extendantur : quid pro
corporis habitu capiendum : non necessaria
ad sanguinis motum manifesta anastomo-
ses : de iis Cartesii, item Harveji senten-
tia. 222

CAP. VII. Motu calorem excitari, proba-
tur, tam in non animatis, quam animali-
bus : de loco ubi is educatur : conclusio. 226

A P P E N D I X.

Anne Harvejus sentiat cordis ventriculos in
systole dilatarⁱ, ut sanguinem recipiant,
& in diastole constringi, ut eundem extru-
dant : tale è Cartesii suppositis sequi : cu-
jusnam potior de systole & diastole sit sen-
tentia. 231

INDEX RERUM

Hâc Dissertatione contentarum.

A.

- A** Bortus novem septimanarum. pag: 42
 Accretio. 25, 214
 Actio cordis fit contractione omnium
 fibrarum. 164, 232, 234
 Actio omnis ab anima. 216
 Actiones animæ tres. 20. à quâ parte læsâ læ-
 duntur, ab eâ sanâ eduntur. 176. corporis
 dispositi quando peragantur. 205. fiunt
 contractione. 194
 Aër sanguini commistus : merito dicitur pri-
 mum humidum. 146
 Aëris ad nutriendum necessitas. 150. effectus
 insignes. 151. usus. 67, 148, 149, 155
 Agens reactionem patientis debet ferre. 187
 Alimentum cum saliva oris quare misceatur.
 91. solo contactu non mutatur. 92. fami-
 liari humore debet dilui. 93
 Amnium. 40
 Anastomoses, manifestæ, non necessariae. 223
 Anima est tota in toto & singulis partibus. 17.
 est mere activa. 19, 29. non indiget me-
 dio, quo cum corpore unitur. 82. non pa-
 titur. 19, 20. quibus ad actiones edendas
 sola tribuitur, 72, 204. quid. 18
 Animæ actus nomen bene quadrat. 19
 Animalia vegetabilibus superiora. 30. geni-
 turam

Index Rerum.

- turam tempore coitus in uteri cavitate
non recipiunt. 37, 48
- Animatum quid. 20
- Animus & anima quomodo differant. 19
- Anthropologia quid. 17. ejus divisio. *ibid.*
- Aorta sanguinem per corpus distribuit. 217
- Aptitudo alendi sanguinem facit, non color,
88, 128
- Argumenta, quibus *van Horne* conatus de-
struere chylum ad pancreas ascendere, 109.
rejiciuntur insequ.
- Arteria aspera. 155. duplici tunicâ donata. 24.
pneumonica. 154. hujus usus. 217
- Arteriæ cordi auxiliantur. 217. eodem cum
auriculis tempore in diastole exsurgunt.
247. non habent valvulas. 190, 221. quare.
197, 221. spermaticæ 33. ubique eandem
habent actionem. 197. umbilicales. 47
- Arteriarum agendi vis. 217. probatur in sequ.
usus. 24
- Artis Medicæ difficultas. 6
- Artium inventorum merita, 5
- Auctio. 25
- Auctor spiritus non solus rejicit. 79
- Auricula quid. 22. unde primum producta. 45
- Auriculæ dum se contrahunt, sanguinem in
cor exprimunt. 191. quando moveantur.
233. venarum partes non cordis. 159
- Auricularum actio. 190. fibræ. 22. nume-
rus. 23. valvulæ. 190

Index Rerum.

B.

B *Artholimus* vasorum lymphaticorum inventor. 119

Bilis ab hepate non deponitur in folliculum.

130, 133. est sanguinis condimentum.

130. necessitas. 134, 136. non est excrementum. 103, 130. per cholydochum ductui pancreatico, & intestinis offertur. 135.

per porum biliarium defertur cum portione chymi ad hepar. 135. quomodo in folliculum veniat. 131, 133

Blateroni respondetur. 242

Bullula in animalis exordio in vesiculam abit cui in subsidium cor venit. 162, 195

C.

C Alor an faciat ad sanguinis fluiditatem.

147. cum spirituosâ substantiâ non confundendus. 70. excitatur motu. 208,

226. facit ad coctionem. 92. in omnibus

unus & idem. 210. non est contractionis

ebullitionis aut dilatationis causa. 204,

251. quid. 207. quod rarefacit, id condensatur à frigore. 199. quomodo è san-

guine eliciatur. 211. ubi educatur. 229

Caro cordis. 194, 216. genita à sanguine.

176. tantum calorem ferre nequit, ut humores in bullas eleuet. 186. vultus. 183

Cartesii de calore sententia rejicitur. 188. pro

Index Rerum.

- pro cordis hæmatosi assertum contradici-
tur. 178
- Cartesio* cor mechanice à nullâ facultate mo-
vetur. 142
- Causa quare in effectu, modo, & causa, motus
sanguinis dissentiant. 13
- Cerebri substantia. 16, 76
- Cerebrum rationis sedes. *ibid.* sentiendi mo-
vendique præcipuum organum. *ibid.* af-
fectiones objectorum externis sensoriis
receptas facillè percipit. 30. non facit spi-
ritus. 66. pulsationibus cordis respondet.
30, 76. quasi per totum corpus exten-
sum. 74
- Chorion. 40
- Chylus an ex mesenterii glandibus deferatur
ad hepar. 124. & *sequ.* in pancreas propul-
sus cum sanguine deferitur in venas. 101,
113. in intestinis fœtus repertus certum
est indicium, eum per os aliquid assumptis-
se. 87. nutritioni est ineptus. 100
- Chymosis quid. 114. quomodo fiat. *ibid.*
- Chymus quid. 115, 125
- Cibus si humore per ventriculi tunicas exu-
dante, non bene subigatur, vitium primæ
coctionis non corrigetur à secundâ. 94
- Coctio fit additione & detractio. 90
- Coctiones variant. 27
- Conceptus quid. 33. est ovum intus manens.
37. est ovum viviparum m. 38. quomodo
fiat.

Index Rerum.

- fiat 37, 38. ejus augmentatio. 86.
 Concoctrix. 27.
Conringii pro cordis hæmatosi argumenta.
166. & sequ. refutantur. 169. & sequ.
 Consummatio sanguini non est à corde. 181.
 Copia sanguinis cor transeuntis unde colligatur. 217.
 Cor an rex totius corporis 61. & sequ. 230.
 cæteris visceribus non magis calet. 177,
185. & sequ. 206, 230. distinctum ab auriculis habet motum. 197. dum se movet contrahitur. 240. è corpore & in frustula sectum, quare aliquandiu saltet. 203. fit mole minus. 193, 240. magnâ vi & impetu sanguinem in arterias propellit. 23. materiam ad corporis nutritionem suggerit. 23. nondum bene perscrutatum. 56. non est sanguinis perfectionis organum. 170. & sequ. 180. & sequ. 230. non gignit spiritus. 206, 230. per accidens calorem corpori communicat. 177. præcuius instrumentum sanguinem propellens. 216, 228. quale animæ instrumentum. 165. quando in diastole. 191, 196. quare in medio collocatum. 102. solum distribuendi commoditatem habet. 165. solummodo discutere videtur molestiam, quam patitur à distendente sanguine. 24. 173, 204, 216. unde dictum 60.
 Cor à dilatato sanguine *Cartesio* movetur. 242.

Index Rerum.

242. quod probat exemplo cuniculi. *ibid.*
sub conditionibus. 243. hoc rejicitur. 245.
& evincitur. 251. in diastole quiescens im-
pletur. 247, 252. pectus feriens contrahi-
tur, non impletur. 241, 243, 246, 251. &
tunc sanguinem per vulnus emittit. *ibid.*
248. vegetum à moriente, integrum ab
ultra medium dissecto differt. 245, 248.
hoc non elevatur. *ibid.*
- Cordis compositio. 162, 190. dignitates. 23,
50, 58, 60. contracti contingentia. 240,
241. probatur exemplo. *ibid.* diastole &
systole duplici modo considerantur. 246.
Regio à carnis crassitie æstimatur. 250.
quibus conditionibus hoc admittitur. *ibid.*
examen exactius tractandum. 15. motus
duo tempora. 241, 248. hæc in sano dif-
ficulter discernuntur. *ibid.* substantia &
usus. 23
- Corporis divisio. 17
- Corpus novo nutrimento refocillari debet. 74

D

- D**iaſtole arteriarum. 193. arteriarum &
cordis non fiunt ſimul. 194, 197, 221.
Diaſtole & ſyſtole quomodo dignoſcentur.
235. cordis non imputanda calori dilatan-
ti. 194. ſed ſanguini illabenti in cor. 233,
239. eſt diſtenſio. 235
Dia-

Index Rerum.

- Diastole est prior systole. 171
 Dignitas non convenit alicui parti; quia ante
 alias fabricata. 62
 Divisio facit ad caloris productionem. 214
 Ductus cholidochus apparuit in vivâ sectione
 lacte plenus. 107. cum pancreatico in be-
 stiis non conjungitur. 104
 Ductus chyliiferus à quibus & quomodo pri-
 mum inventus. 119. an merito dicatur
 chyliiferus, 125
 Ductus pancreatis. 98. admittit aquam in os
 commune cum cholidochosyringulâ in-
 jectam, hoc vacuo manente. 106. conjun-
 gitur in homine cum meatu biliario. 102.
 & seq. in cadavere reperitur vacuus. 100.
 in sectione vivâ lacte turgidus. *ibid.*

E.

- E**lementorum qualitates manent in mix-
 to. 209
 Entia non multiplicanda. 73. 81
 Experimentum quod probatur in arteriis non
 contineri spiritus. 68. quo probatur chy-
 lum ascendere ad pancreas. 108
 Extenuatio, 25, 213. ab obstructo liene. 97

F.

- F**acultas animæ quid. 20, 62. vitalis &
 naturalis. 21. animalis. 29. assimila-
 trix. 24. attractrix an detur. 25

M

Fa-

Index Rerum.

- Facultates aliis inservientes. 25. non influunt
in partem quampiam. 623
Facultatum diversitas unde. 203
Fœmina ad procreationem quid tribuat. 32
Fœtus eodem modo, quo pullus in ovo for-
matur. 36, 44. ejus generatio. 45. for-
matur à calore, seu animæ vi plastica. 44.
in principio nutritur sanguine serosiore.
172. maturus quis. 49. nutrimentum ha-
bet à matre. 44, 86. ob quas causas pro-
deat. 148. quare grandescens humores vi-
ciniores in ventriculum sugendo alliciat.
49, 87. quomodo nutriatur. 48, 87
Fibræ valvularum cordis impares. 192. earum
exortus. *ibid.* usus. *ibid.* 193
Folliculi fellis descriptio. 131
Folliculum à vicinâ neque remotâ parte bi-
lem potest recipere. 132

G.

- G**alenus non rejiciendus. 114
Gassendus porum biliarium vocavit
chylodochum. 125
Generatio. 32
Genitura. 33. maris unde. *ibid.* hæc uterum
non ingreditur, sed tanquam excremen-
tum secundum *Harvejum* elabitur. 34.
non ingreditur uteri cavitatem sed sub-
stantiam. 35, 37, 41
Genitura fœminæ an ad nutritionem fœtus
aliquid

Index Rerum.

- aliquid conferat. 35
Genituram in foeminis esse, vel quippiam ad
generationem facere, *Harvejus* negat. 34.
examinatur in sequ.
Gymnasia in quem finem extracta. 6

H.

- Hæmatosis* quid. 84. dupliciter conside-
ratur. *ibid.* quomodo fiat. 84, 85
Harveji in naturæ penetralia scrutando dili-
gentia. 31
Harvejus an sentiat cordis ventriculos in sy-
stole dilatari, ut sanguinem recipiant, &
in diastole constringi, ut eundem extru-
dant. 231. fuit curiosior in observando
Veterum placita. 57
Hepar rejicitur à quibusdam tanquam san-
guinis officina. 122. & sequ. 148
Hepatis venæ. 139. usus. 138. & sequ.
Homo rationalis. 29
Humor quo nervi abundant, immerito dici-
tur aqueus. 128. est sanguineus. *ibid.* quo-
modo ad cor redeat. *ibid.*
Humores quotquot sunt, faciunt ad sangui-
nis constitutionem. 17. in ovo. 39. in
ovo, quales in conceptibus viviparorum.
43. quotquot cristallini totidem venturæ
proles. *ibid.*
Humoris aquei usus in foetu. 40

Index Rerum.

L

- L** Cterus unde. 137
Incautè quidam judicant. 57
Infans quare meatu urinario & podice non perforatis statim moriatur. 149
Instrumenta genituræ generandæ dicata, sunt in fœminis inepta, neque omnibus insunt. 34. secundum *Harvejum*.
Intestina ea quæ à ventriculo accepere motu peristaltico promovent. 98

L.

- L** Actearum thoracicarum usus. 126
Liberi quomodo parentibus similes. 41
Libertas inquirendæ veritatis, magni apud *Galen.* habita. 8
Lien an à ventriculo aliquid accipiat. 95, 96.
in ventriculum nihil dimittit. 94, 95
Lienis usus. 97, 143

M.

- M** Acula in ovo pulli origo. 39
Magistris debemus quod in arte proficimus. 2
Magistri ut parentes habendi. 10
Mas ad procreationem quid tribuat. 32
Medicinæ inventores inter deos numerati. 5
Medicina rationalis & dogmatica, veris nititur fulcris. 11

Mem-

Index Rerum.

- Membranæ foetum involventes. 40, 41
- Mistio chyli & sanguinis in adenibus. 117
- Mobilitas sanguinis unde. 213.
- Motus animalium voluntarii dignitate superant motus astrorum. 30. quomodo fiant. 73. quomodo spirituum ope peragantur. 72. rejicitur. 73. sunt contractiones. 29
- Motus non semper in bonum rei motæ, sed partis moventis instituitur. 173
- Motus sanguinis circularis. 11. ambabus ulnis amplectendus. *ibid* ejus divulgatio. 12. hoc posito innumera veterum statuta evertuntur. *ibid*.
- Motus sanguinis tardè fieret si esset à rarefactione, seu ebullitione. 201.
- Motus sanguinis tremulus non pulsantibus auriculis, superest. 196
- Motuum & actionum in animantibus causa, secundum *Cartes*. 178, 183

N.

- N**atura consulit securitati corporis. 142. similibus usibus consimiles instituit partes. 36
- Natura circa alimentum ordo. 113
- Nervi humore copioso, à cerebro delabente imbuuntur. 73. & sequ. 128. quomodo nutriuntur. 23. & sequ. 128. per partes sensibiles disseminati. 76, 77. unde producti. 39, 76, 128.

Index Rerum.

Nervus obstructus vel læsus, actionem motus
& sensus impedit. 72, 78

Nutrimētum pro foetus cōstitutione va-
riat. 48

Nutritio quid. 25. quomodo fiat. 149, 213

O.

Opus magnum primo aggressu non per-
ficitur. 21

Ordo, quo cor emoritur. 195

P.

Pabulum in corporis substantiam com-
mutandum, aliam induit formam. 21
quid ad ejus mutationem requiratur. *ibid.*
tres patitur evidentiores formarum muta-
tiones. 22

Palpitationes ex obstructo liene. 175

Pancreas non nutritur chylō. 100

Pancreatis descriptio. 99

Paries cordis sinister, dextro crassior. 192

Pars admittit familiare, molestum deponit.

26. ad sui distentionem nihil attrahit *ibid.*

derepente opus magnum non perficit. 89

facultati appropriata. 51. nulla ab alterā

existentiam habet. 169. nulla aliter nisi

sanguine cor prius transgressio. 176. nulla

in alterius commodum propulsionem in-

tentat, ut alteri in auxilium veniat. 29.

quomodo actiones perficit. 72. una non

potest

Index Rerum:

- potest alimenti formas mutare. 21
- Partes debiliores quandoque præternaturale
aliquid accipiunt à fortioribus. 26. idque
fit duobus modis. *ibid.* novo nutrimento
debent refocillari ut actionibus adaptentur. 22. principes non conficiunt spiritus. 66. quid ad motum singulæ præstent. 212
- Particulæ corporis minimæ secundum omnes
dimensiones nutriuntur. 201
- Partium corporis divisio, earumque nutritio. 127
- Partus quando judicatur felix. 50. quis maximè naturalis. *ibid.* ut sit naturalis, diversa requiruntur. 49
- Pathemata animi nō sunt passionēs animæ. 19
- Patiens tandem interit. 19
- Pepalsmus. 27
- Pepsis. *ibid.* amborum differentia. 28
- Pisces quanquam frigidi, rapaces admodum. 92, 93. sine aëre nequeunt vivere. 151
- Placenta exclusa circa prægnationis mensem tertium. 46. unde dicta. *ibid.*
- Placentæ generatio. 45. obtusiori parti conceptus adhærere solet. 43
- Potus eodem quo cibus succo debet dilui. 94
- Præmia quare distributa. 5
- Principia sanguinis ductuum cum venis incipiunt, cum arteriis terminantur. 222
- Procreatrix. 31. intellectu difficilis. *ibid.* ejus diversæ.

Index Rerum.

diversæ partes.	32
Propulsio sanguinis in & ex corde, quomodo fiat.	191
Propultrix.	28
Psychologia quid.	18
Pulmo in fœtu nullius usus.	157, 172
Pulmonum constructio.	154

R.

R ationes Veterum affirmantes cordi majorem quàm cæteris visceribus inesse calorem, refutantur.	185. & sequ.
Receptaculi chyli descriptio.	121. usus. 122
Regii candor & generositas.	249
Regius à parietum crassitie diastolen existimat.	231, 250. quomodo hoc conceditur. 250
Res naturales operantur per instrumenta essentialia, & essentialiter intrinseca.	82
Retentio partibus necessaria.	26
Rubedo non facit sanguinem,	88

S.

S anguificatio in fœtu quomodo inchoatur.	86. non fit ab unâ parte. 89, 180. non fit in corde. 169. & sequ. 180, 206, 230
Sanguinis definitio.	84. principium. 170. mobilitas unde. 146, 212. in jecore uterino præparatio. 116. perfectio in pulmone.

Index Rerum.

- mone. 148, 171, 180. idque non fit propriâ intentione, sed agentis animæ. 173
- Sanguis ab hepate non movetur in partes per venas, neque à partibus in nutritionem attrahitur. 10. ad partes nutriendas debet moveri. 160. antequam in corporis substantiam mutatur, varias subit mutationes. 88. arteriosus venoso tenuior. 179. ex corde pulsus eadem via redire nequit. 23. fœtui qualis inservit. 147. in corde non alteratur. 66, 181, 183, 206. in partem influxus eam non omnis nutrit. 24. non elabitur cordis ventriculis alius quàm illos fuit ingressus. 180, 183. ut sit nutritius duo necessaria. 146. sine aëre non potest nutrire. 142
- Sanguis cor non ingreditur guttatim. 202. corporis poros permeat. 201. è cordis vulnere in systole egrediens, quare saliat. 249. quomodo in diastole exeat. *ibid.* mobilitatem in pulmonibus adipiscitur. 214, 223. quare moveri debeat. 215. quibusdam non rubet. 88. serosior membra facit mollia; aëreus robustiora. 147. ut possit calefieri quæ requirantur. 212. minutissime divisibilis. *ibid.*
- Secundinæ non sunt partes uteri. 47
- Semen *Aristoreli.* 32. & genitura quomodo differant. 33. an ad generationem faciat. 35. an fœtum alat. *ibid.*
- Scu.

Sensus quomodo fiat. 76, 77. quomodo spirituum ope fiat. 72. rejicitur. *ibid.* unde læditur. 73

Sententia D. *Arnoldi de Reeck* de spiritibus. 80. *Et sequ.* *Cartesii* de anastomosibus. 223. de motu cordis examinatur. 235. *Columbi* de vitalis sanguinis officina. 152. *Harveji* de anastomosibus. 224. *Regii* de motu cordis. 238. quando de systole admittenda. 239. *Et sequ.*

Sententiæ alicui sine rationibus decentibus non adscribendum. 8, 56. cui fidendum. 55

Spiritus activum motum inducere nequiunt. 16. si dantur contentorum nomine merentur *ibid.* divisio. 65, 71. insitus & influens, actiones nullas edunt. 71, 72. non bene dicitur impetum faciens. 15. non datur. 65. *Et sequ.* 78, 81. *Et sequ.* non est vinculum corporis cum anima, neque instrumentum. 71, 72, 82. non requiritur, ut per eum facultates in corpus fluant. 83. quid. 64, 80

Substantiâ aëreâ à sanguine separatâ, non potest sanguis sic dici. 69. corporis triplex. 67. si separatur, destruitur partis natura. *ibid.* pertinet ad sanguinis & partium constitutionem. 70, 73. spirituosâ non est spiritus. 78

Succus lactus non tendit omnis ad receptaculum. 143

T.

- T** Actus arguit cordi majorem aliis visceribus non inesse calorem. 185
 Tumor lienis unde. 97
 Tunica ventriculi interior, non potest pati ut aliquid per eam transeat in vasa gastrica. 96

V.

- V** Alvularum cordis situs & numerus. 163, 190, 191
 Vapores opplent internas cavitates, 80. unde excitantur. *ibid.*
 Vasa lymphatica à quo inventa. 120. pro lacteis habita. 123. usus. *ibid.*
 Vasorum interiorum uteri maxima pars sunt venæ, exteriorum arteriæ. 48
 Vena & arteria in fœtu duobus exortibus è corde prodeunt. 157. ejus causa. *ib.* & seq.
 Venæ & arteriæ causa sanguinis factæ. 169
 Venæ cordis appositæ sibi habent auriculas. 159. ligatæ versus truncum detumescunt. 96. majores constant tunicis crassioribus. 110, quare valvulis dotata. 221. lacteæ quare dictæ. 110, 125. harum usus. 98
 Venarum gastricarum insertio. 96
 Vena umbilicalis. 48. pneumonica. 156
 Ventriculi cordis in quiete sanguinem recipiunt. 23. robore imparcs. 163, 192. eorum usus. 183
 Ven-

Index Rerum.

- Sensus quomodo fiat. 76, 77. quomodo spirituum ope fiat. 72. rejicitur. *ibid.* unde læditur. 73
- Sententia D. *Arnoldi de Reeck* de spiritibus. 80. *& sequ.* *Cartesii* de anastomosis. 223. de motu cordis examinatur. 235. *Columbi* de vitalis sanguinis officina. 152. *Harveji* de anastomosis. 224. *Regii* de motu cordis. 238. quando de systole admittenda. 239. *& sequ.*
- Sententiæ alicui sine rationibus decentibus non adscribendum. 8, 56. cui fidendum. 55
- Spiritus activum motum inducere nequunt. 16. si dantur contentorum nomine merentur *ibid.* divisio. 65, 71. insitus & influens, actiones nullas edunt. 71, 72. non bene dicitur impetum faciens. 15. non datur. 65. *& sequ.* 78, 81. *& sequ.* non est vinculum corporis cum anima, neque instrumentum. 71, 72, 82. non requiritur, ut per eum facultates in corpus fluant. 83. quid. 64, 80
- Substantiâ aëreâ à sanguine separatâ, non potest sanguis sic dici 69. corporis triplex. 67. si separatur, destruitur partis natura. *ibid.* pertinet ad sanguinis & partium constitutionem. 70, 73. spirituosâ non est spiritus. 78
- Succus lactus non tendit omnis ad receptaculum. 143
- Tactus

T.

- T** Actus arguit cordi majorem aliis visceribus non inesse calorem. 185
 Tumor lienis unde. 97
 Tunica ventriculi interior, non potest pati ut aliquid per eam transeat in vasa gastrica. 96

V.

- V** Alvularum cordis situs & numerus. 163, 190, 191
 Vapores opplent internas cavitates, 80. unde excitantur. *ibid.*
 Vasa lymphatica à quo inventa. 120. pro lacteis habita. 123. usus. *ibid.*
 Vasorum interiorum uteri maxima pars sunt venæ, exteriorum arteriæ. 48
 Vena & arteria in foetu duobus exortibus è corde prodeunt. 157. ejus causa. *ib.* & seq.
 Venæ & arteriæ causa sanguinis factæ. 169
 Venæ cordis appositæ sibi habent auriculas. 159. ligatæ versus truncum detumescunt. 96. majores constant tunicis crassioribus. 110, quare valvulis dotatæ. 221. lacteæ quare dictæ. 110, 125. harum usus. 98
 Venarum gastricarum insertio. 96
 Vena umbilicalis. 48. pneumonica. 156
 Ventriculi cordis in quiete sanguinem recipiunt. 23. robore impares. 163, 192. eorum usus. 183
 Ven-

Index Rerum.

Ventriculus quò magis à cibis extenditur, cò rarior est ejus tunica interior huius. orque ab ea copiosius fluit.	91
Via ad corporis venas ab intestinis tendit per portam & hepar.	201
Viæ sanguinis motui destinata. 220. quomo- do disposita.	<i>ibid.</i>
Visus quomodo fiat.	76
Vita quando & quomodo incipiat.	161
Umbilicus.	47
Unumquodque à naturâ comparatum, ut à noxio abhorreat, illudque contractione re- moveat.	29
Urachus.	47
Urina in largâ portione quare intincta.	137
Uterus admittit aliquid secundum substan- tiam. 35, 37. debet maris genitura fœcun- dari. 36. quomodo elapso mense post coi- tum concipit.	37, 38

F I N I S.

423.902

423902

d. 2-

